









GAR. 30




John Carter Brown
Library
Brown University







AMSTELODAMI, ϕ 1418
Apud Ludovicum Elzevirium. 1650.



Ad Nobilissimos, Amplissimos, Spectatissimos, & Prudentissimos VIROS

D. CORNELIUM BICKER
à SVVIETEN, Dominum in SVvieten.

D. NICOLAUM KORVER.

D. ANTONIUM OETGENS
à VVAVEREN, Equitem, Dominum
in VVaveren, Boxthol, Ruygevvil-
nis, &c. Foederatarum Belgii Pro-
vinciarum nomine antehac ad Da-
niæ Regem Legatum.

*Consules
Reipubl.
Amstelodam.
Sapientissimos.*

D. FR. BENNINGIUM KOCK,
Equitem, Dominum de Purmerland
& Ilpendam, Militiæ Urbicæ Tri-
bunum.

D. GERHARDUM SCHAEF.

J. U. D. Foederatarum Belgii Pro-
vinciarum Senatui Delegatum &
ad Potentissimum Daniæ Regem
Exlegatum.

*Consula-
res Reip
Amstel.
& Gymn.
Curato-
res: huc et
etiam Aca-
demiæ
Lugd.
Batav.*

D. VVILHELMUM BACKER
de CORNELIIS, Equitem S. Marci,
in Confessu Deputatorum D.D. Or-
dinum Hollandiæ Delegatum.

D. PETRUM HASSELAER.

D. CORNELIUM GRAEF,
Dominum in Polsbroeck, Curato-
rem Gymnasii Amstelodamensis.

*Consula-
res &
Thesauri-
arios Reip.
Amstel.
fidelissim.*

E P I S T O L A

NOBILISSIMI, AMPLISSIMI,
SPECTATISSIMI, ET PRU-
DENTISSIMI CONSVLES,



Ota hæc rerum Universitas, quam Mundum appellare consuevimus, à longo jam tempore communi quasi hominum consensu divisa fuit in Tellurem & Cœlum. Quæ partitio etiam minus regulis Logicis & ipsi naturæ conveniens videatur, partim quod essentialem Telluris à cœlo differentiam supponit, partim quod exiguam Tellurem toti cœlo, hoc est centrum orbi comparat, tamen ab omnibus ferè jam recepta, & tanquam legitima approbata fuit, idque varias ob causas. Plerique ideo Mundum ita dividendum censent, quod tellus sit diversæ admodum à cœlestibus corporibus naturæ: illam enim variis mutationibus & corruptionibus obnoxiam esse: hæc verò incorruptibilia sine omni jactura persistere autumant. Deinde ajunt, Tellurem adeo parvam esse si comparetur ad Cœlum, ut sit instar puncti vel centri: centrum autem diversam valde naturam habere ab ipso orbe,

ac

DEDICATORIA.

ac proinde rectè Tellurem & Cœlum opponi, tanquam diversâ & contraria. Cæterum hæ rationes non sunt veritati consentaneæ. Etenim neque excepta sunt à mutationibus & corruptionibus cælestia corpora, ut demonstrarunt hujus & præcedentis seculi Mathematicorum observationes: neque Tellurem centrum cœli occupare firmis ostensum est hætenus argumentis. Quod si ob parvitatem opponenda esset cœlo, multò rectius Luna & quædam aliæ stellæ, quæ minores sunt Tellure, eidem opponerentur. Cum itaque hæ rationes falsitatibus laborent, aliæ afferendæ sunt, propter quas totius hujus Vniversi unam partem Cœlum, alteram esse Tellurem dixerint Majores nostri. Illæ videntur esse hæ. Prima, quoniam Tellus est generis humani domicilium, ideoque à nobis non minoris æstimanda est, quam totum cœlum. Altera, quia non tantum Tellus est domicilium nostrum, sed etiam ab illa prima nostra origo est, illa nobis præbet & conservationis & propagationis adminicula. Tertia, quoniam è Tellure nostra cœlestium corporum motus contemplamur. Quarta, quia in Tellurem cœlestia corpora vires suas exerere videntur. Quinta,

E P I S T O L A

quoniam Telluris constitutio magis nobis cognita est, quam cœlestium corporum. Verum, utcunque se istæ rationes habeant, id certè ab omnibus prudentibus conceditur, quod cognitio Telluris sit non tantum homine dignissima, sed etiam tam in Republica literaria, quam ad vitæ usum pernecessaria. Non jam dicam de usu quem præstat Historiarum studio, cujus lampades non immeritò statuuntur Chronologia & Geographia: non de usu, quem præstat Theologiæ, Physicæ, Politicæ, & aliis disciplinis: illas modo utilitates & commoditates consideremus, quibus mercaturam & rem nauticam, quæ duo Vestræ Reipubl. ærarium, hoc est nervum rerum gerendarum constituunt, adjuvari à Geographia docet & testatur quotidiana in hac urbe experientia. Annon ad mercaturam feliciter & cum fructu, addo etiam jucundè, exercendam plurimum facit, scire regionum, ad quas merces mittendæ, vel è quibus ad hunc vel alia loca deferendæ sunt, situm, distantiam, interjecta maria, iter, vicina loca insensos vel amicos incolas habentia & alia, quæ quidem è Mappis Geographicis non sine honestâ animi voluptate hauriuntur? Nautæ verò amplissimum imò divinum

DEDICATORIA.

num Geographiæ usum agnoscunt , quando remota maria & furentem Oceanum fulcare suscipiunt freti Mapparum Geographicarum & aliarum regularum, quas ad directionem navis Geographia illis largita est , certitudine. Quæ etsi hodie in hac vestra civitate non tam à Mathematicis, quam ab artificibus lucri causa & nautarum informatoribus , imò ab ipsis nautis fiant & doceantur , nemo tamen ideo existimare debet , ab illis , non à Mathematicis profecta hæc esse. Etenim inventio illarum rerum & demonstratio , unde certitudo dependet , multò difficilior fuit & majoris est operæ , quam usurpatio : hanc Mathematici ita facilem reddidere , ut etiam illi , qui Mathematici non essent , capere possent : illam vero , demonstrationem dico , quoniam ex ipsis Mathesis penetrabilibus , nempe Theoretica Geometria , maxima ex parte petitur , soli Mathematici asservant , quandoquidem majorem postulat ingenii fatigationem , quàm homines , qui lucro tantum intenti solam usurpationis & utilitatis cognitionem quaerunt , sustinere velint vel possint. Neque hoc tantum in Geographia locum habet, sed etiam in plerisque aliis Scientiis Mathematicis

E P I S T O L A

maticis idem perspicuè licet videre, inprimis in Arithemetica. Quid ejus usu & exercitio hodie vulgarius, præsertim in hac vestra civitate? quid facilius? quis è mercatoribus, imò mercatorum pueris, non novit promptissime calculum juxta regulas Arithmeticæ instituere, imò etiam alios artem hanc docere? At verò, antequam regulæ, juxta quas praxis instituitur, à Mathematicis essent è penetralibus Arithmeticæ erutæ & demonstratæ, & methodus expedita exercitii monstrata, planè tunc nemo erat qui ista facere posset. Neque si ab illis, qui promptissimi sunt in usu, quæras, cur hoc vel isto modo ad supputationem agendum sit, quicquam rationis vel fundamenti nancisceris, quoniam demonstrationes à Mathematicis tantum & fiunt & aservantur: neque si nova quædam regula pro novo usu invenienda sit, ad alios, quam Mathematicos recurritur. Et eodem modo cum Perspectiva, statica Mechanica. Musica, Arte muniendi, Geodæsia & aliis scientiis comparatum esse perquam facile est ostendere: ut inde manifestum sit, quanta beneficia à Mathesi in vitæ humanæ usum, inprimis vestram civitatem, profecta sint. Sed ut ad Geographiam redeam, etsi hæc

tan-

DEDICATORIA.

tantum de Tellure agat, quæ instar puncti est si cum Cælo conferatur, tamen non minus peculiarem partem Mathesis constituit, quam Astronomia, idque propter causas supra allatas. Duplex autem est Geographia: una Generalis, altera Specialis. Illa considerat Tellurem in genere, varias ejus partes & generales affectiones explicans: hæc autem, specialis scilicet, observans regulas generales recenset singularum regionum situm, divisionem, terminos & alia cognitu digna. Cæterum qui hætenus Geographiam scripserunt, illi de sola fere speciali prolixè egerunt, pauca verò ad Generalem pertinentia explicarunt, plurimis iisque necessariis neglectis & omissis, ita ut juvenes specialem addiscentes fundamenta hujus disciplinæ maxima ex parte ignorarent, & ipsa Geographia vix Scientiæ titulum tueretur. Quod cum animadverterem, ut malo huic remedium facerem, cæpi cogitationes meas ad supplendum hunc defectum hoc est, ad scribendam Generalem Geographiam convertere, neque à suscepto labore cessavi, donec opus absolutum esset, ut nimirum pro mearum virium modulo quem ex diligenti Mathematicarum disciplinarum per multos an-

E P I S T O L A

nos cultura Deus mihi concessit, Reipubl. literariæ atque juventutis studiis inservirem, vel saltem voluntatem inserviendi probarem. Hunc meum laborem cur vobis, VIRI MAGNIFICI, inscripserim & consecraverim, plurimis inductus sum rationibus. Prima, quoniam toto terrarum orbe nulla est civitas, quæ magis quàm hæc Vestra Geographiæ cognitione & indigeat & utatur propter admirandas in omnes terræ angulos navigationes. Secunda, quia Vestræ Reipubl. navigationibus non parum crevit Geographiæ studium, multa dubia & incertitudines sublata sunt. Tertia, quoniam Vos cognovi esse omnis Eruditionis Fautores & Promotores, ideo nullus dubito, quin Geographicum quoque studium maximi æstimetis. Quarta, eaque præcipua causa est, quod hoc meum opus in Vestra urbe & confectum & in lucem editum fuit. Non itaque sub alterius Patroni favore, quam Vestro, in lucem prodire debuit. Etenim cum Patria mea variis prius belli injuriis afflictæ tandem in favillas & cineres tota redacta esset, bono quodam fato vel potius Dei Opt. Max. providentia in Vestram civitatem me contuli, ubi commodam nactus sum scribendi

DEDICATORIA.

bendi occasionem de iis rebus , quas in alio loco agens vix potuiffem absolvere , quandoquidem non pauca ab aliis Scriptoribus vel omiffa vel perperam tradita de Terræ & Oceani partium conditione , fitu , ventis , & populorum moribus exquirenda fuerunt à nautis vel aliis , qui in regionibus istis commorati fuerant. Multa in hoc libro loca id testantur : idem manifestum est ex commentariis , quos præcedenti anno de Iaponiæ regno , religione , ut & diversa gentium religione edidi : & magis id perspicuum evadet , si favore Vestro & liberalitate studia mea juvabitis , ut perficere liceat , quæ inter alias meas meditationes de naturalibus observationibus in variis Telluris partibus , quæ de cibo & potu diversorum populorum , quæ de cibi & potus essentia & materia , item de diversa diversarum gentium medicina , & quæ de medicamentis paratu facilibus atque aliis rebus commentari incepti. Laus vestra est, PROCE-
RES , quod industrios & labore suo Reipublicæ inservire cupientes atque hoc ipso opere demonstrantes libenter foveatis , alatis & promovere studeatis : date & mihi cujus conatus adversa fortuna Marte & Vulcanò impedire satagit , ut vestram liberali-

EPISTOL. DEDICAT.

tatem laudare , Vobisque eorum , quæ pu-
blico bono edere studeo , promotionem
ascribere possim, quo tota Respubl. litera-
ria intelligat , quantum Vestræ Prudentiæ
debeatur. Quod si feceritis , operam dabo
ut intelligatis , non in hominem ignavum
& Vestra liberalitate atque favore abuten-
tem beneficium Vos contulisse. Deus Vos,
vestramque Rempubl. diu incolumem ser-
vet. Valete. Ex meo musæo Calendis Au-
gusti, Anno cId Id cL.

Vr. Magfæ. Ampliæ. & Prudæ.

Observantissimus

BERNHARDUS VARENIUS,
Med. D.

CON-

C O N T E N T A

SINGULORUM CAPITUM, ET PROPOSITIONUM INDEX.

C A P U T I.

De præcognitis Geographiæ.

Pag. I.

PROPOS. I. *Definitio.*

2. *Divisio.*
3. *Objectum.*
4. *Affectiones.*
5. *Principia.*
6. *Ordo.*
7. *Methodus.*
8. *Origo & incrementum Geographiæ.*
9. *Præstantia Geographiæ.*

C A P U T II.

De Geometricis præcognitis.

P. 9.

1. *Tres sunt magnitudinum species.*
2. 3. 4. 5. *Definitiones lineæ rectæ, circuli, diametri, arcus.*
6. *Super datam rectam erigere perpendicularem.*
7. *Circulum & peripheriam in quatuor quadrantes secare.*
8. *Peripheriam in gradus 360 dividere.*
9. *Quadranguli rectanguli capacitatem invenire.*
10. *Datâ circuli semidiametro invenire peripheriam.*
11. *Datâ peripheriâ invenire diametrum.*
12. *Datâ globi alicujus diametro invenire ejus superficiem curvam, & soliditatem sive capacitatem globi.*
13. *Definitiones Trianguli rectanguli, sinus, tangentis*

- INDEX CAPITUM
gentis & Canonis Mathematici.
14. Duo necessaria theoremata.
 15. Quatuor necessaria problemata.
 16. Variarum mensurarum explicatio.

CAPUT III.

De Telluris Figura. P. 19.

1. Varia hominum opiniones de Figura Telluris.
2. Figura est prima affectionum Telluris; ex qua omnes reliqua dependent.
3. Rationes, quibus sphaerica figura probatur, à priori.
4. Rationes à calo desumptae.
5. Rationes à terra ipsa desumptae.
6. Refutatio Objectionum.

CAPUT IV.

De Telluris dimensione & Magnitud. P. 30.

1. Telluris dimensio tria complectitur; lineas, superficiem & solidum.
2. De diversis autoribus, qui illam dimensionem tentarunt.
3. Modus primus vulgaris.
4. Modus secundus, Eratosthenis.
5. Modus tertius Posidonii.
6. Modus quartus Snellii.
7. Modus quintus, primus terrestris.
8. Modus sextus, secundus terrestris.
9. Modus septimus, tertius terrestris.
10. Determinatio circuitus Telluris, diametri, superficie, capacitatis Telluris in milliaribus & perticis linearibus, quadratis & Cubicis.
11. Defectus & vitia in enumeratis antea dimensionum modis.

12. De

ET PROPOSITIONUM.

12 De magnitudine minorum peripheriarum Telluris.

CAPUT V.

De Motu Telluris.

P. 48.

1. Motus Telluris est causa caelestium apparentiarum juxta Copernicanos.
2. Motus duplex præter tertium, qui inclinatio potius est axis.
3. Rationes, quibus motus illi probantur.
4. Responsio ad Objectiones.
5. Celeritas motus istius in diversis Telluris locis.

CAPUT VI.

De loco Telluris in Mundi Systemate. P. 57

1. Communis opinio Tellurem in centro collocat totius Mundi.
2. Situs Telluris & ordo Planetarum.
3. Locus Telluris Copernicanus.
4. Distantia Telluris à Planetis.
5. Distantia Telluris à stellis fixis.

CAPUT VII.

De Telluris Substantia & constitut. P. 62.

1. Ex quibus corporibus Tellus composita sit, exponere.
2. Tellus dividitur in partem consistentem, liquidam, & Atmosphæram, sive in Terram, liquidam seu aquas, & Aërem.
3. Quomodo terra & aqua cohæreant & unum globum faciant.
4. Terrarum superficies continua est, aquarum non continua.
5. Quomodo Telluris partes à superficie ad centrum

INDEX CAPITUM

trum se habeant, non est omnino certum.

6. *Consistentia terra & cohaerentia est à sale.*
7. *Terrarum species variis modis commixtae sunt in Tellure.*
8. *Partium Telluris situs & dispositio diversa est diversis temporibus.*

CAPUT VIII.

De Divisione partium terræ in partes integrantes, facta à mari. P. 70.

1. *Terra quadam portio tegitur aquis, alia extat.*
2. *Terra extantes sejuncta sunt à se invicem per interfluentem aquam.*
3. *Magna continentes sunt quatuor, earum enumeratio.*
4. *Insularum magnarum decem enumeratio.*
5. *Insularum mediocrium decem enumeratio.*
6. *Insularum parvarum decem enumeratio.*
7. *Minimarum insularum enumeratio.*
8. *De penisulis, & Isthmis, atque terris procurrentibus.*
9. *Peninsularum quatuordecim enumeratio.*
10. *Isthmorum insigniorum enumeratio.*

CAPUT IX.

De Montibus in genere, & dimensione altitudinis. P. 83.

1. *Partes terræ diverse sunt altitudinis.*
2. *Montis alicujus altitudinem per geodæsiam investigare.*
3. *Data altitudine montis investigare ejus à certo loco distantiam.*
4. *Data distantia, à qua primò conspicitur vertex montis, invenire ejus altitudinem.*

5. Co-

ET PROPOSITIONUM.

5. Cognitâ altitudine montis invenire remotissimam distantiam, è qua videri potest.
6. Datâ Solis ad tempus aliquod altitudine supra Horizontem, & longitudine umbrae, quam mons à Sole illustratus tunc spargit, invenire montis altitudinem.
7. Montium altitudo ad semidiametrum Telluris non habet sensilem proportionem sive non tollit rotunditatem Telluris.
8. Quomodo montes extiterint, explicare.
9. Cur in montium fastigiis pluvia & aquea meteoræ frequentia, cum in vallibus serenitas est.
10. An montis superficies sit capacior, quam subiectum planum, sive pes montis.

CAPUT X.

De Montium differentiis, &c. P. 96.

1. Quidam montes parvo circuitu sunt, alii longo tractu se extendunt.
2. Enumeratio celebriorum jugorum.
3. In plerisque insulis & procurrentibus terris iuga montium medias pervadunt regiones.
4. Montes insignis altitudinis enumerare.
5. Montium differentias exponere.
6. Montes ardentes & ignivomos enumerare.
7. Iuga quædam portas habent.
8. Promontoria celebriora enumerare.
9. Montibus opponuntur barathra & specus.

CAPUT XI.

De Fodinis, Sylvis & Desertis. P. 112.

1. Fodinarum differentia & celebriorum enumeratio.
2. Sylvarum differentia & enumeratio quarundam.

INDEX CAPITUM

3. *Desertorium differentia & enumeratio.*

CAPUT XII.

De Oceani partitione per terras. P. 118.

1. *Oceanus continuo tractu Terram ambit.*
2. *Oceani partium tres species sunt, Maria, Sinus, & Freta.*
3. *Oceani partes quatuor.*
4. *Partium Oceani denominationes, siue appellationes.*
5. *Sinuum celebriorum enumeratio, & differentia.*
6. *Fretorum differentia & enumeratio.*
7. *Periplus ora maritima & conjunctio partium Oceani.*

CAPUT XIII.

De quibusdam Oceani proprietatibus.

P. 132.

1. *Oceani superficies est spherica.*
2. *Oceanus non est altior, quam terra.*
3. *Cur mare conspectum è litore videtur in majorem altitudinem assurgere.*
4. *Causam atque ortum sinuum & fretorum Oceani explicare.*
5. *An Oceanus ubique ejusdem sit altitudinis.*
6. *Profunditas Oceani in plerisque locis explorari potest, in quibusdam locis nondum explorata est.*
7. *Oceanus nullos habet fontes proprie loquendo.*
8. *Oceani aquarum salsedo est à particulis salis.*
9. *An aqua dulcior, quo fundo propior.*
10. *Aqua Oceani magis salsa, quo magis vicina est Equatori: & de causis inaequalis salsedinis.*
11. *Cur pluvialis aqua in Oceano dulcis.*

12. *Aqua*

ET PROPOSITIONUM.

12. *Aqua marina & inter se invicem & dulcibus aquis sunt graviores.*
13. *Aqua marina non ita facile gelaſcit ac fluviorum aqua.*
14. *Cur Oceanus non fiat major, cum tot fluvios recipiat?*
15. *Oceani partes discrepant coloribus.*
16. *In quibusdam Oceani partibus quadam peculiaria reperiuntur.*
17. *Cur mare noctu ſplendere & lucere videtur, præſertim ſi fluctus ſint vehementiores.*
18. *Oceanus eſcit corpora terreſtria & conſiſtentia ad littus.*

CAPUT XIV.

De Motibus Oceani & in ſpecie de fluxu & refluxu.

P. 174.

1. *Aqua unum tantum habet naturalem motum.*
2. *Cum pars Oceani movetur, totus Oceanus movetur.*
3. *Obſervare plagam, in quam mare movetur.*
4. *Motus maris vel eſt directus vel vortex vel conſuſſio & tremor.*
5. *Motuum maris quidam eſt generalis, quidam ſunt proprii, reliqui contingentes.*
6. *Contingentium motuum maris cauſa eſt ventus.*
7. *Generalis Oceani motus duplex eſt, unus continuus, alter fluxus & refluxus.*
8. *Venti ſæpe immutant motum generalem Oceani.*
9. *Cauſa generalis motus incerta eſt.*
10. *Qualis ſit motus, qui dicitur fluxus & refluxus.*
11. *De cauſa fluxus & refluxus.*
12. *Cum in plenilunio & novilunio motus maris generalis eſt magis vehemens, quam alio tempore,*

INDEX CAPITUM

pore, sicut etiam intumescencia major tunc sentitur.

13. Cur diebus æquinoctiorum motus generalis & maris intumescencia major.
14. In quibusdam littoribus magnus est affluxus & refluxus, in aliis vix sensilis.
15. Affluxus maris est violentus, refluxus naturalis.
16. In locis, ubi Luna est verticalis, affluxus est maximus.
17. Quantitas affluxus non est constans.
18. Tempus termini affluxus incipientis & desinentis variat in diversis locis.
19. Mare ad pleraque littora sex horis affluit, sex refluit, in quibusdam tamen paucioribus affluit, quam refluit, & contra.
20. An Lunâ Horizontem attingente incipiat affluxus.
21. Datâ horâ, in qua altitudo summa est fluxus die novilunii in aliquo loco, invenire horam summa altitudinis pro sequentibus diebus.
22. Venti protrahunt & imminuunt terminum affluxus vel refluxus.
23. Specialium motuum maris magna est diversitas. Primus perpetuus.
24. Secundus specialis perpetuus.
25. Tertius specialis perpetuus.
26. Quartus specialis perpetuus.
27. Quintus specialis perpetuus.
28. Sextus specialis perpetuus.
29. Septimus specialis perpetuus.
30. Specialium motuum periodicorum enumeratio.
31. Vortices maris duplices sunt.
32. Causa Tremoris maris & exempla.
33. Cur mare Pacificum calo sereno magis tranquillum

ET PROPOSITIONUM.

quillum est & sine fluctibus, ventis autem levibus facillime movetur.

CAPUT XV.

De Lacubus, Stagnis & Paludibus. P. 216.

1. Definitiones lacus, stagni & paludis.
2. Lacus sunt quadruplices.
3. Eorum lacuum, qui neque emittunt neque recipiunt fluvios, generationem exponere & enumerare.
4. Eorum, qui emittunt sed nullos recipiunt fluvios, generationem exponere.
5. Eorum, qui recipiunt, sed nullos emittunt fluvios, generationem explicare.
6. Eorum, qui & recipiunt & emittunt fluvios, generationem explicare.
7. Lacus plurimi dulcem, pauci salsam aquam habent.
8. Vtrum mare Caspium sit lacus an sinus Oceani.
9. Vtrum Pontus Euxinus sit lacus an sinus Oceani.
10. Lacuum enumeratio, qui insulas habent in medio.
11. In dato loco lacum efficere, si fieri possit.
12. Lacum exsiccare.
13. Paludes duplices sunt.
14. Paludes habent terram sulphuream.
15. Paludes exsiccare.

CAPUT XVI.

De Fluviis in genere. P. 230.

1. Definitiones fluvii, rivi, Confluentis, &c.
2. Torrentes & rivi existunt interdum à copiosa pluvia & resoluta nive.
3. Plerique rivi oriuntur è fontibus, fluvii ex
con-

INDEX CAPITUM

congressu rivorum.

4. Fluvii augentur à pluvia & resolutione nivis. diversis anni temporibus.
5. De causis fontium, sive unde aqua fontana oriatur.
6. Fluvii quidam sub terram se condunt & rursus emergunt.
7. Fluvii exonerant se in mare vel lacum. Rivi pauci stagnant.
8. Vtrum à natura an hominum industria sint facti fluviorum alvei, & itinera.
9. Alvei, quo fontibus sunt propiores, eo sunt depressi magis. De Cataractis.
10. Cur fluvii in una sui parte sunt latiores quam in alia.
11. Fluviorum alvei magis vel minus depressi sunt modo in una, modo in alia parte.
12. Cur fluvii quidam tardi, quidam celeres: Et idem fluvius celerior in uno quam in alio loco decurrit.
13. Fluvii pauci directo, plerique flexuoso itinere feruntur ad ostia sua.
14. De lacubus, per quos quidam fluvii transcunt.
15. Fluvii plerique quo ostiis sunt propiores, eo latiores evadunt.
16. Aqua fluviorum multas particulas variorum metallorum, mineralium, sabuli, succorum oleosorum & aliorum continent, spiritus quoque subtiles vitrioli, salis, sulphuris, &c. Auriferorum rivorum enumeratio.
17. Plurimorum fluviorum aqua discrepant coloribus, gravitate, aliisque qualitatibus.
18. Quidam fluvii adeo augentur stato tempore,

ET PROPOSITIONUM.

ut exundent in vicinas terras. Enumeratio eorum fluviorum, & causa.

19. Quomodo fontes prorumpant.
20. Dato loco in terra, inquirere an possit in illo fons seu puteus fieri.
21. Dato loco in terra, efficere in illo fontem, si fieri possit.
22. Dato loco, apparentem in illo fontem efficere, si fieri possit.
23. A dato fonte vel fluvio ad datum locum deducere fluvium. De libramento aquæ.
24. Fluviorum longi tractus & magnorum enumeratio.
25. In quibusdam fluvii sunt voragine & vortices.
26. Aqua fluviorum est levior, quam marina.

CAPUT XVII.

De Aquis mineralibus, thermis, acidulis & aliis, quas vulgus admiratur. P. 287.

1. Nulla aqua pura est & elementaris. Definitio aquæ mineralis.
2. Aqua minera'es sunt triplici modo.
3. Quomodo aqua minerales generentur, explicare.
4. Aquarum mineralium infinita sunt species.
5. Differentias celebriores liquorum, quas vulgus miratur, enumerare.
6. De aquis acidulis.
7. De Thermis.
8. De oleosis & pinguibus aquis.
9. De aquis amaris.
10. De fontibus frigidis admodum.
11. De aquis, quæ immutant corpora.

12. De

INDEX CAPITUM

12. De aquis venenatis & mortiferis.
13. De aquis coloratis.
14. De aquis salis.
15. De fontibus ebullientibus & cum spiritu prorumpentibus.
16. De aquis alias mirabiles proprietates habentibus.
17. Fontes stato tempore prorumpentes.

CAPUT XVIII.

De Mutatione & generatione locorum aridorum & Aquarum Telluris. P. 313.

1. Superficiem Terra extantis & illam, qua aqua tegitur, explorare.
2. Superficies terra & aqua non est perpetuo eadem.
3. Quantum terra & quantum aqua Tellus contineat, supputare.
4. Aqua littus deserit, & locus ejus fit terra, varias ob causas: Primò de paludibus & stagnis.
5. Fluvii ripas & alveum deserunt & novam terram præbent.
6. Lacus exsiccantur & in terram mutantur.
7. Freta exsiccantur.
8. Sinus exsiccantur.
9. Oceani partes exsiccantur.
10. Pulviorum generationem explicare.
11. An pulvini sint futuri pars continentis vicinæ, inquirere.
12. Insulae sunt variis modis.
13. Rariores modi generationis insularum.
14. De insulis natantibus.
15. Fluvii occupant terrarum tractus, quos antea

ET PROPOSITIONUM.

non occupabant, varias ob causas.

16. *Lacus, paludes & stagna occupant terrarum tractus, quos antea non occupabant.*
17. *Oceanus occupat terrarum tractus, quos antea non occupabat.*
18. *An fieri possit, ut tota superficies Telluris occupetur à sola aqua, vel à sola terra.*
19. *Cur in medio Oceano pauca insula, plurima & agmina insularum non procul à continentibus vel maioribus insulis.*
20. *Qua de causa agri fiant fertiles vel steriles, & ad littora maris mutetur terra agros tegentis species.*

C A P U T X I X.

De Athmosphæra & Aëre.

P. 338.

1. *Ex Telluris partibus perpetuo ascendunt exhalationes.*
2. *Athmosphæra constitutio.*
3. *Exhalationes diverso tempore & diversis locis plures vel pauciores.*
4. *Exhalationes sunt varii generis.*
5. *Particula aëris repellunt radios Solis tanquam speculum.*
6. *Partes athmosphæra supera sunt subtiliores, quam infera.*
7. *Exhalationes violento motu pelluntur sursum, naturaliter deorsum vergunt.*
8. *Athmosphæra incallescens majorem locum postulat, frigida contrahitur in minorem.*
9. *Thermometrum sive Thermoscopium conficere.*
10. *Quomodo vel quantum possit aër rarefieri.*
11. *Cur in Zona frigida aër plerunque crassus & nebulosus.*

* *

12. *Cur*

INDEX CAPITUM

12. *Cur in saevissimo hyemis frigore aer est subtilis & serenus.*
13. *Cur aer Horizontalis apparet crassior.*
14. *An aeris seu athmosphæra altitudo in omnibus locis sit una & eadem.*
15. *Condensatio aeris & rarefactio non mutat ejus altitudinem.*
16. *Aeris altitudo eadem est in omnibus locis & omni tempore.*
17. *Aer hyeme & nocte densior quam æstate & die.*
18. *De diversa densitate aeris in diversis locis.*
20. *In locis polo vicinis remotior est regio aeris calida, sive suprema initium.*
21. *Radii Solis, Lunæ & Stellarum refringuntur in aere.*
22. *Propter illam refractionem Sol & Luna citius videntur in ortu, quam debebant.*
23. *Quo aer crassior, eo major refraction.*
24. *Quo aer crassior, eo citius videtur Sol & Luna.*
25. *Quo aer est humilior, qui refractionem facit, eo citius videtur Stella.*
26. *Eadem potest esse stellæ alicujus refraction ad eundem ejus situm, etsi diversa sit aeris altitudo.*
27. *Si loci alicujus aer sit & crassior & humilior, quam alterius, citius Luna & Sol videbuntur in illo quam in hoc.*
28. *Si unius loci aer sit crassior & altior, quam in altero, potest & citius & tardius videri Orientales stellas.*
29. *Observatis duabus refractionibus ad duas altitudines, invenire inde & aeris altitudinem & crassitiem aeris respectu ætheris sive regulam refractionis.*
30. *Invenire minimam aeris altitudinem, quæ esse potest.*

ET PROPOSITIONUM.

31. *Invenire regulam refractionis.*
32. *Invenire refractiones ad quamvis inclinationem.*
33. *Invenire refractionem ad datam stellæ altitudinem.*
34. *Radii stellarum inprimis Solis & Luna reflectunt seu reperiuntur à particulis aeris.*
35. *Reflexio illa est causa crepusculi præcipua.*
36. *Crepusculi initium quando fiat.*
37. *Ex crepusculi quantitate non potest inveniri altitudo aeris.*
38. *Quanta aeris altitudo fiat, si supponamus à duplici reflexione oriri crepusculum.*
39. *Datâ aeris altitudine, ejus quantitatem supputare.*
40. *Aer in quibusdam locis quadam habet peculiaritatem.*

C A P U T XX.

De Motu aeris & Ventis in genere; de plagis. P. 387.

1. *Venti Definitio.*
2. *Venti plerique ab una plaga ad oppositam tendunt.*
3. *De plagæ definitione.*
4. *Plagarum numerus, & ventorum.*
5. *Plagæ & Venti triginta duo.*
6. *Alia subtilior numeratio plagarum & ventorum.*
7. *Veterum numeratio ventorum.*
8. *Alia veterum numeratio.*
9. *Venti oppositi.*
10. *Causæ ventorum variae.*
11. *Cur venti perpendiculariter spirant supra loci*
* * 2
Hori-

INDEX CAPITUM

Horizontem.

12. *Cur venti interrupto impetu spirant.*
13. *Cur ventus nullus vel rarus admodum perpendicularis in locum desuper ex aere spirat, sed omnis obliquus quasi.*
14. *Cur venti Australes & Occidentales repidi sunt.*
15. *Cur Occidentales minus frequentes, quam Orientales.*
16. *Cur Septentrionales & Orientales majori nisu & fortiores, Austrini & Occidentales debiliores.*
17. *Cur nubecula crassior & subnigra praeannuntiat ventum ab ea plaga.*
18. *Cur in Vere & Autumno frequentiores sunt venti.*
19. *In quamvis aeris regione vel altitudine venti spirant.*
20. *Ad quantum spatium unus idemque ventus se extendit.*

CAPUT XXI.

De Ventis in specie, differentiis & de Tempestatibus.

P. 403.

1. *Ventus alius constans, alius inconstans.*
2. *Alius generalis, alius particularis, & causa generalis venti.*
3. *Quidam venti periodici & statii, alii vagi & contingentes. Enumeratio periodicorum.*
4. *Etesiarum causa.*
5. *Cur in multis locis Etesiae non deprehendantur.*
6. *Venti quidam proprii, alii communes.*
7. *Venti quidam sunt periodici horarii.*
8. *Venti Septentrionales plures in locis, qui polo*
Septen-

ET PROPOSITIONUM.

- Septentrionali propiores. . .
9. Ventorum species quatuor.
 10. Venti quidam impetnosi subitanei, illorum species. Travadas. Exempla singulorum. De Ecnephia.
 11. De Exhydria.
 12. De Typhone.
 13. An venti quidam ex ipsa Terra vel Aqua erumpunt.
 14. An ventus quidam oriatur à fluxu maris & fluxu maris.
 15. Causa Castoris, Pollucis & Helena in tempestatibus.
 16. Cur in Oceani Ethiopici parte sub Aequatore præcipue ad Guinea littora tam frequens malacia.
 17. Quibusdam locis procella & tempestates sunt anniversariae.

INDEX CAPITUM
GENERALIS GEOGRAPHIÆ

LIBER II.

De Affectionibus Telluris caelestibus.

CAPUT XXII.

Definitiones & præcognita necessaria.

P.437.

1. Definitiones Globi, Mapparum Geographicarum, Polorum Telluris, Axis, Æquatoris, Parallelorum, Circulorum latitudinis, Tropi-
corum, Polarium, Meridiani, Horizon-
tis, &c.
2. De motu sive circumvolutione diurna appa-
renti stellarum.
3. De motu Solis proprio seu annuo.

CAPUT XXIII.

De locorum latitudine & elevatione poli.

P.445.

1. Definitio latitudinis loci, & circuli latitu-
dinis.
2. Definitio elevationis poli.
3. Latitudinem loci in globo & mappis inve-
nire.
4. Dato loco in globo, ita disponere globum, ut Ho-
rizon ligneus fiat loci illius Horizon.
5. Latitudo loci aequalis est elevationi poli. Co-
rollaria duo.
6. Exhibere in globo & mappis omnia illa loca,
quæ datam ab Æquatore distantiam sive la-
titudi-

ET PROPOSITIONUM.

itudinem habent.

7. Invenire lineam meridianam, sive plagam Septentrionis & Austri in dato loco.
8. Globum constituere juxta cardines mundi.
9. Latitudinem loci de calo observare vel investigare.
10. Diversitas latitudinis locorum.
11. Si in loco ignoto versemur, inventa autem sit latitudo loci, exhibere in globo peripheriam, in cujus uno puncto nos esse certum sit.

C A P U T X X I V.

De Zonis & apparentiis cœlestibus in diversis Zonis. P. 456.

1. Diviso Telluris superficiei in Zonas oritur à motu Solis proprio. Definitiones Zonarum.
2. Signum, ex quo colligimus, in qua Zona quilibet locus jacet.
3. Per qua loca Aequator transeat, sive qua loca in Aequatore jaceant: quam regiones in Zona Torrida, Temperatis, Tropicis, Zonis frigidis sita sint.
4. Quibus locis Sol semel in anno fiat verticalis, quibus bis, quibus nunquam.
5. Quibus locis Sol aliquot circumvolutionibus sive integris diebus non oriatur, & totidem non occidat: quibus locis uno tantum anni die non occidat, &c.
6. Quibus locis Sol quotidie oriatur & occidat.
7. Dato loco in Zona Torrida, invenire duos illos anni dies, quibus Sol verticalis fit illi loco.
8. Dato loco in Zona Frigida, invenire diem anni, qui primus erit, quo Sol illi loco non

INDEX CAPITUM

- occidet : item quot dies non occidet : Et contra, diem primum, quo Sol non orietur.
9. Dato die anni, exhibere omnia illa loca Telluris, quibus Soleo die verticalis fiet in meridie.
 10. Dato die anni, exhibere omnia illa loca Telluris, quibus Sol non occidit illo die, ita ut hic dies primus sit.
 11. Latitudinem & magnitudinem singularum Zonarum supputare.

CAPUT XXV.

De Longitudine diversa dierum in diversis locis, & inde ortâ divisione superficiei in Climata.

P. 469.

1. Duobus anni diebus in omnibus Telluris locis sunt æquinoctia, sive nox diei aqualis.
2. Locis in Æquatore sitis omnes dies noctibus sunt aequales. Poli loco unus est tantum dies & una nox totius anni, &c.
3. Aliis locis nulli alii dies aequales noctibus præter illos duos.
4. Dato loco in globo & dato die anni, invenire numerum horarum, quibus Sol supra Horizontem illius loci, & quibus infra eum illo die morabitur.
5. De die longissimo & brevissimo.
6. Quomodo dies accrescant in singulis locis usque ad longissimum, & decrescant ad brevissimum.
7. Duorum locorum, qui ab Æquatore est remotior, habet omnes unius anni semissis dies atque ideo longissimum diem longiores.
8. Omnia loca Telluris, quæ in uno eodemque parallelo

ET PROPOSITIONUM.

rallelo sita sunt, habent omnes anni dies, & ideo quoque eandem longissimi diei quantitatem.

DEFINITIONES Climatum, parallelorum.

9. De inaequali incremento longissimi diei ad aequale incrementum distantia locorum ab Aequatore.
10. De eadem inaequalitate.
11. Data quantitate diei longissimi in aliquo loco, invenire ejus latitudinem.
12. Dato aliquot dierum numero, exhibere illa loca Telluris, (sive, invenire latitudinem locorum) ubi Sol tot diebus non oritur & totidem non occidit.
13. Tabulam Climatum construere.
14. Aliorum Geographorum methodus constructionis Tabulae, &c.
15. Vsum Tabulae Climatum mensurare.

CAPUT XXVI.

De luce, calore, frigore, anni tempestatibus in diversis Telluris locis & Zonis.

P. 591

1. Causarum enumeratio, qua efficere vel variare possunt lucem, calorem, &c.
2. Quomodo Ver, Aestas, Autumnus & Hyems generaliter definienda sint.
3. Determinatio temporis Verni, Aestatis, &c. in diversis Zonis & Zonarum locis.
4. Dato loco Zonae Torridae invenire dies anni, quibus Aestas, Autumnus, Ver, Hyems incipit & desinit.
5. In quibus locis quatuor tempestatum aequale

INDEX CAPITUM

fit tempus, & in quibus inaequale.

6. *De inaequali Solis infra Horizontem de-
pressionem in diversis locis.*
7. *Invenire longitudinem crepusculi in dato loco
ad datum diem.*
8. *In Torrida Zona crepuscula sunt minima, in
frigida longissima, &c.*
9. *Qua hora in Zona Torrida loco aliquo Sol ean-
dem habeat elevationem, quam in loci alicuius
extra Zonam Torridam meridie.*
10. *Quomodo cause lucis, caloris, &c. in Zona
Torrida se habeant.*
11. *Quomodo lux, calor, tempestates, Ver, Aestas,
&c. in Zona Torrida locis se habeant.*
12. *Quomodo in Zonarum Temperatarum locis.*
13. *Quomodo in Zonarum Frigidarum locis.*

CAPUT XXVII.

De Umbris & denominatione locorum
inde orta. P. 557.

1. *Definitiones Perisciorum, &c.*
Umbra cadunt in plagam Soli oppositam.
2. *Incola Tropicorum sunt Ascii Heteroscii.*
3. *Incola Zona Torrida sunt Ascii Amphiscii.*
4. *Incola Zonarum Temperatarum sunt Heteroscii.*
5. *Incola Zonarum Frigidarum sunt Periscii.*
6. *Dato loco Zona Torrida, invenire dies anni,
quibus incolae illius loci erunt Ascii.*
7. *Dato die anni, exhibere illa loca, quorum in-
cola eo die erunt Ascii.*
8. *Dato loco Zona Frigida, invenire dies, qui-
bus incolae loci istius erunt Periscii.*
9. *Contra dato die anni, exhibere omnia loca, quo-
rum incolae Periscii essent eo die primo.*
10. *Quomodo cadat umbra in locis Aequatoris.*

11. *Pla-*

ET PROPOSITIONUM.

11. Planum constituere in quovis loco, ita ut umbra styli in illo plano ita spargatur, sicut in cuiusvis alius loci plano Horizontali.
12. In Aquatoris locis umbra diebus æquinoctiorum manet in una recta linea.
13. Quomodo in locis Torridæ se habeant umbra.
14. Dato loco in Zona Torrida invenire horam & plagam, in qua umbra regredietur & Sol cursum inflectere videbitur.
15. Quomodo umbrarum longitudo accrescat & decreseat.
16. Data longitudine styli & umbra, invenire altitudinem Solis.
17. Investigare umbra, quam tota Tellus spargit, longitudinem.
18. Quanta pars Lunæ obscuranda sit in Eclipsi.
19. In diversitate longitudine umbrarum.
20. De umbra styli, qui pars est axis mundi vel ei parallelus.
21. Horologium sciathericum æquinoctiale construere.
22. Horizontale sciathericum construere.
23. Verticale sciathericum construere.
24. Sciathericum construere, quod in nostro loco monstret horas aliorum locorum.
25. Sciathericum, in quo umbra regredietur, construere.

CAPUT XXVIII.

De Comparatione affectionum cælestium in diversis locis & inde orta denominatione, Antæcorum, &c. P: 575.

1. Quinam & meridiem & omnes diei horas eadem simul nunc merent.

INDEX CAPITUM

2. *Quinam ad idem tempus diversas anni tempestates sentiant.*
3. *De sinistro, dextro, &c. ortu atque occasu.*
4. *Antæcorum affectiones inter se comparata.*
5. *Quinam non habeant Antæcos, &c.*
6. *Dati loci exhibere Antæcos, Periæcos & Antipodes.*
7. *De comparatione affectionum incolarum ejusdem paralleli.*
8. *Periæcorum affectiones comparata.*
9. *Antipodum affectiones comparata.*
10. *Vnius loci Periæci sunt aliorum Antipodes, &c.*
11. *Exhibere omnia loca, quæ cum dato loco simul numerent omnes horas, &c.*
12. *Dato loco, exhibere omnia illa loca, quorum dies sunt æquales noctibus prioris loci.*
13. *Quibus horis Antæci simul videant, &c.*
14. *Quibus horis Periæci simul videant Solem, &c.*

CAPUT XXIX.

De Comparatione temporis in diversis locis. P. 586.

1. *Datâ horâ unius loci invenire horam alterius loci.*
2. *Datâ horâ nostri loci, exhibere omnia illa loca, ubi sit hora, quamcunque volumus.*
3. *Datâ Solis altitudine, die anni & latitudine loci observationis, invenire horam loci.*
4. *Datâ plagâ Solis, invenire horam loci.*
5. *Lucente Sole, beneficio globi cognoscere horam loci.*
6. *Datâ horâ nostra numerationis, invenire horam*

ET PROPOSITIONUM.

ram Babyloniam ab Ortu.

7. *Contra.*
8. *Invenire horam Italicam sive ab Occasu, nostrâ datâ.*
9. *Contra.*
10. *Datâ horâ nostrâ, sive aequali, invenire inaequalem sive Iudaicam.*
11. *Contra.*
12. *Vnde fiat, ut circumnavigantes Tellurem, ubi redeunt ad locum discessus, unum diem magis vel minus numerent.*

CAPUT XXX.

De diverso ortu atque occasu Solis & stellarum in diversis locis. P. 596.

1. *Globum terrestrem ita suspendere vel constituerre, ut à lucente Sole partes ea globi illuminentur, quas Sol in ipsa Tellure ad singulas horas illuminat, &c.*
2. *Idem à Luna lucente ostenditur.*
3. *Diversitas plagarum Horizontis, quibus Sol oritur & occidit.*
4. *De rectâ & obliquâ Solis ascensione supra Horizontem.*
5. *Diversitas temporis, quo signa ascendunt.*
6. *Dato die, invenire loca, quibus Sol oritur in data plaga.*
7. *Datâ horâ, exhibere locum, cui Sol tunc verticalis est.*
8. *Datâ hora, invenire loca, à quorum vertice Sol habeat datam distantiam.*
9. 10. *Data datâ diei horâ, exhibere omnia loca, quibus Sol oritur, quibus occidit, &c.*
11. *Investigare, quantam Telluris portionem Sol illuminet.*
12. *Quan-*

INDEX CAPITUM

12. *Quanto citius in vertice montis videant orientem Solem, quam in pede montis.*
13. *Ex anticipatione illa temporis invenire montis altitudinem.*
14. *Exhibere loca, quibus ad datum diem Luna fit verticalis.*
15. *Invenire horam, quâ Luna orietur, quâ occidet, &c.*
16. *Exhibere omnia loca, quibus Luna oritur, occidit, &c.*
17. *Exhibere loca, quæ Eclipsin Luna videre possint, & quæ non videre, &c.*
18. *Quanta portio Telluris à Lunâ illuminetur in plenilunio.*
19. *Exhibere omnia loca, quibus stella aliqua fixa fit verticalis.*
20. *Exhibere omnia loca, quibus ad datam horam stella in meridiano est.*
21. *Exhibere omnia loca, supra quorum Horizontes stella aliqua est ad datam horam, & quibus oriatur, occidat, &c.*
22. *Exhibere omnia loca, quorum dies nostris noctibus sunt æquales.*
23. *Cur dies celerius augeantur & decrescant circa æquinoctia, quam circa solstitia, &c.*
24. *A locorum in Æquatore sitorum vertice Sol multo celerius recedit, quam à vertice locorum, quæ Tropici vicina sunt in Zona Torrida.*

ET PROPOSITIONUM.

LIBER TERTIUS.

Pars Comparativa terrestris.

CAPUT XXXI.

De longitudine locorum.

P. 617.

1. *Qualibet loca possunt assumi pro initio numerationis longitudinis locorum.*
2. *Primum meridianum determinare in Globo Telluris.*
3. *Data loci latitudine & longitudine, exhibere illum locum in Globo & Mappis.*
4. *Omnes Stella removentur à meridiano quolibet quindecim gradibus in una hora.*
5. *Datis ad unum idemque temporis momentum horis duorum locorum, invenire unius loci longitudinem ab altero.*
6. *Datis eisdem & uno loco in Globo vel Mappis dato, exhibere alterius loci meridianum in Globo & Mappis, sive meridianum, in cuius uno puncto alterum hunc locum jacere certum est.*
7. *Invenire loci longitudinem, in quo versamur. Modi sex.*
8. *Alii modi inveniendæ longitudinis, minus propriè ita dicti, quinque.*
9. *Tabula longitudinis & latitudinis locorum celeberrimorum.*

CAPUT XXXII.

De situ locorum mutuo, de compositione
Globi Terrestris & Mapparum. P. 668.

1. *Dato loco Telluris, reliquorum locorum situm ad eum expendere, & invenire.*
2. *Dato*

INDEX CAPITUM

2. Dato loco in Tellure, exhibere in Globo omnia illa loca, quæ ad locum illum sita sunt in plaga data.
3. Dato loco in Tellure vel globo, exhibere omnia illa loca, ad quæ singula datus locus situs est in una aliqua plaga data.
4. Data plaga unius loci ad alterum, ejus distantia, & hujus latitudine, invenire plagam hujus loci ab altero, & hujus alterius latitudinem.
5. Globum terrestrem componere. Modi tres.
6. Mappas Geographicas componere: Modi quinque pro universalibus, & quatuor pro particularibus.

CAPUT XXXIII.

De distantia locorum.

P. 725.

1. Distantia duorum locorum in superficie Telluris brevissima est arcus peripheria maxima interceptus inter duo illa loca.
2. Datis duobus locis in globi superficie ducere per illa peripheriam maximam sive arcum, qui est brevissima locorum distantia.
3. Distantia locorum manent eadem perpetuo, exceptis paucis partibus.
4. Nulla loca superficiei Telluris distant majori intervallo, quam 2700 milliaribus Germanicis quorum xv gradum facere ponuntur.
5. Dato loco in Globo, exhibere omnia illa loca, quæ à dato distent datis milliar. quocunque.
6. Quanam faciant, ut itineraria distantia locorum sit major, quam vera sive brevissima.
7. Duorum locorum in Globo distantiam invenire. De Mappis.
8. Data longitudine locorum & latitudine invenire distantiam.

9. Datâ

ET PROPOSITIONUM.

9. *Data duorum locorum latitudine, & plaga, in qua unus ab altero jacet, invenire distantiam.*
10. *Data duorum locorum longitudine, unius latitudine & plaga, invenire distantiam.*
11. *Data distantia duorum locorum ejusdem longitudinis & plagas in quibus tertius aliquis ab utroque situs est, invenire distantiam tertii à duobus hisce.*

CAPUT XXXIV.

De Horizonte visibili.

P. 739.

1. *Horizon visibilis diversa est magnitudinis pro diversa oculi altitudine.*
2. *Horizontis visibilis quantitatem invenire, suppositâ maxima hominis staturâ.*
3. *Data oculi altitudine, invenire distantiam ultimi puncti, quod videri potest.*
4. *Si ex aliqua altitudine conspiciamus fastigium alicujus rei, cujus altitudo nota sit, invenire distantiam ab illa.*
5. *Contra, si distantia nota sit, invenire illius rei altitudinem.*
6. *Refraçtio auget quantitatem Horizontis visibilis.*

CAPUT XXXV.

De Arte Nautica in genere & in specie de Navium structura.

P. 744.

1. *Quanam requirantur ad navigationem recte instituendam.*
2. *Quanam in fabrica navium sint observanda.*

INDEX CAPITUM

CAPUT XXXVI.

De Onere navibus imponendo. P. 747.

1. Onus exprimitur per vehes & delia.
2. De corporum in aqua submersione & natatione.
3. De capacitate figuræ navis.
4. In oneris impositione duo consideranda.
5. De submersione navium in fluviis.
6. De gravitate corporis innatantis aquæ.
7. De gravitate in aquis diversi ponderis.
8. De oneris quantitate.
9. De navis commotione à procellis, &c.

CAPUT XXXVII.

De Limeneuretica sive Arte dirigendæ navis, & prima ejus parte. P. 751.

1. Artis gubernandæ navis definitio & divisio in partes quatuor.
2. Cognitio spatii intermedii in quibus consistat.

CAPUT XXXVIII.

De secunda artis directoriæ parte. P. 753.

1. Cognoscere in singulis locis plagas.
2. Compassum magneticum seu nauticum construere.
3. De numero plagarum.
4. De acus Magnetici declinatione & compassi fallacia.
5. Invenire declinationem illam.
6. De correctione compassi nautici & terminis nauticis.
7. Quæ acum Magneticam à naturali situ deducant.

De Histrodromia sive linea cursus navis.

P. 763.

1. Locus ab alio loco situs versus Septentrionem vel Austrum, ab omnibus intermediis locis situs est versus eandem plagam Septentrionis vel Austri.
2. Duorum in Equatore jacentium unus ab altero & ab omnibus intermediis locis situs est versus plagam Orientis vel Occidentis.
3. Duorum locorum non in uno Meridiano neque in Equatore jacentium unus ab altero & ab omnibus intermediis punctis non est situs versus unam eandemque plagam, sed versus diversas à diversis punctis.
4. Navigatio institui non potest, nisi navis aliquo tempore dirigatur in unam plagam, & quamnam via inter duo loca sit commodissima ad navigationem.
5. In navigationibus, quibus navis dirigitur versus Septentrionem vel Austrum, via navis est portio Meridiani illorum locorum.
6. Si navigatio instituatur à loco aliquo in Equatore sito, ita ut navis dirigitur versus Orientem vel Occidentem, erit via navis portio ipsius Equatoris.
7. Si navigatio ab aliquo loco extra Equatorem sito instituatur, ita ut navis dirigitur versus Orientem vel Occidentem (plagas Cardinales,) erit via navis peripheria paralleli loci, à quo navigatur.
8. Si navigatio à quovis Telluris loco instituatur, ita ut navis dirigitur in plagam non Cardinalem, erit via navis non circularis sive periphe-

INDEX CAPIT. ET PROPOSIT.

ripheria circuli, sed linea curva solida, heli-
cis modo Tellurem infinitis gyris atque flexi-
bus circa polos ambiens.

9. Non pervenitur ab uno loco in alterum, (nisi
in uno meridiano vel ambo in *Aequatore* fue-
rint) si navis dirigatur in plagam, in qua al-
ter locus à primo situs est.
10. Quando navis in eandem, quando in alias
plagas dirigenda sit, quam situs loci unius ad
alterum habet.
11. *Loxodromiarum* sive *Rhomborum* numerus.
12. *Loxodromia* magnitudo.
13. Partes *Loxodromia* inter æquidistantes paral-
los sunt æquales.
14. Datis duobus locis *Telluris* invenire *Loxodro-*
miam sive *Rhombum*, qua via navis erit, si
ab uno ad alterum sit navigandum, & pla-
gam, in quam navis dirigenda.

CAPUT XL.

De *Cognitione loci*, ad quem navis perve-
nit ad quodlibet navigationis tempus, &
ejus signatione in *Mappis*. P. 779.

1. Non potest institui navigatio, nisi loci situs,
unde proficiscendum, sit notus.
2. Locum, ad quem navis pervenit, invenire in
Mappis & calculo.
3. In quam plagam & in qua *Loxodromia* seu
Rhombus navis moveatur, conjicere.
4. Confectum iter navis è conjecturis colligere.
5. *Latitudinem loci* in mari observare.
6. *Longitudinem loci* in mari observare.

GEOGRAPHIÆ GENERALIS

PARS ABSOLUTA.

SECTIO PRIMÆ.

DE PRÆCOGNITIS GEOGRAPHIÆ.

CAPUT I.

*De Geographiæ Definitione, Divisione,
Methodo & aliis prolegomenis.*

Dudum invaluit consuetudo, ut illi qui scientiam aliquam aut disciplinam integrè pertractant, de hujus doctrinæ conditionibus atque methodo & constitutione aliisque proprietatibus quædam præmittant. Neque hoc sine ratione, modò absque obreptione Sophistica fiat, existimo fieri, cum per talem informationem Lectorum intellectus Ideam quandam totius disciplinæ vel saltem argumentum illius concipiat, & quomodo versari debeat in hac disciplina, cognoscat. Nos itaque primo hoc capite de Geographiæ Constitutione, & natura, pauca præfabimur.

Definitio.

Geographia dicitur scientia Mathematica mixta, quæ Telluris, partiumque illius affectiones à quantitate dependentes, nempe figuram, locum, magnitudinem, morum, cælestes apparentias, atque aliis proprietates affines docet.

A

Aquí-

A quibusdam nimis stricte sumitur pro sola regionum Telluris descriptione & distributione. Ab aliis contra nimis late extenditur, qui descriptionem politicam singularum regionum adjungunt. Sed hi facile excusantur, cum illud faciant ad retinendos & excitandos lectorum animos, qui nudâ regionum enumeratione & descriptione sine motum gentis explicatione somnolenti plerunque redduntur.

Divisio.

Dividimus Geographiam in Generalem & Specialem, sive Universalem & Particularem. (Goltizius explicationem Geographiæ ait duplicem esse, Exteriorem & Interiorem, sed impropria & Catachrestica est hæc appellatio, & sine ratione assumpta, cum termini, Generalis & Specialis sint aptiores.) Generalis sive Universalis Geographia dicitur, quæ Tellurem in genere considerat atque affectiones explicat non habitâ particularium regionum ratione. Specialis sive Particularis dicitur, quæ singularum regionum Telluris constitutionem docet, estque duplex, Chorographia & Topographia. Chorographia regionis alicujus, magnitudinem saltem mediocrem habentis, descriptionem proponit. Topographia parvum aliquem Telluris tractum seu locum describit.

Nos hoc libro Generalem Geographiam exhibebimus, quam in tres partes distribuendam esse existimavimus, quæ sint *Pars Absoluta*, *Pars Respectiva*, *Pars Comparativa*. In Parte absoluta contemplantur corpus ipsum Telluris & partes ejus atque affectiones ejus proprias, ut figuram, magnitudinem, motum, terras, maria, fluvios, &c. In Parte Respectiva illas affectiones atque accidentia

dentia considerabimus, quæ Telluri à cælestibus causis accidunt. Pars denique Comparativa continet illarum proprietatum explicationem, quæ ex diversorum locorum Telluris comparatione existunt.

Objectum.

Objectum Geographiæ, sive subiectum circa quod est Tellus, in primis superficies ejus & partes.

Affectiones.

Triplicis generis esse videntur illa, quæ in singulis regionibus considerari merentur, ac proinde in Speciali Geographia ad singulas regiones explicari possunt cum fructu discipulorum & Lectorum, nempe *Terrestria, Cælestia, & Humana*. Cælestes affectiones voco illas, quæ ex apparenti solis & stellarum motu dependent, & octo esse videntur. Primo, *Elevatio poli, distantia loci ab Equatore & à polo*. Secundo, *Obliquitas motus diurni stellarum supra Horizontem illius loci*. Tertio, *Quantitas diei longissimi ac brevissimi*. Quarto, *Clima & Zona*. Quinto, *Calor, frigus atque anni tempestates: item pluvia, nix, venti & alia meteora*. Et si enim hæc ad terrestres proprietates possint referri, tamen quoniam cum quatuor anni temporibus & Solis motu magnam habent connexionem ideo ad cælestium classẽ retulimus ea. Sexto, *stellarum ortus, apparentia, & mora supra Horizontem*. Septimo, *stella per verticem loci transeuntes*. Octavo, *quantitas vel celeritas motus*, quo juxta Copernicanam hypothesin singulis horis locus quilibet rotatur. Juxta Astrologos *nova affectio* addi posset, quoniam illi singulis regionibus præficiunt unum ex duodecim Zodiaci signis at-

que hujus signi planetam. Sed mihi vana hæc doctrina semper visa fuit, neque ullum ejus doctrinæ fundamentum perspicio : in fine tamen Specialis Geographiæ recensēbimus eorum hanc distributionem.

Hæc de cælestium affectionum classe. *Terrestres* voco, quæ in ipsius regionis loco considerantur, quarum numero decem. Primo, *Limites & circumscriptionem*. Secundo, *Figuram*. Tertio, *Magnitudinem*. Quarto, *Montes*. Quinto, *Aguas, nempe fluvios, fontes, sinus maris*. Sexto, *Sylvas & desertas*. Septimo, *Fertilitatem & sterilitatem, item fructuum genera*. Octavo, *Mineralia, sive fossilia*. Nono, *Animalia*. Decimo, *Longitudinem loci*, quæ primæ terrestri proprietati nempe circumscriptioni adjungi potest.

Tertium affectionum, quæ in singulis regionibus spectari merentur, genus facio *Humanas*, quæ ab hominibus sive incolis regionum dependent, quarum etiam decem circiter constitui possunt. Primo, *Incolarum statura, conformatio, color, vitæ diuturnitas, origo, cibus, potus*. Secundo, *Quæstus & Artes, quibus occupantur incolæ, mercatura & merces, quas mittit illa regio in alias*. Tertio, *Virtutes, vitia, eruditio, ingenium, scholæ, &c.* Quarto, *Consuetudines circa puerperia, nuptias, funera*. Quinto, *Sermo seu lingua, qua utuntur incolæ*. Sexto, *Regimen politicum*. Septimo, *Religio & status Ecclesiasticæ rei*. Octavo, *Urbes & loca celebriora*. Nono, *Historiæ memorabiles*. Decimo, *Viri illustres, artifices & inventa à singularum regionum incolis*.

Hæc sunt tria affectionum genera in Speciali Geographia explicanda, etsi illæ, quæ tertiam classē faciunt, minus rectè ad Geographiam referantur :

rantur : Sed dandum est aliquid consuetudini & utilitati discientium. Nos præter illa adjungemus Speciali Geographiæ multa capita de Uſu Geographiæ.

In Generali vero Geographia , quam hoc libro explicabimus , considerantur primo affectiones absolutæ Telluris, & partium constitutio. Deinde cælestes proprietates in genere contemplabimur, quæ deinde in Speciali Geographia ad singulas regiones applicanda sunt. Denique in Parte comparativa ea proponuntur , quæ in unius loci cum alio comparatione offeruntur.

Principia.

Triplicia sunt principia , quibus Geographia utitur ad confirmandam Propositionum veritatem. Primo, Geometricæ, Arithmeticæ atque Trigonometricæ propositiones. Secundo, Astronomica præcepta & theoremata, etsi miraculo simile videatur, quod ad Telluris , in qua habitamus, naturam cognoscendam uti debeamus cælestibus corporibus, quæ tot myriadibus milliarium à nobis remota sunt. Tertio, Experientia. Etenim maxima Geographiæ pars , inprimis specialis, solâ experientiâ & observatione hominum nititur, qui regiones singulas descripserunt.

Ordo.

De Ordine, quem in disciplina hac Geographica observare commodum esse existimo , dictum est in Divisione & Affectionum explicatione. Occurrit tamen quædam difficultas de ordine in affectionum harum explicatione observando , nimirum , utrum singulis regionibus suas affectiones, an verò affectionibus generaliter explicatis ipsæ regiones attribuendæ sint ? Aristoteles libr. i.

Histor. Animal. ut etiam libr. 1. de part. Anim. similem movet dubitationem, & multis disputat: utrum ad singulas animalium species enumerandæ sint proprietates eorum, an verò proprietates hæ generaliter explicandæ & animalia, in quibus eæ reperiuntur, subjungenda. Similis difficultas in aliis Philosophiæ partibus occurrit. Nos in Generali Geographia, quasdam affectiones generaliter explicavimus, quas in speciali Geographia ad singularum regionum explicationem accommodabimus.

Methodus.

De Methodo, hoc est Modo probandi dogmatum Geographicorum veritatem, sciendum est, quod in Generali Geographia plurima propriè dictis Demonstrationibus confirmantur, inprimis cælestes affectiones: in Speciali autem Geographia omnia ferè sine Demonstratione explicantur (exceptis cælestibus affectionibus, quæ demonstrari possunt) quo experientia & observatio, hoc est sensuum testimonium illa confirmat; neque possunt alio modo probari. Etenim scientia tripliciter sumitur. Primo, pro qualicunque cognitione etiamsi ex probabilibus tantum sit. Secundo, pro cognitione certa, siue hæc certitudo à Demonstrationum robore, siue à sensuum testimonio dependeat. Tertio, pro sola cognitione per Demonstrationem: quæ usurpatio strictissima est, convenitque Geometriæ, Arithmeticæ, reliquisque Scientiis Mathematicis, exceptâ Chronologia, Astrologia & Geographia, quibus Scientiæ vocabulum in secunda significatione competit.

Probantur etiam vel ostenduntur potius plurimæ propositiones per Globum terrestrem artificialem,

cialem, per mappas quoque Geographicas; atque harum propositionum, quæ ita ostenduntur, quædam possunt legitimis Demonstrationibus confirmari (quod tamen propter captum Lectorum omittitur) aliæ nequaquam ita probari possunt, sed ideo recipiuntur, quia supponimus, omnia loca in globo & mappis ita esse disposita ut in ipsa Tellure jacent. In hisce tamen Descriptiones potius ab autoribus Geographicis confectas sequimur: globus & mappæ ad illustrationem & faciliorem comprehensionem inserviunt.

Origo Geographia.

Origo Geographiæ nova non est, neque uno partu in lucem edita est, neque ab uno homine profecta: sed dudum ante multa secula ejus primordia jacta sunt, etsi antiqui Geographi tantum in describendis regionibus, hoc est Chorographia & Topographia occupati fuerunt. Romani solebant, devictâ & subjugatâ aliquâ provinciâ, hujus Chorographiam in Tabula expressam & claris signis illuminatam monstrare in triumpho spectatoribus. Erant præterea Romæ in portu Luculli multæ Geographicæ Tabulæ omnium contemplationi expositæ. Senatus Romanus anno ante natum Christum centesimo circiter, miserat Geodætas & Geographos in diversas mundi plagas, ut totam Tellurem dimetirentur, sed vix vigesimam partem perlustrarunt. Neco Ægyptiorum Rex, multis ante Christum natum seculis per Phænices universum Africæ externum latus integro triennio explorare jussit. Darius Indi ostia & mare Æthiopicum Orientali scrutari mandavit. Alexander Magnus in expeditione sua Asiatica duxit secum duos itinerum mensores & descri-

ptores, Diognetum & Betonem, teste Plinio, ex quorum annotationibus & Itinerariis Geographi sequentium seculorum multa desumserunt. Etenim cum omnium fere aliarum artium studium à bellis afficiatur damno, sola ferè Geographia ab illis crescit una cum Fortificatoria, quam vocant.

Cæterum valde manca, imperfecta, & falsitatis plurimis scatens Geographia veterum erat, quoniam ignorabant hæc, quæ non infimæ sed præcipuæ sunt cognitionis Telluris partes, (vel saltem non habebant certam de iis experientiam.)

1. Totam Americam. 2. Terras Septentrionales.
3. Terram Australem & Magellanicam. 4. Terram circum navigari posse & Oceanum continuo tractu ambire Tellurem, (quosdam tamen ex antiquis in hac opinione fuisse non nego, at illud certo scivisse, id nego.) 5. Zonam Torridam habitabilem esse & ab infinitis populis habitari. 6. Telluris dimensionem veram, etsi multa in hoc negotio scripserint. 7. Africam posse circumnavigari, & australem Africæ partem. 8. Regionum remotarum veris Descriptionibus carebant tam Græci quam Romani, atque innumera falsa & fabulosa de populis in Asiæ termino atque Septentrionalibus locis scripta reliquerunt. 9. Motum maris sive fluxus diversitates & generalem illum fluxum ignorabant. 10. Imo Græci atque ipse Aristoteles Fluxum & Refluxum maris non habuerunt cognitum. 11. Ventorum diversitates paucas habebant perspectas, generalis omnino illis incognitus. 12. Magnetis insignis proprietates, quæ Septentrionem & Austrum monstrat, ipsis occulta fuit, etsi alteram illam, quæ ferrum trahit, cognoverint. Anaximander autem, qui vixit anno

ante



GENERALIS
GEOGRAPHIA
in tres Partes in hoc
libro divisa est, quae
sunt

PARS ASSO-
LUTA, divisa
in sectiones sex.

PARS RESPECT-
IVA explicans affe-
ctiones caelestes capi-
tulis.

PARS COMPARA-
TIVA, affe-
ctiones illas confi-
derans, quae ex
comparatione un-
ius loci ad alium
conveniunt.

SECTIO PRIMAE,
de praecognitis capi-
ta duo.

SECTIO SECONDA,
de affectiones totius
Telluris explicat ca-
pitulis V.
Cap. VI. De ejus loco in Systemate Mundi.
Cap. VII. De ejus substantia & materia.


SECTIO TERTIA,
in qua Terra Consi-
deratur & partes expli-
cantur capitulis qua-
tuor.
Cap. IX. De Montibus in genere.
Cap. X. De Montium differentis.
Cap. XI. De Sylvis, desertis, & fodinis.

SECTIO QUARTA,
de Hydrographia in qua Aqua-
rum constitutio &
proprietates expli-
cantur capitulis vi.
Cap. XII. De Divisione Aquarum.
Cap. XIII. De Oceano & Mari.
Cap. XIV. De Motibus maris, imprimis de Flu-
xibus & Refluxu.

SECTIO QUINTA,
de Atmosphæra. Cap. XVI. De mutatione locorum aridorum in
Agula & contra.
Cap. XVII. De aquis mineralibus.
Cap. XVIII. De Lacubus, flagnis & paludibus.
Cap. XIX. De Atmosphæra & Aëre.
Cap. XX. De Ventis in genere.
Cap. XXI. De Ventorum differentis & in specie.

Cap. XXII. De latitudine loci & elevatione poli.
Cap. XXIII. De Divisione Telluris in Zonas.
Cap. XXIV. De longitudine dierum & divisione Telluris in Climata.
Cap. XXV. De longitudine dierum & divisione Telluris in Zonas.
Cap. XXVI. De luce, calore, & tempestatibus anni.
Cap. XXVII. De Umbra & divisione incolarum respectu umbrarum.
Cap. XXVIII. De comparatione Affectionum caelestium in diversis
locis, ubi de Antecitis, Periculis & Antipodibus.
Cap. XXIX. De Diversitate Temporis in diversis locis.
Cap. XXX. De diverso ortu Solis, Lunæ, &c. arque aliis apparentiis.

Cap. XXXI. De longitudine locorum.
Cap. XXXII. De situ locorum ad invicem.
Cap. XXXIII. De distantia locorum mutua.
Cap. XXXIV. De Horizonte visibili.
Cap. XXXV. De arce Nautica in genere & navium structura.
Cap. XXXVI. De onere navibus imponendo.
Cap. XXXVII. De Directoria artis Nauticae parte prima, Cognitio
intervalli.
Cap. XXXVIII. Secunda parte Cognitio plagarum.
Cap. XXXIX. Tertia parte de Histriodromia, live via navis.
Cap. XL. Quarta parte de loco navis in itinere.



SPECIALIS
GEOGRAPHIA
considerat in sin-
gulis regionibus
triplicia.

Terrestria
decem.

1. Limites & Circumscriptionem.
2. Longitudinem loci & situm.
3. Figuram.
4. Magnitudinem.
5. Montes, } eorum appellatio & situs altitudo,
 } proprietates & contenta.
6. Fodinas.
7. Sylvas & defera.
8. Aquas } Mare, lacus, paludes,
 } Fluvii. Horum fontes, ostium, tractus, latitudo, aquarum copia, celeritas, aquarum
 } qualitas, cataractæ, &c.
9. Fertilitatem, vel sterilitatem, & fructus.
10. Animalia.

Cœlestia
octo.

1. Distantiam loci ab Æquatore & Polo.
2. Obliquitatem motus supra Horizontem.
3. Quantitatem dierum.
4. Clima & Zonam.
5. Calorem, atque anni tempestates, ventos, pluvias & alia meteora.
6. Stellarum ortum & moram supra Horizontem.
7. Stellarum per verticem loci transeuntes.
8. Quantitatem vel celeritatem motus juxta Copernicanam hypothesin.

Humana
decem.

1. Incolarum statura, vita, cibus & potus, origo, &c.
2. Quæstus & artes, mercatura, merces.
3. Virtutes & vitia, ingenium, eruditio, &c.
4. Consuetudines circa puerperia, nuptias, funera.
5. Sermo & lingua.
6. Regimen Politicum.
7. Religio & status rei Ecclesiasticæ.
8. Urbes.
9. Historiæ memorabiles.
10. Viri illustres vel feminae, artifices, inventa.

ante Christum, cccc circiter, primus scribitur
tentasse Telluris dimensionem.

Geographia Præstantia.

Commendat studium Geographicum. 1. Dignitas, quia hominem Telluris incolam & ratione præ aliis animalibus præditum maximè decet. 2. Jucundum quoque est & quidem honesta recreatio contemplari Telluris regiones & proprietates. 3. Insignis utilitas & necessitas, cum neque Theologi, neque Medici, neque Juris-consulti, neque Historici neque Literatores alii carere possint Geographiæ cognitione, si absque remora progredi voluerint in suis studiis. Hæc ab aliis satis ostensa sunt & multis exemplis illustrari possunt.

Subjungo hic Tabulas duas, quarum prior Contenta hujus libri nempe Geographiæ Generalis ante oculos ponit, altera ordinem in Speciali Geographia ad singularum regionum explicationem observandum.

C A P V T II.

*Quadam ex Geometria & Trigonometria,
qua studiosos Geographiæ scire oportet.*

Sapienter Plato Geometriam & Arithmeticam vocavit alas, quibus hominum mentes in cælum evolarent, hoc est solis stellarumque motus & affectiones scrutarentur. In Geographia non minus necessariae sunt eæ disciplinæ, si quis cum judicio & absque impedimento eam apprehendere velit. Interim paucioribus Geographia est contenta, quam Astronomia. Et quoniam multi Geographiæ studio capiuntur, qui disciplinas illas non

callent, nos pauca hic afferemus ex illis, quæ necessaria esse putamus Geographiæ studioſo, ut eò felicius & promptius in hac diſciplina verſetur: eſi neſtquam probemus pravam illam conſuetudinem, quâ adoleſcentes nondum delibatâ Geometriâ & Arithmeticâ ad alias Philoſophiæ diſciplinas animum applicant: ſed cauſa eſt in Præceptoribus & Profeſſoribus, quorum plerique ipſi ignorant has ſcientias, & ideo juvenes non morient de hac erronea conſuetudine. Ex Arithmetiſ præſupponimus in Leſtore cognitionem quatuor Numerationis ſpecierum, nempe Additionis, Subtractionis, Multiplicationis, Diſiſionis, & præterea Regulæ aureæ ſive Regulæ De-tri. Neque de his loquemur in præſentia, quandoquidem plerique adoleſcentes eâ cognitione ſunt inſtructi, & ſi qui ignorent, viva Præceptoris voce potius, quam ex libro addiſcant. ſed *Geometrica afferemus.*

1. Geometria tres agnoſcit magnitudinum ſpecies, quibus omnia dimetitur, nempe Lineas, Superficiēs & Corpora ſeu Solida: neque datur quartum in Natura.

2. Linea alia eſt Recta, alia Curva. Et curva alia uni formis ſeu circularis, alia diſformis ſeu diſſimilariſ, ut lineæ ovales, conchoides, helices, &c.

3. Circulus dicitur ſpatium ſeu ſuperficies plana & figura, curvâ lineâ incluſa, in quo ſpatio punctum aliquod eſt, à quo ductæ rectæ ad curvam illam terminantem omnes ſunt æquales. Et curva illa terminans ſpatium dicitur linea circularis ſeu peripheria circuli. Punctum illud medium dicitur centrum circuli.

4. Diameter circuli dicitur lineâ rectâ per centrum ductâ ad peripheriam ex utraque parte. *Semidia-*

midiameter, quæ ex centro ad peripheriam ducitur.

5. Arcus dicitur pars peripheriæ circuli. Quadrans dicitur quarta totius peripheriæ pars. Complementum arcus alicujus dicitur arcus, quo à quadrante differt vel deficit: Excessus, quo excedit.

PROBLEMAT A.

6. *Data lineâ rectâ, & puncto in ea vel extra eam, ducere ex illo puncto lineam perpendicularem.* Sit data A B, punctum C. Sumatur quodvis circini intervallum, & posito pede uno circini in C, altero pede secetur lineâ in d. & f. Tunc centro d. describatur arcus supra partem df: item centro f, alius arcus priorem secans in g, & h, & ducatur gh, hæc erit perpendicularis.

7. *Circulum & peripheriam in quatuor partes secare.* Ducatur una diameter, & ex centro excutetur supra illam perpendicularis: Erit hæc quoque diameter, & secta erit peripheria cum circulo in quatuor æquales partes seu quadrantes.

8. *Peripheriam circuli in gradus dividere.* Dicitur autem gradus pars trecentesima sexagesima peripheriæ. Etenim Mathematici peripheriam in trecentas & sexaginta (360) partes secant: & gradum in sexaginta minuta prima: minutum primum in sexaginta secunda. Signum gradus est superscriptum gr. minuti primi pr. minuti secundi sec.: nempe ita 3.gr. 2.min. 5.sec. Hac ratione efficitur, ut quadrans habeat 90 gradus: semiperipheria, 180. sexta pars sit 60.

Ad absolvendum itaque Problema assumto prius quadrante circuli, sumatur intervallo circini, semidiameter circuli, & hoc intervallo auferatur

tur arcus à peripheria. Hic arcus erit sexaginta graduum, & restabunt in quadrante triginta gradus, quibus bissectis; habebis quindecim gradus, & hisce mechanicè trissectis, habebis quinque gradus, qui iterum mechanicè in quinque partes sunt secandi, quæ erunt ipsi gradus. Caterum ope instrumentorum hæc promptius & perfectius absolventur.

9. *Quadranguli rectanguli aream seu spatium contentum invenire, datis duobus lateribus quadranguli.* Multiplicetur unum latus in alterum: Productum indicabit areæ quantitatem. Sciendum autem lineas mensurari lineis, superficies seu spatia mensurari mensuris, quæ sint superficies & quidem quadratæ; corpora denique & solida mensurari mensuris, quæ sint corpora & solida Cubica. Ita latera domus mensuramur pedibus lineis, aream domus seu pavementum metimur pedibus quadratis: capacitatem domus seu soliditatem explicamus pedibus Cubicis.

10. *Data semidiametro circuli vel diametro, invenire in eadem mensura peripheriam circuli, & contrà, Data peripheriâ invenire diametrum, & quidem quam proximè.* Problematis solutio dependet ex proportionem diametri ad peripheriam, quæ juxta Archimedis Demonstrationem, ferè est ut 7 ad 22, vel accuratius, ut 10000000000 ad 31415926535. Detur itaque diameter 12 pedum. Fiat per regulam auream, ut 7 ad 22 ita 12 ad peripheriam circuli istius. Vel ut 10000000000 ad 31415926535 ita 12 ad eandem peripheriam.

Contrà, si detur peripheria, quæratür autem diameter, Fiat ut 22 ad 7 vel ut 31415926535 ad 10000000000 ita data peripheria ad quæsitam diametrum.

11. *Datâ peripheriâ circuli in pedibus vel miliaribus & diametro: Veletiam datâ solâ peripheriâ vel solâ diametro, invenire aream circuli in pedibus vel miliaribus quadratis.* Juxta primum datum, multiplicetur data peripheria in quartam diametri partem, vel semiperipheria in semidiametrum: quod producitur, erit area quæsitâ. Juxta secundum datum præstat prius invenire semidiametrum vel semiperipheriam, ex præcedenti Problemate, etsi sine hoc absolvi possit.

12. *Datâ semidiametro vel diametro globi aliqujus, invenire illius superficiem in quadrata mensura & soliditatem in cubica mensura.* Globus dicitur corpus rotundum seu solidum, in cujus medio aliquod punctum est, ex quo omnes rectæ ductæ ad superficiem sunt æquales. Et punctum hoc dicitur globi centrum. Linea per centrum dicitur diameter: Et axis, si globus circa eam diametrum volvatur, seu rotetur. Porro si globus utcumque secetur, sectio est circulus. Et si per centrum secetur seu planum duci cogitemus, erit sectio Circulus, cujus eadem diameter est, quæ ipsius globi. Et tales circuli dicuntur circuli sphaeræ seu globi Majores: reliqui circuli sphaeræ Minores dicuntur.

Ad problematis itaque solutionem, ex data diametro inveniatur primò peripheria circuli majoris. Deinde multiplicetur diameter in hanc peripheriam, producetur superficies globi in quadrata mensura.

Porro hæc superficies multiplicetur per sextam diametri partem. Quod producitur, erit soliditas globi in cubica mensura.

13. *Triangulum rectangulum dicitur, cujus unum latus alteri perpendiculariter insistit, sive*

angulum rectum 90 graduum cum eo facit. Lateralia hæc duo dicuntur catheti, tertium latus hypotenusa.

Angulorum mensura est arcus, qui describitur centro assumpto vertice illius anguli: Nimirum quot graduum est arcus ille inter cetera anguli interceptus, tot graduum dicitur esse ille angulus. Ita angulus rectus dicitur esse nonaginta graduum, quia arcus ita descriptus semper est quadrans peripheriæ circuli.

Sinus alicujus arcus dicitur recta, quæ ex uno arcus termino ducitur perpendicularis in diametrum ductam per alterum arcus terminum.

Tangens illius arcus dicitur recta tangens arcum in uno termino, & terminata rectâ, quæ ex centro per alterum arcus terminum ducitur. Hæc vero ita ducta dicitur, *secans* illius arcus.

Sinus vero anguli dicitur sinus arcus illius, qui metitur illum angulum: Ita Tangens anguli, & Secans.

Porro sciendum est, operâ & studio Mathematicorum Tabulas esse confectas, in quibus assumptâ femidiametro 100000 (vel plurium cyphrarum) reperiuntur sinus & tangentes & secantes omnium arcuum peripheriæ, ex. gr. 2 gr. 10 gr. 20 gr. 32 min. &c. Et hæ Tabulæ dicuntur *Canon Mathematicus*, habentque infinitas utilitates in omnibus Mathematicis & Physicis Scientiis. Et ideo Geographiæ studiosos pauca hæc de illis docere volui. Vfus autem ejus præcipuus est in Triangulorum mensura tam Sphæricorum, quam planorum. Sed quia sphæricorum mensura aliquam difficultatem habet, quæ illis tantum videtur necessaria qui profundius immergere se huic disciplinæ cupiunt, ideo de planis Triangulis rectan-

gulis

gulis solùm dicemus, quorum dimensionem facile capere quilibet potest & debet.

DVO THEOREMATA,

Quorum frequens usus in Geographia.

14. *Cujusvis Trianguli tres anguli simul sumti sunt aequales duobus rectis angulis sive 180 gr. & ideo duo acuti in Triangulo rectangulo faciunt 90 gr. Præterea, si linea recta tangat circularem, & ex puncto contactus ducatur recta ad centrum circuli: hæc facit angulum rectum cum linea Tangente.*

15. Problemata verò, quorum usus frequens est, sunt hæc.

16. I. *Datâ Trianguli rectanguli hypotenusa & una catheto, invenire angulum contentum vel alterum acutum.* Ad ejus inventionem fiat juxta Regulam auream, ut hypotenusa data ad datam cathetum: ita sinus totus 100000 (qui numerus est semidiameter in Tabulis sinuum assumtus) ad sinum anguli alterius. Hic sinus in Canone quæsitus monstrabit arcum seu quantitatem anguli, qui adjacet hypotenusæ. Angulus verò contentus est inventi anguli complementum ad 90 gr. Itaque si inventum angulum subtrahas à 90 gr. relinquitur angulus quæsitus.

11. *Datâ catheto & angulo acuto adjacente, invenire hypotenusam.* Fiat juxta regulam auream, Ut Sinus complementi dati anguli ad 100000 (vel 10000000 in majori Canone) ita data cathetus ad quæsitam hypotenusam.

17. III. *Datis duabus cathetis, invenire angulum alterutri catheto adjacentem.* Fiat, ut una cathetus ad alteram, ita sinus totus 100000 ad Tangentem anguli, qui adjacet primò assumtæ catheto,

18. IV.

18. IV. *Data hypotenusæ & uno angulo acuto, invenire alterutram cathetum.* Fiat, ut sinus totus 100000 ad sinum anguli, qui opponitur quæsitæ catheto, ita data hypotenusæ ad cathetum illam.

De variis mensuris.

A Quoniam in Geographia frequentissimus est mensurarum usus, & verò diversi populi diversis utuntur mensuris, ideo de illis quædam monenda sunt partim ad Veterum Geographorum & Historicorum scripta bene intelligenda, partim propter hodiernam diversarum mensurarum comparisonem cognoscendam.

Famosa mensura est *pedis longitudo*, sed apud diversos populos diversa. Vñtatus jam Mathematicis est pes Rhinlandicus Snellii, quem hic antiquo Romano æqualem esse probat. Et quoniam Snellius diligentissimus & accuratissimus fuit in terræ dimensione, ideo meritò pes ille Rhinlandicus assumitur pro regula omnium mensurarum. Ejus quarta pars est in margine appòsita A B.

Decempeda continet tales pedes decem. Dicitur & pertica. Sed hodie Geodætæ perticam Rhinlandicam faciunt duodecim pedum Rhinlandicorum vel etiam sedecim in Germania: quod valde incommodum est in calculo vel supputatione: *Milliare Hollandicum* idem Snellius facit perticarum Rhinlandicarum (12 pedum singulæ) 1500 sive pedum Rhinlandicorum (cujus quadratum apposuimus hic in margine) 18000.

Atque hæ duæ mensuræ, pertica & milliare oriuntur ex pedum multiplicatione seu aggregatione. Mensuræ vero ex pedis divisione sunt digitus,

digitus, palmus, granum. Digitus est duodecima pedis pars. Palmus continet digitos quatuor. Granum est quarta digiti: sed harum infrequens est usus. Præstat pedem in decem digitos, digitum in decem grana dividere.

Atque hæ mensuræ sufficiunt hodierno usui in Geographia: sed aliæ addendæ sunt, nempe primò Veterum, Græcorum, Romanorum, Persarum, Ægyptiorum & Recentiorum, Gallorum, Hispanorum, Italarum, Germanorum, Polonorum, Moscorum, Turcarum.

Stadium Græcorum censetur fuisse pedum Græcorum 600: qui faciunt pedes Romanos seu Rhinlandicos 625. Nam Græcus pes major paulo fuit Romano.

Milliare Germanicum (qualium Geographi quindecim attribuunt gradui uno) continet pedes Rhinlandicos 14000 $\frac{4}{9}$. Censetur passuum 4000: stadiorum 32. Ad Rhinlandicum proportio ejus est, quæ 15 ad 19.

Milliare Italicum & Romanum passuum est 1000: pedum Rhinlandicorum 4000. Octo stadia unum milliare Romani Scriptores etiam Lapidem vocant, ubi de vicinis urbi locis loquuntur.

Passus Geometricus & absolute ita dictus continet pedes quinque.

Orgyja continuissè censetur pedes sex, & Græcorum passus fuisse dicitur à nonnullis.

Cubitus pedum $1\frac{1}{2}$ fuisse existimatur.

Parasange, Persicum milliare, continuissè censetur triginta stadia: passus autem Persicos 3000.

Schœnus, Ægyptiorum mensura continet sexaginta stadia juxta Herodotum: juxta Plinium quadraginta. Verum in diversis locis fortassè diversa

versa magnitudo fuit: vel etiam stadium Herodoti à Pliniano differt: vel libri corrupti sunt.

Leuca Gallica ad milliare Rhinlandicum habet proportionem, quam 25 ad 19. Hispanica leuca ad idem milliare est, ut $17\frac{1}{2}$ ad 19. Sed quia in diversis Galliæ atque Hispaniæ locis diversa observatur leucae magnitudo, ideo hæc non sunt omnino certa.

Anglicum milliare ad milliare Rhinlandicum est, sicut 55 ad 19 vel etiam, ut 60 ad 19. Verum triplicia habent Angli milliaria. Majora, quorum $27\frac{1}{2}$ æquant gradum sive 19 Hollandica: Mediocria, quorum 50: Minima quorum 60 vel 55.

Danicum vero, & Suecicum ut 10 ad 19. in quibusdam tamen locis utuntur Germanico.

Russicum ut 80 ad 19. Vocant autem Vorest. *Turcarum milliare* sive leuca censetur æqualis Italico milliari, ita ut 60 faciant gradum.

Arabum leuca olim censetur fuisse vicesima quinta pars gradus, ita ut 25 æquarint gradum unum vel 19 milliaria Hollandica: verum aliam quoque mensuram usurparunt, cujus 56 gradum effecisse perhibentur.

Indorum milliaria centum gradui æqualia esse judicantur, etsi Indi vulgo per dierum & horarum itinera describant distantias.

Cambajenses & Guzaratensis regni incolæ utuntur mensura, quam Cosam vocant, cujus triginta faciunt gradum unum.

Sinæ tres itinerarias mensuras observant, quas vocant Li, Pu, Vchan. Li est intervallum, ex quo hominis altè clamantis vox audiri potest in planitie & aëre quieto, quod censetur trecentorum passuum Geometricorum. Pu continet decem Li, ita

ita ut viginti gradum conficiant. Decem Pu faciunt Vchan, quod unius diei iter statuunt, nempe passuum quindecim millium.

Milliare quadratum Rhinlandicum est pedum quadratorum.

Milliare Cubicum Rhinlandicum est pedum Cubicorum.

Existit autem milliaris quadrati numerus ex multiplicatione milliaris in se, & Cubicum milliare, si quadratum milliare multiplicetur per milliare simplex. Idem de pedibus quadratis & Cubicis intelligendum est.

SECTIO SECVNDA

GEOGRAPHIÆ ABSOLVTÆ,

Continens affectiones generales & absolutas totius Telluris, quinque capitibus.

CAPVT III.

De Figura Telluris.

PRima omnium Telluris affectionum est *Figura*, non tantum nobilitate, sed etiam utilitate & necessitate excellens, cum absque illius cognitione nihil in Geographia demonstrari vel cognosci solide possimus, atque omnia sequentia ex hac ferè sola dependeant & fluant. Primo itaque loco de illa agendum esse manifestum est.

Variae autem de Telluris figura extiterunt opinioniones. Etenim vulgus (hoc est homines nullâ Geographiæ cognitione imbuti) existimant, Terram latissima planitie, cujus terminus sit circularis linea, excurrere, nisi montes vel valles occurrerint. In eadem sententia fuit Lactantius, alique
Pa-

Patres, qui Tellurem infinitis radicibus deorsum extendi atque fundari acriter defenderunt, moti quibusdam sacræ Scripturæ locis malè explicatis vel intellectis. Vide Lactant. l. 3. c. 24. & Augustinum l. 16. de Civit. Dei c. 9. Sed & antiquo Philosopho Heraclito hæc sententia tribuitur: etsi hunc alii scribant Telluri attribuisse formam *σφαίρης* sive profundo excavatam alveo. Quid? quod è recentioribus prioris seculi non ignobilis Philosophus Franciscus Patricius mordicus tueri conatus est terram plano exporrigi pede. Cylin- draceam ejus formam Anaximander statuisse scribitur à Peucero: sed id verisimile non est, cum & dimensionem Telluris tentaverit & Astronomiæ peritus satis pro illius seculi ratione fuerit, quippe qui Lacedæmone Heliotropia constituit, in quibus gnomonis apex umbra sua signabat æquinoctiorum & solstitiorum diem. Leucippus tympani in modum conformatam tellurem existimasse scribitur: & sunt qui nescio quas absurdas opiniones Veteribus ascribere audent: de quibus videatur Aristoteles l. 2. de cælo c. x i i i.

Cæterùm vera & ab omnibus fere Philosophis, Mathematicis verò omnibus, defensa sententia est, Terram esse globosam seu Sphæricæ figuræ. Argumenta vero, quibus ad confirmationem hujus utuntur Scriptores, adeo obscurè & confusè proponunt ut pertinacem contrariæ sententiæ defensorum cogere nequeant. Nos itaque quantum fieri potest, clarissimè illas rationes proponemus & examinabimus, ut lectores distinctam illarum cognitionem consequantur.

Leviore primò rationes, quæ probabiles vel Sophisticæ potius sunt, rejicio, nempe has. 1. Sphærica figura est capacissima. Ergo terra debuit ta-

lem

tem figuram habuisse. 2. Omnes partes terræ tendunt ad centrum ideum. Ergo partes illæ omnes constituent figuram globosam. 3. Cum in Creatione aqua adhuc terræ esset confusa, fuit proculdubio humida & mollis tellus. Humidorum autem & liquidorum figura est sphærica. Ergo etiam telluris talis figura post separationem humidi à sicco mansit.

Hiscæ & similibus argumentis neglectis, videamus firmiter, quæ triplicia sunt. Unius & primi generis tantum est unum, quod est à priori. Reliqua duo genera sunt à posteriori, nempe quædam cælestibus apparentiis desumuntur, quædam ab aliis, quæ in Tellure observamus sine cælo. Quod primum attinet, à priori concludens, desumptum id est à natura aquæ, soletque demonstratio hæc peti vel ex Aristotele vel ex Archimede. Aristoteles libr. 2. de cæl. c. v. suam, quam tamen à præcessoribus Philosophis accepit, his verbis præloquitur: Superficiem aquæ rotundam (sphæricam) esse patebit, si suppositionem sumserimus, aquam apte natura semper ad magis concavum (declivius) locum confluere, & eum locum magis concavum esse, qui est propinquior centro. Ducantur igitur ex α centro, rectæ lineæ $\alpha\beta$ & $\alpha\gamma$, & ex β in γ linea ducatur $\beta\gamma$; ad quam ab α perpendicularis ducatur $\alpha\delta$, & protrahatur $\alpha\epsilon$. Patet itaque lineam $\alpha\delta$ esse minorem lineis $\alpha\beta$ & $\alpha\gamma$ (per 18. l. 1. Elem. Euclidis.) Ergo hic locus δ , magis concavus est. Quare affluet aqua (ex β & γ) quousque lineæ $\alpha\beta$, $\alpha\delta$, $\alpha\gamma$ sint æquales. At $\alpha\epsilon$ est æqualis $\alpha\beta$, $\alpha\gamma$. Ergo aquam istam in hisce esse, quæ sunt ex centro ductæ, necessarium est. (Nota hæc pars, At $\alpha\epsilon$ &c. nihil facit ad demonstrationem) At ea, quæ tangit eas, quæ sunt

sunt ex centro ductæ, circumferentia est. Rotunda est ergo superficies aquæ, quæ quidem est $\beta\epsilon\gamma$.

Hæc Aristotelis Demonstratio est, in qua præter confusam & malam compositionem (quæ corrigi potest) hæc animadverto. Primò quod supponit centrum aliquod universi: secundò, quod declivem magis aut minus locum sumit respectu illius centri. Hæc enim duo in dubium revocaret, qui figuram sphericam Telluris negaverit. Primum tamen de centro Universi sufficienter probari vel corrigi potest. Namque vel stellas motu quotidiano circumduci dicendum est vel terram circumrotari circa suum centrum (hoc enim motus apparens stellarum cogit.) Si stellæ, jam punctum id circa quod volvuntur, erit centrum Universi, si terra, jam punctum medium terræ sive circa quod rotatur poterit assumi in Demonstratione pro hoc puncto centrali Aristotelis. Verum præcipua difficultas est in secunda suppositione, nempe minorem vel maiorem declivitatem spectari debere respectu istius centri. Etenim qui defenderet Aquæ superficiem planam esse vel alterius figuræ, ille negaret hoc suppositum, diceretque declivitatem spectandam esse juxta nostros sensus, nempe respectu planitiei Horizontalis nostræ, juxta quam tellus infinitis spatiis in profundum extendatur: veletiam alio modo declivitatem definiret. Atque ita demonstratio hæc nihil concludit, nisi concedatur, declivitatem locorum Telluris sumendam esse respectu illius centri, circa quod apparens motus quotidianus cælestium corporum perficitur: quod etsi verum sit, possintque omnes aliæ declivitatibus definitiones, juxta quam aqua moveri dicitur, refutari, tamen

pro

pro principio admitti vix potest, cum fere supponere videatur sphaericam terræ figuram.

Alii itaque Archimedeam præferunt Demonstrationem, quæ reperitur l. i. de iis, quæ vehuntur in aqua. Hæc quidem artificiosior est quam Aristotelis: attamen iisdem laborat difficultatibus, quandoquidem Telluris Sphaericam figuram & ejus centrum supponit, ratione cujus pressuram aquæ sumit. Absit verò ut divinissimum Archimedes alicujus paralogismi arguamus, quem neque unquam decepsisse neque unquam deceptum esse scimus. Etenim Archimedi, illo libro non est propositum Telluris sphaericam figuram demonstrare (sic enim petitionem principii admisisset) sed solius Aquæ seu omnium liquorum generalem naturam contemplatur, ad quam supponit tanquam notius & ex aliis phænomenis demonstratum, Tellurem esse sphaericæ figuræ, sive habere in se centrum suum, ad quod gravia moveantur: quod miror Clavius non animadvertisse, qui Commentariis in Joannem de Sacro Bosco usurpat Archimedeam demonstrationem pro sphaerica Telluris figura asserenda. Sed & Mellius idem facit in suo Eratosthene Batavo. Alia ratio est cum Aristotele. Huic enim eo loco propositum erat, & Terræ & Aquæ & Cœli sphaericam figuram demonstrare. Quare non sine paralogismo assumere potuit terræ vel universi centrum.

Ita vidimus, argumentum à priori ab Aqua deductum, quod ab omnibus fere Geographiæ Scriptoribus usurpatur, aliquâ laborare imbecillitate: quæ an tolli possit, de eo despiciant docti Mathematici. Ego quidem integrum huic cogitationi diem attribui & varia tentavi, sed non factus sum voti compos: esset quippe validum & elegans argu-

argumentum sphaericae Telluris figurae. Seposito jam illo, afferemus argumenta à posteriori, & primo quidem à caelestibus apparentiis desumpta. 1. Concipiamus lineam meridianam nostri loci seu puncti cujuslibet B in tellure, sive sectionem telluris factam plano, quod per polos mundi M, N transit A B C D: hæc linea solet dici latitudo terræ; & quæ huic perpendicularis ducitur, longitudo, sive aliud planum Aequatori caelesti parallelum faciens in tellure lineam E B F C. Dico tam lineam A B C D, quam E B F C in tellure circularem esse. Est autem theorema Geometricum: si superficies aliqua juxta unam dimensionem secetur per quodvis punctum, fiatque sectio peripheria circuli, deinde juxta alteram dimensionem per idem punctum secetur plano, quod priori plano sit perpendiculare, fiatque sectio iterum peripheria circuli, ista superficies est sphaerica.

Quoniam itaque in superficie telluris assumimus punctum B pro libitu, & ostendemus sectionem, A B C D, E B F C esse peripherias circulares, ideo ex dicto theoremate concluditur, quod superficies telluris sit sphaerica, & Tellus sphaericum corpus.

Quod autem sectio Telluris juxta dimensionem latitudinis ab uno polo ad alterum A B C D sit circularis, probatur ex apparentiis caelestibus multis. 1. Si in hac linea A B C D, sumto loco B quovis, aliquis progrediatur versus polum alterutrum M, vel stellam ei vicinam, animadvertit in æqualibus factis itineribus, polo se æqualiter appropinquare. Hoc autem fieri non posset, nisi linea itineris B A D C esset circularis, & ostenditur commodè per globum terrestrem artificialem. 2. Quoniam A B C D est linea meridianam,

in quam cum Sol venit, merides nobis & omnibus populis in hac linea ABC habitantibus est. experientia testatur, Solem alicui loco in linea ABC perpendiculariter imminere (nempe in Zona Torrida, ut nautæ satis superque testantur) ex. gr. P , & si æqualia sumamus spatia æqualia BQ , QP (vel quævis alia) animadvertemus, solis distantiam à vertice Q , æqualem esse excessui distantiae solis à vertice B supra distantiam à vertice Q : quod fieri non posset, nisi linea BPQ esset circularis. 3. Eadem ratio est omnium stellarum, quæ cum in meridianum ABC veniunt, distantiarum earum à verticibus P , Q , B , habent eandem inter se rationem, quam distantiarum QP , PB , QP . Ita cum nautæ nostri navigant versus Austrum, stellæ quæ antea plane non erant conspicuæ & infra Horizontem, paulatim magis magisque pro navigationis proportionem altiores fiunt. 4. Ita si sumantur multæ stellæ in cœlo, & loca terræ, per quorum verticem eæ transeant, in uno meridiano, animadvertes, horum locorum distantiam habere eandem inter se proportionem, quam distantiarum punctorum Meridiani, in quibus stellæ illæ meridiem agunt. Jam quod ad longitudinem Telluris attinet, ex. gr. $EBFC$, quod hæc quoque circularis sit, & quod tellus tumorem Sphæricum juxta hanc dimensionem habeat, ex eo probatur, quoniam Sol & omnes stellæ populis, qui à nobis versus Orientem agunt, citius multò oriantur, quàm nobis & citius occidunt: illis verò, qui ad Occidentem à nobis habitant, contra, tardius oriuntur & tardius occidunt, & quidem juxta eam proportionem temporis, quam habent distantiarum meridianorum istorum locorum à nostro meridiano. Ita si duo loca à nostro sumantur, unius meridia-

ni distantia versus Orientem 225 mill. alterius 450, nempe dupla: tunc deprehendemus in hoc loco duabus horis citius Solem oriri quam in nostro: in altero verò loco tantum una horâ citius orietur. Clarius fit, argumentum, si de appulsu Solis ad meridianos diversorum locorum proponatur. Etenim quæ est ratio distantiae locorum à nostro, eadem observabitur ratio temporum, quæ intercedunt inter appulsus ad Meridianos illos & nostrum, sive inter arcus Æquatoris, inter Meridianos illorum & nostrum interceptos: quod ex Eclipsibus conspicuum fit. Hæc autem fieri, si Telluri Sphæricam figuram tribuamus, ostenditur per globum artificialem: aliæ vero figuræ ad hoc ineptæ sunt efficiendum.

Ira tam de latitudine Telluris quam longitudine Sphærica figura ostensa fuit.

Verum ex sola etiam latitudine Telluris probari potest Sphærica ejus figura, (cum aliquid difficultatis habere videatur ratio longitudinis.) Etenim quoniam omnes sectiones Telluris, quæ sunt secundum latitudinem ejus in diversis locis, sunt peripheriæ circulorum, transeunt verò per idem cœli punctum nempe polum conversionis vicinum itellæ polari, ex hisce duobus inferre licet solidè, quod Telluris figura Sphærica sit. Est enim Theorema Geometricum, quod propterea à Geometris demonstrari debet, hoc: si solidum aliquod sive corpus secetur planis utcumque multis per unum aliquod punctum transeuntibus, fiantque omnes sectiones in superficie peripheriæ circuli, istud corpus Sphæricum est.

Accedit alia non parum fortior ratio à cœlo petita, nimirum umbra, quam tellus averfâ parte à Sole spargit ad Lunam unde hæc Eclipsin patitur.

tur. Quoniam enim hæc umbra Conica est, ut ex Lunæ obscuratæ ratione declaratur, & verò, Optici demonstrant, si solidum aliquod utcunque luminoso oppositum Sphærico faciat Conicam umbram, solidum illud esse Sphæricæ figuræ, hinc rectè asseritur Sphærica Telluri figura.

Rigidè tamen si agamus, concludit Argumenta à Telluris contemplatione, pro illius rotunditate Sphærica desumpta sunt hæc.

1. A circumnavigatione. Quoniam oëties jam Europæi ex Europa solventes & directo ad Occidentem & Austrum itinere usque ad Fretum Magellanicum deinde ad Occidentem & Septentrionem iterum redierunt ab Oriente in Europam, atque omnia illis phænomena evenere, quæ à globi proprietate emanant: quod certè haud factum fuisset, si Tellus non esset globosa. Certè super hanc figuræ Telluris hypothesein omnes illæ navigationes fundatæ fuerunt, quæ propterea non ita feliciter successissent, si alia fuisset ejus figura.

2. Quando vel mari vel terra proficiscimur ab altis turribus & montibus, tunc paulatim partes turris & montium inferiores occultantur nobis usque ad ipsa fastigia, quæ ultimò occultantur. Eodem modo quando è longa distantia accedimus ad turrim vel montem excelsum, primò apex nobis se offert conspiciendum deinde partes continuæ inferiores, donec in propinquo versantibus nobis ipsa radix montis seu pes videtur. Et fit hoc apparitionis & occultationis incrementum omnino juxta talem proportionem, qualem rumor Sphæricus Telluris causari potest: neque juxta aliam figuram explicari potest. Diagramma clarius propositum efficiet.

3. Quia dimensio altitudinis montium, quæ

super hypothesin globosæ Terræ figuræ fundatur, cum rei veritate convenireprehenditur.

Cæterum ut omnium horum argumentorum à posteriori desumptorum numerum in unam summam contrahamus, (etsi Geometricè tractari possent, sed magni laboris & difficultatis ea res foret. Nam demonstrandum esset, positâ hac vel ista proprietate, lineam esse circularem) ideo Sphærica figura Telluri assignanda est, quia omnes apparentiæ tam cælestes, (ut poli elevatio diversa, diversa Solis altitudo ejusdem diei in diversis regionibus, umbrarum ratio, dierum longissimorum differentia & incrementum versus polum, stellæ plures vel pauciores apparentes circa polos, diversum ortus & occasus syderum tempus, &c.) quam Terrestres ut navigationum directio, apparitio & occultatio montium turriumque, distantia locorum, plagæ, venti, &c. commodissimè & aptè explicantur juxta illam figuram: neque alia figurâ excogitari potest, quæ id præster, ut ex consideratione variarum figurarum patet. Et noster globus factitius terrestris omnia ita exhibet, sicut in Tellure revera deprehenduntur: quod certè non fieret, si Tellus aliam haberet figuram, quam nostri factitii globi. Et quaecunque aliam formam elegeris, innumera absurda sequuntur. Namque planam non esse, ex adductis apparentiis manifestum est. Nec cavam esse posse patet ex eo, quod sol & stellæ prius occidentalibus populis quam orientalibus apparere deberet, si talis esset, sicut videmus Solem Orientem prius illustrare valles quam aversam montium partem.

Neque parum ad hoc credendum facit, quod ex omnibus corporibus solum Sphæricum simile est, hoc est cujus omnes partes inter se similes sunt,

sunt, & sibi mutuo applicari possunt, & sumtis duabus æqualibus partibus, omnes affectiones, quæ uni parti conveniunt, illæ etiam alteri competunt. Hoc autem in nullo alio corpore locum habet. Et vero in Telluris dimensione deprehendimus, cum in diversis locis eadem ratione instituat, inveniri eandem magnitudinem.

Rationum verò, quibus quidam planam figuram attribueret Telluri sunt conati, levitatem quilibet perspicere potest: Sunt enim hæc. 1. quia sereno aëre mare planum apparet, eodem modo etiam terra, si undique circumspiciamus. 2. quia nisi tellus plana figura esset, nimis ruinæ videretur obnoxia, & mobilis, sed planæ figuræ sunt stabiliores. 3. quia Sol & Luna dum oriuntur & occidunt, rectis lineis paulatim oriri & occultari videntur, debebant autem curvâ lineâ secari ab Horizonte nostro, si Tellus Sphærica vel saltem rotunda esset. Ita antiqui ratiocinati sunt, ut Aristoteles refert. 4. Quidam contra globositatem ratiocinantur ex tot montibus qui rotunditatem impediunt. 5. Quia aqua censetur altior esse quam terra. 6. Quia fieri non posse existimant, ut homines nobis oppositi consistant in Tellure, & non deorsum ad cælum cadant. Hæc cogitatio multis doctis quoque, non vulgo tantum scrupulum facit, quod vix credidissem, nisi ex ipsorum Ore aliquoties ista audivissem, qui mihi confessi sunt, etsi Sphæricam Telluris figuram non ausint neque possint propter urgentes rationes negare, tamen istum scrupulum non posse ex animo amovere, ut raceam Augustini atque aliorum Patrum sarcasmos & irrisiones. Cæterum hæc rationes à quovis facile refutantur. Montium altitudinem, nullam habere proportionem ad Terræ magnitudinem

infra demonstrabitur. Porro positâ jam & assertâ Sphæricâ Telluris figurâ, omnia illa, quæ Geometræ de Sphæra & globo demonstrarunt, Telluri accommodari poterunt & debent, ideoque centri, diametri, seu axis semidiametri, poli, circuli maximi, &c. definitiones in memoriam vocandæ sunt.

Quisnam autem primus Telluris Sphæricam figuram asseruerit, id antiquitatis tenebris obvolutum est. Sane vetustissimam esse doctrinam ex eo patet, quod Babylone ab Alexandro captâ inventæ ibi sint Eclipses annotatæ & supputatæ, ad annos ante Christum multos, quod sine hac Telluris figuræ cognitione fieri nequit. Thaleri Græco satis hoc perspectum fuisse, ex prædictione Eclipsis patet.

C A P V T IV.

De Telluris dimensione & magnitudine.

Telluris dimensio tria complectitur primaria capita. 1. Diametri seu semidiametri, hoc est lineæ à superficie ad centrum ut etiam peripheriæ, terræ sive circuitus longitudinem. 2. Superficie totius Telluris magnitudinem. 3. Soliditatem seu corpoream Telluris dimensionem. Cæterum hæc ita comparata sunt, ut uno eorum cognito, reliqua duo innotescant per Geometrica Theoremata, quoniam tellus Sphæra quædam est: ut capite 2. monstratum est. Nobilissima hæc & cognitu dignissima affectio jam à multis seculis exercuit præstantissima ingenia: ita ut quidam integros libros de hac sola materia conscripserint. Et ideo non ingratum studiosis Geographiæ fore putavi, si historiam hujus dimensionis hoc loco

loco enarrarem. Diogenes Laërtius laudat Anaximandrum Mileesium Thaletis discipulum, quod præter alia Astronomica inventa, primus quoque terræ marisque circuitum seu perimetrum descripserit: Vixit autem Anaximander circa annum 550 ante Christum natum. Ejus dimensionem secuti videntur Mathematici sequentium temporum, usque ad Eratosthenem quoniam nullius alterius mentionem faciunt scriptores: atque ideo ab Anaximandro assignatam magnitudinem eam existimo esse, quam Aristoteles annotavit in fine libri 2 de Cælo dicens: Mathematicorum etiam, qui magnitudinem orbis terræ metiri conantur, quadringentis terram cingi stadiorum millibus dicunt. Ex hac perimetro non est difficile assignare semidiametrum Telluris juxta Anaximandrum. Verum enimvero cum præter unicum illum Diogenis Laërtii locum nihil annotatum inveniamus de Anaximandri Inventione & modo, obscurata est illius diligentia, & Eratosthenis, qui post Anaximandrum hoc negotium suscepit, celebrata ab omnibus industria: Vixit hic circa annum 200 ante Christum: & ut in reliqua Mathefi & dimensionibus fuit versatissimus, ita hanc Telluris Geodæsiam accuratissimè perfecisse existimatus est, & illi primo hæc gloria ascripta. Prodidit autem perimetrum seu ambitum Telluris esse ducentorum quinquaginta mill. stadiorum (250000 alii 252000) quæ Plinius ait efficere passuum Romanorum trecenties quindecies centena millia, hoc est 31500 milliaria Romana, quæ singula censentur mille passuum.

Scripserat Eratosthenes de Geographia tres libros, qui jam non extant amplius injuriâ temporis: Strabo singulorum librorum argumenta re-

cenſet : & Cleomedes Modum annotavit , quo Eratoſthenes uſus eſt ad inventionem ambitus Telluris : in quo quid deſideretur , poſtea dicemus. Etenim Eratoſthenis demenſio à multis Mathematicis , inprimis Hipparcho (100 annis poſt Eratoſthenem) judicata eſt à vero abludere : etſi de Hipparchi dimenſione nihil perſcriptum ſit niſi quod 25000 ſtadia addiderit Eratoſthenis perimetro. Sed proximus poſt Eratoſthenem aggreſſus eſt hanc doctrinam Poſidonius , ſcientiſſimus non tantum Aſtronomus & Practicus, verum etiam in omni Philoſophiæ parte , paulo ante Chriſti Nativitatem, nempe Ciceronis & Pompeji ætate. Hic per ſuam dimenſionem invenit Terræ ambitum eſſe ſtadiorum 240000 ut Cleomedes annotavit , verùm 180000 , ut Strabo : unde magnum exiſtit dubium de cauſa hujus diſcrepantiæ inter Cleomedis & Strabonis aſſignationem : cum Strabonis hæc verior ſit , etſi paucis verbis prolata : Cleomedis autem à vero aliena, etſi multis Geodæſiam Poſidonii enarraverit. *De ipſius Modo dicemus infra.*

Cæterùm Eratoſthenis dimenſio à plurimis adhuc uſurpata eſt uſque ad Ptolomæum (anno 144 poſt Chriſtum) qui perimetrum 180000 ſtadiorum uſurpavit & veritati convenientem præ reliquis eſſe aſſeruit , ita ut à Theone hæc ipſi inventio tribuatur. Marinum quoque celebrem Geographum & cujus ſcriptis Ptolomæus multum fuit adjutus , aliquid tentaſſe in hoc negotio colligitur ex ejuſdem Ptolomæi Geographicis.

Ipſe Ptolomæus teſtatur de ſemetipſo in libr. 1. Geog. cap. 3. quod dimenſionem hanc tentaverit & quidem aliâ viâ , quàm præceſſores, in locis nimirum diverſorum Meridianorum : ſed non addit.

dit, quantam invenerit perimetrum: usurpat enim à Marino & præcessoribus acceptam 180000 stadiorum.

Post illa tempora, cum in Græcia paulatim scientiarum cultus evanesceret, nihil in hoc negotio actum, neque Romani quicquam susceperunt.

Sed Arabes & Saraceni, rerum potiti, sicut aliarum disciplinarum splendorem à Græcis ad se transtulerunt, ita hanc Mathesis partem non liquerunt intactam. Etenim (ut Snellius refert ex Abelfedea Geographo Arabe, qui circa annum Christi. 1300 floruit, & cujus scripta Romæ excusa sunt) circa octingentesimum Epochæ Christianæ annum Maimon Rex Arabum, seu Califa Babyloniorum, Matheseos studiosus, utpote qui magnam Ptolomæi Constructionem jussit ex Græco in Arabicum sermonem convertere, qui ab Arabibus dicitur Almagestus Ptolomæi, hic inquam Maimon convocatis quibusdam Mathematicum peritis mandavit, ut Terræ perimetrum scrutarentur. Ad quod peragendum campos Zinjar seu Mesopotamiæ elegerunt, atque sub eodem Meridiano à Septentrione in Austrum progressi, donec elevatio poli uno gradu decreverat, invenerunt ad amissim intervallum seu iter confectum esse 56 milliarium vel $56\frac{1}{2}$, unde conficitur perimetrum juxta eos esse 20060 vel 20340 milliarium.

Ex eo tempore ad nostrum usque seculum nemo problema hoc sollicitavit: sed Arabes plerique hanc suorum Mathematicorum dimensionem usurparunt: Latini vero cum Astronomiam tractare inciperent, adhibuerunt eam, quam Ptolomæus usurpaverat 180000 stadiorum, quæ faciunt 324000 milliaria Italica vel Germanica,

5400 milliaria, quoniam uni gradui quindecim Germanica vel 60 Italica assignata sunt cum deberent assignari 15 & $\frac{1}{2}$ quoniam 32 stadia tribuuntur circiter uni Germanico milliari: & sic perimeter foret 5625 milliar. Germanica. Ceterum ante triginta circiter annos Mathematicus insignis Snellius Professor Leydenfis, animadvertens usitatam Mathematicis perimetrum terræ vel unius gradus definitam in milliariibus quindecim magnitudinem non certa inniti demonstratione, sed dubiam esse, ideo magna prorsus industria dimensionem hanc aggressus est & feliciter perfecit, demonstrans unius gradus in terra magnitudinem esse 28500 perticarum (quarum singulæ continent duodecim pedes Rhylandicos) sive novendecim milliarium Hollandicorum, & totam perimetrum 8640 milliarium. Milliare autem definit perticis 1500, sive 18000 pedibus Rhylandicis. Hanc historiam dimensionis Telluris placuit præmittere, ut Lectores intelligant, quanta cum industria hoc negotium tractatum sit, & quanta cum difficultate conjunctum. Jam de modo ipso dimetiendi loquemur.

Innititur autem hæc Inventio figuræ Telluris, quam in præcedenti capite probavimus Sphæricam esse. Etenim concipimus Tellurem secari plano transeunte per centrum: hæc sectio efficiet circulum Telluris maximum (Sphærâ enim utunque sectâ, sectio fit circulus, si autem per centrum secetur, circulus erit maximus) & ideo hujus circuli peripheria in superficie Telluris erit ambitus seu circuitus & perimeter telluris. Et ab hujus peripheriæ magnitudine incipit hoc dimetiendi negotium. Quoniam itaque hæc peripheria, sicut alia, dividitur animo in 360 gradus (ut cap. 2. dictum)

Quam) & vero totius peripheriæ magnitudinem obire non possumus, ideo eo reducitur problema, ut unius gradus vel alterius partis, ex.gr. $\frac{1}{2}$ grad. magnitudinem in mensura cognita inveniamus cujus necessitas etiam in aliis problematibus occurrit. Peripheriam autem Telluris accipimus plerunque Meridiani circuli, quia hic facillime & minori erroris occasione determinatur per nostrum locum & Septentrionem seu stellam polarem, vel aliis modis, quos cap. XXIII. afferemus.

*Modus Primus, quo Arabes & alii
usi sunt.*

Horizon $HhRsf$ sit itaque Meridiani nostri terrestris (qui cælestis $abcd$ subjacet & concentricus est) peripheria $ABCD$. R centrum Telluris. Noster locus B . vertex b poli Telluris A , cælesti subjacens. Erit elevatio poli supra Horizontem AHa . Assumamus jam alium locum in eodem meridiano, $ABCD$ vel sub eodem $abcd$ jacentem G , vertex g , Horizon $fFRtT$. Sit jam observata accuratè elevatio poli in loco B , nempe ah vel AH . Item loci G , nempe fa vel FA . Et auferatur FA ab HA , relinquitur HF , cui arcus BG inter loca interceptus est æqualis. Deinde intervallum inter BG accurate metiendum est in certa mensura, ex. gr. quot perticas contineat, vel quot milliaria. Hæc enim respondunt arcui BG , Et per regulam auream ut BG ad $ABGcd$ 360 gr. ita inventum intervallum vel perticæ vel milliaria ad perticas vel milliaria totius perimetri $ABGCD$: Vel ut BG arcus ad unum gradum ita inventæ perticæ vel milliaria ad perticas vel milliaria, quæ debentur uni gradui.

N O T A. Si intervallum BG non placeat metiri, sed vulgi determinationem sequi placet, tunc juxta illud iter determinanda est quantitas. Ex gr. Vni gradui respondere quindecim milliaria talia, qualia inter BG sint decem, &c.

Exemplum. B Amstelodamum, ubi Elevatio poli AH, ah est 52 gr. 23 min. G sit Schoonhoven jacens cum Amstelod. sub eodem meridiano, cujus Elevatio poli Af, af est 51 gr. 54 min. Est itaque fh vel BG, 29 minut. Distantia autem inter Amstelod. & Schoonhoven est $9\frac{1}{4}$ milliar. Holland. vel perticarum Rhinland. (12 ped.) 13875. Itaque ut 29 minut. ad 60 min. vel 1 gr. ita $9\frac{1}{4}$ ad 19 mill. Holl. Ergo 19 mill. Hollandica faciunt gradum unum in peripheria Telluris. Et 360 gr. sive tota peripheria est milliar.

Vel: intervallum BG censetur $7\frac{1}{4}$ milliarium Germanicorum (debet unum censi 1900 perticis Rhynlandicis). Itaque fiat: ut 29 pr. ad 60 pr. ita $7\frac{1}{4}$ ad 15 milliaria talia Germanica. Itaque 1 pr. facit 15 milliar. Germanica. Ita Pragæ Elevatio, poli est 50 gr. 6 min. Lincii. 48 gr. 16 min. Different. BG erit 1 gr. 50 min. Et censetur distare 26 mill. Germanica. Itaq; perimenter erat 5105 milliarium. Et totus circuitus telluris 5400 milliar.

Modus secundus, Eratosthenis.

Sint iterum duo loca telluris in eodem Meridiano. B sit Alexandria Ægypti, ubi Eratosthenes Regiæ Bibliothecæ præfectus vixit. G sit Syene, urbs Ægypti sub Tropico Cancræ, quam Eratosthenes in sua dimensione elegit, & distantiam ejus ab Alexandria assumsit 5000 stadiorum. Observetur quadrante jam in ambobus locis uno eodemque

demque die in meridie Solis quando in lineam meridianam abcd venit, distantia à verticibus b, g. Sit Alexandria die solstitii, 21 Junii observata gf seu GF, $\frac{1}{50}$ peripheriæ sive 7 gr. 12 min. In Syene autem sit nulla distantia, hoc est Sol verticis eorum g imminet perpendiculariter. Erit itaque BG arcus inter duo hæc loca interceptus 7 gr. 12 min. Et quia distantia ponitur 5000 stadior. (quorum 8 faciunt milliare Italicum vel 32 Germanicum.) Itaque juxta regulam auream erit ut 7 gr. 12 pr. ad 1 gr. (vel ut $\frac{1}{50}$ ad $\frac{1}{360}$ sive ut 5 ad 36) ita 5000 ad 694 $\frac{4}{9}$ stadia, quæ debentur uni gradui. Vel ut $\frac{1}{50}$ ad 50 sive ut 1 ad 50, ita 5000 ad 25000 stadia totius peripheriæ ABCD, juxta hanc dimensionem. Cæterum cum diversi sint modi ad altitudinem Solis meridianam, & distantiam à vertice gb sumendam, Eratosthenes illud fecit per Sciathericum cavum sphericum, quod Scaphen & Scaphium appellarunt, ubi stylus BX indicat verticem OXZ radius solis umbram styli terminans designat arcum BZ, quantus est Ob distantia solis à vertice, 7 gr. 12 pr. Alexandria: Sed in Syene stylus GX nullam umbram spargit eo die: quia Sol O illi perpendiculariter imminet, & ideo nulla tunc Solis à vertice est distantia. Quoniam itaque Angulus BXZ est æqualis angulo bxo, cujus mentura est bO sive BG, ideo BG æqualis est BZ, 7 gr. 12 pr. vel $\frac{1}{50}$ peripheriæ. Reliqua peraguntur ut dictum est.

Modus tertius Posidonii.

Sint duo loca B. G sub eodem Meridiano. Posidonius sumsit B, Rhodum, ubi ipse vixit & G Alexandriam Aegypti. Observetur in his duobus

locis, stellæ alicujus S, altitudo, quando in Meridianum venit, supra Horizontem: idque eadem die vel diversis diebus. Nihil enim refert. Posidonius sumsit stellam S Canobum, fulgentem & primæ magnitudinis in Argo navi. Hæc autem supra Horizontem h H S Rhodi non oriebatur, sed tantum stringebat Horizontem in S: Sed supra Alexandrinum Horizontem FR t, elevata erat arcu t S, $\frac{1}{4} \frac{1}{8}$ totius peripheriæ, sive 7 gr. 30 min. Itaque arcus T s, hoc est BG, distantia erit etiam 7 gr. 30 min. Est autem juxta ipsum intervallum Rhodi & Alexandria 5000 stadiorum. Itaque ut 7 gr. 30 min. ad 1 gr. sive ut $\frac{1}{4} \frac{1}{8}$ ad $\frac{1}{3} \frac{1}{6} \pi$, hoc est, ut 48 ad 360 ita 5000 ad $666 \frac{2}{3}$ stadia, quæ debentur uni gradui. Vel ut 1 ad 48 ita 5000 ad 240000 stadia totius perimetri telluris juxta hæc Posidonii hypotheses.

Modus Quartus, Snellii.

Quia in prioribus Modis assumimus duo loca B, G sub eodem meridiano jacentia, & verò loca commoda ad hoc negotium sub diversis meridianis jacere possunt, ideo de hoc quoque casu exemplum proponendum esse duximus, & quidem Snellii.

Sit itaque ABCD Meridianus Alcmariæ, B Alcmaria. Elevatio poli h a 52 gr. 40 $\frac{1}{2}$ min. distantia à polo BA 37 gr. 19. min. 30. sec.

Alter locus sit P, Berga ad Zomum, Meridianus AP VV. distantia à polo, hoc est complementum Elevationis (51 gr. 29 min.) AP, est 38 gr. 31 min. Itaque ducta PG perpendiculari ad ABG, differentia distantiarum à polo est BG, 71 min. 30 sec. vel 1 gr. 11. min. 30. sec.

Por-

Porro distantiam Almaria à Berga, B P, Snellius invenit geodæsiâ operosâ 34710, perticarum Rhinlandicarum: Et angulum positionis P B G 11 gr. 26 min. 2 min. Itaque in Triangulo rectangulo P B G, datur hypotenusâ B P & angulus P B G. Itaque per probl. cap. 2. invenitur B G 34018, (pro quibus Snellius assumit 33930. Nam detrahit 88 perticas propter stationes elevationum poli) Est autem arcus B G $71\frac{1}{2}$ scrupulorum, differentia Elevat. poli. Itaque ut $71\frac{1}{2}$ min. ad 1 gr. vel 60 min. ita 33930 (vel 34018) ad 28473 perticas pro uno gradu, vel ad numerum rotundum, 28500, sive 19 milliar. Holland. Qui sphaericam Trigonometriam callent, Ex datis, A B, A P, angulo A B P possunt invenire arcum B P 1 gr. 14 min. qui cum æquentur perticis 34710, erit 1 gr. æqualis perticis 28300 perticarum seu 18 milliar. & $\frac{4}{5}$. Sed quod hic numerus à Snelliano differt, causa est 1. quod Snellius non ipsa puncta turrium B, P, ex quibus angulum G B P est adeptus, tum sit pro elevationibus poli cognoscendis, sed loca seu ædes paululum remotas ab iis. Vid. eum p. 197. Eandem tamen inventum iri polorum altitudinem in turribus nemo potest dubitare. Altera causa est, quod lineas B G, B P, P G assumit rectas, quæ tamen rectæ non sunt, etsi parvam & nullius momenti differentiam videatur hæc discrepantia creare. Sed assumatur Snelliana quantitas gradus 28500 perticarum (meæ 28300 perticarum) hæc faciunt $19\frac{1}{5}\frac{4}{5}$ mill. (meæ 18 $\frac{4}{5}$ milliar.) Erit perimeter seu ambitus juxta Snellium 10,260,000 pertic. vel 123,120,000 pedum, vel 8640 milliar. Holland.

Quintus modus, primus Terrestris.

Tres sequentes modi terrestres sunt, sine cœlo & meridiana linea opus perficientes. Sit BP montis vel turris altitudo: hæc geodætica ratione inquirenda est. Dein termini remotissimi, à quo videri potest, vel qui ex eo videri potest, distantia PS. Et licet PS recta non sit, tamen quia totius telluris peripheriæ minima portio est, ideo pro rectâ sumitur: & Triangulum BPS rectangulum: in quo ex datis BP, PS invenitur angulus BSP, cui æqualis est PRS, cujus mensura est arcus SP. Itaq; ut hic arcus ad unum gradum ita inventa distantia PS ad quantitatem unius gradus. Ex. gr. sit BP altitudo 480 passuum sive $\frac{1}{8}$ circiter milliaria Germanici. Et distantia PS puncti S, quod visum terminat, sit 40000 passuum vel 10 milliarium Germ. Itaque juxta probl. cap. 2. fiat: Vt $\overset{PS}{40000}$ pass. ad PB. 480 pass. ita $\overset{\text{Sin. Tot.}}{10000000}$ ad 11904. Tangentem anguli BSP vel SRP vel arcus SP, nempe 41 m. Itaque ut 41 m. ad 60 m. ita 40000 pass. ad 59000 passus hoc est 15 milliaria circiter pro uno gradu.

Vel sine Tabula sinuum & sine perimetri inventionem potest inveniri semidiameter PR. Etenim ut BP ad PS ita PS ad PR ut 480 ad 40000, ita 40000 ad 3333333 passus pro semidiametro RP.

Modus sextus, secundus Terrestris, sine distantia cognitione.

Verum eadem semidiameter RP etiam hoc modo concludetur & invenietur. Sit PB turris excelsa, nimirum ex foramine B demissa bolide deprehendatur altitudo 100 pass. (Vel si montis

PB

P B altitudo sit cognita ex alia geodæsia 4000 passuum. Deinde adhibitò in fastigio B instrumento inveniatur angulus ultimi visus, P B S 88 gr. 37 min. Itaque B R S erit 1 gr. 23 min.

Ex Canone Sinuum sumatur sinus 88 gr. 37 m. Et hic subtrahatur à sinu toto 10000000.

Fiatque ut Residuum ad sinum 88 gr. 37. min. ita B P 1000 passuum ad semidiametrum S R in passibus.

Modus septimus, tertius Terrestris.

Hic modus prioribus accuratior & ad praxin accommodatior videbitur, adhibens duos montes, vel altitudines quorum non altitudo sed distantia cognita sit, quæ geodætica inveniri potest. Sit B P una altitudo, mons, turris, arx &c. S T altera, distantia T P sit quinque milliarium Germanicorum. Inveniatur per Instrumentum angulus B T R 89 gr. 45 min. & in altero monte T B R 89 gr. 55 min. Erit angulus P R S 920 min. (quia tres anguli T, B, R æquantur duobus rectis 180 gr.) Quare juxta regulam auream ut 20 gr. ad 60 gr. ita 5 milliaria ad 15 mill. pro uno gradu.

Hi sunt præcipui modi telluris dimetiendæ. Namque ex inventa unius gradus mensura, tota perimeter, diameter, superficies & soliditas invenitur ita.

Quoniam perimeter juxta Snellium est 8640 mill. Holl. vel 10,260,000 pertic. Rhinlan. vel 123,120,000 pedum. Ideo per probl. c. 2. invenitur semidiameter Telluris 1088 $\frac{3}{4}$ milliar. vel pertic. 1633190 vel pedum 19598300. Superficies telluris 1881353 $\frac{3}{5}$ milliar. Holl. quadrata.

Et tota soliditas est milliarium Cubicorum 40956831512. Ve-

Verum quoniam usitator est supputatio per Germanica milliaria, quorum quindecim unum gradum constituent, ideo hæc adhiberi possunt, sed cum hac conditione, ut talia intelligantur milliaria, quorum xv faciant xix milliaria Hollandica, sive ut unum milliare contineat perticas Rhinlandicas 1900, vel pedes Rhinlandicos 22800.

Erit itaque peripheria seu circuitus telluris talium milliarium 5400: semidiameter 860: superficies 9278181 mill. quadrat. Soliditas 265693384 milliarium Cubicorum.

Commodissima vero sunt Italica milliaria, quorum sexaginta uni gradui solent attribui. Sic enim aptè unum milliare respondet uni minuto gradûs. Sed debet tale milliare Italicum intelligi, quod habeat perticas Rhinlandicas 475. Sic erit circuitus telluris talium milliarium 21600: semidiameter. 3440. Hisce ita expositis, causæ afferendæ sunt, cur autorum recitatæ antea dimensiones ita discrepent, & quid in singulis desideretur.

In primo Modo hæc occurrunt. 1. Quod in sumenda elevatione poli erretur. 2. quod de locis sub eodem Meridiano dubitari possit. 3. quod distantia non distincte explicetur. Et quia Arabes hoc modo usi sunt, ideo quæ in eorum dimensionibus desiderantur sunt hæc. 1. Ignota nobis est exacta magnitudo milliaria eorum (4000 cubitorum est juxta Alfraganum.) 2. Non indicarunt loca, quorum elevationes sumserunt, & ideo de illorum diligentia non possumus inquirere. 3. Nec modum quo distantiam mensi sunt, indicarunt.

In Eratosthenis Dimensione hæc animadvertionem merentur.

1. Quod arcui invento BZ 7 gr. 12. min. non addi-

addidit 15 min. pro arcu inter radium Solis XZ & verum centralem radium, qui sumendus fuisset, intercepto.

2. Quod Syenen & Alexandriam sub eodem Meridiano jacere non probavit.

3. Quod umbrarum terminus non accurate possit notari, & præterea loca circa Syenem ad 150 stadia hoc habeant, quod sine umbra sit stylus.

4. Quod distantiam inter Syenen & Alexandriam assumptam juxta vulgi opinionem, quæ *ἀνεξι-
σταστον* non curat: Neque stadiorum magnitudo nobis certo confiet.

In Posidonii Modo hæc vitia inesse censentur.

1. Quod Canobum non attolli existimaverit supra Rhodi Horizontem, cum tamen 2 gr. attollatur: certè non potuit scire, quod accurate stringat.

2. Quod distantiam inter Rhodum & Alexandriam per conjecturas & vulgaria itinera determinavit.

3. Quod ipsius stadiasmus non satis determinatus sit.

4. Quod dubium sit, An Alexandria & Rhodus sub eodem Meridiano jaceant, &c.

In Modis terrestribus hic inest defectus, i. quod facile peccetur in montium exacta dimensione.

2. Extremum visus punctum accurate sciri non potest, tum propter refractiones, tum propter oculorum debilitatem.

Hæc de Telluris circuitu maximo, semidiametro, superficie & soliditate dixisse sufficiat. Possemus ex soliditate de pondere eius judicare, si corpus simile esset: sed quoniam diversi ponderis partes, quarum proportio nos latet, illi insunt, idco non nisi factâ suppositione pondus determinari potest.

Anim-

Animadversione dignum est, quod Telluris semidiameter sit modulus & mensura omnium cælestium dimensionum tam in assignandis distantis planetarum à Tellure & à se invicem, quam in magnitudine eorum supputanda. Ita dicimus Solem abesse à Tellure Semidiameteris 1200 circiter Lunam 40 &c.

Cæterum cum in Geographia non tantum majores Telluris circulos, ut Æquatorem &c. sed etiam parallelos Æquatoris consideremus, ideo etiam determinandum, quot milliaria vel perticæ respondeant uni gradui in singulis parallelis. Perticarum numerationem ex Snellio desumimus: milliaria ipse supputavi: nempe 1900 pert. pro milliaria German. 1500 pro Belgico, sed 475 pro Italico.

Tabula quantitatis unius Gradus in singulis Parallelis.

Gradus, quibus paralleli distant ab Æquatore, sive Elevatio poli parallelorum.

	Perticæ unius gr.	Milliaria Holland. <i>mill. part.</i>	Milliaria German <i>min.</i>	Milliaria Italica. <i>min.</i>
Æquat.	28500	19.	15. 0	60.
1	28496	18. 1496	14. 59	59. 56
2	28483	18. 1483	14. 59	59. 55
3	28461	18. 1461	14. 58	59. 52
4	28431	18. 1431	14. 57	59. 50
5	28392	18. 1392	14. 56	59. 46
6	28344	18. 1344	14. 55	59. 40
7	28288	18. 1288	14. 53	59. 37
8	28223	18. 1223	14. 51	59. 24
9	28149	18. 1149	14. 48	59. 12
10	28067	18. 1067	14. 46	59. 4

Lati- tudo.	Perticae unius gr.	Milliaria Holland. <i>mill. part.</i>	Milliaria German. <i>min.</i>	Milliar. Italica. <i>min.</i>
11	27976	18. 976	14. 43	58. 52
12	27877	18. 877	14. 40	58. 40
13	27769	18. 769	14. 37	58. 28
14	27653	18. 653	14. 33	58. 12
15	27529	18. 529	14. 29	58.

16	27653	18. 453	14. 25	57. 40
17	27255	18. 255	14. 21	57. 20
18	27105	18. 105	14. 16	57. 4
19	26947	18. 0	14. 11	56. 44
20	26781	18.	14. 6	56. 24

21	26607	17. 1107	14. 0	56. 0
22	26425	17. 925	13. 54	55. 36
23	26234	17. 734	13. 48	55. 12
24	26036	17. 536	13. 42	54. 48
25	25830	17. 330	13. 36	54. 24

26	25616	17. 116	13. 29	54. 0
27	25394	16. 1394	13. 22	53. 28
28	25164	16. 1164	13. 15	53. 0
29	24927	16. 927	13. 7	52. 28
30	24681	16. 681	13. 59	51. 56

31	24429	16. 429	12. 51	51. 24
32	24169	16. 169	12. 43	50. 52
33	23902	15. 1402	12. 35	50. 20
34	23628	15. 1128	12. 26	49. 44
35	23346	15. 846	12. 17	49. 8

36	23057	15. 557	12. 8	48. 32
37	22761	15. 261	11. 59	47. 56
38	22458	15.	11. 49	47. 16
39	22149	14. 1149	11. 39	46. 36
40	21832	14. 832	11. 29	46.

Latitudo.	Perticæ unius gr.	Milliaria Holland. <i>mill. pari.</i>	Milliaria German. <i>min.</i>	Milliar. Italica. <i>min.</i>
41	21509	14. 509	11. 19	45. 16
42	21180	14. 180	11. 9	44. 36
43	20843	13. 1343	10. 58	43. 52
44	20501	13. 1001	10. 47	43. 8
45	20152	13. 652	10. 36	42. 24
46	19798	13. 298	10. 25	41. 40
47	19437	13. 0	10. 14	41. 0
48	19070	12. 1070	10. 2	40. 8
49	18698	12. 698	9. 50	39. 20
50	18319	12. 319	9. 38	38. 32
51	17936	11. 1436	9. 26	37. 44
52	17546	11. 1046	9. 14	37. 0
53	17152	11. 652	9. 2	36. 8
54	16752	11. 252	8. 49	35. 26
55	16347	10. 1347	8. 36	34. 24
56	15937	10. 937	8. 23	33. 32
57	15522	10. 522	8. 10	32. 40
58	15103	10. 103	7. 57	31. 48
59	14679	9. 1179	7. 44	31. 0
60	14250	9. 750	7. 30	30. 0
61	13817	9. 317	7. 16	29. 4
62	13380	8. 1380	7. 2	28. 8
63	12939	8. 939	6. 48	27. 12
64	12494	8. 494	6. 34	26. 16
65	12045	8. 45	6. 20	25. 20
66	11592	7. 1092	6. 6	24. 24
67	11136	7. 636	5. 52	23. 28
68	10676	7. 176	5. 38	22. 32
69	10213	6. 1213	5. 23	21. 32
70	9748	6. 748	5. 8	20. 32

Lati- tudo.	Perticae unius gr.	Milliaria Holland. <i>mill. part.</i>	Milliaria German. <i>min.</i>	Milliaria Italica. <i>min.</i>
71	9279	6. 279	4. 53	19. 32
72	8807	5. 1307	4. 38	18. 32
73	8333	5. 933	4. 23	17. 32
74	7846	5. 346	4. 8	16. 32
75	7376	4. 1376	3. 53	15. 32
<hr/>				
76	6895	4. 895	3. 38	14. 32
77	6411	4. 411	3. 23	13. 32
78	5925	3. 1425	3. 8	12. 32
79	5438	3. 938	2. 52	11. 28
80	4949	3. 449	2. 36	10. 24
<hr/>				
81	4458	2. 1458	2. 20	9. 20
82	3966	2. 966	2. 5	8. 20
83	3473	2. 473	1. 50	7. 20
84	2979	1. 1479	1. 34	6. 12
85	2484	1. 984	1. 18	5. 12
<hr/>				
86	1988	1. 488	1. 3	4. 12
87	1492	0. 1492	0. 47	3. 12
88	995	0. 995	0. 31	2. 4
89	497	0. 497	0. 16	1. 4
90	0	0. 0	0. 0	0. 0

De Motu Telluris.

MOTUS Telluris Pythagoricus sive circumrotatio, (non tremor vel concussio illa) causa est plerarumque apparentiarum cœlestium juxta capernicanos, cum sine illo unusquisque locus perpetuam harum constantiam habiturus fuisset. Sed nulla est Telluris affectio, de qua major atque severior sit disputatio, cum etiam non ita dudum censuram Romanæ Ecclesiæ passa sit. Quoniam autem admodum verisimile multis videtur, eum dari, ideo paucis eum explicare conabor.

Solem, Lunam, omnesque cœli stellas apparere singulis diebus, hoc est spatio 24 horarum ab Oriente ad Occidentem moveri, & ad eadem fere cœli loca redire, nemini vel ex vulgo ignotum est. Oportet itaque vel ipsas moveri revera, vel nos moveri, atque nostrum motum imputari stellis. Etenim si duæ res distantiam mutant, alterutrâ ad minimum mota fuit, quod axioma manifestissimum est.

Terram stare, stellas cum cœlo moveri, vulgaris fuit & est opinio Astronomorum, qui Ptolomaici vocantur: sed stellas suum constanter tenere locum, & terram circumgyrari circa suum centrum olim defenderunt Pythagorici, quorum unus fuit celeberrimus Aristarchus Samius, qui propter hujus placiti defensionem ab adversario & inimico suo accusatus est violatæ religionis coram Areopagitis, sed absolutus judicium sententia. Cæterum paucos reperit adstipulatores hoc dogma, ita ut multis seculis oblivione quasi sepultum fuerit: adeò nulla ejus in scholis vel mentio facta, donec.

donec Copernicus Astronomus insignis ante duo circiter secula magnum ei conciliavit nomen, atque effecit, ut plurimi Astronomi & quidem excellentes dogma hoc amplecterentur atque multis rationibus confirmarent: inter quos non ita pridem floruerunt Dominus Keplerus Cæsarum Mathematicus, Galilæus de Galilæo Italus, & Magni Hetruriæ Ducis Mathematicus, & Lansbergius Belga. Et quoniam duplex nobis deprehenditur cælestium corporum motus, primus, quo omnes stellæ tam fixæ quam planetæ pari tempore, nempe 24 horis, circa tellurem ferri videntur, atque oriri, meridiem agere & occidere: Secundus, qui proprius dicitur, quò planetæ diverso motu ab Occidente ad Orientem, ut etiam stellæ fixæ ferri observantur: Ptolomaici utrunque hunc motum ipsis Stellis seu Orbibus inesse affirmant: Copernicani autem primum illum motum solius Telluris non circumlationi de loco in locum, sed ejus in loco suo manentis rotationi circa suum axem ab Occidente in Orientem (qualis omnibus stellis indita videtur) ascribunt: Secundo autem illo motu stellas fixas & Solem etiam liberant, & horum apparentes motus Telluris circumlationi circa Solem atque axis inclinationi attribuunt, reliquis tamen planetis eum relinquunt: nimirum Solem planetam esse negant, sed Tellurem in ejus locum reponunt: Solem vero in Ptolomaicum Telluris locum, nimirum Centrum totius mundi (subtilem illam differentiam Copernici non jam specto), utpote qui Telluri, Saturno, Jovi, Marti, Veneri & Mercurio sit causa circum-

Rationes hujus dogmatis sunt hæ.

1. Quoniam tantus est numerus stellarum, quæ

C

horis

horis 24 circa Tellurem circuitum videntur perficere, & hæc apparentia per unius Telluris manentis in suo loco motum explicari potest, ideo magis rationi consentaneum est, hunc statuere, quam illum: sicut nobis in navi sedentibus, & appropinquantibus ad stationem multarum navium, quæ apparent nobis appropinquare, non ideo hisce motum ascribimus. Et omnino cum natura non soleat facere per plura, quod per pauca potest, verisimile est, in hac quoque re illud observatum esse.

2. Quia incredibilis & omnem cogitationem superans celeritas, motus stellarum illius foret: Etenim cum infinito ferè spatio à Tellure absint & vastissimus orbis illis percurrendus sit, uno horæ minuto ad minimum per centena millia milliarium ferri deberent. Contra, si Telluri motus ascriberetur hic primus, manet hæc in suo loco neque de minima celeritate timendum est, quia circa suum axem rotatur.

3. Accedit argumento huic majus robur, si comparemus vastitatem corporum cælestium cum terrestri. Etenim cum Sol ad minimum ducenties major sit Tellure, stellæ verò fixæ vel millies majores, cui non verisimilius fiat, Tellurem rotari circa suum axem motu naturali, quam tanta corpora incredibili pernicitate de loco in locum moveri?

4. Quoniam omnes Astronomi illustriores cum Tychoe coacti apparentiis jam negant Orbes solidos, quibus antiqui ad faciliorem stellarum motus hypothesin utebantur, ideo multò incredibilior videtur illarum circumlatio circa Tellurem. Negant autem orbes solidos, quia si hi essent, concedenda esset penetratio orbium mutua, cum

quidam

quidam planetæ in alterius alicujus sphaera deprehendantur frequenter.

5. Nulla ratio reddi potest, cur stellæ circa Tellurem moveantur, cum contra, cur Terra & reliqui planetæ circa Solem cum reliquis planetis moveantur, aliqua possit dari ratio.

6. Quia nec polus, nec axis est realis circa quem stellæ ferri ponuntur: contra in Tellure & polus & axis est.

7. Quia multo facilior est navigatio ab Occidente in Orientem, quam ab Oriente in Occidentem. Etenim ex Europa in Indiam navigatur mensibus circiter quatuor, ex India in Europam reditur sex mensium spatio circiter. Nimirum quia in illa navigatione in eandem plagam cum Tellure moventur: in hac verò in contrariam.

8. Quia omnes apparentiæ cœlestes, ortus, occasus syderum, dierum incrementum, &c. possunt explicari, si Tellurem moveri ponamus. Inprimis autem hujus hypothesis commoditas & necessitas conspicitur in admirandis illis Planetarum affectionibus, ad quas explicandas Ptolomaici multos circulos Epicyclos & Eccentricos sine ulla ratione excogitare coguntur: Copernicani autem illas ex Telluris motu secundo circa Solem facili negotio deducunt ita, ut manifestam illarum causam reddant & adeo facilem, ut vel indocti illam capere possint, nimirum 1. Cur planetæ interdum retrogradi videantur, & quidem Saturnus sæpius & diutius quam Jupiter, Jupiter quam Mars, &c. interdum celeriori motu ferri, interdum stationarii esse. 2. Cur Venus & Mercurius nunquam possint tota nocte conspicui esse. 3. Cur Venus nunquam majori à Sole intervallo, quam sexaginta graduum, Mercurius non majori, quam

triginta graduum intervallo discedat, & ideo nunquam oppositi conspiciantur Soli. 4. Cur Venus ejusdem diei & vespere post solem & mane ante Solem possit conspici.

Plures apparentias afferre superfedeo: sed illæ præcipuæ sunt, ex quibus ego existimo argumentum magni momenti peti hujus motus Telluris, cum per hunc adeo apposite & jucunde explicentur, ut admirandum potius esset, si Tellus non moveretur talibus apparentibus phænomenis.

Hæc sunt faciliora argumenta, quibus Copernicani Motum Telluris evincere volunt, quæ etsi Apodictica non sint, tamen admodum probabilem reddunt hanc hypothesein præ illa, quæ cælum moveri ponit. Alterutrum enim admittendum est.

Illæ vero rationes, quas quidam in contrarium afferunt, facili negotio dissolvuntur: sunt enim hæc. 1. Terram esse ineptam ad motum propter gravitatem. 2. Partes telluris moveri naturaliter motu recto ad centrum, ideo circularem motum esse contra naturam ejus. 3. Si tellus moveretur, lapidem è turri demissum non posse cadere ad pedem turris. 4. Globum è tormento explosum versus Orientem ad metam aliquam, (vel etiam si avis quædam ad Orientem volaret) non posse hanc attingere, si meta cum tota Tellure versus Orientem moveretur. vel saltem celeriolem fore attactum, quam si ad Orientem emissus esset globus. 5. Neque turres neque ædificia consistere posse, sed propter illum Telluris motum collapsura esse, neque homines à vertigine innumes fore. 6. quia videmus, inquirunt, stellas mutare locum, non autem Tellurem: 7. Quia tellus est in centro mundi: centrum autem non movetur.

8. Quia

8. Quia Sacrae literæ stabilitatem Telluris confirmant.

Etenim ad hæc Copernicani respondere solent hunc in modum. Ad primum, negando totam Tellurem gravem esse: namque gravitas est partium ad totum homogeneum tendentia: & talis gravitas quoque in Lunæ partibus & Solis detecta est, neque tamen Luna vel Sol gravis dicitur.

Ad secundum dicunt, motum illum rectum esse partium Telluris, non totius Telluris, atque hujus circulem motum non impedire illarum rectilinetam lationem, quod declaratur à partibus Lunæ & Solis.

Ad tertium respondetur triplici modo. 1. Primo enim gravia talia non ad centrum primario feruntur ad ipsam tellurem, & ideo brevissimâ lineâ ad superficiem ejus: brevissima autem est hæc, quæ turri respondet sicut ferrum non ad centrum magnetis, sed ad magnetem tendit: 2. Totus aër adhæret Telluri & cum hac movetur, ideo etiam talia gravia demissa simul hunc circulem motum acquirunt & moventur tanquam in vase. 3. Gassendus crebrâ experienciâ demonstravit, quod si ex moto corpore aliquid projiciatur, hoc projectum etiam illo motu corporis moveri, ex. gr. lapidem dejectum è fastigio mali navis celerimè motæ, tamen non relinqui à navi, sed ad pedem mali decidere: Et è pede mali explosum perpendiculariter è sclopeto globum, rursus perpendiculariter decidere. Itaque allata objectio nihil valet.

Ad quartum respondetur eodem modo, ut ad tertium.

Ad quintum dicimus tale quid locum non habere, quia motus est æquabilis, nec in aliud cor-

pus impingit, & ædificia tanquam corpora gravia & Telluri homogenea moventur tanquam in navi. Etenim in navi celerissime etiam vel tardissime mota, si modo æquabilis sit navigatio, hoc est sine fluctibus & aquæ planâ deprehendimus erecta corpora non everti, imo pocula vino plena nihil effundere. Ad sextum, dicimus mutationem loci stellarum non sentiri, sed situs respectu nostri mutationem deprehendimus: potest autem hæc situs mutatio animadverti & esse, sive nos cum tellure sive nobis immotis stellæ moveantur, vel etiam & nos & stellæ.

In septima objectione & major & minor falsa est, vel saltem dubia.

Ad octavum responderetur, 1. Scripturam Sacram in rebus physicis loqui secundum apparentiam & vulgi captum, ex. gr. quando Luna cum Sole dicitur magnum luminare quod ad noctem illustrandam creatum sit, cum tamen nec Luna magna sit, respectu stellarum & telluris nec proprium lumen habeat, neque omnibus noctibus illuminet terram. Ita Solem ab extremitate ire & ad extremitatem redire dicit Scriptura, cum tamen revera talis extremitas nulla sit. Ita in Iobi libro attribuitur Telluri figura plana & quadrata, cui columnæ sint suppositæ, quibus innitatur, quod quidem haudquaquam ita intelligendum esse, vel vulgus novit. Plura loca adduci possent: sed sufficiunt hæc. Namque sacræ literæ nobis non ad philosophandum sed ad pietatem colendam concessæ sunt. 2. Loca quædam Scripturæ adduci solent, quæ non de immobilitate ejus, sed de constantia & duratione loquuntur, ut locus ille quem è Jobo attulimus.

Ita paucis enarrayimus, qualis sit motus, qui
à Co-

à Copernicanis Telluri ascribitur, cujus accuratior explicatio in Astronomia solet adhiberi. Eò autem supposito, applicanda erunt ad Tellurem omnia illa, quæ in circumrotato globo spectari solent, nempe: Axis, circa quem rotatur est una ex diametris; Poli, sunt extremitates axium seu duo puncta, quæ non moventur; tertio circulus maximus seu periphæria, juxta quam fit circumrotatio, & ejus paralleli. Nunc de quantitate illius motus seu celeritate videamus. Motus primus, quo circa suum axem Tellus convertitur, non potest in tota Tellure spectari, sed in diversis locis diversus est, nempe quò locus Æquatori propior est, eò majori celeritate & spatio movetur, quò propior polo, eò tardius & minori spatio; maximus verò est in locis, quæ in Æquatore jacent. Etenim quoniam viginti quatuor horis quilibet telluris locus circumvolvitur per periphæriæ integræ spatium, nempe 360 gradus, ideo spatium unius horæ invenitur, si 360 dividantur per 24, quotus enim est, quindecim graduum: Hi gradus sunt, quibus locus in Æquatore vel extra eum jacens circumvolvitur in una hora: faciunt autem si in Æquatore locus jacet, milliaria Germanica 25: unde quatuor horæ minutis volvetur per unum gradum, hoc est quindecim milliaria, & in uno horæ minuto per $3\frac{1}{4}$ milliaria.

Sed loca extra Æquatorem versus polum alterutrum jacentia, ejusdem horæ spatio per totidem quidem gradus sed multò minores rotantur, nimirum eadem est ratio inter motus celeritatem & iter duorum locorum, quæ est inter sinus arcuum, quibus illa loca à polo distant. Ex.gr. Amstelodami distantia ab Æquatore, seu Elevatio poli est 52 gr. 23 min. Itaque distantia à polo est 37 gr.

37 min. cujus sinus 61037. Sumamus alterum locum esse in Aequatore, cujus distantia à polo est 90 graduum, hujus sinus 100000. Et vero locus sub Aequatore quatuor minutis horæ fertur per quindecim milliaria, & una hora per 225. Quare per regulam auream.

Vt 100000 ad 61037 ita 15 ad 9 milliaria.

Vel ita 225 ad 135 milliaria.

Itaque Amstelodamum hoc motu singulis horis fertur per 135 milliaria & quatuor horæ minutis per novem.

Sed multò facilior est hujus inventio per Tabulam, quam in præcedentis capitis fine posuimus. Quoniam enim factâ divisione 360 graduum per 24 horas, deprehendimus singulis horis quemlibet locum moveri per quindecim gradus sui circuli, & ideo per unum gradum moveri quatuor minutis horæ, idè si cum loci propositi elevatione poli vel distantia ab Aequatore ingrediamur Tabulam illam, inveniemus ad gradus Elevationis datæ adscripta milliaria, quæ debentur motui propositi loci spatio quatuor horæ minorum. Ex. gratia, Stockholmæ Elevatio poli est 60 gr. circiter. & in Tabula ad gradum 60, invenio respondere uni gradui milliaria septem. Itaque dico Holmiam quatuor horæ minutis moveri vel gyrari per tot milliaria.

Tantus est motus primus spectatus in Telluris locis. Sed motus secundus est totius Telluris de loco in locum, & omnes partes seu loca moventur æquali celeritate & per æquales peripherias. Hujus quantitas ex Telluris à Sole distantia dependet, & perficitur integro anno, atque adeo singulis diebus Tellus perambulat unum circiter gradum, & in una hora duo minuta cum dimidio.

De

De Tertio Telluris motu, quoniam difficilior-
rem habet contemplationem, Astronomis agen-
dum relinquo, quia in Astronomia ejus suppo-
nendi necessitas est. Organus quidem de secundo
Motu etiam controversiam movit, existimans pri-
mum solum Telluri convenire, secundum autem
soli & stellis fixis relinquendum esse: sed apparen-
tiæ in motibus planetarum, quas antea attuli-
mus, secundum Telluris motum satis adstruunt.

C A P V T V I.

*De situ seu loco Telluris respectu Pla-
netarum & Stellarum.*

C Onsideratio situs Telluris in toto hoc Mun-
di Systemate respectu reliquorum Planetarum
affinem habet contemplationem ei, quam de Mo-
tu Telluris in præced. cap. attulimus. Communis
enim sententia Philosophorum & Astronomorum
Ptolomaicorum statuit, Tellurem occupare Cen-
trum hujus Univerſi ita ut in medio sit omnium
stellarum & Planetarum. Capernicani vero cum
antiquis Pythagoricis collocant Solem in centro
omnium stellarum, Tellurem vero tanquam pla-
netam inter Martem & Venerem constituunt, at-
que annuo cursu circa Solem circumferri arbi-
trantur, quod ex diagrammate melius intelligitur.
In eo tamen duæ hæ discrepantes sententiæ con-
veniunt, quod utraque fatetur, In Tellure esse
centrum motus illius primi, quò stellas spatio 24
horarum circumferri nobis videntur. Hac enim
hypothesi & Astronomia & Geographia indiget:
ita ut sive Ptolomaicam sive Pythagoricam sen-
tentiam sequaris, nihil ideo firmitati & certitudi-

ni vel Astronomiæ Generali, & Geographiæ decedat. Differentia enim opinionum in hoc consistit, quod Ptolomaici motum hunc ipsis stellis volunt inesse, Pythagorici quiescentibus stellis Tellurem assignant; quorum neutrum vel Astronomiæ communi vel Geographiæ necesse est statuere.

Juxta Ptolomaicos situs Telluris ad planetas & stellas fixas est hic, Tellus, Luna, Mercurius, Venus, Sol, Mars, Jupiter, Saturnus, Stellæ fixæ.

Juxta Copernicanos talis: Sol in medio Systematis mundi tanquam Cor & focus collocatus est, post eum Orbita Mercurii, Veneris, Telluris, Martis, Jovis, Saturni, Stellarum fixarum.

Si quæras, quantum Tellus & nos in Tellure existentes distemus à Planetis, sciendum est, non esse unam & eandem perpetuo distantiam, sed singulis diebus mutari, & propterea Astronomi tres distantiarum gradus recensent, Minimam, Mediam, Maximam. Media distantia Telluris à reliquis Planetis juxta plurimos Astronomos est hæc:

A Luna distat semidiametris suis 60.

A Mercurio 110.

A Venere 700.

A Sole 1150.

A Marte 5000 circiter.

A Jove 11000 circiter.

A Saturno 18000.

Verum enim vero omnino incerta est Martis, Jovis, Saturni & stellarum fixarum distantia, ob defectum parallaxis. In Copernicana Hypothesi distantia variatur non tantum à Planetarum motu, sed etiam à motu ipsius Telluris.

Rationes utriusque sententiæ Ptolomaicæ nimirum & Copernicanæ de situ Telluris sunt eadem ferè cum eis, quas in præcedenti capite de

Motu

Motu Telluris attulimus: cum hoc enim magnam habet affinitatem hæc disputatio. Si enim secundum motum, qui proprius dicitur, Soli tribuas, non Sol sed Tellus erit in medio: si vero Telluri non Tellus sed Sol in medio erit. Pro Copernicanorum nimirum sententia adduci possunt hæc:

1. Sol non tantum fons lucis est, quæ tanquam clarissima fax illuminat Tellurem, Lunam, Venerem & reliquos sine dubio planetas, sed etiam focus caloris & Vitalis Spiritus quo totum hoc universum foveri & sustentari videtur. Ideo medium locum omnium obtinere, & hos circa eum moveri probabile.

2. Verisimilius est Tellurem circa Solem moveri, ut cum reliquis Planetis ab eo lumen & calorem accipiat; quam Solem circa Tellurem ferri, cum is ab hac nihil accipiat.

3. Sole collocato in medio; redditur aliqua causa, quare reliqui planetæ & tellus circa eum ferantur, nimirum quia Sol vastissimum corpus est & magnis viribus præditum, ideo reliquos Planetas ad motum excitat. Et imprimis hæc ratio locum habet, si Kepleri hypothesés de motibus Planetarum amplectamur.

4. Solem circa axem suum rotari probant observationes Galilæi & Scheineri de Maculis solaribus. Hac igitur ratione reliquis planetis circumferendi causa existit, nec videtur ei alius motus attribuentus.

5. Si Telluri locum inter Martem & Venerem, Soli verò centrum attribuamus, aptè responderet motus singulorum planetarum distantia à centro, quod in Ptolomaica hypothesi non fieri patet ex Motuum Solis, Veneris & Mercurii consideratione.

6. Apparentiæ illæ cœlestes, quibus in priori capite ad Motum Telluris secundum probandum usi sumus, valent quoque ad locum hunc, quem dixi, Telluri attribuendum, nimirum retrogradus planetarum cursus, statio, Veneris & Mercurii mirabiles apparentes motus, &c. Etenim motus ille secundus Telluris, hunc Telluris locum & situm præsupponit, vel proximè sibi conjunctum habet. Est verò hoc argumentum meo quidem judicio præcipuum. Ex primo autem Telluris motu nihil pro situ Telluris colligendo desumi potest: namque Tellus in centro Mundi esse potest, si absque secundo esset, ut etiam Origanus statuit.

7. Sic quoque commodè explicatur variatio distantiae planetarum à Tellure. Verum enim vero Aristotelici cum Ptolomaicis sententiam Pythagoricorum pluribus impugnant argumentis, & Telluri centrum pro loco vendicare conantur hisce rationibus. 1. Gravia feruntur ad centrum mundi. Tellus autem gravissimum corpus est: itaque centrum illud occupat. 2. Gravia à Tellure discederent versus centrum universi, nisi in Tellure hoc centrum esset. 3. Centrum est locus ignobilissimus, & Tellus etiam pars ignobilis hujus Universi: Itaque centrum occupabit. 4. Si Tellus esset extra mundi & stellarum motus centrum, tunc stellæ & constellationes quibusdam anni temporibus & diebus viderentur majores, quam aliis. 5. Neque media cœli pars semper conspicua foret, ut oriente Tauro, occideret scorpius, &c. 6. Neque æquinoctia forent. 7. Neque Lunâ eclipsatâ Oriente Sol occideret, &c. 8. Neque singulis gradibus in cœlo in Tellure responderet æqualis milliarius numerus.

Ratio-

Rationes has Aristotelicas Copernicani facili opera diluunt. Prima enim & secunda refellitur, quoniam gravium motus non ad centrum universi, sed ad corpus homogeneum est, ut ex partibus Lunæ, Solis, Magnetis probatur. Tertia ratio falsam assumit Majorem & Minorem. Namque & centrum nobilis locus est, & Tellus non ignobilis. Reliquæ rationes refutantur facile per Diagrammata, hoc saltem præsupposito, Telluris à Sole seu Centro distantiam, utut magna sit, tamen si ad stellarum fixarum distantiam à Sole comparetur, tam parvam esse, ut nullam ad eam proportionem habeat: hoc autem videtur nonnullis magnum postulatum in Astronomia Copernicana.

Cæterum ad hunc locum pertinet explicatio theorematum, distantiam stellarum fixarum & superiorum planetarum, Martis, Jovis & Saturni, tantam esse à Tellure, ut semidiameter Telluris nullam habeat ad eam proportionem: Lunæ vero, Veneris & Mercurii distantiam tantam non esse. De Sole dubium est adhuc: certe si quæ est semidiametri Telluris ad distantiam Telluris à Sole proportio, ea admodum exilis erit.

Probatur autem theorema ita. 1. Stellæ fixæ, & planetæ superiores eodem momento oriri nobis apparent, quo per supputationem factam oriri apparent, si in centro Telluris constituti essemus. Itaque distantia nostri loci à centro telluris hoc est semidiameter ad distantiam fixarum nullam habet proportionem. 2. Si stellæ fixæ vel unus superiorum planetarum altitudinem meridianam vel aliam Instrumento capiamus, deprehendimus eandem, ac si in centro Telluris eam observassemus; itaque semidiameter Telluris eva-

scit respectu istius distantiae. 3. Si aliqua esset proportio, tunc distantia duarum stellarum minor deprehenderetur circa Horizontem, quam circa Meridianum, quia in hoc situ propiores sunt Telluri unâ ferè semidiametro Telluris.

Idem de Sole valet, namque illius diameter non deprehenditur major in Meridiano, quam cum adhuc in Horizonte est.

Lunæ vero diameter in Meridiano observatur paulo major, quam cum in Horizonte est. Itaque in Meridiano aliquantulum propior est nobis, nempe unâ fere semidiametro Telluris.

C A P U T VII.

De telluris substantia & constitutione.

C Onsideravimus in præcedentibus capitibus quatuor generales Telluris affectiones seu proprietates, nullâ habitâ ratione ipsius substantiæ seu essentiae. Hanc vero illis explicatis jam contemplari convenit, ut quale corpus sit Terra, quomodo partes ejus cohæreant, sciamus: quod etsi magis Physicum videatur, tamen quoniam ad perfectam Telluris cognitionem requiritur, paucis de eo agemus, accuratam hujusce theoriæ Physico relinquentes.

PROPOSITIO I.

Ex quibus corporibus simplicibus & similaribus Tellus constet sive composita sit, exponere.

Diversæ sunt super hac re Philosophorum opinioniones. Peripatetici quatuor numerant Telluris & totius sublunaris Orbis elementa, vulgo satis jam nota, Ignem, Aërem, Aquam & Terram. Multi ex veteribus, ut Democritus, Leucippus, sta-

statuebant, totum mundum constare ex minimis particulis solidis, quæ tantum variis figuris & magnitudine differant: eosdem multi è recentioribus sequuntur, & nuper Cartesius conatus est juxta talem hypothesin omnia naturalia phænomena explicare.

Chymici tria ponunt principia, Solem, Sulphur & Mercurium, quibus caput mortuum quidam rectè addunt, cum tria illa sint sæcunda. Mihi sepositis ambiguis vocabulis & rebus bene expensis quinque videntur esse prima simplicia corpora, Nempe, Aqua, Oleum seu sulphur, Sal, Terra & Spiritus quidam, quem acidum nonnulli appellant, sive is sit Mercurius Chymicorum. Etenim omnia corpora & partes Telluris resolvuntur in quinque illas elementares substantias. Non tamen negaverim, illas ipsas non tam essentiâ internâ, quam singulari figurarum & magnitudinum varietate differre.

Ex hisce proinde corporibus tota Tellus constat, quæ multis modis commixta sunt, unde tanta corporum varietas existit, quæ diversa à se invicem & similia apparent. Verùm de hisce accuratior explicatio ad Physicam pertinet, ubi plenius aliquando ista tractabimus.

PROPOSITIO II.

Tellus dividitur in partem siccam & liquidam, sive in Terram & Aquam, quibus alii atmosphæram adjungunt. M

Vulgaris hæc est Geographorum divisio, & sumitur tunc Aqua in latâ significatione pro omni liquido seu fluido, sicut Terra pro tota sicca & consistente Telluris parte, adeoque varia & diversæ naturæ corpora complectitur, nempe ad Terram

ram referuntur hæc. 1. Arena, sabulum, argilla, & terræ minerales, Creta, Cinnabaris, Ochra, Terra Lemnia, Samia, Armenia & aliæ multæ species. 2. Lapidēs, quorum magna est varietas. 3. Metalla, Aurum, Argentum, Æs, Stannum, Plumbum, Mercurius seu argentum vivum: Vel, Terræ metallicæ, aureæ, argenteæ &c. 4. Sulphur, Salia, Nitrum, Alumen, Bitumen, Vitriolum, Antimonium, 5. Herbæ & animalia.

Ad aquam referuntur. 1. Maria & Oceanus. 2. Fluvii & aqua dulcis, 3. Lacus, paludes. 4. Aquæ minerales, ut theriacæ, acidulæ, &c.

Athmosphæra est subtile illud corpus, quod Tellurem cingit versus cælum, & complectitur aërem, nubes, pluvias, &c. In has itaque tres partes Tellus commodè dividitur.

PROPOSITIO III.

Quomodo terra & aqua cohereant & Tellurem constituent exponere.

I. Terra, hoc est sicca Telluris pars, non una & æquabili superficie terminatur, sed multas habet cavitates, multas elevatas partes. In cavitatibus, quæ circa totam terram hinc inde reperiuntur, continetur mare seu Oceanus, atque ideo pars superficiæ terrestris tegitur aquis, pars extat & eminet supra aquas. Ipsæ cavitates non æquabili cavitare factæ sunt, sed hinc inde scopulos & elevatas partes habent, alicubi admodum depressas voragines. Ita pars terræ extans supra aquas habet quosdam quasi umbilicos in medio sui, & aliæ partes aliis magis vel minus elevatæ seu depressæ sunt. Ita fit, ut aqua ambiens totam Tellurem impediatur, ne totam terram obtegat sed partes altiores & extantes sint insulæ, quarum quædam magnæ, quædam parvæ.

2. Præter illam continuam cavitatem seu alveum in Terra in exteriori superficie, intus quoque in soliditate Terræ existunt innumeri hiatus, recessus, anfractus, cuniculi, voragines, tubuli & vasta receptacula, in quorum quibusdam mare est, nempe quæ alveo maris per aliquam viam conjunguntur, in quibusdam aqua dulcis, fluvii amnes, in quibusdam spiritus vel etiam sulphurea & fumans substantia. Rectè Seneca: Nimis ille oculis permittit, qui non credit esse in abscondito terræ sinus maris vasti. Nec enim video, quid prohibeat vel obset, quo minus illic habeatur aliquod etiam in abscondito littus, & per occultos meatus receptum mare. Multas itaque cavitates in ipsa solida terra existere, non est quod dubitemus. Etenim id conjicimus ex hisce. 1. Ex fluviiis, qui reperiuntur in multis locis, ubi ad insignem profunditatem effoditur terra, quod in fodiis frequens est. 2. In nonnullis locis immensa est maris profunditas. 3. Specus aliquot sunt in terra. In Occidentali parte insulæ Hispaniolæ mons est visendæ altitudinis, multis intus cavus specubus, in quibus tanto sonitu, tantis aquarum fragoribus præcipitantur fluvii, ut ad quinque milliaria procul ea ruina exaudiatur. 4. Voragines quædam in mari reperiuntur, quas vocant Maeltroom. 5. Terræ motus etiam probant subterranearum cavitatum existentiam. 6. Fluvii quidam sub terram se condunt, ut Niger, Tigris, &c. 7. Fontes falsi qui sine dubio (maxima saltem ex parte) à mari fluunt, reperiuntur in multis locis. 8. In multis locis terræ ad ambulantium ingressum tremunt, ut circa fanum S. Omer in Belgio, & in agro Brabantino (die Peel)

COROLLARIUM.

Ex hisce itaque patet, falsam esse veterum quorundam Philosophorum sententiam, qui totam terram aquæ innatare defenderunt. Sic enim nulli essent maris alvei sed ubique immensa ejus profunditas. Ex antiquis Philosophis quidam eam dicuntur fovisse opinionem (ut Democrito ascribitur) quod aqua olim Terræ fuerit commixta, ita ut tota Tellus mollis esset, mediamque inter siccum & liquidum haberet naturam sive consistentiam atque figuram perfecte rotundam, sive sphaericam: deinde vero aqueas particulas paulatim coivisse in unum corpus propter naturalem conjunctionis proprietatem, quæ in aqua deprehenditur: atque tunc terrestres partes aquâ destitutas in se collapsas esse & condensatas, factosque ab aqua alveos esse inter terras hinc inde. Eandem opinionem plurimi Christiani Philosophi moderni defendunt, & ita Moïsi vel potius ipsius Dei ter opt. max. in prima creatione verba à Moïse allata intelligenda censent: *Congregentur aqua in locum unum, & appareat arida.* Sed Doctores primitivæ Ecclesiæ sive Patres plerique aliter de hoc sentiunt. Opinantur enim, Aquas jam tum fuisse separatas à partibus terrestribus, verum circa totam terram extitisse sive terram texisse, atque ita in naturali suo loco fuisse. Deinde autem verbis illis Iehovæ miraculosè aquam recessisse & terras detectas fuisse, & in hunc usque diem per singularem Dei providentiam aquas impediri vel coerceri, quo minus terras iterum tegant, adeoque pro miraculo habendam censent hanc terrarum & Oceani constitutionem. Verumenimvero sine sufficiente causa hac in materia eos ad miraculum

culum confugere, probabimus capite xvi ubi ostendemus, quod aquæ sive Oceani inundatio in omnes terras prohibeatur ab altitudine & consistencia terrarum, quæ si à causis quibusdam, quarum varix sunt, tollatur, non cessat Oceanus in illas terras invadere, atque eas obtegere. Est itaque hic causa manifesta, neque miraculo opus est. Neque antiquorum Philosophorum sententia antea adducta difficultate caret, nimirum si aqua terræ ita commixta fuit in unam massam, cur non potius terrestres partes subsiderint & sic aqua totam terram texerit: illi hoc fortuitæ partium aquearum, ut etiam terrestrium, conjunctioni & motui ascripserunt. Hæc obiter dicta sunt propter nonnullos, qui de hisce anxie solent inquirere: ad Geographiam enim non pertinent, quippe quæ nec veterum opiniones curat, nec in explicandis Telluris proprietatibus confugere debet ad miracula.

PROPOSITIO IV.

Terrarum superficies continua est, aquarum non ætem.

Etenim superficies terræ exstantis continua est alveorum maris superficiei, & hæc aliis exstantibus terræ partibus. Ita quoque Oceani & sinuum atque fluviorum una est continua superficies, sed non omnium aquarum, quia lacus quidam sunt, qui cum Oceano non junguntur superficietenus, ut Parime lacus, Caspium mare.

PROPOSITIO V.

Quomodo Telluris partes, quæ à superficie, hoc est, nostra habitatione sunt remotæ versus centrum, constitutæ sint, incertum est.

Quidam existimant, aquam esse circa Telluris centrum

centrum in imo, sed verisimile magis est, terram eum occupare locum. Gilbertus Anglus opinatur, Telluris corpus intus nil aliud esse, nisi durissimum magnetem, illas vero partes, ad quas homines fodiendo perveniunt, & in quibus herbae creseunt, & nos vivimus, esse tanquam corticem & crustam Telluris, in qua continuæ generationes & corruptiones fiant. Non multum diversa est Cartesii sententia, qui existimat, tres regiones diversæ substantiæ in Telluris corpore esse. Intimam circa centrum ejus, secundam densam & opacam ex particulis minutissimis, tertiam, in qua homines occupantur, ex particulis minus coherentibus.

Verumenimvero de hac re vix quicquam certi asseverare licet. In plurimis subterraneis locis ignem gliscere & fumos à sulphure elevari, manifestum est ex thermis. Thurnheuserus affirmat experientiâ se edoctum esse, quod in fodinis eo minus aquæ deprehendantur, quo profundiores sive centro Telluris propiores sunt. Verum ex particulari ejus observatione non existimo satis tuto aliquid asseverandum esse.

PROPOSITIO VI.

Consistentia Terræ & coherentia est à sale.

Artificiosa resolutio partium terræ ostendit, quod in omnibus reperiatur quædam salis species, & eo plus, quo est durius corpus, (exceptis paucis olcosis) ut in metallis, petris, &c. Et omnium rerum concretionem à sale esse, manifestum est ex lapidibus, quos arte efficere possumus è Sale durissimos. Quod si à terrâ separet Salem, non illa amplius cohererebit. Sed pulvis erit, neque ad duritiem reduci potest sine Salis admixtione.

PRO-

PROPOSITIO VII.

Terrarum species variis modis inter se commixtae sunt in Tellure.

Ita in fodinis reperiuntur particulae aureae, argenteae, plumbeae, &c. non coacervatae & ab aliis sejunctae, sed tum inter se invicem tum cum inutili terra mixtae, secundum minimas particulas, ut non primo aspectu sed aliis indiciis deprehendant artifices, quid in quavis metallica terra contineatur. Eodem modo in agris miscetur arena argillae, limo, sali, &c. Cum Amstelodami altquando ad puteum faciendum effoderetur terra usque ad ducentorum & triginta duorum pedum profunditatem, hae species terrarum oblatae sunt. Hortensis terrae pedes septem, nigrae ad ignem nutriendum aptae, quam vocant Torff (neque enim sunt cespites propriè loquendo) pedes novem, argillae mollis novem, arenae octo, terrae quatuor, argillae decem, terrae quatuor, arenae, super qua solent domus Amstelodamenses fistuari, pedes decem, argillae duo, Sabulonis albi quatuor, siccæ terrae quinque, turbidae unus, arenae quatuordecim, argillae arenariae tres, arenae cum argilla mixtae quinque, arenae marinis conchulis mixtae quatuor, deinde fundus argillae ad centum & duorum pedum profunditatem, denique sabulo triginta pedum & unius, ubi fossio desinit.

PROPOSITIO VIII.

Cavitates terrae, & tam externa quam interna ejus dispositio & partium situs non sunt perpetuo eadem, sed diversis temporibus diversa.

Enim non tantum aqua maris varias mutationes & ruinas in terrae partibus efficit, dum quaedam

quædam foramina obstruuntur, quædam laxiora redduntur sed etiam spiritus & sulphureæ substantiæ in terra hinc inde latitantes cum gliscere incipiunt & in vapores resolvi, impetuose partes terræ movent & protrudunt, ut ex terræ motibus manifestum est. Et verisimile est in interioribus Telluris partibus similes fieri motus quorum maximam partem nos non sentiamus.

De mutua vero aquæ & terræ mutatione in superficie Telluris dicemus capite XVIII.

SECTIO TERTIA.

GEOGRAPHIÆ ABSOLVTÆ.

In qua capitibus quatuor explicatur constitutio Terra, siue sicca partis Telluris.

CAPUT VIII.

De divisione partium Terra naturali, factâ ab Oceano circumfluente.

QVæ hoc capite de Terræ Divisione & capite XV de Maris divisione trademus, ea magnopere iuvabunt adolescentes ad comprehendendam & memoriæ infigendam superficiem Telluris partiumque distinctionem, & situm, atque ideo attente sunt perlegenda & cum globo Terrestri & Mappis conferenda. Diximus capite præcedenti, quod Tellus dividatur, quantum ad substantiam siue materiam, in partes duas, Aquam & Terram, siue Fluidum & consistens, quibus Athenosphæram tanquam corticem vel regumentum adiungimus. Primo itaque loco de parte consistente, nempe Terra dicemus.

PROPOSITIO I.

Terra quadam portio tegitur aqua, quadam portio extat supra aqua superficiem, atque ab aqua circumgitur.

Veritas hujus Propositionis manifesta est per experientiam. Sunt tamen quædam partes terræ, quæ aliquo tempore aquis teguntur, aliquo ab eis liberæ sunt & conspicuæ, ut insulæ multæ ad Norvegiam, Scotiam atque alias regiones: adde hisce pulvinos & littora. Verum cum adeo parvæ sint hæ partes, non habemus earum rationem in præsentia. Neque illam quæstionem hic movebimus: Vtrum majorem superficiem Telluris partem occupet Terra, an Aqua? De hac capite XVIII. paucis agemus. Nunc partem extantem considerabimus, eamque absolute appellabimus Terras, vel Insulas.

PROPOSITIO II.

Terra extans supra aquas non est una & continua, sed multa à se invicem per intersluentem aquam sejunctæ.

Faciemus earum differentias quinque, nempe Terras sive Insulas Maximas, Magnas, Mediocres, Parvas, Minimas.

De causa & origine harum terrarum extantium sive insularum agemus cap. XVIII. quia ibi commodior locus est de hac materia agendi.

Cæterum omnes terræ extantes appellandæ essent insulæ, cum insula nihil aliud sit quam terra ab aquis cineta: usus tamen loquendi maximis terris vocabulum hoc sive appellationem ademit propterea quod adeo magnæ sint & vasti tractus, ut minus sensilis sit aquæ circuitus. Adeo illæ solent

lent vocari Terra firma, itemque Continentes magnæ. Et sanè propter ingentem magnitudinem, ad quam reliquarum insularum magnitudo comparata exigua est, peculiare nomen merentur: ideo nos quoque eas appellabimus Terras firmas & magnas Continentes. Alia tamen est significatio, in qua vulgo & frequenter usurpatur vocabulum Continentis Terræ. Sumitur enim 1. stricte, pro parte Terræ quam ex nullo latere mare alluit. 2. latius, pro parte terræ, quæ ab uno latere à mari alluitur, sed ab altera parte adhæret aliis terris lato tractu. 3. Generaliter & latissime pro terræ parte adhærente alteri utcumque, nempe lato vel angusto tractu. Hæ significationes diversæ sunt ab ea, quâ maximæ insulæ dicuntur Continentes.

PROPOSITIO III.

Terra maxima sive Insula maxima aut Magna Continentes (de appellatione cum nemine certabo) *sive Terra firma sunt quatuor.*

1. VETUS ORBIS. 2. NOVUS ORBIS, sive AMERICA. 3. TERRA POLARIS ARCTICA sive ORBIS ARCTICUS. 4. TERRA AUSTRALIS sive MAGELLANICA.

VETUS ORBIS ex quatuor illis celeberrimus & solus antiquis cognitus, quem nos incolimus, dividitur fere à Mari in duas partes parvo Isthmo conjunctas, quarum una est Africa, alteram Europa & Asia faciunt. Cingitur ab Oceano hunc in modum:

À Septentrione est mare glaciale, Septentrionale, mare album, Oceanus Tartaricus.

Ab Oriente Oceanus est Chinenfis & Pacificum mare.

Ab

Ab Austro Oceanus Indicus, Australis & Æthiopicus.

Ab Occidente mare Atlanticum jacet, dictum del Nort.

Divisionem hujus Continentis, de qua diximus, faciunt Mare Mediterraneum & Arabicum sive rubrum mare; vel sinus Mediterraneus & Arabicus. Distantia enim sinuum, hoc est latitudo intercedentis tractus non est major, quam triginta circiter miliarium, qui si abesset, Africa faceret peculiarem Terram firmam & numerum augeret.

Minimo intervallo Vetus Orbis versus Orientem distat ab America circa fretum Anian, si modo hoc existit. Europæ autem ab America minima distantia est inter Norvvegiam & Terram novam Americæ Septentrionalis.

A terra polari Arctica Vetus Orbis minimo intervallo abest circa fretum VVaigatz. Ab Australi polari sive Magellanica circa Novam Guineam.

NOVUS ORBIS, sive AMERICA ita cingitur ab Oceano.

A Septentrione Mare est incognitum imo incertum, præter fretum Davis.

Ab Oriente est mare Atlanticum.

Ab Austro est fretum Magellanicum.

Ab Occidente est mare Pacificum.

Hic quoque Orbis parum abest quin in duas insulas sit sectus, nimirum ad Panamam & Nombrede Dios, ubi exiguo terræ tractu prohibetur confluxus Oceani Pacifici & Atlantici.

Distat minimo intervallo à Vetere Orbe circa fretum Anian. A terra polari Arctica, circa fretum Davis. Ab Australi, circa Magellanicum fretum.

TERRA POLARIS ARCTICA & AUSTRALIS
D undique

undique mari cinguntur, illa Septentrionali, cuius partes sunt fretum Davis, VVaigatz, Anian: hæc mari Australi, Pacifico, Indico, freto Magellanico.

POLARIS ARCTICA à Veteri Orbe minimum habet intervallum ad fretum VVaigatz: ab America ad fretum Davis. Ab Australi terra ingenti removetur spatio.

POLARIS AUSTRALIS, sive potius Terra Australis maximè vicina est Veteri Orbi ad Novæ Guineæ procurrentem tractum: Americæ sive Novo Orbi ad fretum Magellanicum.

Cæterum de Sola hac Australi certò exploratum habemus, quod mari undique cingatur & à reliquis separetur: de tribus reliquis, nempe Orbe Veteri, America & Orbe Arctico, nondum omnino certa res est, utrum undique mari cingantur & à se invicem separentur: admodum tamen est verisimile propter varios Oceani intra terram procurrentes sinus & fretorum initia. Sola Australis circumnavigata est hætenus, in reliquis nondum licuit. Vetus enim Orbis nondum ultra fretum VVaigatz circumnavigatus est, etsi totum litus Occidentale, Australe & Orientale sit lustratum, adeoque exigua Septentrionalis littoris pars lustranda restet. America circumnavigata est exceptâ parte littoris Septentrionalis, propter fretorum incertitudinem, vel difficultates. Sic itaque situm quatuor maximarum insularum sive continentium explicavimus.

PROPOSITIO IV.

Insulas magnas in Telluris superficie numeramus decem, quæ sunt.

- I. BRITANNIA, comprehendens Angliam & Sco-

Scotiam, censetur maxima ex omnibus insulis, quæ vulgo ita appellantur exclusis illis, quas præcedenti Propositione enumeravimus. Jacet inter Europam & Americam, vicina est Belgio & Gallia: cingitur à mari Atlantico. Forma est oblonga.

2. JAPONIA, quæ in Mappis & globis minorem habet magnitudinem, quam habere debebat: qui enim istic fuerunt, asserunt majorem esse vel saltem non minorem ipsâ Britannia. Jacet in Orientali termino Asiae, non procul à China. Cingitur ab Oceano Pacifico. Forma est aliquantum oblonga & curva.

3. LVCONIA, quæ etiam à Metropoli dicitur Manilha, est una ex Philippinis, quæ ultimæ sunt Orientalium insularum in Asia termino. Sunt qui eam majorem esse volunt, quam Britannia est; verum qui ibi fuerunt, minorem esse dicunt. Cingitur ab Oceano Pacifico, sive Orientali. Forma est oblonga cum multis curvaturis.

4. MADAGASCAR, sive insula S. Laurentii, jacet ad Orientale littus Africae, non procul à faucibus rubri maris & ab Arabia littoribus. Cingitur ab Oceano Indico, quoniam totum mare inter Africam & Indiam hodie appellatur Indicum. Forma est oblonga.

5. SUMATRA, quam quidam Geographi non immerito veterum TAPROBANAM esse censent, jacet in finibus Asiae inter insulas Indicas, non procul à Malaccensi Chersoneso, in longum exposita. Cingitur ab Oceano Indico.

6. BORNEO, non procul à Sumatra in Indico mari sita est formâ rotundâ: in ejus magnitudine assignanda ingens inter Scriptores discrepantia. Quidam enim circuitum ejus faciunt 2100 miliarium

liarium & maximam inter Indicas esse volunt: alii tantum 300 circiter.

7. ISLANDIA, cujus una portio in Zona Temperata, altera in Zona Frigida jacet, non procul à Terra polari & Norvvegia. Cingitur à mari Septentrionali. Forma est oblonga.

8. TERRA NOVA, insula adjacens Canadæ in Septentrionali America. Cingitur à mari Septentrionali, regio major est, quam vulgares Tabulæ exhibent. Per multas curvaturas mare recipit.

9. Inter fretum Davis & fretum Hudsonii in Septentrionali Oceano jacet magna insula ad terram polarem. Tabula Vniversalis Vischeri excusa anno 1694 exhibet eam: in aliis Tabulis non reperi hæcenus. Forma est rotunda.

10. NOVA ZEMBLA, sita inter Polarem Arcticam & Samojedam atque Russicam. Cingitur à Mari glaciali, Tartarico. Separatur ab Europa nempe à Samojeda per fretum VVaigatz. Forma est rotunda.

Hiscæ annumeranda est CALIFORNIA, si ea insula est & non pars Americæ, Belgæ enim in quadam Hispanica navi reppererunt Mappam Geographicam, quæ Californiam insulam & mari cinctam exhibebat non adhærentem Americæ.

PROPOSITIO V.

Insulas mediocres in Telluris superficie numeramus decem, quæ sunt.

1. JAVA, una ex Indicis insulis inter Asiam & Australem terram, omnium rerum abundantia felix & Paradisus. Cingitur ab Oceano Indico. Forma est oblonga.

2. CYBA, una ex Americanis insulis, non procul ab Hispania Nova & FLORIDA. Cingitur à mari

à mari Atlantico in ingressu Sinus Mexicani. Forma est oblonga.

3. HISPANIOLA, jacens à Cuba versus Austrum, major est quam Cuba. Cingitur à mari Septentrionali sive Atlantico, ubi in sinum Mexicanum influit. Forma est subrotunda cum multis procurentibus angulis.

4. HYBERNIA sive IRLANDIA, non procul à Britannia versus Americam. Cingitur à mari Septentrionali. Forma est subrotunda.

5. Creta, non procul à Græcia, adjacet Europæ. Cingitur à mari Mediterraneo. Forma est oblonga.

6. SICILIA, non procul ab Italia jacet. Cingitur à mari Mediterraneo. Forma est subrotunda.

7. CELLANUM insula, non procul ab Indiæ ultimo promontorio Comorino. Cingitur ab Oceano Indico. Forma est rotunda. Barrius contendit hanc esse antiquorum Taprobanam.

8. MIDANAO una ex Philippinis in Oceano Pacifico; forma est subrotunda.

9. SARDINIA, jacet in mari Mediterraneo, forma est oblonga.

10. CELEBES insula non procul à Borneone. Cingitur ab Oceano Indico. Forma est oblonga.

Hisce annumerari potest Frislandia, insula non procul ab Islandia.

PROPOSITIO VI.

Insulas parvas in superficie Telluris numeramus decem, quæ sunt.

1. GILOLO, una ex Indicis non procul à Moluccis. Cingitur ab Indico Oceano. Forma est instar Soleæ equinæ.

2. AMBOINA, non procul à Gilolo in eodem Oceano. Forma est oblonga.
3. TIMOR, insula non procul ab Australi terra ad Indicas refertur. Forma rotunda est.
4. JAMAICA in Mexicano sinu non procul ab America. Forma est oblonga.
5. SELANDIA insula Daniæ inter Jutlandiam & Gothiam jacet. Cingitur ab Oceano Septentrionali, ubi hic in sinum Balthicum influit. Forma est rotunda.
6. CORSICA in mari Mediterraneo.
7. EVB OEA, hodie Negroponte, vicina est Græciæ: cingitur à mari Mediterraneo; forma est oblonga.
8. MAJORCA prope Hispaniam.
9. CYPRVS, non procul ab Asia minori: cingitur à mari Mediterraneo: forma est oblonga.
10. ISABELLA, una ex insulis Salomonis, in Oceano Pacifico.

Possent plures insulæ ad hanc classẽ revocari, sed commodius ad ultimum ordinem eas referemus.

PROPOSITIO VII.

Minimarum insularum innumerabilis ferè est copia in superficie Telluris: ex illis autem considerationem peculiarem merentur 1. solitaria celebres. 2. ea, quæ magno numero in aliquo Oceani tractu reperiuntur, & propter viciniam uno aliquo nomine comprehenduntur vel appellantur.

Vocabimus in genere, Agmen Insularum quia commodiori vocabulo destituimur. Tractus maris, in quo insulæ hæ jacent, dicitur Archipelagus. Celebres solitariae sunt, in mari Mediterraneo: Rhodus, Malta, insularum. Ivica, Minorca, Chios, Cephalonia &c.

In

In Oceano Atlantico inter Africam & Brasiliam celeberrima apud nautas Insula S. Helenæ, ubi etiam insula Ascensionis, insula Divi Thomæ, in ipso Æquatore sita.

Madera insula è regione Freti Gaditani versus Americam.

Zocorora, ante fauces Arabici sinus jacet.

Gorlandia in mari Balthico.

Insula Paradon sola hoc habet, quod de ejus existentia disputent Geographi. Nautæ Lusitani opinantur, ut Linschotius refert, illam jacere centum milliaribus à Canariis insulis versus Occidentem, & sæpe illam conspicuam, plerunque ramen inconspicuam esse: campos ejus virides, fertiles, incolas esse Christianos; verum ignorant cujus nationis vel originis sint, & quo sermone utantur. Hispani aliquoties è Canariis ad illam visendam instituerunt navigationem, sed nunquam reperire potuerunt. Ideo quidam arbitrati sunt spectri esse illusiones. alii existimant: certis tantum anni diebus videri posse; plerunque nubibus vel nebula tectam esse. Mihi tota narratio vana esse videtur.

Inter celebres solitarias dignæ quoque sunt commemoratione illæ, quæ natant in aquis, de quibus vide caput XVIII.

PROPOSITIO VIII.

Agmina insularum minimarum numerantur in superficie Telluris quindecim, nempe:

1. CANARIAE insulæ, olim Fortunatæ dictæ. Jacent in mari Atlantico non procul ab Africæ litore Occidentali è regione Atlantis montis. Numerantur decem circiter, exceptis minimis.

2. FLANDRICAE, sive ASORES, inter Europam

pam & Americam in Oceano Septentrionali, numerantur præcipuæ earum septem.

3. HESPERIDES, hodie Insulæ Virides sive Promontorii Viridis. Jacent enim ad Occidentale Africæ littus è regione Promontorii Viridis. numero XII.

Cinguntur à mari Atlantico.

4. MALDIVÆ insulæ. Harum ingens dicitur esse numerus, nempe undecies mille; sed quidam mille tantum ab incolis habitari volunt. Jacent in Oceano Indico non procul à Malabarico Indiæ latere, à Septentrione ad Austrum usque ad Æquatorem. Multitudinem efficiunt parvi Euripi interfluentes, adeo angusti, ut nautæ inter insulas hasce navigantes possint apprehenso ramo alicujus arboris ex una in aliam saltu pervenire.

5. INSULÆ LYCARES inter Floridam & Cubam prope Americam. Hæ vel ideo memoratu dignæ sunt, quod omnium totius Americæ primò ab Europæis inventæ sunt, nimirum Columbus ad unam ex illis, dictam GYANAHA, omnium primam, ipse primus ex Europa appulit. Lucagarum harum numerantur 400, sed omnes parvæ præter ipsam Lucajam, à qua omnes denominatæ sunt.

6. INSULÆ PRINCIPIS inter Hispaniolam & Americam, ad quas refero omnes in sinu Mexicano sitas.

7. INSULÆ CAMERCANÆ, ante Hispaniolam versus Veterem Orbem.

8. MASCARENIAE insulæ inter Madagascar & Africam.

9. MOLVCCÆ, quarum quinque præcipuæ fertilitate cariophyllorum numerantur, sed multo plures sunt, ad illas refero Mauricas. Oceanus Indicus illas ambit.

10. PHI-

10. PHILIPPINAE in ultima Asia in mari Pacifico: magnus earum est numerus.

11. INSULAE MARIS AEGEI, quod primo omnium appellatum est Archipelagus.

12. INSULAE JAPONIAE.

13. INSULAE SALOMONIS in mari Pacifico ad terram Australem.

14. INSULAE latrunculorum de las Velas in Archipelago S. Lazari.

15. INSULAE BANDANAE & aliae inter Javam & Bandam.

16. INSULAE ANGLIAE & SCOTIAE adjacentes.

17. INSULAE inter Magellanicum fretum & fretum Le Maire.

Non hic adnumero insulas illas, quae magno numero adjacent, quarundam continentiam litoribus, ut Norvegiae, Chinae, Brasiliae, freto Davis &c.

Ad hanc classem etiam referendae sunt insulae fluviorum, quales in Nilo, in fluvio S. Laurentii Canadae in VVolga, atque aliis quibusdam fluviiis reperiuntur, ut etiam illae, quae in lacubus quibusdam existunt, ut in Zembre lacu Africae, in America Australi, ubi insula plumbi in lacu sita, &c.

PROPOSITIO IX.

Partes singularum Terrarum sive insularum non sunt ejusdem figurae sed dissimiles: differentia celebrioribus sunt Peninsula & Isthmus.

Peninsula Graecis Chersonesus, dicitur pars Terrae, quae alteri parti jungitur tractu angusto, atque in reliquo circuitu undique mari cincta est. Angustus iste tractus terrae dicitur Isthmus, nempe

arcta via, per quam ex lata terra pervenitur in latam. Cæterum nec negligendæ videntur partes procurrentes Terrarum, quæ longo tractu in mare exporriguntur, etsi ab uno latere tractu latiori conjungantur cum alia terra. Atque ita Península est species procurentis Terræ: quanquam omnis talis procurrens Terra possit appellari Península.

Procurrentes terræ sunt, 1. Italia. 2. Hispania. 3. Pars Angliæ. 4. Tota Græcia & Macedonia. 5. Asia Minor. 6. Norvvegia & Suecia cum Lap-
pia. 7. India. 8. Camboja. 9. Nova Guinea terræ Australis. 10. Beach ejusdem terræ regio. 11. Nova Britannia, novum Belgium in America. 12. Lingua Africæ, &c.

PROPOSITIO X.

Peninsulas numeramus quatuordecim.

Dividimus eas in oblongas & subrotundas.

Oblongæ sunt septem vel octo.

1. *Chersonesus aurea* veterum, hodie Malaccensis, adhæret Indiæ.

2. *Chersonesus Cimbrica*, hodie Jutlandia, adhæret Hollaricæ.

3. *California*, ad Occidentale litus Americæ Septentrionalis prope mare Vermejo. Sed recentes observationes eam insulam perhibent.

4. *Nova Francia*, in Orientali latere Americæ Septentrionalis.

5. *Chersonesus Incatan* in sinu Mexicano, adhæret Americæ.

6. *Chersonesus Thracia* ad Hellespontum.

7. *Chersonesus Cassandriæ* ad sinum Theſſaloni-
ensem Græci maris. Sunt etiam Asiæ minoris
quædam peninsulæ minus celebres, nempe 1. Io-
nia

nia sive Smyrnenfis, 2. Cnidenfis, sive Doris regio. 3. Myndenses.

De *Corea* dubium est, utrum insula sit an Peninsula. Quidam Mappæ adjungunt Tartariæ, quædam mari cingunt. Recentissimæ tamen observationes faciunt eam peninsulam.

Peninsula subrotunda sunt sex.

1. *Ipsa Africa*, pars Veteris Orbis ingens. Cingitur mari Mediterraneo, Atlantico, Æthiopico, Indico, Rubro: adhæret Asiæ angusto tractu ad *Aegyptum*.

2. 3. *Partes America*, nempe Mexicana & Peruviana. Cohærent ad Panamam angustâ viâ.

4. *Peloponnesus*, hodie Morea, pars Græciæ.

5. *Taurica Chersonesus* in Ponto Euxino & paludis Mæotis ostio: hodie Tartaris Pzrecopenfis.

6. *Cambaja* in India.

PROPOSITIO XI.

Isthmos numeramus totidem, quot Peninsula.
Insigniores sunt quinque.

1. Isthmus inter *Aegyptum* & *Asiam*, quo *Africa* adhæret Asiæ.

2. Isthmus Corinthiacus inter Peloponnesum & Græciam.

3. Panamensis inter Mexicanam, Americam & Peruviam.

4. Inter Auream Chersonesum & Indiam.

5. Tauricæ Chersonesi.

CAPUT IX.

De montibus in Genere.

DE montibus plurima occurrunt cognita digna & in Geographia explicanda, partim quia

rotunditati Telluris videntur officere, partim quia de illis varia apud Scriptores traduntur.

PROPOSITIO I.

Dicitur autem *mons pars terræ ad insignem altitudinem pertingens*, quæ si minor sit, dicitur *Collis & clivus*.

Promotorium autem dicitur mons in mare procurrent. *Scopuli* dicuntur partes exstantes in mari vel etiam petris. Verum in genere sciendum, partes terræ quæ planæ apparent, non esse omnes ejusdem altitudinis, sed quasdam depressiores, imprimis ad littora maris, ita ut altitudo accrescat à maritimis locis ad mediterranea. Hoc autem probatur ex fluviorum fontibus & fluxu. Cum enim illa pars terræ, ad quam fluit aqua sit humilior eâ, à qua fluit, & raro in locis mediterraneis & à mari remotis fontes sint fluviorum, patet mediterranea esse elevatiora maritimis. Sic Bohemia est altior Holsatia, quod cognoscitur ex fluxu Albis qui à Bohemia fluit ad Holsatiam. Ita ex Danubio, Visurgi, Rheno, Mosa, &c. sumimus indicia majoris altitudinis locorum mediterraneorum. Helvetiorum & Rhetorum terræ à quibusdam censentur altissimæ totius Europæ, quod inde fluant Rhenus, Rhodanus, Danubius. Porro quanta est fluviorum declivitas, tanta est altitudo locorum mediterraneorum supra loca maritima.

Cæterum problemata de montibus cognoscenda, ex quibus judicium de controversiis, vel scriptis, & traditis apparentiis est desumendum, sunt hæc:

PROPOSITIO II.

Montis altitudinem per geodæsiam invenire.

Fig.

Fit hoc eodem modo, quo in Turrium altitudine exploranda utimur, si modo vertex montis aliquo peculiari signo sit notabilis.

Sit AB montis altitudo, A pes, B vertex conspicuus. Mediocri ab ea distantia sumemus lineam FC , ita ut neuter angulorum AFC , ACF fiat valde acutus, sed ferè æquales. Observentur deinde factâ collimatione ad B , anguli AFC , ACF & hisce subtractis ad 180 gradibus, residui gradus designabunt angulum CAF . Deinde accurate metienda est distantia stationum FC . Et fiat ut sinus anguli FAC ad sinum anguli CFA (vel FCA si FA velis assumere) ita FC ad AC , distantiam montis à C . Dein suspenso vel erectè collocato instrumento in C , & collimando ad B , sumatur angulus BCA . Et quia Triangulum CAB est rectangulum, nempe BAC est rectus, 90 gr. ideo dabitur etiam angulus ABC .

Fiat itaque ex Triangulo BAC , ut sinus Totus 10000000 ad tangentem anguli BCA ita distantia AC ad altitudinem montis perpendiculari-rem AB .

Exempli gratiâ. Ponamus Xenagoran Eumeli filium usum esse hoc modo in Olympi montis altitudine cognoscenda (namque accurate eum dimensus est, ut epigrammate testatur) & angulum AFC invenisse 88 gr. 29 min. Sed angulum ACF 57 gr. 30 min. Itaque CAF erit 34 gr. 13 min. & per mensuram vel alio certo modo invenerit FC 400 pedum Græcorum sive $\frac{2}{3}$ unius stadii. Itaque erit ut sinus anguli CAF , 34 gr. 13 min. ad sinum anguli ACF 57 gr. 30 min. ita CF 400 pès ad FA distantiam: Nempe ut 56226 ad 84339 ita 400 ad 600 . Est itaque FA 600 pedum. Porro angulus BFA sit inventus 84 gr.

23. min. Erit in Triangulo FAB, ut 100000 ad Tang. anguli BFA 1016000 ita 600 ad 6096 pedes pro A B altitudine montis Olympi: sed 600 pedes faciunt stadium. Itaque divisus 6096 per 600 inveniuntur 10 stadia & 96 pedes Græci pro altitudine montis Olympi, quantam Xenagoras invenit. Stadia autem illa faciunt $\frac{1}{4}$ mill. German. cum $\frac{2}{3}$ vel $\frac{1}{6}$ circiter.

Testatur autem Aristoteles cum multis aliis Scriptoribus, tantam esse altitudinem montis, ut vertex nullos aëris motus nec pluvias sentiat, adeoque supra aëris secundam regionem sit elevatus, idque collegerunt veteres ex immotis cineribus & non confusis literarum ductibus post aliquot lustra.

Notandum, quod in diversis locis diversa nubium altitudo: ideo, non valet consequentia: hunc montem nubes æque tegunt: Ergo est æque altus: Etenim in Septentrionalibus plagis nubes sunt multo humiliores.

Est quidem etiam alius modus in plano dimetiendi montes per duas stationes in eadem cum monte linea recta, sed proclivis est ad errorem propter exiguum angulorum differentiam.

Ex alia tamen altitudine nota, ex. gr. ex turri, cujus altitudo cognita est, & distantia à monte, accuratius consequemur montis altitudinem. Nempe si ponamus F esse turrin altam 300 pedibus, & in ejus vertice vel commodo loco observatum esse angulum BFP 83 gr. 30. min. Invenietur BP 5796 pedum, cui BA altitudo turris addenda.

PROPOSITIO III.

Data vel cognita altitudine visi montis, quanto inter-

intervallo ab eo distemus geodætice invenire, si instrumentum Goniometricum habeamus, vel etiam quadratum Geodæticum, vel radium, aut scalam altimetram.

Sit iterum montis altitudo AB , jam cognita ex scriptis aliorum decem stadiorum & 96 pedum Græcorum sive 6096 pedum. Locus noster F , & cupiamus scire intervallum FA . Observetur Goniometrico sive quadrante angulus BFA , sit ex gr. 84 gr. 23 min. Itaque in Triangulo rectangulo BAF , cum tria sint nota, erit, ut sinus totus ad Tangentem anguli ABF 5 gr. 37 minur. ita BA nota ad AF quæsitam.

Vt 100000 ad 9234 ita 6096 ad 600 pedes sive unum stadium. Tanto itaque intervallo, quod est FA , distamus à monte. Si quadrato geodætico vel radioutamur, non opus est Canone Sinuum, quod ex Instrumentorum ostensione & explicatio-
ne patescit, sed minus accuratus fit ex eis calculus propter defectum veræ proportionis.

NOTA. In duobus hisce problematibus addidi, Geodætice, quoniam alius est modus, quando semidiametro & peripheria Telluris utimur, ut jam proponemus: nam in prioribus intervallum FA tanquam lineam rectam sumimus, quia exigua est differentia inter illam & curvam.

PROPOSITIO IV.

*Dato intervallo, à cuius termino primùm conspici-
tur fastigium montis, inde invenire altitudinem
montis per Geographiam.*

Sumamus montem altissimum in Insula Tene-
riffa una ex Canariis, qui dicitur El Pico. Et sit
Terræ peripheria, & quidem Meridianus montis
illius $APCDF$; centrum R , mons ipse sit AB .
Duca-

Ducatur ex B, recta tangens ad peripheriam B F. Erit F ultimum seu primum punctum, ex quo montis vertex B conspici poterit: Ducatur R F. Testantur autem quidam nautæ, quod verticem montis illius conspiciant primò, cum adhuc quatuor gradibus ab eo absunt in Meridiano (namque in hoc situ sub eodem Meridiano facile est illis hanc in gradibus distantiam invenire). Itaque arcus A F erit quatuor graduum: ponamus itaque veram esse hanc relationem nautarum, & radium primum visivum B F venire directè à vertice B: & exquiramus, quanta sit futura montis altitudo, si ita res sese haberet. Angulus B F R est rectus, & quia F A est 4 gr. ideo etiam angulus B R F est 4 gr. & nota est R F semidiameter Telluris, & in Triangulo B R F tria data, eritque

Vt Sinus Torus ad secantem anguli B R F 4 gr. ita R F ad R B: Vt 10000000 ad 10024419 ita 3440 (milliar. Italic. R F, vel 860 mill. German.) ad 3448 mill. Ital. pro R B: aufer 3440 pro R A, manent 8 mill. Ital. vel 64 stadia sive duo Germ. pro altitudine montis A B, quæ incredibilis fere est, & omnino contra Veteres. Itaque sciendum duo assumpta esse in solutione problematis, quæ falsa sunt, primum, quod radius ille qui primus oculum ferit veniens à B, sit directus, cum tamen propter aëris densitatem sit refractus. Nimirum ex vertice B non potest duci ad F recta (si F A sit 4 gr.) quin prius incurrat in Tellurem, & ideo directè vertex B non potest in F loco videri, sed radio fracto, nempe B T F, qui fractus est, & quidem primus ex fractis, qui ad F potest pertingere.

Si itaque ponamus, quod hæc refractionis efficiat, ut uno gradu (hoc est quindecim milliaribus German.) citius hic mons videatur, quam videretur, si absque

si absque hac refractione esset, nimirum directo radio BF videri à tribus gradibus AF, inveniatur altitudo AB juxta expositam formulam quinque milliarium Italicorum vel quadraginta stadiorum. Sed quia verisimile etiam est, (quod secundum est) nautas parum liberalius vel minus accuratâ dimensione loqui, si adhuc dimidium gradum subtrahamus (neque enim amplius licere puto) ut videri eum ponamus à $2\frac{1}{2}$ gradibus, sive 38 milliaribus Germanicis pro FA hoc inquam posito, & instituto calculo, ut prius inveniatur altitudo montis AB unius circiter milliaris.

Si mons videatur à duobus gradibus, (sepositâ refractione) erit altus $2\frac{1}{2}$ milliar. Ital.

Si vero ab uno gradu seu 15 milliaribus Germanicis, erit altus $\frac{1}{2}$ mill. Ital.

Sive quinque circiter stadiorum. Adjicimus in hunc finem Tabulam sequentem.

Si montium altitudo sit.	$\frac{1}{8}$ mil. ger.	$\frac{1}{7}$ mil.	$\frac{1}{6}$	$\frac{1}{5}$	$\frac{1}{4}$	$\frac{1}{3}$	$\frac{1}{2}$	I.
--------------------------	-------------------------	--------------------	---------------	---------------	---------------	---------------	---------------	----

Tunc videbitur ab interv. mill.	14	18	20	25	26	$27\frac{1}{2}$	28	$29\frac{1}{4}$
---------------------------------	----	----	----	----	----	-----------------	----	-----------------

Sed hæc omnia intelligenda sunt sine refractione, quæ plerunquæ montium & altitudinem visam & distantiam visus auget, ut per Diagrammata videre licet: namque refractus radius FT productus exhibet altitudinem NA.

PROPOSITIO V.

Viso primum montis alicujus, cujus altitudo nota est, fastigio, invenire quanto intervallo ab illo distemus per Geographiam.

Hoc est conversum prioris, & posset ex Tabella præ-

præmissa solutio peti : sed calculus monstrabit accuratiorem solutionem. Sit itaque montis AB altitudo cognita , & videatur in F , placeat scire distantiam AF. BF tangit peripheriam. In Triangulo rectangulo BFR , angulus F est rectus, & cognita sunt duo latera RF , semidiameter Telluris, & RB eadem semidiameter cum AB, quam ponamus esse $\frac{1}{2}$ mill. German. Et quia RF vel RA est 260, erit RB 860 $\frac{1}{2}$. Et fiat ut RB ad RF ita sinus totus ad sinum anguli RBF.

In Pedibus
Rynland.

Vt 860 $\frac{1}{2}$ ad 860 ita 10000000 ad
Vt 19609700 ad 19598300 ita
10000000 ad 9994186, sinus 88 gr.
2 min. 40 pro RBF.

Itaque BRF, hoc est arcus AF erit 1 gr. 57 m. 20 sec. qui conversi in milliaria Germanica efficiunt 29 $\frac{1}{4}$ mill. Itaque ab hoc spatio videbitur mons sine refractione , si altus sit $\frac{1}{2}$ milliar. cui pro refractionis augmento addere licet octo milliaria, ut à 37 milliariis videri possit : sed refractionis quoque pro diversa Solis altitudine variat, neque abest ante Solis ortum vel post occasum. Verum plura de hoc negotio dabimus capite de Aëre & parte tertia hujus libri, ubi de Horizonte Visibili agemus.

PROPOSITIO VI.

Data longitudine umbra , quam mons aliquis spargit, & data ad id tempus altitudine Solis, invenire montis altitudinem.


Hoc problema proponemus magis propter antiquitatem & jucunditatem, quam quod per umbram accurate obtineri posse altitudinem putamus.

Scri-

Scripterunt Plutarchus & Plinius, (& res certa est propter vulgarem versiculum, Ἀθὼς κατὰ ὄψιν πλοῦσι Λημνίας βούς. Athos teget latera buculæ Lemniæ) quod mons Athos in Macedoniæ littore situs adeo elatus sit, ut umbram jaceat usque in Insulam Lemnum, Sole in Cancro existente, & quidem in forum urbis Myrrinæ, ubi terminus umbræ olim designabatur bucula ærea, quam incolæ propter rei miraculum posuerant: Et scribit Plinius, intervallum intermontem Athos & insulam Lemnum censi octuaginta septem millibus passuum, sive 87 milliar. Italicis.

Sed non annorarunt Scriptores altitudinem Solis pro tempore ejus umbræ. Verisimile autem est, umbram hanc sparsam à Sole jam jam Occidente, sive ubi civitati Myrrinæ occultari incipiebat à monte Athos, (est enim Athos à Lemno versus Occidentem situs) vel ubi in eo Myrrinæ verticali erat, qui per Athos montem ducitur. Etsi vero possimus ponere, Solem tunc fuisse in Horizonte

fere Myrrinæ FO, & sic radiū OF transficisse per verticem montis B, & jecisse umbram AF, eritq; tunc OF tangens peripheriæ, & quia datur FR, & angulus FRB (vel aliu-
mendo Triangulum BAF, & FA tan-
quam rectam) invenietur BA stadiorum octo sive unius Italici miliaris, altitudo montis. Attamen quia in hoc Solis situ non potest notari terminus umbræ quippe infinitæ, & præterea ædificia urbis Myrrinæ



Myrrinæ impedirent & umbram & Solis vicinos umbræ radios, ideo statuendum est, Solem ad minimum duobus gradibus adhuc fuisse elevatum supra Horizontem myrrinæ, ex. gr. in S, ut angulus SFO sit 2 gr. & SF radius Solis transiens per verticem montis T, & umbram in F terminans. Erit itaque in Triangulo RFT obliquangulo datus angulus TFR 92 gr. & FRT datur 1 gr. 16 min. (quia AF assumimus 87 miliar. Ital.) & ideo FTR est 86 gr. 54 min. & nota est semidiameter FR, 860 miliar. German. Ideo invenietur TR juxta hanc proportionem.

Vt sinus anguli FTR 86 gr. 54 min. ad sinum anguli TFR 92 gr. ita FR ad RT 860.

Itaque RT erit 861 miliar. German. & AT montis Athos altitudo unius miliaris Germanici sive 32 stadiorum, quæ nimia est, cum Græci non ultra undecim stadia montes elevari statuerint.

Si unius gradus altitudinem Solis assumamus, invenietur altitudo montis Athos viginti stadior.

Verumenimvero causam hujus nimie magnitudinis provenientis ex calculo, existimo esse nimiam distantiam Lemni à monte Athos assignatam à Plinio: namque & Tabula Græciæ Sophiani, & Tabula modernæ Græciæ Blavii exhibent tantum 55 milliar. Ital. distantiam pro FA. Ideo angulus FRT erit vix 1 grad. nempe 55 min. Et sumtâ Solis altitudine 1 gr. 30 min. erit angulus TFR 91 gr. 30 min. & ideo FTR 87 gr. 35 min. Et si fiat in Triangulo FRT.

Vt sinus Ang. FTR 87 gr. 35 min. ad sinum Anguli TRR 91 gr. 30 min. ita FR 860 ad RT. Vel in Triangulo TFA rectangulo ad A, erit angulus TFA 1 gr. 30 min. & assumitur FA tanquam recta quinquaginta quinque miliarium, invenie-

venietur altitudo AT juxta hanc proportionem :
 Ut sinus totus ad tangentem anguli TFA , 1 gr.
 30 min. ita FA 55 miliaria ad AT altitudinem
 montis.

Hic etiam solvendum esset problema , quomo-
 do montis alicujus altitudo inveniatur , si explo-
 ratum sit , quanto citius in illius vertice Sol con-
 spiciatur oriri , quam ad pedem montis , Et contra ,
 si altitudo detur , quomodo hæc Temporis diffe-
 rentia sit investiganda , qua de re Aristoteles &
 Plinius quædam incredibilia prodidere & quæ se-
 rius se habere calculus docet. Sed cum hoc sine al-
 terius problematis solutione , quod ad partem se-
 cundam hujus libri retulimus , non possit explica-
 ri , ideo differemus duo hæc problemata ad ca-
 put xxx.

PROPOSITIO VII.

*Montium altitudo ad semidiametrum Telluris
 non habet sensilem proportionem , sive adeo exigua ,
 ut rotunditati Telluris non magis officiat , quam
 punctum in globi artificialis superficie notatum.*

Ostendimus enim montem insulæ Teneriffæ di-
 ctum , el Pico de Tayde non majorem habere alti-
 tudinem , quam unius milliaris vel ad summum
 minus cum dimidio. Et verò vix ullum montem
 eo altiore reperiri testatur experientia. Cum ita-
 que semidiameter Telluris sit milliarium 860 , erit
 ratio altitudinis maximæ montium ad semidia-
 metrum Telluris , quæ est 1 ad 860 , nempe qua-
 rum partium semidiameter Telluris vel globi ali-
 cujus est 860 , talium unam habebit altitudo
 montium maxima. Cumque paucissimi sint mon-
 tes tantæ altitudinis , sed plerique vix ad quartam
 milliaris partem ascendant , manifestum est , quod
 rotunditatem Telluris non magis tollant , quam
 aspe-

asperitates quædam in globis manu factis artificum horum globorum rotunditatem. Etenim in tota rerum natura nullum corpus est, quod exactam & Geometricam rotunditatem habeat.

PROPOSITIO VIII.

Quomodo montes extiterint, explicare.

Hanc quæstionem quidam Philosophi moverunt: plurimi inutilem esse censent, neque de eo quærendum existimant, propterea quod montes cum ipsa tota Tellure generatos esse opinentur. Atqui non paucos subsidisse montes fornicibus, faxeis exesis vel aliam ob causam fatiscentibus, historiæ testantur. Quorum autem naturalis corruptio est, illorum quoque generationem naturalem, non supernaturalem fuisse judicamus. Præterea quosdam montes progressu temporis generatos esse, colligitur ex conchularum testis, quæ in quibusdam montibus inveniuntur, ut in Geldriæ montibus. Et generationis modus hic esse videtur, si ventus vehemens arenam & sabulum paulatim in locum montis deferat & accumulet accedente pluviâ. Qui modus sicut minores montes producere potest, ita verisimile videtur, majores montes non esse generatos sed ejusdem cum tota Tellure ætatis & originis. Qui magis Theologicè philosophantur, illi censent Tellurem primò à Deo creatam fuisse mollem & omnino Sphæricam sine extantibus partibus vel montibus, sine cavitatibus, deinde cum Deus aquam à terra recedere jussisset, tunc alveos in terra factos fuisse atque terram ex alveis remotam montes constituisse. An vero tanta sit montium multitudo & magnitudo ut omnes maris alveos implere possint, ipsi viderint.

PROPOSITIO IX.

Cur in montium fastigiis pluvia, nebula, nivesque frequentes sunt, cum in vicinis vallibus aer serenus est sine talibus meteoris?

Testantur illi, qui in montanis Asiæ, Peruviaeque aliarum regionum peregrinati sunt, quod frequenter accidat, ut in montium vertice versantes experiantur pluvias, nivem vel densam nebulam, descendentes verò ad subjectam vallem nihil eorum, sed serenum aërem sentiant. Idem in nostra regionis montibus aliquando animadvertimus.

Causam hujus phaenomeni quidam esse dicunt, quod montes attrahant aërem & nubes: Sed quia facultate id faciant, non explicant, ideoque nihil ad rem loquuntur. Mihi id videtur fieri hoc modo: Vapores & exhalationes ubi in media aëris regione (in qua sunt plerique montium vertices) condensantur in guttulas, deorsum vergere incipiunt. Et quoniam montium vertices sunt illis viciniore, quam subjectæ valles, ideo illæ guttulae, quæ supra vertices illos existunt, prius ad terram, pervenientes locum in aëris regione deserunt, quem vicinæ guttulae statim occupant, quia arguentur & trudentur ab aliis vel ratione fugæ vacui, vel quia aquæ hæc natura est, ut ad illum locum fluat, ubi incipit fieri fluxus vel ubi est locus magis depresso.

PROPOSITIO X.

Montibus accidunt, ruina, ruptura, transpositio.
Rara quidem horum accidentium exempla sunt, quidam tamen in historiis leguntur. Rupturae exempla in sequ. cap. afferemus.

PRO

PROPOSITIO XI.

An montis superficies sit capacior, quam subiectum planum, cui insistit.

Majorem esse probat Geometria : sed an ideo plures homines vel majorem frumenti copiam possit proferre alia quæstio est. Ego affirmativam probo, Etsi enim omnia in monte posita debeant esse perpendicularia ad subiectum planum, tamen major copia terræ & major superficies ad est.

CAPUT X.

De montium differentiis & tractu, & in specie de montibus ardentibus.

PROPOSITIO I.

Montium quidam parvo circumscripti sunt intervallo, alii longo tractu se extendunt & progrediuntur.

Atque hi posterioris speciei dicuntur juga. Reperiuntur talia juga in omnibus fere terræ regionibus, ita ut continua censi possint, nisi parva intervalla intercederent. Progrediuntur autem in varias plagas : quædam à Septentrione in Austrum, quædam ab Oriente in Occidentem, & alia ad plagas cardinibus collaterales.

Celebriora juga sunt hæc.

I. Alpes, qui Italiam à vicinis regionibus separantes vasto terræ tractu se extendunt & quasi brachia emittunt in alias provincias, nempe per Galliam ad Hispaniam ubi Pyrenæa juga appellantur, ad Rhætiam Rhætica, ad Pannoniam, Pannonia, & dubia, deinde supra Dalmatiam Dalmatica, & protenduntur usque in Thraciam
& Pon-

& Pontum per Macedoniam. Sed quoniam inter Iulia & Dalmatica juga mediocriter intercedit intervallum, ideo quidam in Iuliis jugis finem Alpium constituunt. Mittit unum brachium perpetuis jugis lunatoque cursu per totam Italiam transiens, eamque bifecans usque ad fretum Siculum, neque simplex ubique progreditur, sed in multis partibus collaterales comites seu ramos emittit, quosdam etiam montes propter insignem altitudinem vel aliam causam singularibus appellationibus donatos, ut est Massicus mons, Gaurus, Monte di Capua, Vesuvius ardens, &c.

2. Jugu Peruviana omnium longissima. Totamenim Americam Australem ab Aequatore usque ad Fretum Magellanicum pervadunt, separantque Peruvianum regnum ab aliis provinciis, ita ut tractus hujus jugi sit octingentorum circiter milliarium Germanicorum (quorum quindecim unum gradum facere ponuntur.) Atque adeo celsa sunt fastigia horum montium, ut ipsos avium volatus fatigare dicantur, uno duntaxat, quod adhuc exploratum sit, eoque difficillimo transitu. Multa ex illis perpetuis teguntur nivibus tam æstate quam hyeme: multa nubibus involvuntur, quædam ultra mediam æris regionem elevantur. Sane Hispanis aliquando transeuntibus ex Nicaragua in Peruviam, accidit, ut in summis montium interjectorum jugis non pauci subito expirarent cum ipsis equis, & quasi gelu obriguissent, statuarum instar manserint immobiles. Cujus sane causa fuisse videtur defectus æris, qualem respiratio nostra seu pulmones postulant. Reperiuntur in his jugis etiam sulphurei & fumantes montes.

3. Plurima alia juga sunt inter Peruviam &

Brasiliam, quæ etiam per Chicam regionem se extendunt ad fretum Magellanicum, ubi vertices montium perpetuis nivibus occultantur, et si sub latitudine 52 gr. jaceant.

4. Hisce jugis adde, et si minus celebria, Canadensia, Novæ Albionis, & plurima alia in America Septentrionali, perpetuis nivibus testata.

5. Tauri montis jugum in Asia. Hoc apud veteres nobilissimum & totius Orbis maximum habebatur. Exoritur in Asia minori à Pamphylio mari juxta Chelidonias insulas, & per varias regiones atque vasta regna aliis aliisque nominibus progreditur ab occasu in ortum usque ad Indiam, dividitque Asiam universam in duas partes, quarum altera, quæ Septentrionem spectat, Asia intra Taurum, altera, quæ Meridiem, Asia extra Taurum appellatur. Multis à latere comitibus stipatur hinc inde, inter quos celebres sunt Antitaurus major & minor, qui Armeniam majorem & minorem bisecant, ubi ipse Taurus transit inter Armeniam & Mesopotamiam, multa brachia versus Septentrionem & Austrum emittit.

6. Imaus mons, crucis forma duabus viis progreditur tam versus ortum & occasum, quam versus Septentrionem & Austrum. Septentrionalis pars nunc Alkai perhibetur. Protenditur versus Austrum usque ad Indiæ fines & Gangis fluvii fontes, longitudine milliarium Germanicorum quadringentorum circiter. Dividit Scythiam Asiaticam in duas partes, quarum illa, quæ occasum spectat, dicitur Scythia intra Imaum montem, quæ ortum, dicitur Scythia extra Imaum montem.

7. Caucaſi montis jugum à Septentrione ad Austrum, versus pontum Euxinum à Caspio mari

(cui

(cui vicinum est) extenditur, latitudine quinquaginta milliarium, atque navigantibus in Caspio mari certum instituendi cursus indicium; attingit montem Ararat Armeniæ, in quo arcam Nohæ resedisse Scriptura Sacra testatur, & in hunc usque diem asservari Persæ atque Turcæ perhibent. Ararat vero montes Taurò vicini sunt: quippe omnes hi montes contigui. De altitudine Caucaſi dicemus capite x x.

8. Jugum Chinenſe, quod complectitur montes Damasios veteribus dictos versus occasum, & Ottorocoram versus Septentrionem. Hoc jugum multis montibus haud sane continuis sed hinc inde transitum concedentibus constat. Et montes Cambojæ ejusdem jugi pars esse videntur.

9. Juga Arabiæ, quæ triplici ordine progrediuntur, quorum pars est sanctus mons Sinai.

10. In Africa celeberrimum & innumeris Poëtarum Græculorum figmentis prædicatum jugum est Atlas. Oritur à litore Africæ Occidentalis Oceani, & per totam Africam se extendit versus Orientem usque ad confinia Ægypti loca. Fontes habet omnium ferè fluviorum Africæ, in plurimis partibus nivofus, frigidusque etsi in zona Torrida jaceat.

11. Jugum Africæ prope Monomotapam, quod Montes Lunæ vocatur. Cingit totam ferè Monomotapam, & ejus brachia multa sunt, ut Zeth mons & nivofus montes. Plurima alia juga in Africa & ferè innumera reperiuntur parvo intervallo sejuncta, ita ut omnia fere contigua sint & unius jugi partes esse videantur.

12. Montes Riphæi Europæ, qui & Obii dicuntur: à mari albo seu sinu Moscovitico progrediuntur ad ostium Obii fluminis, eosque Mosci

vocant VVeliki Kamenypoyas, id est, magnum lapideum cingulum, quoniam eis montibus totum terrarum orbem cingi existimant. Aliud hic jugum est, quod Russi vocant Joegoria. Incipit à termino australi Tattariæ & usque ad Oceanum Septentrionalem se extendit; atque ex hoc plurimi fluvii oriuntur, nempe VVisagda, Neem, VVisfæra, & maximus Petfiora. Mappæ hæc omnia male expriment vel potius omittunt. Præterea triplex jugum decurrit inter Siberiam & Russiam à Septentrione versus Austrum. Vnum ex iis Russi appellant Coosvinscoy Camen, cujus latitudo vel transitus est duorum dierum iter. Huic intercedentibus quibusdam vallibus, proximum est secundum dictum Cirgins Koy Camen, itidem duorum dierum itinere; tertium Podvins Coy Camen altissimum ex tribus hisce jugis, quod in plurimis partibus per totum annum tegitur nivibus & nubibus, ideoque molestum præbet transitum, qui est quatuor dierum. Vrbs Vergateria Siberiæ ei vicina est.

13. Juga Norvvegiæ & Lappiæ, quæ à promontorio australi Norvvegiæ incipiunt, atque Sueciam ex parte separant à Norvvegia, deinde multis ordinibus progrediuntur in ultimam usque Lappiam, variisque vocabulis distinguuntur, ut Fillefiel, Dofrefiel &c.

14. In Germania celebre est jugum Hercinium, cingens totam Bohêmiam & variis flexibus se extendens in varias regiones, idque variis nominibus. In Ducatu Brunsvvicensi servat veterem appellationem, ubi dicitur *der Harz*: pars ejus est mons Bructerus.

PROPOSITIO II.

In plerisque insulis & procurentibus terræ continentis partibus juga montium ita sita sunt, ut medias terras pervadant atque in duas partes dividant.

Sic in Scotia Grampius mons est (Gransbain vocant incolæ) qui hanc insulam ab ortu in occasum pervadit & mediam secat in duas partes, quarum ut solum & incolæ non parum discrepant. Ita in insulis Sumatra, Luconia, Borneo, Celebes, Cuba, Hispaniola juga montium reperiuntur, quæ à littore maris versus insularum medium paulatim assurgunt in egregiam altitudinem.

Ita procurentem Asiæ partem, quæ India dicitur, juga Gatis mediam pervadunt. Oriuntur enim à Caucasi extremitatibus & ad Cori usque promontorium, quod Cabo de Comorino vulgo dicitur, progrediuntur à Septentrione in Austrum, atque ita Indiam hanc procurentem dividunt in duas partes, quarum illa quæ eis juga Gatis versus Occidentem jacent, dicitur Malabarica regio, altera trans Gatis juga versus Orientem dicitur Coromandelia. Eadem hæc juga reliquam Indiam, quæ nunc Bengala dicitur, pervadunt per regnum Pegu Siam atque totam Malaccensem Cherfoneum.

Ita juga procurentis terræ, quæ Camboja dicitur: similia in Peninsula vel Insula Californiæ, in procurrente Africa à Zaire lacu ad promontorium Bonæ spei, in peninsula Corea, in Italia apenninus, &c.

Quomodo hæc juga extiterint, utrum cum ipsa Tellure orti, an postea à naturalibus causis generati sint, incertum est.

PROPOSITIO III.

Montes altitudine insigni celebres enumerare.

1. El Pico in Teneriffa insula, incolæ vocant Pico de Terraira. Censetur altissimus totius Telluris, & clarè satis conspicitur ejus vertex in mari ab intervallo sexaginta milliarium (de quo in præced. cap. diximus) antequam accedas ad illum. Non ascenditur in illum, nisi Julio & Augusto mensibus, quoniam reliquo anni tempore nive reclusus est, etsi neque in ipsa insula Teneriffa neque in adjacentibus Canariis unquam nix conspicitur. Vertex supra nubes attolli videtur manifeste, cum hæc medium montem cingant & vertex extare supra hanc nebulam conspicatur. Quoniam tamen nives patitur, ideo certum est, quod non ultra mediam regionem aëris protendatur. In ascensu ad verticem usque requiruntur tres dies: est autem vertex non acuminatus, sed planus, atque aëre sereno & sine nebula existente reliquas circumjacentes Canarias insulas distincte ex illo cernere licet, quarum quædam quinquaginta milliariis ab eo remouentur. Duobus illis mensibus deferuntur ex monte multi sulphurei lapides atque in Hispaniam magna copia vehuntur. Scalliger scribit, Teneriffæ hunc montem summo è fastigio continua vomere incendia, sed ex quo auctore id habeat, ignoro: in illis, quos ego legi, nihil tale commemoratum inveni.

2. In una Azorum seu Flandricarum insularum prope insulam Fayal reperitur mons dictus Pico de Sancti Georg, unde & ipsa insula dicitur Pico. Aequalem cum Teneriffæ monte altitudinem habere scribitur, imo quidam aliquantum altiores esse volunt.

3. Jugum dictum Cordillera Americæ Austrialis, separans Peruviam à reliquis Provinciis, insigni adeo ubique altitudine esse dicitur, ut nulli monti Telluris altitudine cedat. Progreditur à freto Magellanico ad Panamam usque.

4. Ætna mons Siciliae, ex cujus vertice ejaculati ignes conspiciuntur in ipsa insula Melite, unde integri milliaris altitudinem habere putatur ad minimum: sed in præcedenti capite jam monuimus de causa hujus apparentis altitudinis.

5. Heccla mons Islandiæ.

6. Pico de Adam in insula Ceilano.

7. Mons Bruçterus in Germania, & Abnoba.

8. Mons Figenojamma in Japonia, nubes superare altitudine putatur.

9. Caucasus altitudinem magnam prodiderunt veteres.

10. Pelion Macedoniæ mons. Plinius ait, Dicaarchum Mathematicum jussu & impensis Regum hujus montis altitudinem dimensum fuisse, atque deprehendisse eam passuum mille ducentorum & quinquaginta, hoc est decem stadiorum, sive $\frac{1}{3}$ milliaris German. Geminus montem Cylleenem à Dicaërcho ait inventum tantæ altitudinis.

11. Arthos mons de quo Mela lib. 2. cap. 2. Arthos, inquit, adeo elatus est, ut credatur altius, quam unde imbres cadunt, surgere. Caput opinio fidem, quia de aris, quas in vertice sustinet, non abluitur cinis, sed quo relinquitur aggere manet: toto longo dorso procurrit in pelagus. Qua continenti adhæret, à Xerxe in Grajos tendente perfossus & transnavigatus & facilius freto navigabili pervius.

12. Olympus mons Asiæ minoris, de quo in præced. cap. diximus.

13. Casius mons in Asia, quem Plinius quatuor mille passuum altitudine elevatum esse scripsit.

14. Hæmus mons, quem Martianus Capella sex millibus passuum cacumen attollere refert.

15. Sîsimethræ petram strabo narrat inventam fuisse altitudinis quindecim stadiorum, & Sogdiani petram altitudine dupla.

16. Atlas mons Africæ, de quo jam diximus in præced. Propos. Hunc adeo altum esse finxerunt Poëtæ, ut cælum humeris sustineat: sed minus insignem ejus esse altitudinem hodie docuit experientia.

PROPOSITIO IV.

Montium plures differentias exponere.

Prioribus propositionibus tres differentias explicavimus, nempe

1. Quidam longo tractu extenduntur, alii parvo circuitu terminantur.

2. Quidam medias regiones secant, alii per quosvis regionum tractus transeunt.

3. Quidam sunt insigni altitudine, quidam mediocri, alii parva. Hisce differentiis addi possunt hæ:

4. Quidam montes sunt arenosi, quidam petrosi, alii argillacei, cretacei &c.

5. Quidam montes fluviorum fontes habent, alii sine fontibus.

6. Quidam montes sylvis ornantur, alii sine arboribus.

7. Quidam montes ardentes & fumantes sunt, alii sine ignibus.

8. Quidam montes metalla largiuntur, quorum

rum quidam aurum, argentum, alii ferrum, &c. alii sine metallis.

9. Quidam montes nivibus continue teguntur, alii in æstate liberantur à nive.

PROPOSITIO V.

Montes ardentes & ignivomos enumerare.

Dicuntur autem hodie tales montes Vulcani, quam appellationem Lusitani nautæ primum invexerunt, & jam à nautis communiter usurpatur. Sunt autem hi

1. Celeberrimus est Ætna, Siciliae mons, hodie Gibel è ejus vertice ejectæ flammæ & fumi longissimâ distantia in mari mediterraneo cernuntur, nempe in ipso Melitæ insulæ portu, qui tamen 40 milliaribus Germanicis à littore Siciliae abest. Etsi continua sit flammarum & fumorum ejaculatio, tamen interdum majori impetu furit; Anno 1537 à primo die Maji usque ad xii tremuit tota Sicilia: deinde ingens & horrendus mugitus & fragor auditus fuit, quasi magna tormenta bellica exploderentur: secuta est multorum ædificiorum per totam insulam ruina. Hæc sævitia per xi dies cum continuassèt, disrupta fuit vel hiatu se aperuit hinc inde terra, unde magna vis flammæ & ignis prorupit, quâ intra quatuor dies omnia absumta sunt & cremata, quæ non ultra quinque leucarum distantiam ab Ætna aberant. Paulo post crater, qui est in vertice montis, per tres integros dies ingentem copiam favillæ & cinerum ejecit, quæ non tantum per totam insulam dispersa fuit, sed etiam trans mare in Italiam delata: & naves in mari cum ducentis leucis à Sicilia abessent & ad Venetias tenderent, damnum passæ sunt. Farellus descripsit prolixè

hujus montis incendia : & circuitum pedis ejus esse scribit 100 leucarum.

2. Hecla mons Islandiæ , non minus interdum sævit quam Aetna , & magnos lapides projicit : continui in illo ignes libero exitu carentes sæpe miros edunt sonos lamentationibus similes , inde multi creduli putarunt , ibi esse infernum & impias animas cruciari.

3. Vesuvius Campaniæ , hodie monte di Somma, non procul ab urbe Neapoli: consitus quidem est vitibus fertilissimis extra incendii tempus vini optimi falerni, at frequentibus obnoxius incendiis. Dion Cassius refert, regnante Vespasiano adeo vehementius fuisse incendium ejus & flammarum impetum , ut cineres ex ejus foco seu penetralibus cum sulphureo fumo projecti non modo Romam venio deferrentur, sed etiam ultra Mediterraneum mare in Africam usque & Aegyptum , præterea aves in aëre suffocati deciderent in terram, pisces in fervente & infectâ vicina aqua interirent. de hoc incendio & montis tristi immutatione elegans est apud Martialem carmen , qui eo tempore vixit , & vidit virentem & atrum deinde ex favillis montem. Sed deinde cessante incendio & pluviis irrigantibus sulphureas favillas & cineres in montis superficie magna hinc exitit ejus fertilitas vini. Cæterum ante aliquot lustra iterum arsit mons iste & crebros fumos emisit. Vicinus ager combustus est & frequentibus inde foveis periculosus viatori.

4. Mons in Java insula, non procul ab urbe Panapura. Hic anno 1586 cum antea non arsisset, primum disruptus est violentâ flagrantis sulphuris eruptione adeo ut ad decem millia hominum perisse dicantur in subjectis agris, atque ingentia sa-

xa in urbem Panacuram ejecerit. Tribus continuis diebus tantum fumum atrumque mixtis flammis & favillis evomuit, ut Solem regeret & ferè tenebras diei inferret.

5. Mons Gonnapi in una Bandanarum insularum. Is anno 1586, mense Aprili, cum jam septendecim annis arsisset, disruptus est ingenti cum fragore, atque tantam copiam magnorum saxorum & massæ sulphuræ ardentisque materiæ ejaculavit in mare & terras, ut omnibus horrorem incuteret. Cinerum & favillæ ingens vis, quæ etiam tormenta bellica, quæ Belgæ in arce sua seu castello habebant, inutilia reddebat ad usum, tantæ nimirum copia illis incumberebat. Saxa ardentia in mari reperta unius integræ orgiæ, minorum verò tanta multitudo, ut vix naviculis iter in mari concederet. Aqua ad litus insulæ multis adhuc horis ebulliebat, ac si ignis ei subjectus esset: pisces plurimi enecati & fluitantes conspecti.

6. Mons Balaluanum in insula Sumatra, fumum & flammam evomit, ut Aetna.

7. Terra insularum Moluccarum diversis locis cum insano reboatu ignes eructat. Sed præcipua camino Ternatensi nobilitas. Mons in nubes assurgit excelsus & arduus, cujus inferiora densis nemoribus vestiuntur, superiora ex incendiis glabra & horrida sunt. In vertice crater, hiatus vasto, in plures circulos, circumductos majores minoribus ad speciem amphitheatri discedit. Inde, per æquinoctia maxime, (in Vere & Autumno) certis flantibus ventis, inprimis borealibus, cum horrifico fremitu flammæ atro mistæ fumo & cum favillis erumpunt, atque omnia latè loca cineribus complent. Visendi annuæ sunt vices: nec nisi

per funes aut ferramenta quibusdam locis ascensus est: incolæ etiam sulphur optimum alicubi colligunt. Hæc Massæus.

8. Una ex Mauricis insulis (distant 1 x leucis à Moluccis) sæpissime tota motibus terræ concutitur, ignemque ac cineres evomit. Ignis subterranei tanta vis, ut rupes conflagrent totæ: sæpe saxa ignea erumpunt, maximarum instar arborum: ubi autem ventus existit vehementior, è cavernis tanta vis cinerum effunditur, ut viri ac mulieres laborantes in campis domum revertantur cinere oppleti: complures quoque apros illi cineres opprimunt, qui, ubi ventus remisit, passim repertiuntur mortui: pisces quoque plurimi in littore enecti, qui etiam vulgo intereunt, si cinere aspersam aquam hauriant. Ex vertice montis cum horrendo mugitu, crebrisque tonitribus, qualia majoribus tormentis eduntur, sordidum ac tetrum erumpit incendium, & magna cineris, pumicumque & ambustorum igne lapidum vis.

9. In Japonia mons est incertæ appellationis flammæ assidue evomens, in cuius cacumine (si credere fas est) certis hominibus, postquam voti causa diu se macerârunt, splendida circumfusum nube Cacodæmoné sese ostendere scribit Massæus.

10. Plures Vulcani in insulis Japoniæ septuaginta milliaribus à Firando distitis reperiuntur. Item in parva quadam insula, quæ inter Tanaxumam & insulas appellatas, septem sorores, jacet, mons conspicitur interdum ardens, reliquo tempore fumans.

11. In Tandaja insula una ex Philippinis, ubi est promontorium Spiritus Sancti, aliquot parvi Vulcani inveniuntur. Unus etiam in insula Marindique, quæ itidem Philippinarum pars est.

12. In

12. In Nicaragua Americæ provincia, triginta quinque leucis ab urbe Leon mons altus adeo ejicit flammæ tantâ copiâ, ut ad decem millia passuum videantur.

13. In jugo Peruviano, dicto Cordillera, hinc inde rupes & montes quidam Vulcani, partim fumantes partim ardentes & ignivomi esse dicuntur, imprimis in Carrapa provincia Popajanæ mons est, à cujus vertice quando cælum serenum est, plurimus fumus elevari cernitur.

14. Prope Arequipam urbem Peruviæ, nonaginta leucis à Lima distantem, mons aliquis sulphureus continue ignes ejaculat, quem metuunt ne aliquando rumpatur & urbem adjacentem obruat.

15. In Peruvia prope vallem, quæ Mulahallo appellatur, quinquaginta leucis circiter à Quito, Vulcanus seu sulphureus mons est, qui aliquando disruptus magnos lapides ejecit & ingenti fragore loca etiam remota terruit.

16. In una insularum, quas Papoys appellant, quam le Maire detexit, (nisi ea fortassis adhærent continenti Australi) ex Orientali littore novæ Guinæ Vulcanus est, qui eo tempore ardebat.

17. Montes quidam jacentes ad Orientalem ripam fluvii Jeniscea in Tingæforum regione ultra Obium versus ortum itinere aliquot hebdomadam, Vulcani sunt, Moscis referentibus.

18. Montes quidam ad fluvium Pefida ultra Tingæforum regionem.

19. Mons Fesslanus dictus Beni Gua zeval antrum ignivomum.

20. In Liburnia non procul à littore prope urbem Apolloniam petrosus mons, è cujus vertice sæpe erumpit fumus & flamma, In vicinia calidi sunt fontes.

Sunt etiam quidam montes, qui jam ardere desierunt. Sic insula Queimoda ad littus Brasiliæ non procul ab argentei fluvii ostio olim arsit, jam non amplius, unde vocant *het verbrande Eylandt*. Sic montes in Congo vel Angola, quos vocant, *de verbrande bergen*. In insulis Azoribus seu Flандricis, imprimis Tercera & S. Michael olim in plurimis locis & rupibus terra ardebat, jam in quibusdam locis tantum fumus interdum expellitur: unde & crebri terræ motus inibi existunt. Insula S. Helenæ & Ascension terras habent similes adustis, favillis & cineribus, ut verisimile sit olim arsisse harum insularum montes, quod etiam probatur à sulphurea terra & carbonibus, quos *Smitskolen* vocant, quales tum in hisce tum azoribus insulis reperiuntur. Et cum in plurimis locis illi reperiantur & effodiantur, sintque ad sumum faciendum ignemque concipiendum & fovendum aptissimi, nil mirum si novi interdum existant Vulcani. Causa nimirum ardentium montium est sulphurea & bituminosa substantia, quæ in talibus montibus continetur.

PROPOSITIO VI.

Iuga quadam nullum transitum seu aperturam vel hiatum præbent, quadam multos, alia unum tantum vel alterum.

Vocantur autem portæ, item Thermopylæ. Ex quibus celebriores sunt 1. Thermopylæ in Phocide, à quibus nomen hoc cæteris communicatum: 2. Portæ Caspiæ, per quas tanquam viam angustam transitus conceditur inter montes Caspios. 3. Porta Cordilleræ jugi in Peruvia. 4. Porta jugi, quod inter Abassiam & Arabiam Troglodyticam extenditur, per quam annona ex illa regione in

in hanc importatur. 5. In Caucaſo monte portæ Sarmaticæ & Albanicæ.

PROPOSITIO VII.

Promontorium dicitur mons in mare aliquo tractu procurrens, vel in littore ſupra vicina loca elevatus.

In mappis appellantur Cabo, Luſitanico vocabulo, Latinis Caput.

Celebriora ſunt, 1. Caput Bonæ ſpei in Africæ extremo, quod ſuperandum eſt navigantibus in Indiam.

2. Caput victoriæ, in exitu freti Magellanic.

3. Caput Viride, in angulo ſeu cuspide Africæ, ubi ab Occidente in Orientem littus ſteſtitur.

4. Caput Vincētiæ in Hiſpania.

5. Promontorium Atlantis, quod olim dicebatur, Caput non, propterea quod illud ante aliquot ſecula nautæ exiſtimabant non poſſe ſuperari, vel ſi quis tranſnavigaſſet, non tamen illum ſalvum & incolumem reſeſſurum: ideoque iſ terminus erat navigationis eorum in Africæ littore. Alia promontoria in mappis videantur.

PROPOSITIO VIII.

Montibus opponuntur barathra, ſpecus & abyſſi, quæ in paucis terra locis reperiuntur.

Olim celebre erat memphiticum barathrum, hodie Iſlandiæ, quod S. Patricii vocant, & in Italia ſpecu, diſtum Grotta del Canē. In monte Feſſano Beni gua zeval antrum eſt ignivomum, de quo Leo Africanus p. 439.

In inſula Brūchus (adjacet VValliæ provinciæ Angliæ) ad mare rupes eſt: in qua hiatus, ad quem ſi aurem admoveris, malleolorum ictus, folium motus, ferri ſtriſturas, quaſi in officina ferriaria exaudias.

Non

Non procul ab urbe Bessia in Aquitania antrum est, vulgo, du Souley, in quo æstate murmura tonitruui instar exaudiuntur.

In multis locis medios inter montes reperiuntur valles profundæ adeo, ut aspicientibus horrorem & vertiginem inducant.

CAPVT XI.

De Fodinis, Sylvis & Desertis.

Nobilitant certos terræ tractus, fodinæ, sylvæ & deserta, de quibus etsi pauca proponi possint, tamen ad exactam superficiæ Terrestris cognitionem non inutile fuerit ea loca considerare, & tractus eorum limitesque designare, quod hoc capite paucis præstabimus.

PROPOSITIO I.

Fodina dicitur locus in terra, ex quo terræ metallica vel minerales vel aliæ terræ species effodiuntur.

Quoniam itaque varia sunt, quæ ex terra effodiuntur, ideo varias quoque denominationes fodinæ recipiunt, ut auri fodinæ, argenti fodinæ, cupri fodinæ, ferri fodinæ, marmoreæ fodinæ, gemmæ fodinæ, salis fodinæ, &c.

Auri fodina & argenti celebrioris sunt. 1. Peruvianæ, & Castellæ aurea omnium totius Telluris ditissimæ. Etenim per omnes Peruvix provincias reperiuntur fodinæ auri atque argenti feraces (non exclusis tamen aliis metallis) ita ut ipsi Peruviani atque Hispani olim gloriati sint, fundum hujus regni aureum esse atque argenteum. Girava scriptor Hispanus testatur, circa urbem Quito fodinas fuisse, quæ plus auri, quàm terræ largirentur.

rentur. Ideo cum Hispani primum in aureum hoc regnum (quod ideo firmissimis muniunt castellis & præfidiis) venissent, in multis urbibus, in primis regia, Cusco dicta, plurimas ædes conspexerunt intus & extus obductas laminis aureis. Militum etiam Peruvianorum primarii non tantum loricas argenteas sed etiam omnia armorum genera ex auro parata gestabant. Argenti fodina felicissima est in monte Potosi, in quo viginti millia hominum effodiendæ terræ operam dant descendentes per quadringentos gradus & plures. Inde ingens illa auri argentique vis, quam singulis annis Rex Hispaniæ in invidiam omnium reliquorum Imperatorum & Regum ex America accipit.

2. *Argenti fodina* præstantissimæ in Japoniæ insulis, unde Hispanis dictæ Argentariæ insulæ. Auri quoque fodinæ reperiuntur, sed hodie minoribus divitiis, ac olim.

3. Arabia olim auri fodinas uberiores habebat quam hodie.

4. In montanis Persiæ, item in China quædam argenti fodinæ sunt.

5. In Guinea multi montes auriferi sed à litore remoti, quod nautæ Belgi vocant De Gourt-kuste: non tamen omne aurum effoditur, quod inde petitur, sed & aliis modis colligitur. Reges verò singuli singulas fodinas possidere dicuntur & effossum aurum mercatoribus vendere, hi aliis, donec ad littora pervenitur, ubi Europæi commutant.

6. In Monomotapa divites auri, atque argenti fodinæ reperiuntur, ut etiam in Angola, quarum regionem fodinæ unius postes esse censetur, & continuæ.

7. Ex Europæ provinciis Germania superat reliquas

reliquas copiâ fodinarum , quarum quædam auri aliquantum largiuntur , multæ argentum egregiâ naturæ liberalitate , plurimæ cuprum , ferrum , plumbum , vitriolum , antimonium , &c. de hisce consulantur Germaniæ Descriptiones.

8. *Cupri fodinam* omnium hætenus cognitarum feracissimam habet Suecia in vasto monte unius circiter milliaris , quem vocant Den Kopperberg. Tanta cupri inde copia effoditur , ut tertiam reddituum regionum partem largiatur. Sunt quoque ferrifodinæ in Suecia , & argentifodinæ , sed hæ vix tantum præbent , ut operæ pretium refundant.

9. *Gemmeæ fodinæ* reperiuntur in Ceilano insula , in regno Congi (ubi etiam argenti fodinæ & ingens marmorea fodinæ , imo tota terra marmorea subitus esse creditur) in Peruvia , (Smaragdinæ circa Portovejo) in Gujana. Huic adjacens parva insula nomine S. Maria magnam auri copiam præbet , nempe ad centum libras (si Belgis credendum) singulis fere annis. In regno Golundæ Gemmifera fodinæ (plurimos adamantes largiebatur) jam desit fodi.

10. In Chili regione , auri , argenti , atque gemmarum feraces fodinæ sunt , sed incolæ bellicosi fugatis partim , partim trucidatis Hispanis inceptas fodinas demoliti sunt , pluri facientes ferrea arma , quam aurum atque argentum.

11. In insula Madagascar ferrum & stannum abundat , argenti mediocris copia , auri parum , plumbi nihil. Vnde fit , ut incolæ plumbea cochlearia pluri æstiment , quam argentea.

12. In insula Sumatra largas fodinas auri , argenti , æris ferrique esse scribitur , ita ut Regem anno 1620 regnantem ferant in terra desolâs habuisse mille libras auri.

13. In insulis Philippinis, Java, Hispaniola, Cuba aliisque reperiri auri, argētiq̃ue ut etiam cupri & ferri fodinas testantur historiæ. In Siamensibus etiam montibus perhibent inveniri aurum, argentum atque stannum.

14. *Salis fodinæ* reperiuntur in Polonia, ad pochniam quatuor milliaribus à Cracovia ubi pellucidi & candidi salis ingentia frustra exscinduntur è terra, in Transsylvania, Tyrolensi comitatu, in Hispania, in Asia minori, in Persiæ monte Kilissim, in locis prope mare Caspium, non procul à VVolga fluvio, ubi insula Kostovvata. Hinc effodiunt sal Russi & ad puriorem substantiam coquunt, atque per totam Russiam devehunt. In Cuba mons salinus est. Insulæ Ormus in sinus Persici initio montes omnes sale crySTALLINO constant, imo tota insula nil ferè nisi sal est, ex quo etiam parietes ædium fiunt. In Africa non aliud sal, nisi quod ex specuum salinis velut marmor, candidi rubei & cinericii coloris effoditur. In Peru octodecim milliaribus à Lima versus Septentrionem in valle quadam magna copia salis reperitur, unde cuivis licet petere, quantum placuerit, quoniam continue accrescit, neque unquam exhaurienda videtur fodina hæc. In regno Musilipatan Indiæ Coromandelix ad urbem Baganaga maxima salis copia effoditur, unde omnes Indi petunt. Plures salis fodinas Lectores studiosi colligere poterunt. De fontibus salinis dicemus capite alio.

PROPOSITIO II.

Sylva dicitur arborum multitudo longo & continuo tractu terra protensa, & sine cultura propagata.

Pleræque Sylvæ unius tantum speciei arbores habent

habent, & ab hisce denominantur, cumque arborum magna sit varietas, varix quoque Sylvarum differentix existunt, ut Palmetum dicitur Sylva palmas habens, Quercetum, quæ quercus, ita salicetum, æsculetum, &c. etsi hæc vocabula frequentius pro nemoribus seu minoribus Sylvis sumantur. Diversa autem sunt in diversis regionibus præsertim remotioribus. in Africa ad promontorium viride Sylvæ sunt malorum citreorum, aurantium (cujus fructus minimo pretio ibi carpere licet nautis appellentibus) quales etiam in aliis locis reperiuntur. In Gallia castaneæ arbores multas Sylvas faciunt. In Ceilano insula Sylvæ sunt arborum, quarum cortex cinamomum præbet. In Moluccis insulis Caryophyllorum arbores. In Bandanis Nuces muscatæ; In Brasilia Sylvæ arborum, quas Brasilienses vocant & lignum durissimum Brasiliense. In Africa dactyliferæ arbores faciunt Sylvas, inprimis in Numidia. In insula Madagascar aliisque locis Tamarindiferæ arbores. In Libano monte cedri, quarum etiam integræ Sylvæ reperiuntur in Japonia, ita ut malos navium inde conficiant. In Hispania, Gallia, Italia, Olearum Sylvæ & myrti. In Germania Sylvæ constant abiete, quercu, alno, fago, pinu, junipero, acere, populo, fraxino, ulmo. Celebriores Sylvæ sunt, Hercinia, quæ olim totam fere Germaniam occupabat, pars ejus Sylva Bohemica, der Böhmerwald / & in Ducatu Brunsvicensi baccensis seu semana, quæ sola hodie dicitur der Hartz / Gabreta, der Thuringer Wald / Martiana, der Schwarz Wald / & aliæ. In Scoria celebris Sylva Caledonia, atque in aliis provinciis aliæ, inprimis Norvegia, arboribus ingentibus abundat præ omnibus aliis regionibus, unde malos navium
tota

totā fere Europa accipit : Lithuania nil fere nisi arbores habet , unde magnus Regi Poloniae redditus.

PROPOSITIO III.

Deserta dicuntur vasti terræ tractus, qui ab hominibus non coluntur.

Ea duplicia sunt , Proprie dicta & improprie : Illa , quorum solum seu terra sterilis est & infæcunda : hæc , quæ fertilem quidem agrum præbent , sed non coluntur ab hominibus , qualia in Moscovia , in locis circa Mare Caspium à latere Volgæ atque aliis locis reperiuntur , ubi non pauci fertiles & opimi agri jacent inculti , in Moscovia quidem ob copiam agrorum & incolarum segnitiam , circa Volgam vero prope mare Caspium ob bella Tamerlanis quibus olim illæ regiones vastatæ & incolæ fugati sunt.

Sed hæc minus propriè deserta dicuntur. Ex propriè autem dictis celebriora sunt hæc , quæ in quatuor species dividi possunt , nempe Deserta arenosa , ericosa , petrosa , paludosa : Ericosa pleraque habent in plurimis locis hinc inde Sylvas & nemora , sunt quoque utiliora & facilius ad culturam perducuntur.

1. Africa deserta ferè omnia sunt arenosa , neque ulla pars terræ pluribus desertis laborat ; maxima in Libya reperiuntur : totam quoque Ægyptum cingunt.

2. Arabia deserta , quæ partim arenosa , partim petrosa sunt. Sed celeberrimum est illud arenosum desertum in Arabia , quod vocant vulgo *Die Sandjee*.

3. Deserta Tartariæ circa Imaum montem . Item Desertum Belgian circa Mongul , ubi falsò hæc-

hactenus creditum fuit opimum Cathajæ regnum
existere.

4. Deserta Cambojæ.
5. Deserta Novæ Zemblæ petrosa.
6. Norvvegiæ, Lappiæ, Sueciæ, Finmarchiæ.
7. Germaniæ deserta omnia sunt ericosa¹, vo-
cant een Heide, unde desertum in Lunæburgensi
Ducatu longitudine decem circiter milliarium
vocant, De Lunenburger Heide.
8. Deserta Americæ, &c.

SECTIO QUARTA

GEOGRAPHIÆ ABSOLVTÆ,

Continens Hydrographiam sex capitibus explicatam.

CAPUT XII.

De Oceani divisione per Terras.

QUoniam in præcedentibus de Terræ partibus
& divisione egimus, ordo postulat, ut etiam
Aquarum, quæ alteram Telluris partem faciunt,
divisionem & situm contemplemur, atque earum
proprietates, quæ ad Geographiam pertinent, ex-
plicemus. Capite septimo in Propositione secun-
da distribuimus Aquas in quatuor species, quæ
sunt 1. Oceanus. 2. Fluvii & fontes aquæ dulcis.
3. Lacus & paludes. 4. Aquæ minerales. Hoc ca-
pite agemus de Oceani divisione.

PROPOSITIO I.

*Oceanus continuo tractu universam Tellurem
partesque terrestres ambit, neque ejus superficies per
interpositas terras omnino alicubi interruptitur,*
sed

sed tantum latior continuïtas & liber congressus im-
peditur.

Propositionis veritas non nisi per experientiam probari potest, inprimis à circumnavigatione Telluris, quæ toties jam tentata, & feliciter absoluta est, primò ab Hispanis, Duce Magellane primo inventore Freti: deinde ab Anglis, bis, nempe à Dracone & Candischio: postremò à Belgis quinquies.

Veteres de hac continuïtate nequaquam dubitabant, quia Veterem tantum orbem pro Terra extante habebant, eamque undique ab Oceano cingi, quidam etiam innare censebant. At cum America esset detecta, (quæ à Septentrione ad Austrum longissimo tractu exporrigitur & Oceani continuïtatem impedit) & præterea Terra polaris Septentrionalis & Australis, tunc verò dubitatum de eo fuit non immeritò. Existimabant enim plerique, & illud non erat vero absimile, Americam & Terram Australem conjungi, sicut etiam Americam Septentrionalem cum Groenlandia multi ex hodiernis Geographis continuam esse arbitrantur. Quæ duo si ambo vera essent, non ambiret Oceanus totam Tellurem. Verumenimvero hæsitatio- nem & scrupulum sustulit Magellanes, quando anno 1520 invenit fretum inter Americam & Terram Australem, per quod conjungi Oceanum Pacificum cum Atlantico manifestè patuit. Quod itaque veteres ex falsa persuasione & opinione se scire existimabant, illud nos ab infallibili experientia scimus. Simile accidit cum Africa. Namque etiam ultra hanc Veteres sine ulla hæsitatio- ne ponebant Oceanum, atque Africam multo minori spatio ultra Equatorem protendi autuma- bant, quam revera est. Sed cum Lusitani littora
Africæ

Africæ navigassent atque vastas hic Terras longo etiam ultra Aequatorem tractu invenissent, tum verò dubitabatur, an posset circumnavigari Africa (ut ita in Indiam iter pateret) hoc est utrum Africa extenderet se usque in Austrum, an vero Oceano cingeretur. Hæc dubitatio sublata est à Vasco Gamma navarcho, quo primo Duce anno 1597 circumnavigata est Africa, invento ejus ultimo versus Austrum termino, Promontorio, quod Bonæ spei appellationem accepit à Rege Lusitanicæ anno 1594, cum Diazius, (qui primus de eo retulit etsi ipse non superaverit deficiente com meatu & urgentibus tempestatibus) de promontorii hujus procelloso Oceano multa apud Regem commemorasset.

PROPOSITIO II.

Differentia in partibus Oceani, quæ à Terris originatur, tres habet species, sive Oceani aqua in tres quasi species potest dividi, quæ sint, 1. Oceanus particularis sive Maria. 2. Sinus maris sive Oceani. 3. Freta.

Oceani vox sumitur dupliciter. Interdum pro toto Oceano sive Aqua, quæ Tellurem ambit: aliquando & quidem frequenter pro quavis istius integri Oceani parte, quæ alteri parti adhæret lato tractu, & quidem ab utroque latere: ita dicimus Oceanus Atlanticus, Oceanus Germanicus, Æthiopicus, Indicus, Chinensis. In hac posteriori significatione propter usum loquendi nos quoque interdum ea voce utimur, etsi plerunque Mare vocemus Oceani integri partem, sed propter homonymiam Maris mox explicandam, Oceani vox frequenter in eo sensu adhibetur.

Sinus maris vel Oceani dicitur pars Oceani sive Aqua,

Aqua, quæ inter duas Terras ex Oceano vel alio
finu decurrit donec ad aliquam terram sistatur.
Dicitur etiam communiter mare.

Fretum dicitur pars Oceani vel sinus Oceani
pars, inter duas Terras angusto tractu decurrens
& duo maria connectens, sive ab utraque extre-
mitate cum mari conjunctum, per quod ex uno
mari in alterum navigatur.

Tres hæc differentias in Oceani partibus re-
periri probatur ab experientia & patebit ex se-
quentibus.

PROPOSITIO III.

*Oceanos particulares, sive magnas totius Oceani
partes, vel Maria, numeramus quatuor, respectu
situm quatuor Terræ Continentium sive Maxima-
rum Insularum Germanis, Die offne See/ quæ
sunt.*

1. *Oceanus Atlanticus, est ea pars Oceani, quæ
inter Veteris orbis littus Occidentale, & Novi
orbis littus Orientale sita est.*

Dicitur quidem vulgo, *Mar del Nort*, Septen-
trionale Mare, sed minus proprie, cum ultra Æ-
quatorem versus Austrum se extendat; rectius in
duas partes dividitur, una ab Æquatore versus Se-
ptentrionem, altera versus Austrum exporrigitur.
Habet itaque ab Oriente, orbis Veteris littus Oc-
cidentale, & ab Occidente, Americæ littus Orien-
tale. Versus Septentrionem, coit cum Oceano
Hyperboreo sive Septentrionali: Versus Austrum
cum Australi.

2. *Oceanus Pacificus, vulgo Mare Pacificum,
Mar del Zur, quod inter Americæ littus Occiden-
tale & Asiam interjacet ingenti tractu usque ad
insulas Indiæ & Philippinas atq; Chinam usque.*

3. *Oceanus Hyperboreus*, Septentrionalis, circa Terram polarem Arcticam.

4. *Oceanus Australis*, circa Terram Australem, cujus Oceani pars est Oceanus Indicus.

Alii Geographi quatuor partes Oceani constituunt alia divisione; Atlanticum unum faciunt, sed non extendunt ultra Æquatorem: hincenim incipiunt secundum, quem vocant Æthiopicum. Tertium numerant cum nobis Pacificum: Quartum, Indicum. Sed nos in divisione nostra respeximus ad Quatuor Magnas Continentes Terras, sive ad maximas Insulas. Possunt quoque tres partes constitui, nempe Oceanus Atlanticus, Pacificus & Indicus, sed tunc Atlanticum extendimus latius. Res est non magni momenti: Sequatur quilibet, quod ipsi optimum videtur. Magis enim à nostra fictione, quam à Natura dependet hæc divisio.

PROPOSITIO IV.

Partes Oceani accipiunt denominationes à nominibus terrarum, quas alluunt.

Ita dicimus Oceanus Cantabricus, Britannicus, Indicus, Chinenfis, & plurimæ sunt tales appellationes.

PROPOSITIO V.

Sinus Maris sunt duplices, Oblongi & Latii. Alio quoque modo duplices sunt, nempe primarii & secundarii. Illi ab Oceano, hi ab alio sinu oriuntur vel influunt, sive primarii sinus pars sunt vel ramus. Oblongi primarii numerantur.

1. *Mare Mediterraneum*, celeberrimum, ab Oceano inter Hispaniam & Barbariam irrupit & inter Europam & Africam decurrit longo spatio usque

usque ad Syriam, Asiam minorem & Thraciam. Dicitur etiam mare Internum, Germanis *die Straffe* / Belgis *de Strate*, unde *een Straets-vaerder*, nauta, qui ad regiones, quas sinus hicce aluit, navigat, ut ad Syriam, Italiam, Siciliam, Venetias, &c.

Plurimos secundarios sinus facit vel emittit, nimirum sinum Adriaticum (*Golfo di Venetia*) sinum Theſſalonicensem, mare Agæum, &c.

De Ponto Euxino non immerito dubites, utrum hujus primarii sinus pars sit dicendus, de quo vide Caput. xv.

Distinguitur autem mare Mediterraneum variis nominibus desumptis à variis regionibus, quas alluit. Etenim versus Septentrionem habet Hispaniam, Galliam, Italiam, Siciliam, Illyricum, Græciam, Cretam, Thraciam, Asiam minorem. Versus Austrum habet Marocco, Fessanum regnum, Tunetanum, Ægyptum. Inde appellationes, mare Ibericum, Gallicum, Ligusticum, Siculum, Balearicum, Cretenſe, &c. Exporrigitur ab Occidente in Orientem. Fluvios recipit plurimos.

2. *Mare Balticum, Sinus Codanus*, Germanis *die Ost-See*, improprie. Irrumpit ex Oceano inter Terras inter Selandiam Daniæ insulam & Gothiam Sueciæ continentem, ut etiam inter Selandiam & Jutlandiam. Primo oblongâ via à Septentrione in Austrum fluit, mox reflectens longissimo spatio ad Septentrionem excurrit, inter Germaniæ provincias, Megapolim, Pomeraniam, Caſſubiam, Borussiam, Livoniam, &c. ab uno latere nempe Orientali. Ab Occidentali latere habet Sueciam & Lappiam. Præbet tres secundarios sinus, quorum duo sunt oblongi, nempe Botanicus & Finnicus, Tertius est latus, Livonicus nimirum.

Fluvios recipit insignes magnitudine.

3. *Mare rubrum, sive Sinus Arabicus, mar di Mecca*, ex Oceano Indico fluit inter promontorium Arabiæ ad Aden urbem & inter Africæ promontorium, atque inter Africam versus Occidentem, & Arabiam versus Orientem decurrit: sistitur ad Isthmum Africæ, ad urbem Suez, ubi est statio Classis Turcicæ. Fluvios paucissimos & parvæ magnitudinis recipit. Ex Africa nullum, ut quidam annotant. Exporrigitur ab Austro Euri plaga ad collateralem Borealis plagæ versus Zephyrum.

4. *Sinus Persicus*, inter Arabiam & Persiam decurrit ex Oceano Indico circa insulam Ormuz. Persiam habet ab Oriente, Arabiam ab Occidente. Sistitur ad provinciam Chaldææ. Exporrigitur à plaga Euro Australi ad Zephyro borealem. Fluvios recipit paucos præter Euphratem & Tigrin jam ante conjunctos.

5. *Sinus California*, Mare Vermejo vel rubrum: Inter Californiam & Occidentale Americæ Mexicanæ littus decurrit, ab Austro versus Septentrionem. Terminatur ad incognitam Americæ provinciam Tatonteac. Fluvios accipit paucos. Moderni nautæ asserunt Californiam, esse insulam: quod, si ita est, non erit hic aquæ tractus sinus, sed potius fretum.

6. *Sinus de Nanquin* inter Coream & Chinæ Tartariæque littora decurrit ad Septentrionalia Tartariæ loca, ubi Tenduc regnum Cathajæ ponitur, falso tamen, ut hodie quidam censent, qui Coream insulam esse volunt. Fluvios accipit paucos. Exporrigitur ab Austro versus Septentrionem.

Hi sunt oblongi sinus, quibus minores addi possunt, ut sinus ad Cambajam atque alii. Quatuor posteriores ex enumeratis non præbent sinus
secun-

secundarios, nempe Arabicus, Persicus, Californiæ, Nanguinenfis : sed solus Mediterraneus & Balthicus.

PROPOSITIO VI.

Latos sinus sive hiantes numero septem, qui sunt.

1. *Sinus Mexicanus*, mare Mexicanum, ex Oceano Atlantico inter partes Americæ Septentrionalem & Australem, quas separat, fluit : ab Orientali plaga ad Occidentalem. Siftitur ad Isthmum longum inter illas terras, qui impedit ne Pacificus & Atlanticus Oceanus coëant ab hac parte, Fluvios recipit non paucos. Multitudine insularum certat cum mari Ægeo.

2. *Sinus Gangeticus*, Golfo di Bengala, inter Indiam & Malaccensem Chersonesum infunditur ex Oceano Indico : ab Austro versus Septentrionem : sistitur ad regna Indiæ, Bengalam & Pegu, &c. Recipit insignes fluvios præter Gangem.

3. *Sinus inter Malaccam & Cambojam* non procul à Gangetico, itidem ab Austro versus Septentrionem infunditur : Siftitur ad regnum Siani & alia.

4. *Mare album*, Sinus Russicus. Ex Oceano Septentrionali inter Lappiam & extrema Russiæ littora influit versus Austrum : terminatur partim ad Finlandiam, partim ad Moscoviæ regnum : (Præbet parvum quendam oblongum sinum, qui ad Lappiam extenditur) ubi celebre & frequentatum ab Anglis & Belgis Emporium Archangelo dictum. Fluvios recipit insignes.

5. 6. *Mare Lantchidolinum*, sinus est inter terræ Australis provincias Beachet novam Guineam ab Oceano Indico fluens : à Septentrione versus Austrum exporrigitur : terminatur ad in-

cognita Terræ Australis. Huic alius sinus vicinus est versus Occidentem inter Beach & Terram aliam Australis procurentem, ubi est Terra dicta Anthonii à Diemen, quod est nomen Belgici Prætoris navalis, sub quo detecta est hæc terra.

7. *Mare Hudsonii*, sinus est inter Novam Franciam & Canadam aliasque Americæ Septentrionalis ex Oceano Septentrionali infusus. Terminatur ad Estotilandiam.

PROPOSITIO VII.

Freta sunt triplicia. Vel enim conjungunt Oceanum cum Oceano : vel Oceanum cum sinu : vel sinum cum sinu.

Enumerabimus quindecim, quorum tria sunt celebria & præcipua.

1. Primo loco meritò numerandum est *MAGELLANICUM FRETUM*, quod & celeberrimum & longissimi est tractus : Conjungit Oceanum Atlanticum cum Pacifico, atque ex uno in alterum præbet Transitum. Longitudo est ab Oriente in Occidentem centum & decem miliarium : latitudo varia, modo duorum miliarium, modo unius, modo quadrantis. Magellanes primus invenit & navigavit anno 1500 : etsi Vascus Nunnius de Valboa prius, nempe anno 1513 illud animadvertisse dicitur, cum ad Australem regionem lustrandam istic navigaret. Latitudo sive distantia ejus ab Aequatore est 52 gr. 30 min. Antiquitate notitiæ hominum cedit aliis fretis. Ad Septentrionem habet Chicam Americæ Australis provinciam : ad Austrum jacent insulæ Magellanica Terræ, & Terra del Fuego.

2. Huic vicinum est *Fretum le Maire*, inter terram Australem & Magellanicas insulas, ab Oriente

riente in Occidentem, minus longum quam Magellanicum: per illud multo brevior via ex Oceano Atlantico in Pacificum distat ab Æquatore 54 gr. 30 min.

3. *Fretum Manilhas*, inter Luconiam & Mindanao aliasque Philippinas insulas protensum, dicitur esse centum leucarum, navibus periculosum ob crebras syrtes: extenditur ab Oriente in Occidentem: conjungit Pacificum Oceanum cum Indico ab illa parte, etsi liberiores in vicinia sint conjunctiones.

4. Plurima freta sunt inter insulas Indicas ipsas, tum inter Insulas & vicinas Continentes, ut 1. inter Ceilanum & Indiam. 2. Inter Sumatram & Malaçcam. 3. Inter Sumatram & Bandam, &c.

5. *Fretum VVaigatz*, per quod ex Septentrionali vel Russico mari in Tartaricum Oceanum via est, sed à glacie clausa tenetur, hætenus saltem Europæis: Jacet inter Samojedam & Novam Zemblam.

6. *Fretum Glaciale* inter Novam Zemblam & Spitzbergam vel alio nomine appellandam Terram polarem.

7. *Fretum Davis*, inter Groenlandiam & Americam Septentrionalem, sed ejus exitus nondum cognitus, & ideo dubium adhuc est, utrum fretum sit an sinus.

8. *Fretum Forbischers*, si non ad Oceanum Pacificum, saltem ad sinum Hudsonii viam præbet Atlantico Oceano.

9. *Fretum Anian*, inter Americam Septentrionalem & Tartariam Asiæ, per quod ex Oceano Tartarico in Pacificum via esse dicitur: sed adhuc incertum. Aliquod tamen fretum esse inter Americam Septentrionalem & Tartariam, atque etiam

aliud inter Americam & Groenlandiam, periti nautæ ex eo colligunt, quod in maris Pacifici ea parte, quæ inter Tartariam & littora Occidentalia Americæ Septentrionalis jacet, septingentis milliaribus à Japone ad Americam fluctus maris & motus sit à borea & Zephyroborea, etsi diversi vel ab alia plaga spirent venti (nautæ vocant *de holle Zee van 't Noorden*) sed centum milliaribus ante littus Novæ Hispaniæ omnino cessat ille motus & fluctus, nimirum feruntur ad patens aliquod fretum ultra Novam Hispaniam versus boream situm. Adde, quod in septingentis illis milliaribus reperiuntur multæ balænæ, & pisces, quos Hispani vocant Albacores, Bonitos, & Arum: quæ piscium genera circa freta plerunque agitant: ut verisimile sit, eos ex freto vel mari Anian in hanc Oceani Pacifici partem pervenire, cum in reliqua hujus Oceani parte non reperiuntur. Verum enimvero plurimi è recentibus omnino negant istud fretum, & vastum mare inter Tartariam sive Coream & Americam ponunt.

10. FRETUM GADITANUM, Herculeum, di Gibraltar, per quod Oceanus Atlanticus fluit vel efficit sinum Mediterraneum. Latitudo minima est unius circiter milliaris: longitudo major: jacet inter Hispaniam & Africam. Olim non fuisse, sed ab Oceano in Terras irrumpente extitisse scripserunt Veteres.

11. FRETUM DANICUM, *der Sund*. Iacet inter Daniæ insulam, Zelandiam & Scandiam. Per illud Oceanus Atlanticus fluit in sinum Balticum. Latitudo est dimidii milliaris non integri, ubi minima. Huic freto ad jungendum est alterum inter Zelandiam & Funen & tertium inter Funen & Jutlandiam, dictum *der Belt*.

12. *Fauces Arabici sinus.* Sunt ad Aden emporium per quas ex Oceano Indico in mare rubrum via est.

13. *Fretum Persini sinus,* sed minus proprie ita dicitur, quia non est angustior ingressus, quam ipse sinus.

14. *Hellepontus,* fretum satis celebre apud Græcos, per quod ex Ponto Euxino in Propontidem via conceditur. Huic vicinum est aliud fretum, dictum *Bosphorus Thracicus,* quo ex Propontide in mare Ægeum pervenitur.

15. *Fretum inter Siciliam & Italiam.*

Quidam existimarunt, fretum quoddam esse ad latus Septentrionale Virginie, ad latitudinem 40 gr. per quod jungatur Oceanus Atlanticus Pacifico, & libera via ex Europa in Chinam & Philippinas concedatur: Sed frustra id per Hudsonium anno 1609 tentatum fuit. Sic itaque explicavimus differentias partium Oceani à Terrarum situ existentes, sicut capite octavo differentias Terrarum ab interfluente Oceano ortas ante oculos posuimus. Ad quorum omnium faciliorem memoriam non inconsultum erit, si adolescentes periplum oræ maritimæ Terrarum & Oceani tractus uno quasi intuitu perlegant. Ad faciliorem situs partium Telluris memoriam facit quoque non parum cognita habere littora Oræ maritimæ continentium, atque eorum conjunctionem: item partium maris connexionem & situm.

Periplus oræ maritimæ Veteris seu nostri qui comprehendit Europam, Asiam atque Africam Orbis est hic. Terminus ejus versus Septentrionem est fretum VVaigatz: Hinc itaque placet incipere. Freto VVaigatz adjacet provincia Samo-

jeda, & versus occasum progrediendo provinciarum regni Moscovitici, ubi etiam terra sinu facto recipit Mare album è Septentrionali: Dein est Lap-
pia, & versus occasum Norvvegiarum litus jacens à Septentrione ad Austrum. Hic facto flexu ad Orientem litus Scaniarum & Gothiarum, ubi iterum facto sinu, cujus alterum latus Jutlandia, recipit mare, quod dicitur Balthicum affluens ad Sueciam, Finlandiam, Livoniam, Borussia, Cassubiam, Pomeraniam, Megapolin, Holsatiam & Jutlandiam. Tunc sequitur alterum litus Jutlandiarum, & Holsatiarum, Frisiarum, Hollandiarum, Zelandiarum (ubi mare dicitur Germanicum) Galliarum, Hispaniarum. Hic iterum fit divaricatio, factoque sinu recipitur Mare Internum alluens Hispaniam, Galliam, Italiam, Illyricum, Græciam, Thraciam, Asiam minorem, Aegyptum & Barbariam, ubi ad Marocco iterum litus è regione responderet littori Hispanico, & sequitur postea litus Occidentale Africarum ad promontorium Viride, ubi litus flectitur ad Ortum, nempe hic sunt Guinea, Angola, Congi versus Austrum ad promontorium Bonarum spei, ubi iterum versus Septentrionem litus flectitur Mozambique, Sofala & sinus efficitur pro mari rubro seu Arabico: sequitur litus Arabiarum, hinc sinus Persici littora, & versus Orientem littora Persiarum, Cambajarum, Indostanis, Indiarum, Malaccensis, Bengalarum, Cambojarum, Chinarum, Tartariarum ad Coream, vel ad fretum Anian, unde per littora Tartariarum Septentrionalia & Samoiedarum reditur ad Fretum Vvaigatz.

Circumscriptio seu periplus Americarum est hic:

Incipiemus à littore Freti Davis, ubi sinu facto recipitur Mare Hudsonii: hinc facto reflexu littora Estotilandiarum Novarum Angliarum, Franciarum, Virginiarum, Floridarum, Mexicanarum, Isthmi Americani, Californiarum

filia del Oro, Gujana, Caribana, Brasilia, Chica : hic littora freti Magellanici versus Austrum spectantia sed ab Ortu versus occasum extensa : hinc ab Austro ad Septentrionem decurrit litus Chili, Peru, Isthmi Americani, Mexicani, ubi ad Californiam sinu facto recipitur, Mare Vermejeo : hinc littora Californiae novae Albionis, Quiriva, regni Anian, ubi littora freti Anian, quod hodie negant existere, & sequuntur littora ignota, quae ad Fretum davis extendantur.

Circumscriptio Terrae Septentrionalis polaris est haec. A freto davis littora Groenlandiae incipiunt, quae aliquantulum procurrunt versus Austrum, deinde redeunt ad Septentrionem, & Spitsbergae littora dicuntur.

Decurrit dein litus e regione Novae Zembla, & objicitur Oceano Tartarico : ubi reliqua littora ad fretum Davis ignota sunt.

Terrae Magellanicae periplus est talis. A freto Magellanico vel le Maire incipit litus & factis flexibus variis ad Beach regionem, ubi facto sinu recipitur Mare Lantchilonium : hinc littora Novae Guineae procurrunt versus Septentrionem, & redeunt dein ad Austrum, pergunt dein ad Fretum Magellanicum. Ita se habet Terrarum periplus.

Videamus jam Oceani circumductum. Inter fretum Davis & Novae Zembla sumimus initium : atque hic mare Hyperboreum, glaciale, Caledonium, Groenlandiae dicitur : deinde decurrit inter Europae littora & Americae, diciturque Oceanus Britannicus, Danicus (ubi sinum facit) Germanicus, Gallicus, Hispanicus, (ubi mare & Mexicanum Mediterraneum praebet) Atlanticus in specie : Hic nempe ubi inter Brasiliae & Africae littora

decurrit, dicitur mox *Athiopicus*, & fretum *Magellanicum* ab una parte ingreditur, ab altera *Orientali* plaga est *Mare Indicum* & *Australe*, ubi inter *Africam* & *Magellanicam* porrigitur, dein inter *Asiam* & eandem *Magellanicam*, & pervenit in mare *Pacificum*, quod extenditur ad *Septentrionalia* freta *VVaigatz* & *Anian*, & ad *Australe* fretum *Magellanicum* (quo mediante jungitur *Atlantico*) directè autem appellit ad *Americæ* littora *Orientalia*, *Chili*, *Peru*, *Mexicana*, *Californiæ*, *Albionis novæ*, &c.

Hiscæ præterea subjungo duas Tabulas, quarum una continet divisionem partium Terræ: altera divisionem partium Océani.

CAPUT XII.

De Oceani atque ejus partium proprietatibus quibusdam.

PROPOSITIO I.

Océani atque omnium liquidorum superficies est rotunda, Sphærica, sive, est pars superficiei Sphæricæ, cujus centrum idem est quod Telluris totius, sive Terra.

Hujus theorematiss veritas apparet ex illis argumentis, quibus capite tertio probavimus, Telluris superficiem esse Sphæricam, quia tam de aqua, quam Terra valent ea, quæ ibi attulimus. Sed quia illæ probationes tantum à posteriori concludunt, placet hoc loco proponere Demonstrationem à priori factam, per quam Archimedes de omnibus liquidis probavit superficiem Sphæricam suppositâ hac, tanquam re certa, in Terra sive parte Telluris consistente. Etenim Archimedes in

De-

1. IN MAGNAS CONTINENTES sive Maximas Insulas, quarum quatuor numerantur à nobis.

- | | | | |
|---|--------------------------------------|-------------------------------------|---|
| 1. VETUS ORBIS
cujus partes | Europa.
Asia.
Africa. | Termini hujus
Continents
sunt | A Septentr. Mare Boreale, glaciale & Tartar.
Ab Oriente, Pacificum & Indicum.
Ab Austro, Australe.
Ab Occidente, Atlanticum. |
| 2. NOVUS ORBIS
seu AMERICA cu-
jus partes | Septentrionalis
&
Meridionalis | Termini
hujus
sunt | A Septentr. Fretum Davis.
Ab Oriente, mare Atlanticum.
Ab Austro, Fretum Magellanicum.
Ab Occidente, mare Pacificum. |
| 3. TERRA POLARIS SEPTENTRIONALIS, sive Groenlandia. | | | Cingitur undique mari & fræsis. |
| 4. TERRA AUSTRALIS seu Magellanica incognita. | | | |

TELLUS dividitur in
TERRAM } restam aquis,
& Extantem.
& AQUAM.

TERRAE autem extan-
tis Superficies per Maris
interfluxum distinguitur
in partes hasce quatuor.

- | | | |
|---|--|--|
| 2. PENINSULAS seu
CHERSONESOS quæ
sunt Continentium illa-
rum partes | Rotundas, quarum latitudo & lon-
gitudò sunt æquales circiter. | Africa ipsa.
Peloponnesus seu Morea, Chersonesus Græciæ,
Chersonesus Taurica, seu Tartaria Przecopensis.
Cambaja. |
| | Oblongas, quarum
multæ sunt | 1. Chersonesus aurea seu Malacca, adhærens Indiæ.
2. Cimbrica, sive Jutlandia, adhærens Holsatiæ.
3. Corca, adhærens Tartariæ.
4. 5. Partes Americæ Septen. & Merid. |
| | Affines penin-
sulis sunt | 6. Californiæ. 8. Chersonesus Thraciæ.
7. Jucatan. 9. Nova Francia.
10. Ionia, Cnidensis, Myndensis.
Italia, Græcia, Achaja in specie. Indostanis regna. Cochinchina.
Hispania, Asia minor, Arabia. Nova Britannia in America.
Norrvægia cum Suecia & Lappia. Monomorapa, &c. Cambaja.
Beach regio Magellanicæ, & nova Guinea. |
| 3. INSULAS,
quarum facio
tres classes. | Magnas no-
vem | Britannia. Sumatra.
Japonia. Madagascar.
Islandia. Borneo.
Canadensis. Nova Zembla.
California. |
| | Mediocrates
tredecim | Sicilia. Java major. Sardinia.
Hybernia. Celebes. Frieslandia.
Hispaniola. Creta. Terra nova circa novam Franciam.
Cuba. Luconia. Midanao. Ceilanum. |
| | Parvas
novem | Gilolo, Amboina, Timor jacent inter Indicas Insulas.
Corfica, Majorca, Cyprus Negroponte jacent in mari Mediterraneo.
Seelandia, Daniæ, Jamaica in sinu Mexicano. |
| | MINIMAS, qua-
rum consideramus. | 1. Celebriores solitarias, Rhodus, Malta, Lemnos, S. Helena, D. Thomæ, Madera, &c.
2. Congeries, sive quæ magno nume-
ro in mari jacent sibi valde vicinæ |
| | | Canariæ. Maldivæ.
Flandricæ. Circa Madagascar.
Hesperides. Moluccæ & Bandanæ.
Sinus Mexicani. Philippinæ. Insulæ latrunculorum.
Japoniæ. Insulæ Mariæ Aegæi.
Circæ Britanniam.
Insulæ Salomonis. |
| 4. ISTHMOS | Inter Agyptum & Arabiam, sive Africam & Asiam.
Corinthiacus inter Peloponnesum & Achajam.
Isthmus Panamenfis seu Americanus longissimus omnium.
Inter Jutlandiam & Holsatiam.
Inter Malaccam & Indiam, &c. | |

I. OCEANUM
cujus sunt par-
tes primariæ
quatuor

Atlanticum, Mare del Nort, cum Æthiopico inter Europam, & Africam ab uno latere, ab altero Americam
interfluens, varia sortitur nomina secundum partes.
Mare Pacificum, sive Mar del Zur inter Asiæ extrema Indicasque Insulas & Americæ Occidentale littus.
Mare Septentrionale circa terram Septentrionalem } Oceanus glacialis. Tartaricus hyper-
boreus, &c.
Mare Australe circa Magellanicam, cujus pars mare Indicum.

Britannicus.
Gallicus.
Æthiopicus, &c.

TELLUS dividitur
in TERRAS &
AQUAM. AQUA
dividitur in fluvios,
lacus, paludes &
MARE continuum.
MARE autem per
terras distinguitur
in hæc differentias
tres.

2. SINUS

Oblongi, quo-
rum numero
sex, suntque

1. Mare Mediterraneum seu Inter-
num, inter Africam & Europæ re-
giones decurrens ad Asiæ Mino-
rem. Ejus partes sunt
2. Mare Balthicum sive
sinus Codanus unde si-
nus secundarii

Mare Ibericum, Ligusticum, Siculum, Creticum, &c.
Sinus secundarii multi } Sinus Adriaticus, Golfo di Venetia.
Pontus Euxinus.
Sinus Corinthiacus & plures alii.

3. Sinus Arabicus inter Africam & Arabiam.
4. Sinus Persicus, inter Arabiam & Persiam.
5. Sinus Californiæ, inter Californiam & Novam Granadam.
6. Sinus Coreensis, inter Coream & ultimæ Tartariæ Chinæque littora.
Sinus Mexicanus inter Americam Septentrionalem & Meridionalem.
Sinus Gangeticus, sive Golfo di Bengala, inter Indostanis littora & Malaccæ.
Sinus inter Malaccam & Cambojam.
Mare album à Septentrionali Oceano inter Lappiam & extrema Moscoviæ.
Mare Lantehidol, inter Beach & novam Guineam terræ Magellanicæ.
Mare Hudsonii inter novam Franciam & Canadam ex Septentrionali Oceano ortum.

Magellanicum, quo ex Atlantico vel Æthiopico mari pervenitur in Pacificum. Est omnium fretorum longissimum.
Fretum le Maire, vicinum Magellanico & ejusdem usus.
Fretum VVaigatz, quo ex Septentrionali Oceano in Tartaricum itur.
Fretum Anian, quo ex Tartarico in Pacificum mare: sed hodie negant illud.
Fretum Davis, Forbischers, quibus ex Atlantico in Tartaricum vel Pacificum Oceanum pervenitur.
Fretum Novæ Zemblæ, quo ex Hyperboreo & glaciali Oceano in Tartaricum via concederetur, nisi glacies obstaret.
Fretum GADITANUM, quod ex Oceano Atlantico in mare Mediterraneum via est.
Fretum DANICUM, der Sund / quo ex Atlantico in mare Balthicum via est.
Fauces Arabici maris, quibus in sinum Arabicum navigatur.
Fauces Persici maris, quibus in Persicum.
Hellepontus & Bosphorus, quibus ex mari Ægei in Pontum.

3. FRETA

De Mari Caspio an peculiare sit vel an ad Latos Sinus Oceani, cujus sit subterranea via, referendum, dubium est.

Demonstratione sua supponit tria. 1. Terram in medio sui habere aliquod centrum, adeoque Sphæricæ figuræ esse. 2. Omnium liquidorum hanc esse naturam, ut partibus eorum æqualiter (æquali à centro terræ distantia) jacentibus & continuis inter sese, minus pressa à magis pressa expellatur, quod ab experientia ostendit. 3. Vnamquamque liquidi partem premi à liquido super eam existente ad perpendicularum respectu centri terræ, si hoc liquidum sit descendens aut ab alio aliquo corpore prematur. Præter hæc tria supposita Archimedes utitur aliquâ Geometricâ propositione, quæ in elementis non invenitur demonstrata, & ideo ipse eam demonstrat, quæ est hæc: Si superficies aliqua secetur planis quocunque per unum punctum transeuntibus, sitque omnis sectio peripheria circuli centrum habens punctum illud, ista superficies est Sphærica, cujus centrum erit punctum illud dictum. Hoc autem facile est ostendere. Sit enim corporis alicujus superficies secta per punctum D plano I F K E P, & sit sectionis linea I F K E P peripheria circuli habens pro centro ipsum atque in omni sectione per D facta reperiat peripheria circuli habens centrum D. Ostendendum est, quod superficies ista sit Sphærica, & D esse ejus centrum, D punctum, hoc est, omnia ejus lineæ puncta æqualiter distent à puncto D. Concipiamus enim à puncto D ductas esse quotvis rectas ad alia puncta superficiem propositam. Has itaque omnes inter se invicem æquales esse demonstrandum erit. Assumatur quælibet ex illis à D ductis ad superficiem, & per illam atque per rectam D F ducatur planum (Dux enim rectæ se mutuo secantes vel concurrentes sunt in uno plano, per 2. libr. xi Elem.) Hoc itaque

que planum superficiem secans faciet peripheriam circuli ex hypothesi. Quare ducta illa & æqualis erit rectæ DF , atque ita de omnibus ex D puncto ductis ostendemus, quod æquales sint ipsi DF , & propterea, quod omnes inter se invicem sint æquales. Ex quo inferitur, superficiem istam esse Sphæricam, habentem pro centro punctum D . Superficies enim Sphærica est superficies curva, intra quam punctum aliquod est, ex quo ductæ omnes rectæ ad illam superficiem sunt æquales.

Hiscæ præmissis, demonstratur sphærica superficies de omni liquido, hunc in modum: sit liquor aliquis consistens $EFGH$, centrum terræ D , & concipiamus liquorem istum secari plano transiente per D . Sit facta sectio in superficie liquoris linea $EFGH$. Ostendendum est primò, hanc lineam $EFGH$ esse curvam, nempe peripheriam vel arcum peripheriæ circuli, cujus centrum sit D . Si enim fieri potest, ut non sit talis peripheria, inæquales erunt rectæ ex D ductæ ad illam: sint ductæ inæquales DE , DG , nempe DG major sit quam DE , & sit DG maxima ex omnibus, quæ ducuntur à D , atque DE sit minima. Ducatur alia recta DF , angulum GDE bisecans ad $EFGH$, ita ut hæc DF major sit quam DE , minor vero quam DG . Deinde centro D intervallo DF in eodem hoc plano describatur peripheria vel arcus circuli $IFKH$, cujus peripheria rectam DE ultra punctum E protractam secabit nempe in puncto I , sed rectam DG citra G nempe in K puncto.

Porro centro D intervallo DL , quæ minor sit quam DE , describatur peripheria vel arcus LMN intra liquorem in plano $IFKH$. Partes itaque humoris contenti intra DLN sive circa peripheriam

riam

riam LMN æquali distantia à centro D jacent & continuæ sunt: sed eæ partes, quæ sunt circa MN magis premuntur, quam illæ quæ sunt circa LM, quia illæ premuntur à majori pondere, nempe à majori aquæ copiâ existente supra illas, quam hæc ad LM.

Itaque partes juxta LM, cum minus preman-
tur, expellentur à partibus juxta MN, & hæc il-
larum locum occupabunt, neque consistet liquor.
Atqui ponebatur liquor consistens esse & quietus.
Erit itaque liquor consistens & non consistens,
quod est absurdum. Quare rectæ ex D ductæ ad
lineam EFGH non sunt inæquales, sed æquales,
atque adeo linea EFGH est arcus peripheriæ
circuli, cujus centrum est D. Eadem autem est
demonstratio de omnibus planis secantibus su-
perficiem liquorum & per D transeuntibus, nimi-
rum sectionem esse arcum peripheriæ circuli cen-
tri d ostenderetur. Quoniam itaque superficies li-
quorum talis est, ut, si secetur planis utcumque per
D transeuntibus, sectio semper sit peripheria cir-
culi, ideo sequitur ex demonstrata antea proposi-
tione, quod superficies liquorum sit spherica cen-
trum habens punctum D, quod est Terræ cen-
trum, Oceani itaque superficies est spherica ha-
bens idem centrum, quod est Terræ centrum:
quod idem etiam ex sequentis Propositionis con-
firmatione manifestum fiet.

PROPOSITIO II.

*Oceanus non est majoris altitudinis, quam terra.
littora, atque ideo terra & aqua ejusdem ferè sunt
altitudinis ubique, exceptis montibus excelsis.*

Hujus Propositionis veritas à priori quidem
demonstratur per præcedentem propositionem. Si
enim

enim superficies Oceani & sphaerica ejusdem centri cum Terræ superficie, & verò circa littora mare non est altius, quam terra, ideo neque medium Oceani erit altius quam terra, sed faciet ejus superficies cum hujus superficie unam eandemque sphaericam superficiem. Verum sine præcedenti propositione ostendemus theorema hoc à posteriori hunc in modum, ut præcedens propositio ex hac possit ostendi, si præcedenti Demonstrationi minus fidamus propter factas hypotheses.

1. Experientia testatur, aquam liberam nec impeditam fluere ex locis altioribus ad loca minus alta. Si itaque circa littora esset locus minus altus, quam in medio Oceano, deflueret pars maris è medio Oceano ad littora, neque consisteret vel tranquillum esset, quod tamen in tranquillitate aëris non deprehenditur.

2. Si Oceanus à littoribus longè remotus esset multò altior, quam mare ad littus, conspiceretur ea altitudo è majori intervallo, quam sphaerica superficies admittit: imò ex eadem distantia videri debebat, ex qua videntur partes Oceani interceptæ inter illam altitudinem & littus. Atqui experientia testatur, quod non conspiciatur è majori distantia, sed quod paulatim pars remotior post viciniorem detegatur, quando è mediterraneis locis ad littus accedimus, & quo quævis pars littori est vicinior, è prius sive majori ex intervallo à littore conspicitur. Non itaque pars Oceani à littore remota est altior, quam ea, quæ vicina est illi. Quare Oceanus est ejusdem ubique altitudinis tam in medio quam ad littora, neque altior quam terra.

3. Nautæ in medio Oceano altoque pelago versantes, etsi Mathematica instrumenta adhibeant,

non

non tamen majorem ibi deprehendunt altitudinem, quam in partibus littori vicinis; quod certe haud fieret, si mare quandam altitudinem tanquam turrim vel montem elevatum haberet. Sicut enim instrumentis deprehendimus altitudinem turrium vel montium supra subjectas terræ partes, ita quoque si quæ esset altitudo medii Oceani supra vicinas partes, ista nequaquam lateret neque instrumentorum subtilitatem effugeret.

4. In Oceano etiam medio hinc inde reperiuntur insulæ, & quidem magno numero in quibusdam partibus, quæ vicinæ sunt Continentibus sive maximis insulis. Non itaque medius Oceanus altior est quam terra, quia non altior est quam littora illarum insularum.

5. Nullus Oceani fluctus diu suspensus permanet in cumulo, sed statim diffunditur ad omnimodam æqualitatem cum vicina parte ineundam. Itaque nec in medio Oceano talis tumor eminens supra vicinas partes erit.

6. Nulla causa dari potest, cur aqua in medio Oceano altior sit, & cur non influat in alveos fluviorum, si horum aquæ sunt depressiores. Videmus enim vel deprehendimus experientiâ, quod aqua ubicunque sita moveatur ad vicinas partes, si hæ sint minus altæ, unde tot inundationes extiterunt.

Ex hisce, ut puto, sufficienter colligimus, Oceani aquas non esse altiores quam littora terrarum. Quoniam itaque paucorum littorum altitudo aliquantum major est quam vicinæ mediterraneæ terræ, in plerisque vero minor, cum terrarum altitudo à littoribus versus mediterranea loca accrescat & tanquam in umbilicos asflurgat, inde concludimus, quod Oceani superficies non sit altior quam

quam terrarum superficies. Quod autem altitudo terrarum à littoribus ad loca mediterranea accrescat, sive quod loca mediterranea altiora sint littoribus, id probatur è fluxu fluviorum, quorum plerique oriuntur in locis mediterraneis & fluunt ad Oceanum. Sunt itaque partes mediterraneæ aliquantulum saltem altiores quam littora, quoniam ab illis ad hæc fit fluxus. Fluit enim aqua à partibus altioribus ad loca minus alta. Quasdam autem regiones esse aliquantum depressiores, quam Oceani aquam, non negamus: sed illæ vel altitudine littorum, defenduntur vel aggeribus vel aliis interpositis terris. Aggeres tamen plerique facti sunt non propter maiorem altitudinem Oceani in naturali suo statu hoc est tranquillæ existentis, sed propter impetuosum ejus à ventis vel alia causa concitati motum.

Corollarium. Frustra itaque sunt, qui Oceani aquas altiores esse quam terram volunt, atque ad miraculosam providentiam confugiunt, quâ impediatur Oceani in terras exundatio & totius Telluris diluvium. Ostendimus enim aquæ & terræ unam & eandem ferè esse sphæricam superficiem: plerasque verò terræ partes, ad minimum ipsa littora, habere maiorem altitudinem, quam medium Oceanum, atque hanc esse causam, cur Oceanus nequeat inundare terras, quæ major altitudo si in quibusdam littoribus tollatur; ruptis aggeribus vel auctâ & impulsâ magnâ aquæ copiâ, tum verò existunt inundationes. Neque omnino impossibile est vel contra naturam ut tota terra obtegatur ab aqua, ut in fine capitis dicemus.

PROPOSITIO III.

Cur mare conspectum è littore videtur in majorem

*rem altitudinem & tumorem assurgere, quò à lit-
tore remotius est.*

Est fallacia visus, sive ut rectius dicamus, æsti-
mativæ facultatis, quæ multos in eum adduxit er-
rorem, ut Oceanum medium multis stadiis altio-
rem esse quam littora defendere conati sint. Sed
permirum est, illis non venisse in mentem aliorum
experimentorum quotidianorum in vita commu-
ni, in quibus fallacia ista manifesta satis est. Si
enim pavementum aliquod seu aream longo ex-
porrectam tractu vel seriem columnarum aspicia-
mus, cuivis videbuntur partes remotiores pavi-
menti esse altiores quam vicinæ partes, ita ut inde
à nostro loco ad remotissimum area videatur pau-
latim magis magisque elevari, cum tamen ubique
eiusdem sit altitudinis. Eodem modo se res habet
cum aquis Oceani. Si etiam in littore adhibeatur
instrumentum Geodæticum librandis locis com-
modum, deprehendimus nullam remotæ Oceani
partis elevationem supra littus, sed potius exi-
guam aliquam depressionem, ita ut undæ subsi-
deant infra Horizontem littorum.

Causam fallaciæ explicant Optici. Sit oculus A,
& conspiciat pavementum sive aquæ superficiem
in longum spatium exporrectam a c. Dividatur
angulus a A c in partes æquales vel angulos qua-
tuor, qui sint e A d, d A c, c A b, b A a ductis re-
ctis A b, A c, A d. Hæ dividunt rectam a c in par-
tes admodum inæquales a b, b c, c d, d e, nimi-
rum remotiores erunt multo majores, ut apparet
ex ipso Diagrammate, nempe e d major est quam
d e, & d e major quam b c, & b c quam a b. Et si
autem hæ partes valde inæquales sint, tamen
æquales videbuntur, quia sub æqualibus angulis
a A b, b A c, c A d, d A e videntur, atque æsti-
mativa

mativa facultas judicabit illas æquali distantia ab oculo A removeri (in quo multum fallitur) atque ideolneas A b, A c, A d, A e judicat esse A f, A g, A h, A k, ut a b, f g, g h, h k æquales sint. Unde partes b c, c d, d e videntur elevatæ, quasi essent f g, g h, h k.

Vel brevius. Quia oculus magis elevatur ad remota conspicienda, quam ad propinqua ubi deprimitur, ideo etiam remota judicantur esse elevata, & propinqua depressa. Vel, quoniam ad partes vicinas comparamus nostri oculi elevationem, ideo illas depressas judicamus, sed ad partes remotas non ita possumus comparare nostri oculi elevationem, ideo ipsa videntur magis elevata quam vera sunt.

Sic itaque vidimus, ex eo, quod Oceanus contemplanti è littore videtur altior fieri, quo magis removetur, ex eo, inquam, non probari quod vera sit altior.

Aliam causam vel indicium ejus afferunt quidam, nimirum ideo medio Oceano majorem altitudinem quam terræ attribuendam esse censent, quod existiment aliter fieri non posse ut aqua ex Oceano perveniat ad fontes fluviorum, qui fontes sunt in mediterraneis locis, quippe cum aqua non fluat nisi è loco altiori ad depressiorem. Sed alio modo id fieri explicabimus capite ubi de origine fontium agemus.

Posset etiam aliquis ita ratiocinari: mons Teneriffæ non est tam altus (sicut & alii montes) ut possit è tam longo intervallo in Oceano videri, nempe ad sexaginta milliaria Germanica sive è quatuor graduum intervallo, nisi vel ipse montis pes, vel Oceanus sit altior quam mare ad littus Teneriffæ. Ad hoc quid respondendum sit, patet

patet è capite IX ubi de altitudine montium
eginus.

PROPOSITIO IV.

*Causam & ortum sinuum atque fretorum Oceani
ni explicare.*

Sinus hi propriè loquendo, Terræ sinus sunt,
non Oceani, sed potius Oceani brachia, rami &
procurentes partes. Magis propriè possumus ap-
pellare sinus Oceani, ubi hic in se recipit penin-
sulas terræ, ut ubi Jutlandiam, Malaccensem
Chersonesum, Californiam &c. recipit.

Verùm usus loquendi obtinuit, ut contra re-
rum naturam in prima significatione usurpetur
ita vox, atque sinus Oceani sit idem quod ramus
Oceani vel pars procurrens.

Causa sinuum horum est, quod partes terræ ex-
tantes alicubi avulsæ à se invicem sunt & diva-
ricantur, ita ut pars terræ inter divaricatas inter-
jecta sit magis depressa quam Oceani superficies.
Aqua igitur ad depressiorem locum semper ten-
dens influit inter divaricatas partes atque cons-
que procurrit, donec occurrat terræ elevationi:
hic enim ulteriùs progredi non potest adeoque
finem suum seu terminum accipit.

Eadem est causa atque ortus fretorum Oceani
sive maris.

Causa verò separationis sive divaricationis par-
tium Terræ, (quæ requiritur ad sinuum & freto-
rum existentiam) est impetuosus Oceani motus &
insultus, quando à ventis vel alia causa urgetur:
quod cum singulis ferè diebus fiat, ut fluctibus
terras verberat, inde fit, ut progressu temporis in
quibusdam partibus littorum ita concutiat ter-
ra, ut ad irruentem Oceani aquam collabatur at-
que

que ei viam concedat ; Quod si adjacens littori terra sit depressa, multo facilius & celerius oriuntur sinus, nimirum modò littoris terra perrupta sit, inundabit aqua vicinas terras atque ita sinum efficiet, si terra ita depressa sit vel tali materia constet, quæ ab aqua irruente possit educi.

Ita quidem sinus & freta generari posse & novos existere manifestum est: at inde non licet concludere, omnes sinus atque freta, quæ hodie existunt, ita generata esse: Fieri enim potest, ut quædam cum ipsa Tellure vel Oceano extiterint, adeoque ipsi Oceano sint cœva, quandoquidem ab hominum usque memoria nullus novus sinus maris vel fretum generatum est, etsi de Gaditano sive Herculeo freto Veteres Græci tale quid fabulati fuerint, nimirum: Calpen montem Hispanici littoris & Abylen montem Africani littoris olim unum fuisse montem tradebant, separatos autem esse ab Hercule, unde montes hosce appellarunt columnas Herculis, & ipsum fretum Herculeum.

De freto inter Siciliam & Italiam, quod ab irrumpente mari factum esse constans fuit apud antiquos opinio, minus dubitandum videtur: nimirum talia parva freta generata esse & similia hodie quoque generari non est negandum. Possunt etiam ex fretis fieri sinus, & contra sinus possunt fieri freta. Ex-gr. Si alterutrum freti Magellanicos, vel freti Manilhas obstrueretur, forent illa freta sinus oblongi. Contra, si isthmus inter Africam & Asiam tollatur, tunc totum mare rubrum fieret, & dici posset fretum, per quod ex Indico Oceano in sinum Mediterraneum perveniretur.

PROPOSITIO V.

An Oceanus ubique sit ejusdem altitudinis?

Quod

Quod quidem in naturali sua constitutione & motis omnibus impeditis Oceani partes omnes sint ejusdem altitudinis, illud patet ex prima propositione, quâ ostendimus Oceani superficiem esse sphericam, & centrum ejus esse centrum terræ: inde enim manifestè sequitur, quod debeat esse in omnibus suis partibus ejusdem altitudinis. Verùm hic dubitatur, annon sint causæ quædam, quæ faciant ut quædam Oceani partes sint magis altæ quam aliæ? Est enim hoc consideratione dignissimum, & magni momenti, quando de perfodiendis isthmis & committendis maris partibus instituitur consultatio.

Plurimi Oceanum & terras volunt esse altiores circa septentrionem, minus verò altas circa Æquatorem. Ita Aristoteles sentit libr. 2. de cælo cap. 2. Rationem afferunt hanc, quod Oceanus à septentrionalibus regionibus tanquam à fonte videatur profluere. Verumenimvero ex hoc nihil certi concludere possumus: namque an terræ septentrionales, inprimis alvei Septentrionales sint altiores vel minus depressi quam alvei terrarum Equatori vicinarum, illud dubium adhuc est, neque ex motu illo sufficienter probatur, quia hic non est generalis, sive non deprehenditur in omni-ous regionibus Septentrionalibus. Et licet conce-
latur hic Oceani motus à Septentrione, tamen ex eo non sequitur, Oceanum ibi esse altio-rem, quippe ad fugiendum hunc altitudinis excessum Oceanus fluit ab illis locis versus Æquatorem. Ad-
lit Aristoteles loco citato fabulosam & à Poëtis desumptam rationem, quæ non meretur refutationem, Solem nimirum abdere & occultare se post regiones Septentrionales, quando accedit.

Origo autem opinionis de majori altitudine

Terræ

Terræ Septentrionalis, quam aliarum inde videtur extitisse, quod facie ad Septentrionem conversâ polum concipimus elevatum supra Horizontem & nostrum locum, atque ideo etiam terræ polum & vicinos tractus Telluris majoris esse altitudinis, quam alias regiones, existimarunt.

Nonnulli Oceanum Indicum inter Africam & Indiam altiore esse quam Oceanum Atlanticum statuunt, quod ex sinibus nempe sinu Arabico & Mediterraneo probare volunt. Vbi illa simul considerata est dubitatio: Vtrum eadem sit altitudo sinuum, quæ ipsius Oceani, an minor? Inprimis in partibus sinuum extremis, atque maximè in illis sinibus qui per fretum angustius Oceani conjunguntur.

Oceanum Atlanticum atque Indicum esse altiores, quam sinum Mediterraneum, præsertim in extremis hujus partibus ad Asiam minorem & Ægyptum, non est vero absimile. Etenim Oceanus Atlanticus per angustum fretum Gaditanum influit in sinum Mediterraneum, & verisimile est, Oceani altitudinem esse aliquantum majorem quam fretorum, quia in hisce impeditur liber influxus: Hic quidem parva erit differentia, sed deinde progrediens tam longo & lato tractu inter Europam & Africam major videtur fieri depressio sinus hujus, quam ipsius Oceani, præsertim cum variis occurrat scopulis, insulis & procurrentibus terris, quæ repellunt aquam allabentem, adeoque imminuunt vel retundunt influxum. Imo si vera sunt, quæ de Rege Ægypti Sefostri, de Dario aliisque Ægypti regibus commemorantur à fide dignis scriptoribus, non est quod dubitemus de illa inæqualitate altitudinis. Etenim Reges illi attentarunt fossam seu alyeum ducere è mari rubro

rubro in Nilum, ut hac viâ ex Indico mari & rubro per Ægyptum & hinc per ostia Nili in mare Mediterraneum navigatio institui posset, quæ ingentem commoditatem & utilitatem præberet Ægypto & plurimis regionibus littoris Mediterranei sinus. Verum enimvero susceptum negotium omittere coacti sunt, cum à peritis deprehensum esset, mare rubrum multò esse altius, quam terram Ægypti interioris. Si itaque mare rubrum est altius quam terra Ægypti, erit quoque altius quam aqua fluvii Nili, & per consequens altius quam ostia Nili & quam ipsum mediterraneum mare. Aquam enim Nili non esse minoris altitudinis, quam sit mare mediterraneum, ex eo manifestum est, quod in illud fluit. Quare mare rubrum & ideo quoque Indicum mare est altius quam mare Mediterraneum, saltem ad hujus extremas partes circa Ægyptum, Syriam, Thraciam, & in mari Ægeo.

Præterea alii Ægypti Reges olim & præteritis seculis Sultani Ægypti atque Turcici Imperatores aliquoties de perfodiendo Isthmo, qui Africam & Asiam conjungens disjungit mare Mediterraneum & rubrum, consilia agitarunt: sed omissi negotii causa fuisse perhibetur, quod Indici atque rubri maris, deprehensa esset major altitudo, quam Mediterranei & littorum huic adjacentium: atque ideo metuendum esset, ne aqua è rubro mari in Mediterraneum influens obrueret illorum littorum regiones, inprimis Ægyptum, de cuius humili situ omnes consentiunt Scriptores.

Hoc vero, quod de mari rubro diximus, alicui non sine causa dubium videri possit, cui nempe illius aqua altior sit quam Mediterranei maris, cum utrumque sit sinus Oceani, Mediterraneum scilicet

cet Atlantici Oceani, Rubrum Indici. Causam esse puto, quod etsi utrunque mare sit sinus & per fretum inter terras immittatur ex Oceano, atque ideo verissimile sit, utrunque esse minoris aliquantum altitudinis, quam est Oceanus, hoc tamen in mari rubro minus sensibile esse quam in Mediterraneo, propterea quod illius tractus multo minor sit quam huius, & idcirco multò vicinior sit Oceano quam extremæ maris Mediterranei partes. Alii vero aliam addunt causam, quod ipse Oceanus Indicus ex quo mare rubrum profluit, sit altior quam Oceanus Atlanticus, ex quo mediterraneum, (quod mihi admodum dubium videtur.)

Si itaque Isthmus inter mare rubrum & mediterraneum perfoderetur, tunc equidem patente viâ Oceanus Indicus multum aquæ immitteret in mediterraneum sinum. An verò tantam copiam immisurus sit, ut ex ea regionibus adjacentibus littori mediterranei maris periculum inundationis existeret, de eo dubito. Fortasse enim ita fieret, ut si Indicus Oceanus plusculum immitteret, tunc minus immitteret Atlanticus Oceanus per fretum Gaditanum, quippe cuius altitudini aliquid detraheretur, si ex Indico Oceano motus fieret in mediterraneum mare.

Etsi vero hæc ita esse non negem, existimo tamen Sultanos Aegyptios & Turcas aliis potius nimium politicis rationibus & causis inductos esse ad omittenda consilia de isthmo perfodiendo. Primus scrupulus procul dubio fuit magnitudo operis. Neque enim foret negotium parvi vel brevis laboris, nec paucorum sumtuum, quia isthmus est ad minimum quadraginta milliarius Germanicorum, ubi minima est ejus latitudo: terra petrosa: ducendi essent aggeres non sine peritorum

rum artificum industria, quibus carebant Sultani & Turcæ.

Secundam causam fuisse existimo, quod ex ea navigatione & freto plus commodi & lucri in Christiani orbis incolas, nempe in Italos, Venetos, Gallos, Hispanos redundare possit, quam in Sultanorum vel Turcarum provincias. Etenim nautæ Veneti, Galli, &c. per illud fretum navigarent ad Persiam atque Indiam, & inde remeantes pretiosas illas merces Persiæ atque Indiæ adveherent: quas merces Sultani & Turcæ malunt terrestri itinere camelis per suas ditiones vehi, ut ita multis locis vectigalia ex illis colligant, qua in re non minima ærario Turcico accedit opulentia. Legi potest hac de re Maffeus libro tertio Historiarum Indicarum, ubi describit, quam ægrè Campion Sultanus Ægyptius tulerit Lusitanorum, in Indiam navigationes & commercia.

Tertia causa omissi consilii fortassis fuit, quod Sultani & Turcæ sciant, Christianos in re navali prævalere, atque ideo metuerint ne fretum illud & adjacentes regiones, ipsamque Medinam Mahometis sepulchrum valida classe & firmo exercitu invaderent, cum per hanc navigationem milites robustos nequē itinere defatigatos cum omni necessario comœatu in terram exponere possint.

Aliud fuit consilium Prætoris Indici Lusitani Alphonsi Albuquerqueii, qui in animo dicitur habuisse, Nilum ab Ægypto avertere ducto alveo ex Abassia, (quæ Ægypto contermina est intercedentibus tantum quibusdam desertis, & per quam fuit Nilus antequam in Ægyptum veniat) in mare rubrum, ut ita Ægyptum Turcis redderet sterilem & infructuosam. Verum morte præventus est, antequam quicquam in hoc negotio susciperet.

Hæc de Mediterranei maris altitudine cum rubro mari & Oceano Atlantico atque Indico comparata explicanda fuerunt, quoniam indicium inde quidam petunt, quod diversa sit partium Oceani altitudo.

Verum illa alio etiam exemplo confirmare possum, si magnis parva licet conferre. Oceanus Germanicus, qui est Atlantici pars, inter Frisiam & Hollandiam se effundens efficit sinum, qui etsi parvus sit respectu celebrium sinuum maris, tamen & ipse dicitur mare, alluitque Hollandiæemporium celeberrimum, Amstelodamum. Non procul inde abest lacus Harlemensis, qui etiam mare Harlemense dicitur. Hujus altitudo non est minor altitudine sinus illius Belgici, quem diximus, & mittit ramum ad urbem Leidam, ubi in varias fossas divaricatur. Quoniam itaque nec lacus hic neque sinus ille Hollandici maris inundant adjacentes agros (de naturali constitutione loquor, non ubi tempestatibus urgentur, propter quas ageres facti sunt) patet inde, quod non sint altiores, quam agri Hollandiæ. At vero Oceanum Germanicum esse altiore quam terras hæc, experti sunt Leidenses, cum suscepissent fossam seu alveum ex urbe sua ad Oceani Germanici littora prope Cattorum vicum perducere (distantia est duorum milliarium,) ut recepto per alveum hunc mari possent navigationem instituere in Oceanum Germanicum & hinc in varias terræ regiones. Verum enim vero cum magnam jam alvei partem perfecissent, desistere coacti sunt, quoniam tum demum per observationem cognitum est, Oceani Germanici aquam esse altiore quam agrum inter Leidam & litus Oceani istius: unde locus ille, ubi fodere desierunt, dicitur *het Malle*

Gat. Oceanus itaque Germanicus est aliquantum altior quam sinus ille Hollandicus.

Alia est ratio sinuum illorum, qui non oblongo, sed amplo & lato tractu in funduntur inter terras, ut Mexicani Bengalenſis sinus & aliorum: hosce ejusdem esse cum Oceano, à quo nullis angustiiis sejunguntur, altitudinis, non est dubitandum: etsi non ignorem, Hispanos olim de hoc dubitasse (an mare Pacificum altius esset sinu Mexicano) cum de Isthmio Americano sive Panamensi perfodiendo consultarent, ut ex sinu Mexicano libera esset & commodissima ad Peruviam & Chinam, Indicasque insulas navigatio. Verum hujus quoque consilii omiſſi causam politicam fuisse accepimus, nimirum metuebat Hispanus, ne Angli, Belgæ & aliæ nationes uterentur hoc freto & fauces obsiderent, ipsamque Peruviam invaderent. Sane Belgæ non necesse habuissent navigationem per fretum Magellanicum & fretum le Maire periculoso & longo itinere instituere, cum ad expugnandam Peruviam, vel saltem infringendas Hispanorum in ea regione vires instructissimas classes mitterent.

Quare, ut hæc concludamus; ita statuendum videtur, Oceani partes & sinus latos esse omnes ejusdem altitudinis, (ut Propositio prima probat) sed sinus oblongos præsertim per angustum fretum immisſos esse aliquantum humiliores, inprimis in partibus extremis, de quo tamen diligentiores magisque accuratas observationes optarem institui ab illis, qui commoditates experiendi nanciscuntur: hæc nimirum dubia sunt. 1. Utrum Oceanus Indicus, Atlanticus, Pacificus sint ejusdem altitudinis, an Indicus vel Pacificus altior sit quam Atlanticus. 2. An Oceanus Septentrionalis

lis proprie dictus, nempe polo vicinus sive in Zona frigida sit altior quàm Atlanticus. 3. An mare rubrum sit altius mediterraneo. 4. An Pacificum mare sit altius sinu Mexicano. 5. An sinus Balthicus sit æque altus ac Atlanticus. Idem in sinu Hudsonii, in freto Magellanico & aliis observari debebat. De Ponto Euxino dicemus capite xv.

Fluxus & refluxus continuus maris atque alii fluxus omnino faciunt, ut partium Oceani diversa sit altitudo, & ejusdem partis in diverso tempore sive diei horis. Sed hæ sunt causæ externæ, nos verò naturalem aquæ constitutionem tantùm hoc loco consideramus: præterea non ita variant altitudinem in ipso Oceano, sicut in littoribus videtur.

Corollarium. Non itaque assentiri possumus Papyrio Fabiano & Cleomedi, qui summam Oceani altitudinem statuerunt quindecim stadiorum esse (dimidii milliari Germanici) nisi forte de profunditate intelligenda est illorum sententia, & male pro profunditate posita est altitudo: sicut in Aristotelis versione factum videmus lib. i. Meteor. cap. xi. in fine, ubi *βαθύτητα πόντου* explicatur per altitudinem maris.

PROPOSITIO VI.

Profunditas maris sive Oceani in plerisque partibus explorari potest bolide, pauca loca sunt, quorum fundus hactenus nondum attingi potuit.

Profunditas Oceani varia est, nimirum pro altiorum majori vel minori depressione, $\frac{1}{80}$ milliari.

$\frac{1}{20}$, $\frac{1}{10}$, $\frac{1}{4}$, $\frac{1}{2}$, &c: in paucis locis integri circiter milliari Germanici deprehensa est, ubi non sufficiunt funes ad explorandam profunditatem, etsi hic quoque verisimile sit profunditatem termina-

tam

ram esse non ad ingentem distantiam. Cum hoc tamen non negamus, in profundis alveis quasdam quasi voragines vel alios subterraneos meatus esse.

In sinibus maris profunditas multo minor est quam Oceani, quia alveus est minus profundus sive minus excavatus propter viciniam terræ, sicut eandem ob causam Oceanus ad littora minus est profundus quàm in remotis à terra locis, quod accidit ob solam alvei ejus figuram cavam.

Nautæ profunditatem explorant bolidè, cujus materia est plumbea, figura pyramidalis, pondus duodecim circiter librarum, si funis sit trium vel plurium librarum, qualis sufficit ad ducentas periticas, etsi alii requirant bolidem plurium librarum. Possunt tamen in hac observatione decipi, si funis ab aquæ vorticibus & undis abreptus non perpendiculariter sed oblique descendat.

Vbi autem tanta est Oceani profunditas, ut rudentes vel catenæ non sufficiant, incerta ea manet, etsi quidam ad hujus investigationem aliquid excogitaverint. Observandum esse censent, quantum temporis elabatur interea dum plumbum aliquod noti ponderis descendit ad notam profunditatem, deinde eidem plumbo applicandum esse suber vel medullam sambuceam, aut vesicam inflatam, ita ut hæc statim separetur à plumbo, ubi hoc in fundum maris impeerit: atque ita applicatione factâ, plumbum rursus demittendum esse in fundum, atque observandum esse tempus, donec suber redeat ad superficiem maris. Ex hac observatione si conferatur cum observationibus alio loco factis, existimant posse inveniri Oceani profunditatem certis adhibitis Canonibus. Sed & ipsa regularum incertitudo & observationum fallacia & temporis brevitudo tanta est, ut nunquam

istâ methodo existimem obtineri posse cognitionem profunditatis. Illud satis constat, *profunditatem Oceani in nulla parte esse infinitam, sed ubique fundum habere.* Etenim cum ipsa Tellus infinita non sit, sed rotunda, atque in seipsam recurrente figura, patet quod Oceani profunditas non sit infinita. Neque ab una superficiei parte se extendit per centrum ad oppositam superficiem, ut ita partes terræ separet à se invicem, quia terra gravior est aquâ, & ideo partes terræ si essent per intercedentem terram separatae, tamen statim iterum conjungerentur.

Cæterum ex observatâ hætenus in plerisque locis profunditate manifestum est, eam fere æqualem esse altitudini sive elevationi montium & locorum mediterraneorum supra littora, nimirum quantum hæc elewantur & extant supra littorum Horizontem, tantum alvei maris infra eum deprimuntur, sive quantum assurgit terra à littoribus versus mediterranea loca, tantundem paulatim magis magisque deprimitur usque ad medii Oceani loca, ubi plerumque maxima est profunditas. Mutatur profunditas modò in hac, modò in alia parte, varias ob causas. 1. Propter fluxum & refluxum. 2. Cum incremento & decremento Lunæ. 3. A ventis. 4. A ruina vel subsidentia alveorum vel littorum, item si alvei fundus fiat altior progressu temporis à subsidente arena, limo &c.

PROPOSITIO VII.

Oceanus nullos habet fontes, sed intra cavitates sive alveos terræ continetur, non tamen idem numero semper manet.

Fluviorum aquam è fontibus prosilire experientia testatur, & quoniam hoc tot annorum seculis fit, inde necessario sequitur, aquam illam quæ

quæ è fontibus continuo tempore fluit ad mare, per subterraneos meatus vel alio modo ad eosdem fontes redire. Eodem modo fuerunt olim quidam Philosophi, qui maria dicebant è certis fontibus scaturire. Neque illos abducebat ab hac opinione magnitudo Oceani & perpetuitas. Aiebant enim per subterraneos ductus vel alio modo ad eosdem fontes redire, ut ita perpetui fluxus causam redderent. Aristoteles libr. 2. Meteor. cap. 2. conatur demonstrare contrarium & opinionem veterum refellere, verùm debilis valde est illius argumentatio. Mihi illa opinio refutari possè videtur hoc modo: Si sunt Oceani fontes, erunt vel in extante Terræ parte, vel in ea quæ ab Oceano tegitur, hoc est in alveo Oceani. Non sunt in extante, cum nullibi ab hominibus sint inventi. Neque dicas, illas forte existere in terris incognitis Septentrionali vel Australi. Hoc enim gratis & sine ulla ratione postulare sibi concedi impudens est, imprimis cum ad Septentrionales terras non paucas mare glacie concretum reperiatur, & in plurimis illis regionibus, quæ hætenus detectæ sunt, nulli fontes inventi sint. Non itaque sunt fontes Oceani in parte terræ extante. Restat ut probemus, illos neque in parte aquis repleta, hoc est in alveo Oceani esse. In hoc si essent, non magis distarent à centro terræ, quam aquæ ipsius Oceani, & ideo non fieret ex illis fluxus, sed aqua quiesceret in illis, quippe cujus natura sit & proprietas ut non moveatur à locis depressis ad altiora. Fontes enim omnes altiores sunt fluviorum aquæ quam effundunt. Sed obijciat aliquis, violentum hunc esse motum, propterea quod alveus Oceani & terra intus multis sit perforatus ductibus, meatibus, barathris sive canalibus, utcunque appellare placer,

qui sub terris tractu longo progrediantur, donec in alium alvei Oceani locum immittantur, ut ita horum canalium subterraneorum (qui magnam satis latitudinem & extensionem intra terram habere possunt) duo sint orificia in alveos Oceani exeuntia. Fieri itaque posse, ut aqua ex Oceano influat in orificium unum ex istis duobus, & per alterum tanquam ex fonte egrediatur, quod facili Diagrammate illustrari potest. Et quia tales subterraneos meatus plurimos esse nihil prohibet, neque absurdum quicquam inde sequitur, ideo fontes quoque maris plurimos esse in ipso Oceani alveo veri simile alicui videri posset, (de fontibus enim apparentibus hæc tantum sunt intelligenda.) Verum hæc imaginatio vana est, neque cum aquæ proprietatibus concordat. Aqua enim in alterutrum orificium istorum canalium sive subterraneorum meatuum illapsa non egrederetur per alterum orificium, sed in illo impleto quiesceret, (nisi accedente causâ violentâ sive externâ). Etsi enim aqua in illo ductu prematur & urgeatur ab aqua incumbente ipsi orificio, tamen non potest ex altero orificio se exonerare, quoniam huic orificio etiam incumbit aqua, quæ non minus premit, quam aqua incumbens priori orificio, quod per experientiam ita probari potest: Sit in vase aliquo aqua A B C D, A B est superficies aquæ æqualiter & Sphæricè jacens. Sed per medium vas mediamque aquam sit immissa trabs R P E F, quæ perforetur ductu g h obliquo, ita ut g ex parte vasis A sit altior quàm foramen h ex parte vasis B. Aqua igitur tam ex parte A quam parte B flueret in hunc ductum g h & impleret eum, neque effunderetur per alterutrum orificium, non per g, quia hoc altius est, neque per h, quia etsi hoc

hoc sit depressius quam g, tamen aqua ex parte B perpendiculariter ad fundum vasis tendens sive nitens prohiberet effluxum.

Si dicas, aquam alteri orificio subterranei canalibus incumbens minus premere & repellere aquam per alterum orificium immisissam, propterea quod ad illud orificium minor ejus sit copia & altitudo, quam ad hoc orificium; ad hoc respondetur 1. illud quidem fieri, si aqua uni orificio incumbens sit separata & non continua cum aqua, quæ alteri orificio incumbit: at si continua superficie cohæreant illæ aquæ, tunc potius aqua altior per hanc continuam viam movebitur ad minus altam, quam ut per subterraneum ductum feratur ad illam. 2. etiam si id concedatur fieri aliquando, tamen motus ille mox cessabit, quando nimirum ex loco aquæ altioris tanta aquæ copia per subterraneum meatum delata est ad alterum orificium & ei vicinum alveum, ut non amplius sit altior vel major ibi copia, quam ad hoc orificium, neque ulla reddi potest causa quæ efficiat, ut aqua ab hoc alveo iterum aliâ via regrediatur ad orificium prius, sive ubi aqua altior ponebatur ita ut hic perpetuò sit altior.

Ex hisce itaque perspicuum est, Oceani nullos esse fontes, sed intra alveum suum perpetuo contineri.

Verum contra hæc quædam objici possunt, quæ digna sunt consideratione.

Primò. Probationem nostram supponere perpetuam Oceani quietem sive naturalem constitutionem, & excludere causas externas atque violentas. Atqui nullum tempus est, quo non in aliqua saltem Oceani parte sit causa movens externa vel violenta, ut venti, fluxus & refluxus, terra-

rum mutationes, &c. Hisce itaque causis efficitur, ut modo in hac parte Oceani, modo in alia sit major altitudo & copia aquæ, quam in alia parte; atque ideo aquam illam altiore in subterraneos meatus illapsam vel irruentem iterum effundi in alia alvei Oceani parte, ubi minor est aquæ altitudo propter causam illam externam, & ubi incumbens aqua tunc minus resistit eruptioni vel effluxui, quoniam à causa externa aliò movetur vel impellitur. Etsi enim, hæc ita fieri, non possit certâ probari ratione vel experientiâ, tamen neque contrarium, hoc est, ista non ita fieri, potest demonstrari. Itaque ad minimum incerta est veritas & dubitandum est de hoc problemate. Quod autem tales subterranei meatus & barathra sint sub alveo Oceani, non potest negari, & videntur eorum indicium præbere loca illa Oceani, ubi immensa est ejus profunditas, cum in vicinis partibus tanta non sit. Ad hoc respondeo, etsi admitamus meatus illos subterraneos; tamen non ideo concedendum quoque est, quod ad aliam alvei Oceani partem progrediantur sive in eam exeant: & licet hoc ipsum quoque concedatur, tamen cum non in omnibus locis sint tales meatus, & causæ hæc externæ modò in hac, modò in alia parte Oceani dominantur, non sequitur ex allata objectione, quod fontes Oceani sint in aliquo loco, sed quod modo ex hisce partibus alvei modo ex aliis aqua profluat, ita ut fluxus non diutius duret, quam causa illa externa.

Secundo, ita aliquis argumentari posset: Fluxum Oceani perpetuum sentiri à Septentrionali terra vel plaga versus Austrum inter Europam & Americam Septentrionalem, item inter Asiam & Americam Septentrionalem: neque tamen ullum
Oceani

Oceani vel vicinum locum esse deprehensum, quo perveniat ad illas Septentrionales regiones. Cum itaque perpetuus sit hic fluxus, neque per manifestam viam ad illas regiones, unde sit fluxus, perveniat aqua, ideo necessario concludendum videtur, aquas ex aliis Oceani partibus per subterraneos ductus pervenire ad Septentrionales illas regiones, atque ita effundi ibi ex alvei foraminibus tanquam ex fonte, & hinc deinde versus Austrum moveri aquas. Accedit alia causa à priori desumpta. Est enim aqua Oceani in Zona Torrida gravior, quam in locis Septentrionalibus propter majorem salis copiam, ut proposuit. VIII & XII probabimus. Itaque in Zona Torrida Oceanus magis premet per subterraneorum meatuum orificia, quam in locis Septentrionalibus, & ideo in hisce locis minus resistens aqua sinet effluere aquam ex orificiis canalium. Ad hoc respondeo. 1. Fluxum illum Oceani à Septentrione non tantum esse, ut objectio ponit, & sicut quidam inprimis veteres de eo sentiebant, (qui quatuor alveis vel ductibus ab ipso polo fluere aquam volebant, sicut etiam quædam Mappæ Geographicæ exhibent) neque perpetuus est, sed propter frequentiam ventorum Septentrionalium frequenter animadvertitur: præterea ingens & perpetua in illis locis copia nivis & pluviarum auget aquam; & facit ut fluat versus Austrum. Adde quod in aliis partibus alijs Oceani motus deprehenditur, de quo vide caput sequens.

Tertio, non videtur absurdum, sed potius verissimum, fontes omnium fluviorum in Oceanum se exonerantium simul sumtos, esse fontes ipsius Oceani. Cum enim perpetuo temporis progressu tanta copia aquæ in Oceanum ex illis profluat,

procul dubio ad ipsos fontes & alveos fluviorum ex Oceano aqua pervenit, partim per subterraneos meatus, partim per pluvias. De hoc cum nemine certavero: neque de hisce fontibus Propositione nostra intelligenda est: quæsitum enim est, An Oceani aqua in certo aliquo Telluris tractu profluat è terræ cavernis, ita ut ex illis in ipsum Oceani alveum fluat sine intermedia viâ?

Quartò, videtur probari posse fontes Oceani in ipso alveo esse, ex eo, quod in fundo Oceani in quibusdam partibus reperta sit aqua dulcis, quæ quidem non aliter nisi per fontes in fundo illo scaturientes istuc potest pervenire vel existere. Linschotius narrat, in Ormus prope parvam insulam Bareyn dictam, in Oceano hauriri aquam dulcem ab urinatoribus ad profunditatem quatuor vel quinque orgyjarum: & similes fontes in aliis fundis Oceani & sinuum reperti sunt. Ad hoc respondeo, paucos tales fontes hæcenus repertos esse, qui non sufficiant vasto Oceano: præterea neque de hisce fontibus institutam esse quæstionem monuimus antea.

Ex hisce patet, aliquomodo verum esse & recte dici posse, Oceanum habere fontes, sed non in eo sensu, quo de fluviorum fontibus hæc proferre solemus, & in quo Propositionem nostram intelligendam esse diximus. Manifestum quoque hinc est, quid sentiendum sit de illa quæstione: Vtrum unum & idem numero mare sit & perpetuo maneat, an aliud atque aliud, cujus partes perpetuo absumantur, & vicissim generentur.

PROPOSITIO VIII.

Salsedo sive salsus sapor aquarum Oceani provenit vel existit à particulis salis quæ eis admixtæ sunt.

*sunt. Illa verò unde exstiterint & hodie adhuc au-
geantur vel conseruentur; dubium est.*

Primum Propositionis hujus membrum probat experientia, qua vel vulgo cognitum est, Sal ex aqua marina fieri aquæ decoctione vel Solis vel ignis nostri calore & fervore: in Germania & plurimis aliis locis separatur aqua ignis beneficio: in Gallia Sol magis fervidus idem præstat immisso Oceano in factas foveas, in quibus aliquot mensium spatio exhalant, vel eductâ vi solis aquâ concretum sal invenitur. In littoribus multarum regionum, ut Angliæ & aliarum, colligitur salis nigri magna copia, aqua marina inündans sæpissime ea littora, relinquit quotidie aliquas particulas sive humorem, ex quo mox aqua sive subtilior pars exhalat, & relinquitur concretum sal, cujus nigredo deinde per coctionem tollitur, etsi à plurimis littoribus rursus abripitur & dissolvitur ab irruente iterum Oceano; quæ causa est, cur non inveniat in omnibus littoribus. Cum itaque vulgaris hæc sit experientia, non necesse habuerat Aristoteles falsum experimentum adducere de vasculo cereo in mare demisso.

Ex hisce patet, proximam salædinis aquæ marinæ causam sive verum subjectum istius salædinis esse particulas salinas, quæ in ea aqua continentur. Itaque improprie & obscure sine causa loquuntur Aristotelici cum suo Præceptore, quando ab adustione maris factâ per Solem, vel ab adustis particulis salædinem maris provenire dicunt & defendunt, sed de hoc mox pluribus dicendum est.

Nimirum de altero Propositionis membro præcipua est difficultas & controversia: Unde particula illæ salæ Oceani existant?

Ari-

Aristoteles siccas exhalationes sive fumos (quos omnes ferè adustos & salinæ naturæ esse ait) exstimat à Tellure elevatos misceri cum humidis vaporibus & cum hi in pluvias coierint, decidere cum hisce in mare atque inde falsedinem falsaque in mari particulas existere. Manifesta ejus verba sunt cap. 7. lib. 2. Meteor. atque ideo hanc sententiam potissimum defendere videtur, quod ex ea rationem possit reddere, cur mare semper falsum sit.

Alii Peripatetici volunt, atque Aristotelem quoque in suas partes trahere conantur, quod ideo falsedo insit mari, quoniam fervore solis perpetuo aduratur: Indicium esse quod aqua eò minus falsa deprehendatur, quo profundior sive à superficie remotior, in hac verò maximè falsam deprehendi.

Ambæ hæ sententiæ gravibus laborant difficultatibus & absurdis, ut mirum videatur, eis doctorum illorum & quidem Philosophorum animos potuisse acquiescere. *Aristotelis enim opinio hisce urgetur.* 1. Quod pluvia in Oceano deberet falsa sentiri, quod non deprehenditur, quia expers est falsi saporis. Scaligeri effugium ineptum est, qui id fieri dicit ex eo, quod fumus iste sive exusta evaporationis materia non sit nacta satis temporis, cum & rarior sit & in aëris regione frigidior hæserit. Etenim jam à nautis asservata est talis pluvia per aliquot dies quod tempus certe satis foret aquæ ad ostendendum saporem falsum, si quis ei inesset. 2. Mare minus falsum deberet esse, quando diu non pluit; cujus tamen contrarium deprehenditur.

Altera opinio urgetur hisce. 1. Falsum est aquas Oceani eò minus falsas deprehendi, quo fundo sunt

sunt propiores : pauca loca sunt, ubi id deprehenditur, nimirum in illis fundis, ubi fontes aquæ dulcis scaturiunt. 2. experientia testatur, aquam dulcem, utcunque diu exponatur fervori Solis, vel ignis tamen non salis fieri. Hanc quoque objectionem Scaliger effugere conatur nimis levi subtilitate. Dicit enim illud in hisce observationibus fieri propter aquæ exiguitatem, quæ non crassescat sed resolvatur. At utcunque magnam aquæ copiam sumas, & si vel levi igne urgeas ut resolutio (in vaporem, hanc enim resolutionem intelligit) impediatur, tamen nullum salis saporis acquirat aqua, nisi quod salis antea contineat. 3. Lacus & paludes etsi sole urgeantur, tamen non saliscunt. Hanc quoque objectionem Scaliger eludere conatur, id accidere dicens propter dulcis aquæ successionem. Atqui idem deprehenditur in stagnis vel lacubus illis & paludibus, quæ tantum à pluvia & nivibus resolutis existunt, ubi non locum habet effugium illud de successionem: Illi enim lacus potius exsiccantur, ubi longo tempore non pluit, quam ut in salis abeant vel saliores fiant.

Rejctis itaque falsis illis opinionibus de causa & ortu salis in Oceano, apprehendamus unam e duas, quæ magis verisimiles sunt, sententiis, neque ullis urgentur difficultatibus, nimirum

1. Particulas hasce coæternas vel coævas esse ipsi Oceano, atque ideo de earum ortu non magis querendum esse, quam de ipsius Oceani atque totius Telluris, imò totius mundi ortu & generatione.

2. Si ea causa minus placet, alteram eligemus, nimirum salis istas particulas à terra hinc inde avulsas esse & in aqua dissolutas. Multos enim montes vel scopulos salinos in maris alveo esse certum

certum est. Tota insula Ormus nil aliud est nisi candidum & durum sal, ex quo etiam parietes ædium fiunt, & ideo nullus dulcis aquæ puteus in ea insula invenitur. Multas fodinas salinas in terra esse nemini ignotum est, & capite xi quasdam enumeravimus. Sed non opus est particularibus hisce exemplis, quin ipsam totam terram consideremus. Hujus enim magna pars nihil fere aliud nisi sal est: à sale enim consistentiam suam habet, quandoquidem Physici Chymicæ periti rectè probant, omnium rerum consistentiam & compactionem à sale esse: & experientia respondet, si enim terræ partem duram sumas & in cinerem comburas, nancisceris multum salis.

Nihil contra hanc sententiam opponi potest, quod alicujus valoris sit & non facili negotio retundatur. Dicunt enim quidam, impossibile videri, quod partes illæ falsæ Terræ perpetuo sufficiant, neque aliquando absumantur ab aqua Oceani quæ continue ab eis aliquam partem aufert. Ad hoc enim respondeo, salem ex aqua Oceani non absumi tantâ copiâ ut magna restauratione egeat, & si quid absumatur id tamen in alio loco reponi, quandoquidem extra Tellurem non aufertur.

PROPOSITIO IX.

An aqua dulcior sit in Oceano, quo fundo propior? Et cur in quibusdam Oceani partibus aqua dulcis in fundo hauritur?

Ad prius respondeo, experientiam non testari de ea dulcedine, nisi in quibusdam locis, de quibus altera quæstio loquitur: In hisce locis esse in alveo maris fontes aquæ dulcis, diximus aliquoties, in præcedentibus. Naturaliter enim fieri nequit,

quit, ut aqua magis salsa existat supra minus sal-
sam, cum illa sit gravior.

Loca illa maris, ubi in fundo aqua dulcis scatu-
riens reperitur, studiosi rei Geographicae ipsi col-
ligant e Scriptoribus.

PROPOSITIO X.

*Aqua Oceani eò minus salsa est, quo propior est
Polis: Contrà, eò magis salsa, quo Equatori vel
Zona Torrida magis vicina existit.*

Hæc tamen de plurimis tantum Oceani parti-
bus intelligenda sunt: quasdam enim exceptiones
admittit Propositio.

Causa hujus inæqualitatis in salsedine est sex-
tuplex.

1. Quod Solis fervor in Zona Torrida plures
vapores ex Oceano attollat in nubes quam in locis
Septentrionalibus, qui vapores sunt aquæ dulcis,
quoniam salis particulæ propter gravitatem non
ita facile attolluntur. Cum itaque ab aqua Ocea-
ni Zonæ Torridæ vel quo locus propior est Zonæ
Torridæ; eò major vaporum copia fervore Solis
separentur, inde fit ut relicta aqua magis salsa de-
prehendatur, quàm in Septentrionalibus locis,
ubi non tanta aquæ dulcis copia separatur pro-
pter debilem Solis calorem.

2. *Secunda causa est ipse calor aquæ vel frigus.*
Etenim eadem numero aqua vel cibus salsus, ut
caro muriatica, intinctum, &c. magis salsedinem
gustu sensibilem præbet, quando calidis eis vesci-
mur, quàm cum frigefacta sunt, quod cuivis ex
vulgari observatione ciborum notum esse puto:
Calor enim sive ignis particulæ movent & acu-
tiores reddunt particulas salis in cibo tali conten-
tas, atque ab aliis admixtis separant, unde lin-
guam,

quam magis & acutius feriunt vel pungunt. Quoniam itaque aqua Oceani eo magis calida est, quo Aequatori propior, vel quo propior est parallelo Solis ad singulos dies, contra eò magis frigida, quo polo propior, sequitur inde, quod aquæ, etsi eandem salis copiam continerent, tamen eo magis falsæ debeant videri vel gustui apparere, quo Zonæ Torridæ propiores, & quo polo propiores, eo minus salsedo erit sensibilis.

3. *Tertia causa est*, copia major vel minor salis in diversis alvei Oceani partibus. Etenim sicut in Terræ extantis partibus deprehendimus, quod non in omnibus sint fodinæ salis, neque ubi sunt, ibi eadem salis copia: idem quoque de parte Terræ, quam Oceanus regit vel alluit, hoc est de alveis & littoribus asserendum esse, nemo non ibit inficias. Ubi itaque major salis copia vel minera in alveo vel littore Oceani est, ibi aquam magis salisam esse, quoniam majori copiâ satis imprægnata est, facile est concipere. Sic insula Ormuz tota sale constat: itaque vicinus Oceanus admodum falsas habet aquas. An verò in alveis & littoribus Oceani existentis in Zona Torrida sit major copia salis vel minerarum salinarum quam in Septentrionalibus locis, id dubium & incertum adhuc est propter defectum observationum: Verisimile tamen quibusdam videtur propter fervorem Solis majorem in illis locis quam in hisce, quo partes aquæ separantur à terrestribus & falsis. Sed fallax hocce indicium est.

4. *Quarta causa* inæqualis salsedinis est pluviarum frequentia vel infrequentia, quibus nives addi possunt. Septentrionalibus locis pluvie atque nives frequentes sunt: in locis Zonæ Torridæ minus frequentes quibusdam anni partibus, quibusdam

busdam fere continuæ. Itaque in hisce locis, mensibus pluvialibus, aqua Oceani ad littora minus salsa est, & minus salis continet, quam mensibus siccis: Imo ad Malabarici Indiæ littoris plurimis regionibus Oceanus dulcis est mensibus pluvialibus propter magnam aquæ copiam, quæ è jugis Gatis defluens in mare se exonerat. Hæc itaque causa facit, ut diverso anni tempore idem Oceanus sit diversæ salsedinis: quia tamen in locis Septentrionalibus continuæ fere per totum annum sunt pluvix & nives, ideo hic mare est minus salsum, quam in Zona Torrida.

5. *Quinta causa* est dissimilis solutio sive inæqualis aquæ facultas ad resolvendum salem & sibi uniendum. Aqua enim calida multo promptius sibi unit salem, quam aqua frigida. Et si itaque in locis Septentrionalibus, alvei Oceani atque littora eandem vel majorem copiam salis continerent, quam in Zonæ Torridæ locis, tamen quoniam aqua ibi frigida est, non poterit ita promte & subtiliter dissolvere salem atque sibi unire, sicut aqua in Zona Torrida, quæ calidiuscule est.

6. *Sexta causa*, est magnorum & multorum fluviorum exoneratio in mare: Sed hæc causa tantum in partibus Oceani, quæ vicinæ sunt littoribus, locum habet, in remotis nihil sensibile efficit. Ita nautæ affirmant, Oceanum ad litus Brasiliæ, ubi argenteus fluvius se exonerat, salsedinem amittere & dulces latices præbere quindecim milliarium à littore distantia. Idem de Oceano Africano ad littora Congi, ubi Zaire fluvius se exonerat, atque aliis plurimis annotatum est, & jam ante in quartæ causæ explicatione de Oceano ad litus Malabaticum Indiæ diximus. Hisce adde fontes in quorundam partium Oceani alveo scaturientium.

Hæc

Hæ sunt causæ quæ ad varietatem & diversitatem falsedinis in diversis Oceani partibus concurrere videntur, ex quibus singulorum marium falsedo explicari potest.

Ex quibus etiam facile est perspicere rationem, cur aqua Oceani Germanici & Septentrionalis sit minus apta ad salem ex illa per coctionem separandum, quam aqua Oceani Hispanici, insularum Canariarum, & viridis promontorii Africæ (unde Belgæ magna copia sal petunt & in varias regiones Septentrionales; nempe in Borussiam, Poloniam, &c. vehunt) nimirum hic Oceanus est propior Zonæ Torridæ, & accipit aquas ex Oceano Zonæ Torridæ, iste remotior est à Zona frigida sive à Septentrione: non tamen negaverim ipsorum alveorum magis vel minus Salinam constitutionem adesse. Aqua marina ad Guineam in Oceano Æthiopico præbet unâ coctione sal candicans instar sacchari, quale nec mare Hispanicum nec ullum Europæorum largitur unâ coctione.

PROPOSITIO XI.

Cur pluvialis aqua in medio Oceano dulcis deprehenditur, aqua verò, quam decoctione vel destillatione separamus à marina sive à salsa, nihilominus salsa deprehenditur, cum tamen pluvialis illa aqua etiam extiterit à vaporibus è mari sublati?

Frustra hætenus laborarunt veri naturæ scrutatores Physici, hoc est, docti Chymici (non illos ineptos Thrasones intelligo) ut in magnum rei Nauticæ commodum & usum invenirent modum & artem, quâ aquam dulcem possent è marina destillare vel abstrahere, sed hætenus, quantum mihi quidem constat, frustra id tentarunt. Etenim tam

in

in decoctione quam destillatione (quæ duo idem sunt) sal relinquatur in fundo vasis , tamen aqua per decoctionem vel destillationem separata adhuc falsa deprehenditur , ut potui hominum non sit apta, quod mirum videtur causam rei ignorantibus. Hanc autem Chymia, hoc est vera Physica, docuit, cujus beneficio cognitum est, duplex esse sal in corporibus; sive duo salium genera, quæ etsi sapore convenient, tamen aliis qualitatibus magnopere discrepant: unum vocarunt artifices sal fixum, alterum volatile. Fixum sal propter gravitatem suam in decoctione & destillatione non elevatur sed in fundo vasis remanet. At volatile sal est spirituosum, & nihil aliud nisi subtilissimus Spiritus, qui levissimo igne elevatur, atque ideo in destillatione cum ipsa dulci aqua ascendit & arte unitus est propter atomorum subtilitatem. Nec tantum in aqua marina, sed in omnibus fere corporibus hoc sal volatile cum fixo sale reperiri Chymia probat per experientiam, verum in quibusdam majori, in aliis minori copia: majori quidem in herbis acris, minori in inspidis & oleosis. Difficultas itaque consistit in separatione spiritus hujus salis sive salis volatilis ab aqua.

At cur aqua pluvialis in medio Oceano dulcis est non minus ac in terra, cum tamen ea generata sit per abstractionem halituum ex Oceano factam fervore vel calore Solis, aut etiam ab igne subterraneo, quæ evaporatio nihil differt à destillatione?

Quadruplex causa esse videtur. 1. Lenta illa & lenis evaporatio, qua tantum subtilior elevatur pars ex Oceano, quæ etsi spiritum salinum volatilem continet, tamen minori copia eum habet, ac si fortiori calore facta esset exhalatio. 2. Longa

ga via, perquam hic vapor transit, antequam in eam aëris regionem perveniat, ubi in pluvias condensatur: in qua via verisimile est, spiritum salinum paulatim separari ab aqueis particulis.

3. Aliarum aquearum particularum in aëre existentium admixtio. 4. Refrigeratio vaporis & coitus sive condensatio. Etenim habitus illi ex Oceano sublato paulatim magis magisque refrigerantur & aliis admixtis vel obviis conjuncti coeunt in crassiores vaporem sive nubes: in hac refrigeratione & condensatione sive coitu spiritus salini cum ipsis igniculis avolant in locum aëris altiores.

Cur vero idem non fiat in destillatione, (ubi etiam halitus sublato iterum refrigerantur & condensantur) causa est, 1. quod propter parvam viam adhuc nimis arctè conjungitur spiritus salinus particulis aqueis. 2. quod vapor coercetur vase, neque liberum evolanti spiritum exitum concedit.

PROPOSITIO XII.

Aqua marina gravior est, quam aqua dulcis, & una marina altera gravior est.

Causa è præcedentibus est manifesta, quia mirum aqua marina continet sal fixum, quod gravius multo est corpus, quam aqua dulcis. Et ostendimus, quod in diversis maris partibus diversa sit salis copia. Non tamen sequitur, aquam esse graviolem, quo magis salsa est: quia potest illa salendo à majori copia salis volatilis esse, qui non auget gravitatem sed minuit, & tamen salissimas reddit aquas.

PROPOSITIO XIII.

Aqua marina non ita facile congelascit quam aqua dulcis : sive, majus requiritur frigus ad aqua marina, quam ad dulcis congelationem.

Experientia hoc satis ostendit contra Aristotelicos, qui aqua eo minus congelationi obnoxiam esse defendunt, quo purior est, & proinde marina, quippe magis ab elementari recedens quam dulcis, debebat facilius congelascere, quod falsum est. Causa autem, quod in ipso sale quidam spiritus inest, qui congelationi resistit, & à sale separatus nullam omnino patitur à sævissimo frigore congelationem, ut notum est Chymicæ peritis. Est enim spiritus salis medicamentum satis notum & frequentis usus.

PROPOSITIO XIV.

Cur Oceanus non sit major, cum tot fluvios recipiat?

Causa est 1. quia per subterraneos meatus, ut capite explicabitur, ad fontes fluviorum redit aqua è mari. 2. quia plurimi vapores ex Oceano elewantur, quorum in pluviam resolutorum pars decidit in ipsum Oceanum, pars in terras.

PROPOSITIO XV.

Oceani partes quadam discrepant coloribus.

Experientia testatur, in locis Septentrionalibus mare videri magis atro colore, in Zona Torrida fusco colore, in aliis locis cæruleo. Circa Novæ Guinæ littora quædam deprehenditur Oceanus albo, alibi flavo colore. In Fretis aqua magis albicare videtur. Ad littora Congi non procul à Baya d'Alyaro Gonzales rivus in mare exoneratur,

tur, qui subrubro colore est, accepto à minera rubra terræ, per quam fluit. Sed celebris est propter coloris proprietatem sinus Arabicus, ideo dictus Mare rubrum. Sunt qui nudam appellationem esse volunt & desumptam ab Erythreo Rege: alii à splendore, quem Solis radii ab eo percussi efficiunt, rubrum apparere volunt. Sed magis verisimilis & experienciâ confirmata sententia est, ruborem illum oriri ab arena rubri coloris, quæ in alveo hujus maris & littoribus reperitur & ipsi aquæ admiscetur frequenter. Hujus autem admixtionis, quæ contra arenæ gravitatem esse videtur, causa est vehementia fluxus & refluxus aquæ sive celeritas & agitatio in hoc mari, quâ fit, ut arena vel sabulum evehatur & agitetur atque ita impediatur à rapida & continua agitatione maris, ut non possit subsidere. Testantur hoc nautæ, qui aquam maris hujus interdum adeo rubram apparere asserunt, ut sanguis esse videatur: sed si vase excepta relinquatur quæta, mox subsidere rubrum sabulum ad fundum atque in eo conspici. Sæpe accidit, ut procellæ à maris rubri plaga in Arabiam vel Africam irruentes tantam rubræ arenæ copiam secum vehant & in terras projiciant, ut integros hominum & brutorum cætus sive comitatus obtegat, unde deinde Mumia vera existit. Aliæ opiniones plurimæ de hac rubedine reperiuntur apud Scriptores, sed omnes falsas esse experientia, quam adduximus, probat.

An eadem vel alia causa sit, Cur mare inter Californiam & Americam dicatur rubrum, (Vermejo) nondum legi annotatum à Scriptoribus.

PROPOSITIO XVI.

*In quibusdam Oceani partibus quadam peculiaria
inveniuntur.*

Celebre est mare di Sargassò dictum à Lusitanis, quod non procul à Promontorio viridi Africæ circa insulas salis incipit & se extendit à vicesimo gradu latitudinis borealis ad tricesimum quartum Australis. Color hujus maris viridis videtur, qui tamen ipsius non est, sed herbæ cujusdam exiguum foliorum, similis nasturtio aquatico, Belgæ vocant *kleyu peterfilie*, Lusitani Sargassò. Hujus herbæ folia implicata sibi invicem adeo dense & continuo tractu incumbunt Oceano hujus loci, ut ipsa aqua ægre conspiciatur, & nautæ eminus Oceanum hunc cernentes putent insulam & terras virides esse, neque penetrare possunt per herbæ hujus tricas, nisi mediocri saltem vento adjuventur. Baccas herbæ fert parvas non absimiles nostris ribesii, sed inspidas & inanes intus. Vnde oriatur nondum constat, quandoquidem nec terræ ita vicinum est mare hoc, ut illi originem suam debeat, neque è fundo sive alveo Oceani excre-scere verisimile est, quoniam egregia hic est maris profunditas, & in plurimis locis funium superat longitudinem.

In Oceano non procul à promontorio Bonæ Spei usque ad insulas Tristan de cunha fluitantes conspiciuntur multi arundinacei frutices insigni crassitie, quibus marinus fucus implicatus est vel herba Sargassò. Nautæ vocant Trombas, vocabulo Lusitanico & pro certo signo habent si ibi versantes conspiciant quod vel vicini sint promontorio Bonæ spei vel illud jam superaverint, ubi in Indiam iter instituitur.

Ad littora Insulæ Madagascar ejicit Oceanus corallia rubra & alba, quæ tanquam frutices sub mari crescunt, & licet mollia sint in quibusdam locis, tamen inter Madagascar & Africam scopuli durissimi corallini esse dicuntur.

In sinu Balthico ad littora Borussiae mare ejicit succinum præstantissimum, quod incolæ flantibus certis ventis versus littus retibus ferreis excipere sunt docti.

Ambra ejicit Oceanus tantum (quod mihi cognitum sit ex scriptoribus) in Zona Torrida, nimirum ad littora Brasiliæ, (ubi aliquando frustum quingentarum librarum à milite Belga inventum & Comiti Nassövio Mauritio oblatum) ad insulam Madagascar, ad promontorium viride Africae, ad insulam Mauritiæ (Lusitanis de Cerne) ad insulam Sumatram & alias Indicas. Garcias refert, aliquando inventum frustum 2000 librarum imò quasdam insulas totas constare ex ambra, sed non nominat illas insulas.

In Oceano Æthiopico ad Guineam, Congo & Angola hoc observatur peculiare, quod lateribus & carinæ navium, dum ibi conimorantur vel navigant, accrescunt conchæ virides instar graminis, unde navium cursus retardatur & ligna navium exeduntur. In ora Aramoricæ Galliæ carinis navium increscunt volucres informes primo, deinde sensim formantur, rostro in lignum defixo, ubi moveri incipiunt, sensim revelluntur, & mare petunt anatibus similes.

Excrementum Oceani, dictum spuma maris, reperitur multis in locis fluitare, sed in quibusdam majori copia, quam aliis, Belgæ vocant *Sasbeen*.

In Oceano ad Indiæ littora Malabarica & ad Cambajam serpentes in superficie aquæ feruntur: hoc

hoc nautis signum, si forte ex aliis non possint colligere an regionibus illis propinqui sint.

Multis in Oceani locis lens palustris invenitur, ut inter Angliam & Galliam, ad Terram australem, & alibi.

Quatuor milliaribus à Nova Hispania fluitant multæ radices, arundines & folia ficulneis similia, quæ comeduntur, suntque sapore brassicæ.

In primæ Belgarum navigationis ad Fretum Magellanicum descriptione legimus, quod die xii Januarii, anno 1599, aqua Oceani non procul ab ostio fluvii argentei in Brasilia (Rio de Platta) apparuerit rubri sanguineique coloris, sed cum situlâ haustam aquam accuratius inspexissent,prehenderunt, quod innumerabilis vermiculorum multitudo, qui rubro colore erant, in aqua illa continerentur, & manu excepti instar pulicum hinc inde saltabant. Nautæ appellant pulices marinos, & putant illos à balænis certo anni tempore evomi sive rejici: alii autumant eos provenire ab innumerabili copia parvorum cancrorum, qui ad terram australem deprehenduntur, quæ copia ita mare implet, ut etiam in luce debili, nempe in crepusculo vespertino vel matutino Oceanum nautis præbeat conspiciendum sanguineo colore.

De animalibus, quorum in Oceani diversis locis diversæ species agunt, non est agendi hic locus.

PROPOSITIO XVII.

Cur mare noctu splendere & lucere videtur, præsertim si fluctus sint vehementiores à tempestatibus?

Quæstio hæc sive phænomenon requirit difficultis illius de causis colorum disputationis cognitio-

nem. Variæ de illis Physicorum sententiæ. Ad propositi phaenomeni explicationem commodissima ea videtur esse doctrina, quæ colores à certo varioque motu existere sive potius apparere docet. Accuratam expositionem Physicis relinquimus.

PROPOSITIO XVIII.

Oceanus, vel potius, omnis aqua ejicit corpora terrestria ad littora, inprimis tempore plenilunii.

Hujus proprietatis, quam experientia satis superque ostendit, causam reddere, non est difficile. Etenim aqua nunquam est sine aliquo motu, qui si rapidus sit & versus unam plagam, deferet terrestria corpora, donec occurratur littoribus, ubi propter cessantem motus aquæ vigorem deponuntur corpora illa terrestria. Verum in Oceano fluctus modo huc modo illuc feruntur. Hisce eodem modo feruntur corpora terrestria, & quoniam fluctus omnes versus aliqua terræ littora tendunt, ideo omnia terrestria versus littora deferuntur.

In pleniluniis maxima est Oceani agitatio.

Vana itaque eorum est opinio, qui Oceanum animatum dixerunt, & sensum possidere, quo se purget ab omnibus sæcibus & terrestribus corporibus. Causa satis hic manifesta est.

CAPUT XIV.

De Motibus Maris in genere, & in specie, de Fluxu & Refluxu.

PROPOSITIO I.

A *Qua nullum habet motum naturalem præter unum, quo ex altiori loco ad depressiora loca move-*

movetur. Et si vicinus locus aut vicinum corpus sit vel aequalis vel majoris altitudinis, ac superficies aqua, tunc aqua naturaliter quiescit, hoc est, non movetur nisi violenta à causa pellatur & protrudatur.

Manifesta est Propositionis veritas per experientiam vulgarem, si vas aquam continens moveatur. Tamdiu enim aqua fluctuat, donec nulla pars aliâ parte altior sit, hoc est donec sphaericam figuram vel superficiem componant, ut dictum est capite xiii. Etsi autem hic motus etiam habeat causam violentam nempe aëris pressuram vel motum aëris circumcirca Tellurem, tamen quia de hac causa magna adhuc est dubitatio, & adeo manifestus est in aqua, ut non ab externa causa ei advenire videatur, ideo saltem ad distinguendum hunc motum aquæ à reliquis motibus vocetur naturalis. Fit autem hic motus in eam plagam, in qua situs est locus depressior.

PROPOSITIO II.

Cum pars Oceani movetur, totus Oceanus movetur, sive omnes reliquæ partes etiam moventur, sed eò magis, quò parti mota vicinior una quaque fuerit.

Quoniam enim si pars Oceani moveatur, necessario locum mutat, & ideo hic locus depressior fit loco vicinæ aquæ, hæc vicina aqua movebitur in hunc locum, & illius vicina in illius locum, & sic porro in reliquis partibus. Minor autem inde existit motus in partibus remotioribus, quia in locum, à quo pars aquæ mota est, irruunt aquæ vicinæ non ex una plaga, sed ex omnibus circumcirca: deinde in harum particularum locum, qui jam est peripheria succedunt, partes ex majori periphe-

ripheria, & in harum locum iterum ex majori :
atque sic porro. Quo autem ex majori peripheria
aqua in locum eundem fluit, eo minor ejus parti-
cula influit, & multo minor si in locum majorem
distribuenda sit. Ita videmus, cum lapis injicitur
in aquam, truditur aqua in peripheriam, hæc in
majorem peripheriam, hujus in majorem peri-
pheriam, & eo minor minusque sensibilis fit motus,
quo longius à loco jacti lapidis abest, & licet dein
nullus motus videatur, est tamen aliquis, admo-
dum exiguus, nisi impediatur ab alio aquæ motu.

PROPOSITIO III.

*Observare plagam, in quam mare, quod move-
tur, tendit.*

Eligatur tempus, si ita licet, quo ventus vehe-
mens nullus spirat, & injiciatur in aquam corpus
ejusdem ferè cum aqua gravitatis, notetur locus
ubi injectum est: nempe navicula ibi maneat im-
mota: deinde ubi hoc corpus mediocri interval-
lo à loco injectionis cum mari fuerit delatum,
tunc ad illius locum alia navicula constituatur, &
observetur plaga, in quam situs hujus secundæ na-
viculæ à priori vergit. Hæc erit etiam plaga, in
quam mare eo tempore dicemus moveri.

PROPOSITIO IV.

*Motus maris vel est directus, vel vortex & gy-
ges vel concussio.*

Directum voco, qui versus plagam aliquam ten-
dit: Vorticem, cum aqua in gyrum agitur: & ali-
cubi absorbetur & rejicitur: Concussionem, cum
æremit. Sed sepositis duobus posterioribus ad finem
capitis, de directo primo agemus, atque ideo hunc
generis voce appellabimus Motum maris.

PRO-

PROPOSITIO V.

Motuum, quos in mariprehendimus, quidam est generalis, quidam sunt proprii, & singulares, quidam contingentes.

Generalem voco, qui in omnibus fere Oceani partibusprehenditur & quidem omni tempore.

Proprios sive speciales motus voco, quibus tantum quædam Oceani partes moventur, suntque duplices, perpetui vel anniversarii: illi, qui sine mutatione vel cessatione persistunt, hi qui certis anni mensibus vel diebus in aliquo mariprehenduntur.

Contingentes motus maris appello, qui sine certo ordine modo cessant, modo incipiunt, quales infiniti sunt.

PROPOSITIO VI.

Contingentium motuum maris causa est ventus, impellens mare versus plagam vento oppositam. Neque unquam mare liberum est à talibus motibus.

Etenim cum aër tangat mare, & ventus nil aliud sit quam valida aëris commotio & pressura versus Tellurem, ideo aër impulsus & protrusus mare expellere de suo loco conatur, & quoniam mare fluidum est neque resistere potest impetenti & urgenti aëri, ideo movebitur ex suo loco versus locum oppositæ plagæ, atque aliam aquam expellet, & hæc aliam, atque sic porro.

Cum autem semper aliquis ventus sit in aëre, modò hic modò illic, plerunque etiam in diversis regionibus diversi eodem tempore, inde sequitur, semper esse in mari quosdam contingentes motus, qui in partibus vento propioribus magis existunt sensiles, & quidem ideo, quod mare facillime recipit impressionem, quoniam fluidum est.

PROPOSITIO VII.

Generalis motus maris duplex est: Vnus continuus ab Oriente in Occidentem; Alter compositus ex duobus contrariis motibus, qui dicitur Fluxus & Refluxus maris, quo mare certis horis fluit ad littora, & certis horis refluit à littoribus. De primo prius agemus.

Moveri Oceanum ab Oriente versus Occidentem continue, probatur potissimum ex motu maris ejus, quod in Zona Torrida intra Tropicos jacet. Quoniam enim hic fortior motus est, minus impeditur ab aliis motibus.

Deprehenditur is motus maris manifestè navigantibus ab India ad Madagascariam & Africam, item in Oceano Pacifico Inter Novam Hispaniam & Chinam & Moluccas, item in Oceano inter Africam & Brasiliam.

Sic per fretum Magellanis fertur mare ab Oriente in Occidentem motu incitatissimo, ut inde Magellanes (vel qui ante Magellanem id detexit, ut volunt) conjecerit fretum, per quod ex Atlantico in Pacificum Oceanum pervenitur. Sic per fretum Maniliense, per canales inter Maldivas insulas, motus maris ab Oriente naves ducit. In sinum Mexicanum impetuosè inter Cubam & Jucatan illabitur mare, effluitque inter Cubam & Floridam. Ad Sinum Persicæ vehementissimus influxus, ut ideo fretum dicatur Os Draconis. Insignis etiam ad Terram Canadensem. Ex Oceano Tartarico per fretum Novæ Zemblæ & fretum Vvaigatz movetur mare, quod tum ex ipso motu probatur, tum ex copiosa glacie, quam Oceanus Tartaricus in fretum Zemblæ ejicit. Et ad littora Septentrionalia Americæ in Pacifico mari motus fit

fit versus fretum Anian : item à Japone movetur mare versus Chinam : sic in freto Maniliensi motus est ab Oriente in Occidentem , sic in freto ad Javam. Et cum Oceanus Atlanticus moveatur versus littora Americæ,deprehenditur contrarium in Pacifico Oceano. Hic enim à littoribus movetur , quod omnium maxime conspicuum est ad Cabo des Correntes inter Panamam & Limam.

PROPOSITIO VIII.

Venti sæpe immutant motum generalem maris, inprimis statim illi, quos motiones appellari dicemus in xx i. cap.

Quoniam enim hi spirant plerique ab Austro & Borea vel ab horum collateralibus , inde fit , ut mare quod propter generalem motum tendit versus Occidentem , moveatur versus plagas collaterales Occidentis, nempe versus Zephyro Boream, vel Zephyro Austrum imò generalis ventus , cum raro ab ipso Oriente , plerunque à collateralibus plagis Orientis spiret , immutat hunc generalem maris motum. Multo magis id faciunt venti Septentrionales in mari Septentrionali , ubi generalis motus in paucis Oceani partibus est sensibilis.

PROPOSITIO IX.


Causa generalis hujus motus maris ab Oriente in Occidentem incerta est.


Aristotelici putant (etsi ipsi Aristoteli & ejus asseclis atq; omnibus Philosophis Europæis ignotus fuerit ante Lusitanorum navigationes per Oceanum Zonæ Torridæ) id fieri à motu cæli primo, qui non tantum omnibus stellis, sed etiam aëri ex parte & Oceano sit communis, quo ab Oriente in Occidentem omnia transferuntur. Coper-

nici quidam, ut Keplerus, et si Lunam quoque agnoscant hujus motus causam, tamen motum Terræ non parum ad motum illum facere statuunt, nimirum aquam cum non continua sit sed tantum contigua Terræ, existimant non posse sequi circumrotationem Terræ, atque illam resistere versus Occidentem, dum Terra se subducit ad Orientem, atque ita non mare moveri ab uno loco Telluris in alium, sed Terram partes aquæ relinquere, unam post aliam.

Alii, quibus nec Aristotelica nec Copernicana satisfacit explicatio, ad Lunam confugiunt: hanc Dominam omnium humorum esse, & Oceanum secum circumducere vel trahere ab Oriente in Occidentem volunt. Si quæras, quomodo? occulta est qualitas, inquiunt, influentia, sympathia, vicina est Terræ, & similia. Sanè Lunam esse effectricem hujus motus, admodum est probabile, propterea quod in Noviluniis & Pleniluniis motus iste est multo vehementior quam in quadraturis, ubi motus plerumque exiguus.

Acutissimus Carthesius mechanicum explicavit modum, quo Luna motum hunc Aquæ tum Aëris efficiat. Supponit enim juxta generalem suam hypothesein, quod circa Tellurem circumgyrentur infiniti atomi, quibus spatium usque ad Lunam expletum sit sine ullo vacuo, quod spatium vocat vorticem Terræ. Sit nempe Tellus F E H G, Aqua 2143, Aër 6587. Vortex Terræ B A D C, Luna B. Si itaque in vortice B A D C nulla Luna esset, inquit, particula ejus vorticis sine impedimento circumrotarentur circa centrum T: quia autem Luna in eo est, ideo spatium, per quod materia cælestis fluit inter B & T, redditur angustius; atque inde sequitur, materiam istam cælestem





estem ibi celerius fluere (inter B & T) atque id-
 eo magis premere tum superficiem aëris in 6, tum
 superficiem aquæ in 2, quam si Luna non esset in
 vorticis diametro BD: cumque corpora aëris &
 aquæ sint fluida, & facile pressioni isti obsequan-
 tur, ipsa minus alta esse debere supra Terræ par-
 tem F, quam si Luna esset extra hanc diametrum
 BD, ac è contra, esse altiora versus E. Dum autem
 Terra fertur ab E per F. versus G, sive ab Occi-
 dente in Orientem, aquæ tumor 412, itemque aë-
 ris 8;6, qui nunc parti Terræ E incumbunt, pau-
 catim ad alias ejus partes magis Occidentales mi-
 grare, ita ut post sex horas incumbant parti Terræ
 H, & post horas duodecim parti Terræ G. Vnde fit,
 ut aqua & aër ab Orientalibus Terræ partibus in
 ejusdem partes Occidentales fluxu continuo fe-
 rantur. Ita Cartesius. Nervus demonstrationis in
 eo est, quoniam Terra EFGH cum aqua 1234
 circumrotatur & unà cælestis materia vorticis in-
 ter BADC & 6;87, Luna vero in B existens fa-
 cit spatium B6 angustius, ideo materia cælestis
 cum pressurâ quadam angustius B6 transiens aë-
 rem & aquam, dum transit infra B, exprimet ver-
 sus IHG, & dum I transit infra B, exprimetur
 versus HGF & sic porro. Neque enim materiæ
 cælestis pars ad Lunam allapsa in BD, sursum
 resiliat, quia repellitur, ideo quod omnia plena
 sunt corporum. Et licet premat aërem & aquam à
 62 F, non tantum versus Occidentem E:5, sed
 etiam versus Orientem 73 G, tamen quia partes à
 62 F versus 73 G Orientem sitæ magis magisque
 recedunt ab istis angustis, partes verò versus. Eis
 sitæ magis magisque accedunt, ideo ab hisce præ-
 cipuè recipitur ille impetus.

Sed in hac viri ingeniosi explicatione desidera-
 mus hæc :

H 7

1. Se-

1. Sequitur ex ea, quod mare detumesceret Lunâ ad illud accedente, & intumesceret in partibus, quæ quadrante sive sex horis absunt à Luna: nimirum Tumor est in E 15, at in F 26, ubi Luna verticalis est altitudo minima. Hoc autem repugnat experientiæ, namque in F 26 tumet mare, in E 15 vero minimus tumor. Quomodo hæc absurditas evitari possit, dicemus Proposuit. seq.

2. Non sufficienter ostenditur (ipse Cartesius hoc planè omisit) cur, dum in angusto spatio B 6 materia cælestis premit aërem 6 & aquam 2, non æque versus G 3 7 moveatur, quandoquidem cum ipsa Terra ferantur versus G 3 7, tam aër & aqua, quam materia cælestis, atque adeo versus Orientem potius quam Occidentem aqua & aër feratur. An hoc solâ partium subductione à 6 D B versus G 3 7 sufficienter caveatur, dubito.

3. Lunâ accedente ad mare aliquod, deprehenderetur in ea parte ventus vehementior versus Occidentem ab Oriente, quam alio tempore. Id vero non fit.

4. Manifestius est, Solem efficere illum aëris motum ab Oriente versus Occidentem sive ventum generalem, quandoquidem illum mane ante ortum Solis & cum ortu Solis in plerisque locis deprehendimus: Tunc enim quadrante abest à vertice loci. Hæc considerationem merentur in Cartesiana explicatione, ut nihil dicam de ipsa hypôthesi.

An vero hic Oceani motus possit referri ad generalem ventum Orientalem, dubito. Etenim cum ventus ille sub Zona Torrida perpetuus sit, videtur etiam motum illum Oceani perpetuum posse efficere. Sane cum augescente vento augeri motum hunc Oceani, apertum est; sed illud non est.

est sufficiens indicium, motum ipsum à vento dependere. Obstat connexio illa, quam motus hic cum Luna habet, nempe quod Luna ad mare appropinquante, turgescere facit illud 2, quod in plenilunio & novilunio vehementior sit motus ille maris ab Oriente in Occidentem, in quadraturis minus vehemens. Quod equidem Cartesii demonstratio egregie explicat, nimirum quoniam in novilunio & plenilunio Luna propior est Telluri, & sic angustior redditur porta B 6 pro transitu materiæ cælestis, & ideo major pressura. Et quamvis cum Luna plena est, possit illa intumescencia referri ad majus lumen Lunæ, tamen cum Luna nova est, cessat illa ratio, atque ideo evincitur, Lumen non esse causam hujus motus, sed potius pressuram illam Cartesianam, ut in sequentibus dicemus.

PROPOSITIO X.

Secundus maris motus generalis est Fluxus & Refluxus Maris, quo mare intervallo duodecim horarum cum dimidia circiter ad littora pleraque fluere & ab iis refluxere animadvertitur: affluere quidem cum Luna accedente ad Meridianum supremum vel imum, refluxere, quando Luna recedit à Meridiano versus occasum, & versus Ortum.

Vbi primo quærendum, an Oceanus hoc motu versus unam plagam certam moveatur, nimirum ab Oriente in Occidentem, & ab Occidente in Orientem?

Etenim littora sinus, alveique fluviorum, in quibus affluxus hic & refluxus manifestius deprehenditur quam in alto pelago, juxta diversas plagas extenduntur, quædam versus Orientem ab Occidente, ut sinus Mediterraneus, quædam ab Austro

Austro versus Septentrionem , ut sinus Arabibus &c. Et in singulis hisce sinubus & littoribus affluit aqua versus plagam extensionis, adeoque in diversis sinubus & diversis littoribus motus iste Oceani in diversas plagas tendit. Itaque primò inquirendum , an motus iste Oceani nullam plagam certam observet, sed alibi alias ad plagas moveatur, an verò duas plagas observet, nempe Occidentalem in affluxu , & Orientalem in refluxu? an verò unam & eandem plagam tam in affluxu, quam in refluxu , nimirum Occidentalem ? Ad quod respondeo , posterius verum esse , nempe quod totus Oceanus in affluxu moveatur ab Oriente versus Occidentem ; in refluxu autem moveatur quidem motu generali itidem ab Oriente ad Occidentem , sed tamen in affluxu in certam partem majorem copiam affluere , in refluxu verò (propriè loquendo , defluxu) non in contrariam plagam moveri sed in eandem Occidentalem , affluere autem minorem copiam.

Nimirum ita statuendum est , quod Fluxus & defluxus maris non sit distinctus motus à generali illo motu , quem priori propositione explicavimus , quo Oceanus continue movetur ab Oriente in Occidentem , sed quod sit hujus generalis motus quidam modus seu affectio. Et ideo si hic motus spectetur & consideretur in toto vel medio liberoque Oceano , minus rectè dicitur fluxus & refluxus maris , sed fluxus & defluxus, imò ne hæc quidem apta sunt vocabula , sed rectius dicitur intumescencia & detumescencia , ita ut peculiaribus appellationibus qualitas motus seu fluxus ab ipso motu & fluxu distinguatur.

Etenim mare semper fluit ab Oriente in Occidentem , refluere autem tantum apparet propter-

ea quod cum in uno tempore majori copia & vehementia ad certum locum affluit, deinde in alio tempore hic impetus cesset. Cæterum refluxus id eo appellatus est propterea quod in sinibus & littoribus mare accedere & recedere videtur juxta extensionem sinuum & littorum, quod tamen non propter ipsius motus qualitatem, sed propter situm littorum & sinuum accidit, nempe ut in contrariam plagam remeet aqua, sed quod decedit mare, hoc non à situ littorum, sed ab ipsius motus conditione provenit.

Neque debet vel potest motus maris spectari ex appulsu ad littora, quia qualiscunque sit motus maris sive in quamcunque plagam fiat, fluctus semper fiunt versus littora, quod fit propter fluidam aquæ naturam.

Quod autem tam in fluxu quam refluxu sive intumescencia & detumescencia mare moveatur versus eandem plagam, nempe ab Oriente in Occidentem & nequaquam refluat, id colligitur ex eo, 1. In Oceano remoto à littoribus, sub Zona Torrida, nullus alius motus deprehenditur quam is, quo ab Oriente in Occidentem fertur. 2. In fretis quæ directè extenduntur ab Oriente in Occidentem, & quibus Oceani partes conjunguntur, ut fretum Magellanicum, Maniliense, Javæ, atque alia inter Indicas Insulas, in hisce inquam fretis mare quidem intumescit & detumescit duodecim horis, sed mare in detumescencia non refluit ex freto ab Occidente in Orientem, sed defluit per alterum freti orificium in Occidentem, quod manifestum est indicium, hanc intumescenciam & detumescenciam non esse peculiarem motum sed generalis illius motus modificationem, neque mare reflueret in Orientem. Ideo Scaliger

&

& alii omnes falluntur, qui duplicem hic motum, in se ipsum replicatum, introducunt.

Id tamen sciendum est, cum dicimus motum hunc fieri ab Oriente in Occidentem, non tantum ipsos Cardines intelligi, sed etiam plagas collaterales, nimirum movetur etiam mare hoc fluxu à plagis collateralibus Orientis ad collaterales Occidentis, imo ad ipsum Boream & Austrum, sed minus valido & urgente motu.

PROPOSITIO XI.

Causam intumescentiæ & detumescentiæ maris, sive fluxus & refluxus ut vulgo appellatur, exponere.

Nullum fere naturæ phænomenon est, quod doctorum & physicorum ingenia tantopere exercuerit, quodque plures conatus eluserit. Quidam Mare & Tellurem animal fecere, quod inspirando & expirando efficeret refluxum & fluxum. Alii ingentem vorticem prope Norvvegiam, qui sex horis aquam rapiat & sorbeat, & totidem exspuat, causam dixere. Scaliger atque alii littora, inprimis Americæ, putarunt esse causam, quod illa mare generali motu appulsum repellant. Sed plurimi, cum viderent connexionem hujus intumescentiæ & detumescentiæ cum motu Lunæ, ab hac sola illam dependere statuerunt: Sed quomodo? Hoc opus, hic labor erat: ubi nihil illi aliud respondebant, quam Lunam trahere humores secum per occultam qualitatem & sympathiam. Verum hæc verba tantum sunt, quibus nihil aliud dicitur, quam effectum illum fieri à Luna modo aliquo, qui nos lateat. At iste modus quærebatur.

Cartesius illum ex generali sua hypothese deducit hac ratione. Resumatur Diagramma pro-

positionis 1x. in quo A B C D sit vortex ille, qui Terram pro centro habet, quique cum illa & cum Luna in majori vortice circa Solem fertur. M centrum ejus vorticis E F G H terra, 1234 superficies maris, à quo majoris perspicuitatis causa Terram ubique regi supponimus: & 5678 superficies aëris mare ambientis. Si itaque nulla in isto vortice Luna esset, punctum T, quod est centrum Terræ, foret in puncto M, quod est vorticis centrum, sed Luna Q existente versus B, hoc centrum Telluris T esse debet inter M & D, quia cum materia cælestis hujus vorticis aliquanto celerius moveatur quam Luna vel Terra, quas secum defert, nisi punctum T aliquanto magis distaret à B quam à D, Lunæ præsentia impediret, ne illa tam liberè fluere posset inter B & T, quam inter T & D, cumque locus Terræ in isto vortice non determinetur, nisi ab æqualitate virium materiæ cælestis eam circumfluentis, evidens est ipsam idcirco nonnihil accedere debere versus D. Atque eodem modo, cum Luna erit in C, Terræ centrum esse debebit inter M & A, sicque semper Terra nonnihil à Luna recedit. Præterea quoniam hoc pacto, ex eo quod Luna sit versus B, non modo spatium, per quod materia cælestis fluit inter B & T, sed etiam illud, per quod fluit inter T & D, redditur angustius, inde sequitur, istam materiam cælestem ibi celerius fluere, atque ideo magis premere, tum superficiem aëris in 6 & 8, tum superficiem aquæ in 2 & 4, quam si Luna non esset in vortice diametro B D, cumq; corpora aëris & aquæ sint fluida, & faciliè pressioni isti obsequantur, ipsa minus alta esse debere supra Terræ partes F & H, quam si Luna esset extra hanc diametrum B D, ac contra, esse altiora versus G & E, adeo ut superficies

ficies aquæ 1, 3 & æris, 5, 7, ibi protuberent. Jam vero, quia pars terræ, quæ nunc est in F, è regione puncti B, ubi mare est quam minime altum, post sex horas erit in G, è regione puncti C, ubi est altissimum, & post alias sex horas in H, è regione puncti D, atque ita consequenter. Vel potius, quia Luna etiam interim nonnihil progreditur à B versus C, utpote quæ mensis spatio circulum ABCD percurrit, pars Terræ quæ nunc est in F, è regione corporis Lunæ, post sex horas cum 12 minutis præter propter, erit ultra punctum G in ea diametro vorticis ABCD, quæ illam ejusdem vorticis diametrum, in quo tunc Luna erit, ad angulos rectos interfecat, tuncque aqua erit ibi altissima, & post sex horas cum duodecim minutis erit ultra punctum H, in loco ubi aqua erit quam minime alta, &c. Vnde clare intelligitur aquam maris singulis duodecim horis cum 24 minutis in uno & eodem loco fluere ac refluerere debere.

Hæc Cartesii est demonstratio, in qua illud imprimis ingeniosum est, quod apte & concinne ostendit, quomodo non tantum ad locum affluxus fiat vel intumescencia, cum Luna ad verticem illius vel Meridianum movetur, sed etiam cum Luna infra Horizontem ad Meridianum mediæ noctis movetur.

Diximus autem in fine propositionis ix, quænam in Demonstratione hac desiderare aliquis possit: imprimis illud mirum videtur, Cartesio non venisse in mentem, quod juxta Demonstrationem minima aquæ altitudo & omnimoda detumescencia esse debebat, Luna in Meridianum perveniente, ut Luna in B existente, est in 2 & 4 minima aquæ altitudo, & contra, aqua accrescit cum sece-

secedente Luna vel Terra, ita ut cum F erit in G h.e.sex horis à Luna, habebit altitudinem seu intumescentiam maximam : quod sane est manifeste contra experientiam : cum Lunæ enim accessu ad Meridianum accrescit aqua, & cum decessu decrescit. Cartesii vero tam verba quam Diagramma contrarium asserunt. Cæterum existimo, absurditatem hanc removeri posse à Demonstratione, idque hac ratione (modò idem Cartesio videatur.) Ponamus enim vorticem Telluris A B C D esse sine Luna, & aquam 1 2 3 4 æqualiter à centro T abesse sine ullo tumore, sed cum Tellure & materia cælesti inter A B C D & 5 6 7 8 circumagi. Accedat jam Lunæ corpus in vorticem hunc, ex. gr. in B, atque ideo spatium T B fit angustius & materia cælestis dum per illud conatur transire, premet aquam in 2 versus E.

Dum itaque aqua expellitur ex 2 versus E, quaeritur ubi maximus aquæ tumor vel cumulus sit futurus, an in loco E, qui quadrante absit à loco F (cui Luna verticalis est) an in loco vicino vel proximo ipsi F versus E. Si primum asseras, nempe in E debere esse tumorem, repugnat experientia : At secundum verè ita se habere, confirmat experientia, & ipsa ratio suadet, nimirum dum Luna consistit super locum E, expelletur aqua ex 2 versus I, sed maximus tumor erit in loco proximo ipsi 2, non in I, sed in hoc I erit minima accretio. Hoc enim experientia manifestum est, quia Occidentalia loca serius sentiunt intumescentiam. Ratio vero & motus aquæ leges idem omnino postulant. Si enim aqua effundatur in 2, ut fluat versus E, maxima copia erit in loco E, paulo minor in vicino loco, adhuc minor in hujus vicino, minima in E. Sic itaque cum ex 2
pelli-

pellitur aqua versus E, maxima ejus copia & tanquam cumulus erit in loco vicino ipsi 2, & eo minor tumor quo ab 2 locus remotior. Quia vero Terra circumrotatur ut E veniat in F, tum de-
mumerit in E maximus tumor, & pelletur aqua versus H.

Diagramma itaque Cartesii cum ipsa Demonstratione immutandum est, ut Tumor sit in loco vicino ipsi 2, hoc est ei, cui Luna est verticalis. Alia quæ hic dici possent, tractabimus in consideratione Physicæ Cartesianæ.

PROPOSITIO XII.

In pleniluniis & noviluniis motus maris generalis ab Oriente in Occidentem est vehementior, intumescencia etiam maris major deprehenditur in plevisque partibus. Sed in quadris minimus est motus generalis, minima etiam intumescencia.

Experientia propositionem hanc satis superque comprobat: Testantur quippe nautæ, Oceanum turgere & æstare in pleniluniis & noviluniis, in quadris vero malaciam esse, calma dicitur. Demonstratur autem juxta præcedentium propositionum hypotheses facili opera. Est enim Luna, cum plena est vel nova, Telluri propinqua magis quam in ulla alia ejus ætate, in quadris remotissima, ut Astronomi demonstrant. Cum autem Luna Telluri est magis propinqua, hoc est cum spatium BT est minus, materia cælestis impedita vehementius premet aquam ab 2 ad 1. (quia propinquior) In quadris contra.

In pleniluniis tamen observatur motus vehementior quam in noviluniis, saltem in quibusdam locis, quod sane nisi lumini Lunæ velis ascribere, aliam causam non video. Neque aliter potest

est explicari, cur in plenilunio, & arbores & animalia majori humorum Oceani imprægnata sint, quam in novilunio, cum tamen mare in novilunio æque augeatur. Id tamen mirabile, quod *Tuvistius* Belga in Descriptione sua Indiæ de regno Guzarath (in quo ipse annos multos egit) refert, Conchas, Cancros atque alios pisces testaceos cum plenilunio omnium minime ibi esse succosos & carnosos, in noviluniis verò omnium maxime, quod est contra omnium aliarum regionum naturam. Neque minus mirabile videri debet, quod ad littora vicina ostiis fluvii Indi (eiusdem regni Guzarathi) mare augeatur & turgeat in noviluniis, non procul verò inde, nempe in Calcutano mari, augmentum deprehenditur in pleniluniis. Verum accurate prius de hisce inquirendum esse institutis iterato observationibus existimo, deinde causarum inquisitionem tentent, quibus Naturæ contemplatio voluptas est.

PROPOSITIO XIII.

Tempore æquinoctii verni & autumnalis, siue in vere & autumnno intumescencia maris major & vehementior est, quam aliis anni temporibus, in solstitiis minima.

Hujus quidem proprietatis demonstrationem *Cartesius* ex sua hypothese simulat se afferre, at ego eam ex verbis illius non possum concipere, nec video, quomodo ex ipsius hypothese sequatur. Verisimile est, Solem quoque & ventos generales multum facere ad intumescenciam aquæ, cumque in æquinoctiis Sol medio incumbat mari Zonæ Torridæ, ideo vel ipse vel venti efficient, ut mare magis intumescat, quam alio tempore. De solstitiis contrario modo dicendum est. Vel dicemus,

can-

eandem esse causam majoris intumescentiæ maris, tempore æquinoctiorum sive veris & autumnii, quæ est causa frequentiorum pluviarum, ventorum, inundationum in illis temporibus.

PROPOSITIO XIV.

In quibusdam Oceani partibus sinibus, & littoribus magnum est accrementum & decrementum aqua in fluxu & refluxu: in quibusdam exiguum, in quibusdam sensibile nullum, adeoque nullus fluxus & refluxus, sive nulla intumescencia & detumescencia.

Magnum accrementum & decrementum recipiunt ea loca, 1. quæ sunt in Zona Torrida, intra Tropicos, quippe cum Luna premens plerumque in hac circumrotetur. 2. In locis, quæ directe ab Oriente in Occidentem extenduntur vel juxta plagas collaterales. 3. In illis sinibus, qui oblongi sunt & minus lati, magis sensibile est accrementum. 4. In illis locis, quibus pauca insulae vel procurentes terræ adjacent.

Horum prout pauca vel plura in locis desiderantur, eo minor erit fluxus & refluxus maris in eo loco.

Maximus fluxus & refluxus ex hætenus cognitis est is, qui in sinu Cambajensi in uno ostio fluvii Indi observatur, & multos in admirationem trahit. Etenim ad ingentem distantiam aqua recedit, & quidem celeriter. Vnde non sine ratione Indus fluvius vel ille sinus Cambajensis putatur ille esse, ad quem cum Alexander Magnus pervenisset & trajicere exercitum tentasset, ubi relatum ibi est, recessisse celeriter aquam & naves in sicco desertas esse, noluit ultra tendere, sed judicavit, Deos hic metam expeditionis suæ posuisse & prohibere

ulterius progredi: id quod etiam incolæ Cambajæ referunt. Causa est alvei parva depressio & altitudo. Quo enim alveus magis elevatus, eò majorem partem nudat aqua recedens; sed aliam accedere causam verisimile est.

Ad urbem Damman Indiæ, non procul à Suratæ altitudo aquæ per fluxum & refluxum variatur ad $2\frac{1}{2}$ orgyjas, & mare recedit à littore ad dimidium milliare.

In sinu Cambajensi affluxus auget altitudinem orgyis quinque (alii septem) quæ insolens accretio inexpertis nautis non raro naves perdidit, quippe recedente aqua ad scopulos allisæ sunt.

In freti Magellanici sinibus & littoribus non observatur constans tempus fluxus & refluxus, sed modo tribus, modo x i i horis aqua fluit & refluxit, quæ inconstantia ascribenda est violentæ Oceani irruptioni in illud fretum & crebris agitationibus à vento.

Circa Malaccam, item ad fretum di funda, insignis quoque affluxus & defluxus observatur.

In sinu Arabico sive mari rubro tantum esse refluxum quidam veteres scripserunt, (referente Scaligero) ut Moses cum Israëlitis sine miraculo illud transierit. At falsum est, quia non est tantus ibi refluxus, ut alveum siccum præbeat.

In maris Hudsoni sinu Nelson Thomas Button Anglus hybernans ad 57 gr. latit. Septentrionalis, observavit singulis duodenis horis aquas accrescere ad quindecim pedes & ultra. Similem affluxum in sequenti æstate deprehendit in loco 60 gr. latitudinis: sed in sinu Hudsons & sinu Sirames non accrescebat aqua ultra duos pedes.

Ad littora Chinæ admodum sensibilis affluxus & refluxus, ut etiam ad insulas Japoniæ.

Ad urbem Panamam in littore Americæ ad mare Pacificum jacentem mare admodum altum evadit & mox deprimitur; in pleniluniis ita augetur affluxus, ut aqua ædes urbis ingrediatur. Imo in omnibus fere littoribus maris Australis mirifice augetur & minuitur altitudo aquæ, ita ut in refluxu ad duo milliaria decrementum sit sensibile, & aqua fugiat visum in littore stantis.

In sinu Bengalensi ad Siamense litus affluxus auget altitudinem aquæ decem pedibus.

In mari autem Mediterraneo, quod per fretum Gibraltar influit ab Occidente versus Orientem, non sentitur affluxus, quia situs est contra plagam, in quam mare movetur, & ideo parum augetur illius aqua per affluxum, ita ut hoc sensibile non sit, nisi in sinu Veneto qui ob longam extensionem & parvam latitudinem ostendit fluxum & refluxum, cum in reliquo mediterraneo mari propter latitudinem insignem non sentiatur illud parvum incrementum vel decrementum. Vnde Græcis fuit ignotus hic fluxus & refluxus maris, uti etiam Romanis tempore Scipionis Africanus. Et tam Græci quam Romani ubi aliquando in aliis locis eum sentiebant, habebant promissum, ut constat ex Alexandri M. expeditione & Scipionis oppugnatione Carthaginis; sed seculo Ciceronis satis cognitus erat Romanis. Quidam tamen ad Massiliam exiguum quid observarunt. Ad littora quoque Barbariæ quædam satis insignis esse dicitur.

In mari vel sinu Balthico, ut etiam toto mari Septentrionali ultra Angliam ad Norvvegiam, Groenlandiam nondum deprehensus est fluxus & refluxus, sicut neque in Pacifici maris boreali littore. Causa nondum satis cognita, nisi dicas illam esse,

esse, quod à Lunæ via longe remota sint illa maria, & simul, quod ab Occidente in Orientem & Septentrionem extendantur, præterea multæ insulæ & procurrentes terræ impédiant. Hæc tria conjungenda sunt ad impediendum effluxum maris in hisce locis. Sic enim objectio de mari Hudsonii non habet locum, quippe hoc ab Oriente in Occidentem extenditur, in quam plagam cum mare moveatur, nil mirum est, si in eo affluxus maris sentitur, quam in mari Norvvegiæ, Balthico, aliisque Septentrionalibus.

PROPOSITIO XV.

Affluxus maris est violentus, nempe impulsus, sed refluxus est naturalis aquæ motus.

Etenim affluxus seu intumescencia fit à premente Luna vel materiâ inter Lunam & Terram, veletiam, quia mare non manet in eo situ, quem accipit in affluxu, hoc signum est, violentum fuisse motum. Ac in refluxu sine detumescencia mare movetur à loco altiori ad depressiorem, qui est naturalis aquæ motus.

LEMMA.

Dato ex Ephemeridibus vel per supputationem aut Astronomicam Observationem, loco Luna in Ecliptica, & latitudine, atque hora diei, invenire in globo Terrestri illum locum, cui Luna ad datam horam sit verticalis, item exhibere omnia illa Telluris loca, quibus Luna verticalis fiet eo die, nempe uni post alterum.

Hujus problematis magnus, imo necessarius est usus in doctrina de Fluxu & Refluxu maris. Modum autem illud præstandi reperies c.xxx. Propositione XIII. Ibi enim commodius explica-

tur: potest tamen anticipari illius Propositionis explicatio, & hoc capite studiosis monstrari.

PROPOSITIO XVI.

In illis locis maris, cui Luna verticalis est, fluxus & defluxus est maximus, nisi alia impendant, qua Propositione XIV enumeravimus. Et quo partes maris ab illo loco remotiores sunt, eo minor est affluxus & defluxus, ceteris paribus.

Quoniam enim in eo loco est pressura major & tumor aquæ major, qui prementi Lunæ & materiæ celesti est vicinior, inde sequitur id, quod Propositio dicit. Objectiones de locis quibusdam, in quorum comparatione contrarium deprehenditur, per aliarum causarum admixtionem sunt excusandæ.

PROPOSITIO XVII.

Quantitas fluxus & refluxus inconstans est in quolibet loco, & diversa ad diversos dies, atque eo major vel minor, quo Luna remotior vel propinquior ei loco sit.

Etenim Luna singulis diebus mutat locum suum in Ecliptica, atque ideo aliis diebus aliis locis fit verticalis, & per consequens à quovis loco remotior vel eidem vicinior. Quo posito, concluditur ex præcedenti Propositione, quod diversa sit ad diversos dies in eodem loco quantitas fluxus & affluxus, siue sensibilis sit diversitas, siue insibilis.

PROPOSITIO XVIII.

Maxima aqua intumescencia in loco quovis & affluxus terminus esse debebat cum Luna Meridia-

nam ejus loci occupat (supremum vel imum) sed in multis locis deprehenditur id fieri alio Lunæ situ.

Etenim cuivis loco Telluris Luna tum maxime est propinqua, cum in meridiano ejus loci versatur, propterea quod hypotenusæ Trianguli rectanguli est longior quam cathetus. Unde infertur per Propositionem xvi, quod Lunâ constitutâ in meridiano, debeat maxima esse intumescencia, & maxima aquæ altitudo, & statim fieri decrementum. Cum autem Luna in imo Meridiani consistit, tunc opposita illi angustia vorticis Terræ consistit in Meridiano superiori, atque ideo idem efficit, ac si ipsum Lunæ corpus præsens esset.

Verum hic magna existit difficultas. Plurima enim loca & littora Telluris sunt, in quibus deprehendimus, quod terminus affluxus sive intumescencia maxima non sit cum Luna ad Meridianum pervenit, (ut Philosophi ante hoc seculum disserebant) sed citius vel tardius, nempe cum Luna ad certum Verticalem sive ad certam plagam non Cardinalem pervenit. Et ne hæc quidem plaga constanter observatur, sed in noviluniis & pleniluniis plerunque maxima intumescencia est & detumescentiæ initium, antequam Luna ad hanc plagam vel verticalem circulum pervenit. Sic Londini aqua altissima est, cum Luna pervenit ad plagam, quæ inter Austrum & Occidentem, vel inter Septentrionem & Orientem media est, hoc est, ad Austrozephyri vel Euroboræ plagam. Ad littus Chinæ in portu urbis Maccau, Lusitanus quidem Nauclerus observavit & consignavit tempus intumescentiæ maximæ, hac ratione. Elevatio poli vel latitudo loci est 22 gr. 20 min. Anno 1584 die 19 Septembris fuit plenilunium: tunc summæ aquæ intumescencia, altitudo vel plem-

myra observabatur hora matutina sesquioctava, sive $\frac{1}{4}$ post octavam. Fuit itaque Luna tunc remota à Meridiano tribus horis cum quadrante. Unde plaga seu verticalis, in quo Luna ad id temporis momentum hæsit, invenitur juxta problema capitis x x x.

Anno 1585 die 111 Februarii, qui fuit tertius à novilunio, observata est altitudo aquæ maxima, paulo post duodecimam, unde colligitur ipso die novilunii, qui fuit primus Februarii, altitudinem maximam fuisse post horam decimam minuto quadragesimo circiter.

Ex hisce iterum plaga, in qua Luna eo temporis momento fuit, intelligenda est.

Anno 1585 die xvi Februarii in ipso plenilunio, observata est altitudo aquæ maxima horâ sesquiundecima, hoc est ferè tempore meridiei.

Anno 1585 die secundo Junii, qui erat quartus à novilunio, altitudo maxima observata fuit fere ad ipsam horam duodecimam: itaque colligitur in ipso novilunii die fuisse altitudinem maximam horâ nona antemeridiana.

Addit idem Naclerus, tempora & horas maximæ altitudinis & decrementi aquæ non convenire cum illis horis, quæ ex Lunæ motu supputantur, nisi quinque diebus ante & post novilunium: sed ambiguitas quædam est in his verbis, ut & iis quæ subjunguntur, ideo omisi hæc. Sed causa istius diversitatis est, quod affluxus novem horas in portu Maccœ occupet, defluxus tantum tres, ut Propos. x x x dicemus.

Naclerus quidam Belga ad dies novilunii & plenilunii annotavit horas diversorum locorum pro affluxus termino sive intumescencia, è quibus excerpti has:

Horá xii (diebus novilunii & plenilunii.) Ad littora Flandriæ, Enchusæ in Hollandia, Hornæ, Embdæ in Frisia Orientali, ad ostia Albis, Eideræ ad insulas Jutlandiæ, Doverii in Anglia, &c.

Minutis 45 post xii. Flissingæ in Zelandia.

Hora sesquiprima, sive $1\frac{1}{2}$ post xii. In Occidentali latere insulæ Anglicæ VVicht, Caleti, ad ostia fluvii Thamefis Angliæ, ad littora Zeelandiæ, in ostiis Scaldis, in Mosa, Goredæ.

Quadrante post secundam, sive $2\frac{1}{4}$ post xii. Ante ostia Scaldis, ante Mosæ ostia.

Horá tertia. Amstelodami, Roterodami, Dordraci, Noviocastrî in Anglia, ante pulvi nos Flandriæ, Armenteriæ in Flandria, in ostio fluvii Burdegalæ (Bordeaux) in australi littore Britannicæ, Gallicæ, Gasconicæ, Biscajæ, Gallæciæ, Portugalliæ & Hispaniæ: in Occidentali littore Irlandiæ ad Hirtlandiam usque.

Quadrante ante quartam pomeridianam. Rhomagi in Gallia. Inter Mosam & Ad Rupellam Gallicæ (Rochelle): in fluvio Burdegalæ, in sinibus littoris Hispanici, Portugallici, Gallæciæ, australi littore Britannicæ, Gallicæ, Gasconicæ, & ad Occidentale littus Irlandiæ.

Semisse post quartam. A Texel ad australia littora Irlandiæ.

Quadrante post quintam. In omnibus portibus australis littoris Irlandiæ, Plimuthi Angliæ & aliis australibus ejus locis usq; ad VValliæ littora.

Horá sextâ vespertina & matutina. Ante Hamburgum in Albi, ante Bremam, ante Texeliam, Antvverpiani, in canali inter Angliam & Brabantiam extra Sorlis.

Quadrante ante septimam vespertinam. Inter

Favvyck & Vaelmuyam in Canali usque ad Briston, ante S. Nicolai & Podeslëmke usque ad VVeymuyam & Hartepol.

Semisse post septimam. In statione navium (*op de Reede*) ad Texeliam. Kilduynæ, medio in Canali, juxta Plimuthum in mari usque ad promontorium Lezart Angliæ procurentis.

Quadrante post octavam vespertinam. Juxta insulam VVicht in Canali usque ad Bevesier, extra Flevum in Hollandico littore.

Horâ nonâ. Ante ostia Amisii fluminis Frisæ (*Eems*) ante Flevum, ad omnia Frisæ littora, ad Orientale litus insulæ VVicht.

Post horam decimam semisse, ante ostia Tamesi fluvii Angliæ, ad littora Normandiæ, Picardiæ.

Quadrante post undecimam. In fluvio Tamesi, atque aliis Angliæ locis.

Hujus tam insignis differentiæ & quidem in omnibus locis causam explicare, difficillimum est: etsi omnino id Physico incumbat, vel Geographo. Varios littorum anfractus, situm littorum respectu maris, insularum obstacula, aquarum mutuos occursums, locorum à via Lunari distantiam, varios ventos, imprimis constantes & generales, declivitatem littorum, atque alia, multum facere ad hanc proprietatem fluxus, verisimile est. Exempli gratia: Ad portum Londini in littore Angliæ aqua accrescit donec Luna perveniat ad plagam Austrozephyri, nimirum cum declinat ab Ecliptica versus Austrum. Tunc enim aqua reflueri incipit, non autem cum Luna ad Meridianum pervenit. Dicemus itaque, dum Luna movetur à meridiano Londini versus Brasiliam, sive Brasilia versus Lunam) ideo non recedere mare à Londino, sed adhuc augeri, propterea quod Americæ littora

littora ad quæ Oceanus movetur à Luna, repellant illam aquam versùs Angliam, hocque ideo, quia non præbet transitum aquæ. At cur Lunâ declinante ab Ecliptica versùs Boream, altitudo maxima aquæ & decrementi initium observatur antequam Luna ad Meridianum perveniat, nempe in plaga Euroboræ?

Respondeo, id ideo fieri, quia tunc Luna est multo propior Angliæ, quam cum versùs Austrum declinat ab Ecliptica, & ideo celerius implet; causa autem quod affluxus tunc non diutius protrahitur usque dum Luna ad meridianum perveniat, esse potest, quod Luna tunc Oceanum pellit magis versùs mare Mexicanum & mare Hudsoni, ubi magnaprehenditur intumescentiâ & detumescentiâ.

Ad littora Chinæ ideo dicemus intumescentiâ anticipare Lunæ ad meridianum appulsum, propterea quod ventus Orientalis continuus mare pellat versùs Occidentem.

Verumenimvero non hæc talia sunt, ut vel mihi ipsi satisfaciant. Ideo cuivis Naturæ scrutatori hæc ulterius & diligentius expendenda sunt. Ad veram autem causam inveniendam omnino necessarium est, ut accuratas habeamus observationes; quomodo in diversis locis fluxus & refluxus fiat, in quonam nempe verticali Luna sit in illo affluxu, quomodo varietur plaga in diverso loco Lunæ, in plenilunio, in novilunio inprimis in illis locis ubi Luna verticalis sit, item illis quæ directe respiciunt Orientem, Occidentem, Septentrionem, Austrum. Illud quoque diligenter observandum, quomodo fluxus hic fiat illis horis diei, dum Luna in boreali circuli sui parte existens non habet verticaliter suppositum mare, sed terras longo-

tractu, nempe à Camboja & China usque ad Africæ littus occidentale. Quia enim tunc non premit aquam directe, quippe mediterraneis locis imminens, existimo quod inde aliqua varietas huic motui accidere debeat. Item quid tunc fiat, dum Luna in Australi hemisphærio regens pervadit Brasiliæ mediterranea sive Australem Americam. Sine hisce observationibus vix pervenimus ad veram causam. Neque nos negligemus hoc argumentum, si in hac urbe, ubi hæc scribimus, visam transigere Deus dabit.

PROPOSITIO XIX.

Mare ad pleraque littora sex horis cum duodecim minutis affluit, & totidem horis refluit;

In paucis locis affluit pluribus horis & refluit paucioribus: Et contra, in paucis affluit horis paucioribus & defluit pluribus: ita tamen ut tempus affluxus & defluxus (nempe inter duas maximas intumescencias) simul faciant duodecim horas cum $24\frac{1}{2}$ minutis, & duo talia tempora faciant viginti quatuor horas cum quinquaginta circiter minutis, ($48\frac{1}{2}$) hoc est, fere viginti quinque horas. Atque ideo singulis diebus intumescencia summa integrâ fere hora serius accedit, quoniam Luna inægra ferè hora (50 minuta) tardius ad eundem Meridianum vel verticalem redit singulis diebus.

Satis superque primum Propositionis membrum explicavimus in demonstratione propositionis x i, etsi in ista Demonstratione summam maris altitudinem sumpserimus Lunâ meridianum occupante: in hac vero propositione, quoniam in præcedenti ostendimus plurimis locis eam altitudinem accidere Lunâ extra Meridianum consti-

tuta,

rutâ; non numeramus illis horas à tempore quo Luna Meridianum occupat, sed ab eo tempore, quo Luna verticalem illum occupat, in quo Lunâ existente summam intumescenciam esse, per experientiam constat. In hisce tamen locis periodus incrementi & decrementi non exacte observat illas duodecim horas cum 24 minutis vel viginti quatuor horas cum quinquaginta minutis, quia Luna propter variam & mutabilem à vertice distantiam vel pluribus vel paucioribus horis ad eum verticalem redit, quæ tamen discrepantia magna non est.

Etsi itaque in omnibus locis affluxus & refluxus duodecim horis fere cum 24 minutis absolvatur, (cum nullæ tempestates sunt) in plerisque etiam hoc tempus æqualiter sit divisum inter fluxum & Refluxum, ita ut sex horis affluat, totidemque defluat, tamen in nonnullis locis inæquale est tempus affluxus, tempori defluxus, nempe majus vel minus. Garumnæ (fluvius Galliæ est) alveum Oceanus ingreditur horis septenis, defluit quinis. Sic ad portum Maccou in littore Chinæ affluit aqua horis novem, defluit, tribus, imò paucioribus, si venti Orientales spirent.

Contra ad Zenegæ (fluvii Æthiopix) littorâ affluit mare horis quaternis, defluit octonis.

Causæ harum differentiarum difficiles sunt. Quidam in validum & celerem fluviorum effluxum vel etiam in simplicem effluxum causam referunt. Ideo enim Garumnæ littus septem horis sentire affluxum, quia validus Garumnæ motus retardet influxum, adjuvet autem defluxum, ideo quinis mare defluere. Alii horam illam addi ad affluxum, propterea quod mare resuens à magis boreali loco impediatur, ne libere egrediatur mare è

Garumna, sed potius plus in eum impellatur. Ego verò existimo ideo fieri, quia Garumna valido motu se effundit ex ostio in Oceanum ad aliquam distantiam, hunc effluxum prohiberi ex parte, ab æstu maris, & sic aquam Garumnæ restitäre ali- quantum etiam antequam in mare propter Lunam ipsum alveum ingreditur.

De Zenegæ incremento, quod quatuor tantum horas habet, utrum causa sit ascribenda, extensio- ni alvei ab Occidente in Orientem, an celeri Ze- negæ defluxui, quæ prohibeat influxum duabus horis, an alteri causæ, dubito, & accuratiorem ob- servationem requiro, nimirum utrum verè decre- scat octonis horis, an tantum sex horis, duabus autem reliquis nec accrescat nec decrescat, &c. quia validus fluvii effluxus impediat affluxum.

Illud etiam considerandum, quod loca depressa pluribus horis sentire possint affluxum, pauciori- bus defluxum.

PROPOSITIO XX.

An Lunâ Horizontem attingente incipiat afflu- xus vel incrementum in loco, cujus est Horizon?

Ita dicunt communiter: contrarium tamen di- cendum est in illis locis obtinere, in quibus summa aquæ altitudo est Lunâ meridianum obtinente. Etenim cum Luna declinat ab Æquatore versus Austrum, tunc paucioribus quam sex horis perve- nit ad Meridianum, & ideo debuit affluxus ince- pisse cum adhuc Luna infra Horizontem est de- pressa. Contra cum Luna declinat ab Æquatore versus Septentrionem, plures quam sex horas re- quirir, ut ab Horizonte ad meridianum perve- niat, atque ideo cum jam supra Horizontem ele- vata est Luna in circulum horarium sextæ horæ,

tum

tum demum incipiet affluxus. Atque ita in plurimis locis observatur; sed Londini contrarium, ut diximus Propos. præced. Et ratio videtur postulare, ut etsi Luna declinet ab Æquatore versus Septentrionem, tamen incipiat affluxus in loco, ubi Luna ad Horizontem pervenerit: Abest enim tunc locus per quadrantem ab illo loco, cui Luna verticalis est, atque ideo pressura maris huc pertinet. Observationes accuratiores hic desideramus.

PROPOSITIO XXI.

Data horâ, in qua altitudo summa vel minima aqua est die novilunii, vel plenilunii in loco, ubi ordinarius est fluxus & refluxus (sex nempe horarum cum 12 gr.) determinare horas sequentium dierum, post novilunium quibus altitudo maxima & minima erit.

Diximus in præcedentibus, quod tempus summi incrementi & decrementi (si medius Lunæ motus à Sole spectetur) in uno die postponat minutis horariis $48\frac{3}{4}$, ($48\frac{1}{16}$ accuratius) in dimidio die, minutis $24\frac{3}{8}$.

Si itaque in aliquo loco sit summum incrementum vel maxima intumescencia die novilunii vel plenilunii, horâ diei $x + 1$, erunt sequentibus diebus horæ incrementi hæ:

Ætas Lunæ.	Dici.	
	Horæ.	Scrup.
1	XII.	48
2	1	37
3	2	27
4	3	17
5	4	5
6	4	55
7	5	59
8	6	49
9	7	23
10	8	12
11	8	56
12	9	51
13	10	40
14	11	29
14½	12 med. no.	
15	12 Dici.	

Nimirum in fine primi dici ætatis Lunæ serius
 accidit intumescencia summa, horatiis minutis
 48 $\frac{1}{16}$. Sed in praxi sufficit ad horam novilunii
 pro primi dici fine addere minuta 48 sive $\frac{1}{4}$ horæ:
 pro secundi fine. horas 1 $\frac{1}{2}$
 pro tertii. 2 $\frac{1}{2}$
 pro quarti. 3 $\frac{1}{4}$
 pro quinti. 4
 pro sexti. 5
 pro septimi. 5 $\frac{3}{4}$
 pro octavi. 6 $\frac{1}{4}$
 pro noni. 7 $\frac{3}{4}$
 pro decimi 8 $\frac{1}{4}$
 pro

pro undecimi.	9
pro duodecimi.	$9\frac{1}{4}$
pro decimitertii.	$10\frac{1}{2}$
pro decimiquarti.	$11\frac{1}{2}$
pro decimiquinti.	$12\frac{1}{4}$

Hic calculus vel supputatio temporis medium Lunæ à Sole motum sive æqualem supponit, qui tamen inæqualis est, ita ut in perigæo suo Luna, multo celerius à Sole recedat, quam cum in apogæo est, atque adeo tunc longius protrahitur incrementum summum, quam horis 6 & 12 min, in apogæo autem cum Luna est, citius incrementum habetur. Nam & veri menses Lunares quidam superant 30 dies, alii minores sunt diebus 29, cum medius assumatur dierum 29, hor. 12, 44. minut.

Sed in locis, ubi cum appulsu Lunæ ad certum verticalem sit maxima altitudo vel minima, etsi eodem modo fiat, tamen minus accurate tempus invenitur.

Neque enim ipsum tempus, quo Luna Soli coniungitur, cadit in easdem diei horas vel ejusdem horæ scrupula eadem in diversis noviluniis.

Quomodo per globum Terrestrum id fiat, docebimus capite xxx.

Et capite xxxvii. in usu nautico plura dicemus de accuratiori methodo.

Possumus etiam hac methodo uti pro illis locis, ubi tempus affluxus est majus vel minus, quam tempus defluxus, modo constet de differentia. Consideratio ipsius rei & praxis facilius hæc docebunt, quam sermo noster.

PROPOSITIO XXII.

Venti saepe protrahunt saepe imminuunt in aliquo loco tempus affluxus vel refluxus: nec tantum venti illius loci, sed etiam in alio loco spirantes idem possunt efficere.

Veritas Propositionis adeo clara est, ut nullâ indigeat demonstratione.

PROPOSITIO XXIII.

SPECIALIVM seu priorum motuum maris, quò nempe una aliqua Oceani pars vel perpetuo & continue vel certis mensibus movetur; magna est varietas.

I. *Ex specialibus perpetuis, praeipuum est is motus, quo maris Atlantici seu Africani pars circa Guineam à promontorio viridi movetur versus curvaturam seu sinum Africae, quam vocant Fernando Poo, hoc est ab Occidente in Orientem, qui contrarius est generali motui ab Oriente in Occidentem. Est autem vehemens motus, ita ut naves littoribus appropinquantibus violente deferat ad illum sinum præter nautarum opinionem & supputationem itineris. Inde fit ut naves, quæ duobus diebus à littore Mourræ delatæ sunt ad Rio de Benin (100 milliaria sunt) vix sex vel septem hebdomadibus interdum à Rio de Benin ad Mourre possint reverti, nisi in altum pelagus se conferant, quod tamen non facile est, cum mare valido motu moveatur ad plagam Euroboræ ab S. Thomæ insula ad sinum illum Fernand. Poo, trahens secum naves secundo quamvis vento Euroborea utentes. Atque vix à littore illo abire possunt, nisi repentinis illis & crebris ecne-*
phiis

philiis (Travados) expellantur, qui interdum per aliquot menses minus frequentes vel nulli sunt. Multas naves perdidit hic maris istius motus, antequam nautis satis cognitus esset: quippe vel naufragio perierunt delatae in latentes littoris scopulos praeter opinionem suam, vel nautae siti & inedia confecti sunt, cum in sinu isto detinerentur.

Verum non inest hic motus toti Oceano Aethiopico, sed tantum parti illi, quae adjacet littori Guineae usque ad sinum illum, nempe non ultra quatuordecim milliarium distantiam à littore in mari deprehenditur, ad unius gradus ab Aequatore distantiam. Itaque nautae littora illa praeternavigantes diligenter cavent, ne propius accedant ad illa, ut ita reliquam navigationem pro suo arbitrio & constituti loci situ possint dirigere.

Causam hujus littoralis motus invenire haud facile est, praesertim cum vicinus Oceanus moveatur contraria via ab Oriente in Occidentem. Duo dici possunt:

1. Oceanum ab Americae littore repulsum remeare aliquantum versus Orientem, & quoniam Oceanus Aethiopicus ad sinum Fernandi Poo lato tractu extenditur, ideo in hunc remeare, sed tantum ad littora deprehendi, non in alto pelago propterea quod in hoc motus contrarius eum deleat & insensilem reddat: versus littora autem mare moveatur violente. Et ideo praecipue in sinu illo Fernandi Poo animadvertitur, quia à littoribus reliquae Africae, (ut Congo) repellitur mare propter effluentes magno impetu fluvios.

2. In sinu isto Fernandi Poo subterraneum, quendam alveum esse, in quem mare illabatur & reliquum Oceanum trahat. Sed hoc minus fortassis

tassus verisimile videbitur. Inveniat meliora, qui potest, & cui otium Deus concessit.

PROPOSITIO XXIV.

Secundus specialis perpetuus motus.

Circa Sumatram mare fluit ab Austro versus Septentrionem in sinum Bengalem, & quidem valido motu, ut verisimile sit vi maris hunc sinum factum esse atque Malaccensem Chersonesum ab India separatum. Utrum causa sit, quod à tam multis insulis & promontorio Terræ Magellanicæ Oceanus, qui ad Occidentem tendit, repellatur ut ita versus Septentrionem violente fluctuansque deferatur, an vero subterraneus alveus sit in illo sinu, dubito.

Puto tamen non directe ad ipsum Septentrionem sed ad plagam collateralem, quæ versus Occidentem declinet, fieri. Imo idem hic motus deprehenditur inter Javam & Terram Magellanicam, itaque Belgæ in Indiam navigantes dirigunt cursum ad procurrentem illam partem Terræ Magellanicæ vel Australis, & dein navigant ab Austro versus Septentrionem nempe ad Javam.

PROPOSITIO XXV.

3. *Tertium specialem perpetuum motum facio eum, qui inter insulam Madagascar & Promontorium Bonæ spei observatur, imprimis in littore Africæ inter Terram de Natal & hoc promontorium Bonæ spei. Hic motus deprehenditur ab Euroboræ plaga ad Zephyro Austrum (& à Borea ad Austrum, pro littorum extensione) tam incitatus & vehemens, ut naves vix valido vento illum superare & contrariam viam ad Madagascar tenere possint. Contra, qui à Canali inter Madagascar &*

Africanam

Africam versus promontorium Bonæ Spei navigant, sine ventorum ope, solo maris motu deficiunt ad illud: causam esse puto, quod Oceanus generali motu delatus ad Africæ littora & à directo itinere prohibitus tendat versus promontorium Bonæ Spei, ubi transitum invenit. Etenim in medio Oceano vel à littoribus remoto interdum & Africam non deprehenditur hic motus collaterali plaga, sed Oceanus ab Oriente in Occidentem movetur.

PROPOSITIO XXVI.

4. *Quartus specialis perpetuus est*, in mari Pacifico ad littora Peruviana & reliquæ Americæ, ubi mare movetur ab Austro ad Boream. Causa est sine dubio ventus perpetuus Australis, qui ad illa littora dominari deprehenditur, ut capite de Ventis diximus. In mari à littoribus remoto non deprehenditur hic motus, sicut nec ventus iste.

PROPOSITIO XXVII.

5. *Quintus specialis perpetuus motus*, observatur in mari ad littora Americæ, à promontorio S. Augustini, Brasiliæ ad insulas Antillas Mexicanæ versus Floridam, hoc est ab Austro ad Septentrionem. Causa fortassis est, quod Oceanus delatus generali motu ad Brasiliam, repellitur, & quia versus Septentrionem latior & liberior via datur, istuc fertur. Similis motus versus Boream observatur in ostio freti Maniliensis ad Philippinas. Ita in Japone à portu Xibuxia versus Arimam motus incitatissimus.

PROPOSITIO XXVIII.

6. *Sextus specialis perpetuus motus*, in freto le Maire, ubi nautæ classis Nassoviæ deprehenderunt mare ferri ab Occidente in Orientem. Sed una observatio non sufficit, præsertim cum le Maire contrarium scribat.

Plures speciales motus reperiuntur in Oceani partibus ad littora, sed nondum satis accurate observati & descripti sunt.

PROPOSITIO XXIX.

Ad speciales perpetuos motus partium Oceani pertinent illi etiam, quos efficiunt fluvii ingentes, ubi in mare se exonerant.

Sic ad littora Africæ, Lovvango, Congi decem & duodecim miliaribus à littore validus est motus maris à littoribus versus Occidentem, quia plurimi fluvii, inter quos maximus est Zaire, cum impetu in mare se projiciunt & ita mare repellunt, qui motus à generali motu juvatur. Ideo aliquot dies requiruntur ut naves illa littora possint attingere, etsi tantum uno vel altero milliari ab eo distent.

Sic ad insulam Lamon littori Chinæ adjacentem mare movetur à littore versus Eurum, contra generalem motum, qui est ab Euro versus Chinam. Hunc contrarium motum efficit impetuosus effluxus fluvii magni Chinenfis Thoucoan: sed in mari remotiori à China omnino deletur hic motus à generali motu: neque enim ultra insulam Branco sentitur.

Hactenus de motibus specialibus perpetuis: pauca de specialibus statis & anniversariis subjungenda sunt.

PROPOSITIO XXX.

Specialium motuum maris cessantium seu periorum maxima est varietas; & motus illi periorum sive statii & anniversarii omnes ferè ab anniversariis & statis ventis oriuntur. Et statii ventius loci possunt motum maris statum efficere in loco.

Ita ad Javam in freto Calappa cum motio est zephyrina, nempe mense Majo, fluit mare versus orientem contra generalem motum.

Sic inter insulam Celebes & Maduram, cum motio est Zephyrina, nempe in Decembri, Februario, Januario (ventus Zephyroboreas vel collateralis Zephyri vicinior plerunque tunc spirat ibi) mare fluit ad Euroaustrum, vel Euri collateralem ciniozem.

Ad insulam Ceilanum à medio Martio ad Octobrem fluit mare versus Austrum, reliquis mensibus versus Boream, nempe quia illis mensibus sequentes sunt venti boreales, in hisce australes.

Inter Cocinum & Malaccam, cum motione Zephyrina ab Aprili ad Augustum, fluit mare ad Malaccam contra motum generalem versus Orientem: deinde reliquo tempore versus Occidentem adjuvantibus ventis generalem motum. Mare hic movetur tanto strepitu, ut inexperti putent scotos adesse, ad quos aqua allidat.

Sic aliquot mensibus post xv Februarii mare movetur à Maldivis insulis versus Orientem & adiam contra generalem motum.

Ad littora Chinæ & Cambojæ mensibus Octobri, Novembri & Decembri movetur mare versus zephyroboream, sed cum Januario versus Zephyroaustrum incitato admodum fluxu versus pulvinos

nos de champa, ut lapidis jacti celeritatem superare videatur.

Ad Pulo Cato usque ad Varella (in littore Cambojæ jacent) cum non fiant motiones, celer maris motus fit versus Austrum, sed motiones in aliam plagam movent.

In littore sinus Bengalensis, à Patana, ad Malaccæ promontorium, mense Novembri & Decembri incitatus cursus maris observatur versus Austrum.

In motione à China ad Malaccam, mense Junio, Julio, Augusto, vehemens maris motus à Pulo Cato ad Pulo Cambir in littore Cambojæ.

Plura exempla, sed minus accurate signata, leguntur in diariis nautarum.

Ad littus Aguada de san bras non procul à promontorio Bonæ spei observatur hoc peculiare quod mare semper ab Oriente in Occidentem versus terram movetur eò vehementius, quo ventus Occidentalis ei nempe oppositus fuerit vehementior. Causa proculdubio aliud vicinum littus altius illo.

PROPOSITIO XXXI.

Motus maris circulares, quos vortices appellamus, & gurgites triplices sunt. Quidam enim tantum aquam in gyrum circumagunt, quidam absorbent horis & certis refundunt & exspuunt, quidam absorbent, sed non exspuunt. Est vero quarta etiam species sine dubio in alveo maris detur, quæ nempe exspuat, non vero absorbet aquas, tamen eam in mari deprehensam esse non memini me legisse apud ullum autorem: si in Terris plurimæ reperiuntur. Nautæ vocant hæc vortices & gurgites *Maelfroom*. Latini etiam Euripum.

Neg

Neque est magnus illorum numerus: saltem
orum, qui annotati sunt, pauci.

Chalcidicus Euripus seu vortex celebris est pro-
pe Græciam, inprimis propter fabellam de Aristot-
elis morte & obitu. Recipit aquam certis horis
& aliis exspuit. Scaliger ita conatur explicare:
subjectarum cautium recessibus receptas aquas
effundi, non pessime dicemus. Nam perpetuo de-
luxu scrupeos impleri sinus, quorum claviculata
conceptacula, sicut fit in fluviorum gurgitibus,
humorem collectum evomant: quorum capacitas
anta sit, ut tot horis sufficere possit motum eum,
qui partim defluxionem tardet ac retrudat, par-
tim juvet, posteaquam satura fuerint illa cava.
Etiologiam hanc Scaligeri non esse sufficientem
nemo non videt.

Vortex & Euripus ad Norvvegiam omnium cele-
errimus & maximus. Etenim tredecim milliaria
abere scribitur in circuitu; medium petra occu-
pat, quam adjacentis terræ populi vocent Mouf-
t. Vorago hæc sex horis absorbet omnia, quæ illi
propinquant vel vicina sunt, aquam, balænas,
aves onerarias & alias res, totidemque horis o-
mnia illa eructat & evomit, magna cum violentia,
repitu & circumgyratione aquæ. Causa latet.

Inter Normanniam Gallix & Angliam vorago
est, ad quam feruntur naves mirabili celeritate,
sed jam vicinæ gurgiti repelluntur.

PROPOSITIO XXXII.

*Motus maris, quem Concussionem vel tremorem,
vocavimus, provenit à spiritu qui vel Terram vel
sam aquam agitat vel ebullire facit.*

Sic ad littus Bascum, quod haud procul Bajo-
a Britannicum mare summovet, locus est quem
inco-

incolæ vocant Capberton. Ibi aliquando mare sine ullis ventis adeo turgescit, ut jamjam litus ipsum obrutum iri videatur: deinde mox subsidet. Similis intumescencia in lacu Scotiæ dicto Loumondprehenditur à spiritu subterraneo.

Tremorem aquæ anno 1523 circiter in mari Canbajensi experti sunt Lusitani: In summa enim malacia (ut ait Maffeus) silentibus ventis, repente ab imo fluctus intumuit: inde naves inter se nutare, crepitare compages, tabulata concuti cœpta. Nautæ subito pavore isti, cum in Syrtes illaram haud dubie classem crederent, in summa perturbatione rerum omnium, alii bolidem demittere, alii sentinam exhaustire, sapientiores de fuga circumspicere & doliola arripere, quibus enarent: sed mox compertum, eum esse Terræ motum, quem navigantes quoque sentire non est dubium.

PROPOSITIO XXXIII.

Cur Mare Pacificum magis tranquillum & sine profundis fluctibus existit, & cur vento facile turbatur. (Belgæ dicunt, Zee is haest ontstelt.)

Causa sine dubio est, quia motus ejus versus Occidentem non impeditur ab objectis littoribus, sicut Atlanticum.

CAPUT XVI.

De Lacubus, Stagnis & Paludibus.

PROPOSITIO I.

Definitiones.

I Acus dicitur copia aquæ in aliqua Mediterranea loci cavitate insignis amplitudinis & tra-

Lacus existens, undique terris cinctus & mediocrem ad minimum profunditatem obrinens. In specie verò, Lacus dicitur is tantum, qui fluvios recipit & emittit.

Stagnum dicitur lacus parvus, qui nec recipit nec emittit fluvios. Geographi & Literatores non omnino eodem modo hæc definiunt: sed res non magni est momenti, quia de vocabulis lis est: nos eo, quo proposuimus, modo commode & apte definiri existimamus.

Palus dicitur aqua in Mediterraneo loco existens, hinc inde extantes & eminentes terras habens vel etiam terræ immixta.

PROPOSITIO II.

Lacus sunt quadruplices. 1. Quidam neque emittunt neque recipiunt fluvios, quales lacus si parvi sint, appellantur stagna, ut diximus, si magni & vasti, retinent plerunque lacus appellationem. 2. Quidam emittunt fluvios, non verò recipiunt. 3. Alii recipiunt fluvios, non emittunt. 4. Reliqui & recipiunt & emittunt fluvios: Et quidam ex hisce majores emittunt, quam accipiunt, quidam æquales, quidam minores. Item, quidam emittunt fluvium in eadem ferè linea cum eo, quem acceperunt, alii in alia linea sive ad aliam plagam. Item, quidam plures recipiunt, quam emittunt, quidam pauciores, quidam æquales.

PROPOSITIO III.

Eorum lacuum, qui neque emittunt neque recipiunt fluvios, generationem & conservationem exponere.

Sunt illi lacus vel Magni vel Mediocres vel Par-

vi. Mediocrium & parvorum quidam perpetuo permanent, quidam æstate & ubi diu non pluit, exsiccantur, dicunturque utraque stagna. Horum itaque, qui exsiccantur, generatio facilis est explicatu, nempe copia pluviarum & cavitas seu depressio loci, in quo talia stagna sunt. Etenim si locus aliquis situs sit in medio elevatorum locorum, defluit in eum omnis aqua pluvia, atque ita stagnum efficit.

Ita in India visuntur plurima stagna industriâ incolarum facta, quorum quædam milliare unum, interdum & duo, ambitu capiuntur, lapideo muro cincta, quæ pluviis mensibus implentur, ut æstivis mensibus sufficiant eis, qui longius ab amnibus aut fontibus degunt.

Simili modo parvi lacus & stagna fiunt ab exundationibus maris & fluviorum.

Sic Nilus & Niger fluvius, ille in Ægypto, hic in Libya & Nigritarum regione exundans, ubi jam recesserunt, multa stagna post se relinquunt, quæ ipsi incolæ etiam vel muniunt vel faciunt, ut inde aquam petant reliquis anni mensibus. Eadem ratione in Moscovia, Finlandia, Lyflandia tempore veris, æstatis, & autumnus multi sunt lacus; partim propter imbres, partim propter nivium & glaciei resolutionem.

Cæterùm etsi lacus quidam exsiccentur æstate & post diurnam pluviarum cessationem, inde tamen non licet firmiter concludere, quod omnem suam aquam à pluviis habuerint. Etenim exsiccare possunt, etsi suas scaturigines habeant in fundo, nimirum cum hæ scaturigines adeo parum largiuntur, ut ab æstu solis in halitum vertatur & dissipetur.

Quod verò ad illos lacus sine fluviis attinet, qui
non

non exsiccantur, potest quidem eorum generatio etiam ad pluvias referri, nempe si profundum alveum habeant, in quo tanta aquæ copia à pluviis collecta asservetur, ut calore Solis non queat tota absumi, antequam alia pluvia cadat: sed magis verisimile est, hosce lacus in fundo habere peculiare scaturigines, à quibus tantum aquæ illis accedat, quantum per exhalationem absumitur: atque hæc causa sola locum habet in illis stagnis, quæ in montium fastigiis reperiuntur, ut in Bructero, in Cenisio (quod stagnum truttas fert) & aliis. Quosdam etiam ex hisce per exundationem aquarum magnam olim generatos esse & deinde à pluviis conservari, probabile est: imò de illis lacubus, qui mari vicini sunt & simul falsi, non est dubitandum quin vel per exundationem vel immissionem maris per aliquam viam extiterint, ut lacus Harlemensis, & plures in Hollandia, in Peru quoque falsi lacus sunt.

Neque est magnus horum lacuum sine fluviis numerus. Parvi aliquot reperiuntur in Moscovia & Finlandia, Lychnitis, stagnum in Macedonia, Apollonia lacus in Mysia, in Carniola unus, qui dicitur *Zrinzee*, unus rotundus in China, alius (Hilam) in Cauchinchina, in Zanhaga Africa provincia unus: Ad urbem Mexico in America unus, longitudine duodecim Leucarum & alius non procul inde. Hi omnes parvi sunt, excepto illo qui in China, namque hic mediocris.

Magnus autem lacus ex hoc genere unus tantum est in tota Tellure, qui cum omnibus lacubus magnitudine certat, imò omnes superat, nempe Parima lacus in America, jacens sub ipso Equatore. Habet enim in longitudine ab Oriente in Occidentem trecenta circiter milliaria, in latitudine

dine centum circiter , ubi ea maxima : neque tamen ullum fluvium recipit vel emittit. Is quomodo primum extiterit , non immerito dubitatur , utrum per inundationem Oceani olim factam , an subterraneis fontibus & scaturiginibus ? Item , utrum à pluviis conservetur , an ab eisdem fontibus ? Mihi verisimile videtur , haberi in fundo scaturigines , quæ tantum suppeditent , quantum calor solis auferat. Eadem enim causa est lacuum , quæ fluviorum , sed differentia est in loco fontis & aquæ copia scaturientis. Si enim fontis locus habeat insignem cavitatem & tractum terræ , copia verò scaturiens parva sit , non effluit aqua , sed tantum per halitus dissipatur quantum scaturit. Itaque fons , lacus & fluvius differunt circumstantiis tantum non reipsa. Sicut multi fontes repertiuntur , qui non effundunt aquam , hi rectius putei dicuntur.

PROPOSITIO IV.

Eorum lacuum , qui emittunt fluvios , neque ullos recipiunt , generationem & conservationem exponere.

Infinitus horum lacuum est numerus , cum plurimi fluvii ex lacubus tanquam cisternis , profluant , inprimis illi , qui in Moscovia , Finlandia , Lapponia oriuntur , nimirum ubi cavitas in loco fontis aliqua quidem est , sed non tanta ut copiam scaturientis aquæ continere possit , sit quidem lacus , sed dein accedit fluvius elabente nimirum aqua ad vicina loca. Neque enim dubitare possumus , quin hi lacus suam generationem & conservationem habeant à fontibus in fundo existentibus , sive verus sit fons , sive apparens , nempe aquâ ab alio loco per subterraneum ductum istuc fluente ,
quod

quod posterius de quibusdam lacubus, qui magnos fluvios protinus emittunt, verisimile magis apparet. Minorum talium lacuum ingens est, ut dixi, numerus, ut Volga, ex quo prima Volgæ fluvii origo, Odojum, ex quo Tanais, Adac, ex quo unus ramus Tigris fluvii. Osera in Moscovia, ex quo Sosnam fluvius, qui in Volga exoneratur, & plurimi alii parvi; nos hic majores & magis insignestantum enumerabimus.

1. Insignis est lacus Chiamy sub latitudine 31 gr. non procul ab India jacens à Gange versus ortum. Ex eo lacu quatuor effunduntur fluvii eximii magnitudine, fertilitate & inundatione in regna Siam, Pegu &c. nempe fluvii Menam, Axa, Cosmum, Martavam. Sed quædam mappæ habent fluvium, qui in lacum hunc labitur, exiguum.

2. Lacus Cincuyhay in finibus Chinæ oblongus, mittit magnum fluvium versus Septentrionem, qui cum alio junctus intrat Chinam.

3. Lacus Titicaca in Chareas provincia Americæ Australis, habet octoginta leucas in ambitu, emittit magnum fluvium, qui in parvum lacum terminatur, neque ultra videtur. Multi circa eum lacum pagi & urbes conspiciuntur.

4. In Nicaragua provincia Americæ lacus est ejusdem nominis, Nicaragua, qui tantum quatuor milliaribus abest à mari Australi seu Pacifico, & centum milliaribus ab Atlantico, in quod effunditur magno alveo.

5. Iroquois Lacus in Canada, ex quo fluvius S. Laurentii.

6. Annibi lacus in Asia sub latitudine 61 gr.

PROPOSITIO V.

Lacuum eorum, qui recipiunt fluvios, sed non emittunt, generationem & conservationem explicare.

Hosce lacus ab eis fluviiis generatos esse & conservari, quos recipiunt, sive qui in eos influunt, manifestum est. Etenim cum fluvii à fonte suo progressi perveniunt in itinere ad insignem aliquam & amplam cavitatem, colligitur in hac & efficit lacum.

Quod si forte hic fundi terra sit porosa, imbibit aquam & ad vicinam terram transmittit, vel, quod frequentius esse existimo, si subterraneus forte sit ductus, vel ab aqua ipsa talis fiat, per hunc avehetur aquæ affluentis portio, ita ut lacus non exundet.

Horum lacuum exiguus est numerus in Tellure.

1. In præcedenti propositione diximus, quod lacus Nicaraguam emittat fluvium, qui in lacum parvum desinat. Hic itaque lacus erit unus hujus classis, nempe eorum qui recipiunt, & non emittunt.

2. Lacus Asphaltites, qui etiam mare mortuum dicitur in Palæstina, recipit Jordanem fluvium, sed nullum emittit. Longitudo ejus à Septentrione in Austrum septuaginta milliarium, latitudo quinque, ut quidam ponunt.

3. Vnus in Asia minori est parvus.

4. In Macedonia parvus, qui dicitur Janna, exiguos rivos accipit.

5. Lacus Genevensis.

6. In Persia prope Calgistan.

7. Soran lacus in Moscovia, accipit duos parvos rivos.

8. Flu-

8. Fluvium Ghir Africæ ortum in Atlante desinere in lacum, tradit Leo Africanus, & ita quædam mappæ repræsentant eum : sed aliæ in Nubiam fluvium deducunt.

PROPOSITIO VI.

Eorum lacuum, qui recipiunt & emittunt fluvios, generationem explicare.

Triplex illorum est differentia, ut Propos. Secunda dictum est. Velenim majorem copiam aquæ emittunt, quam recipiunt, vel æqualem, vel minorem. Si itaque majorem emittant, manifestum est, quod in fundo occultas scaturigines ille lacus habeat. Si minorem, occultos in fundo aquæ ductus vel terram spongiosam esse indicio erit. Si æqualem, colligimus quod neque occultæ aquæ ductus neque occultæ scaturigines in fundo sint. Generationis itaque causa est partim eadem quam Propos. IV. diximus, nimirum cavitas & depressio loci atque aquæ affluentis copia, quibus occultæ scaturigines accedunt, & juvant imbres copiosi.

Qui ex solo unius fluvii in cavitatem aliquam influxu generati sunt, illi in medio tractu fluviorum siti sunt & directè fluvios reddunt, estque illorum magnus numerus. Sic Niger quatuor lacus in itinere facit vel tres, si unum à latere positum excludas. Nilus plurimos lacus in itinere facit, quos mappæ non exhibent. Duina fluvius ad minimum sex vel septem transit. Atque alios fluvios in Moscovia, Finlandiaque videbis in Mapis magnis sedecim lacus efficere, antequam ad ostium perveniant. Sed illos præstat considerare, qui alios producant fluvios, quàm acceperunt.

Celebriores autem & magnitudine insignes sunt hi.

K 4

1. Zaire

1. Zaire lacus Africæ procurrentis, jacens inter decimum tertium & inter sextum gradum latitudinis Australis, adeoque in longitudine habet centum & quinque milliaria. In medio ejus jacet insula (præter alias parvas) ejus magnitudinis, ut triginta hominum millia in bellum cogant incolæ. Hæc insula quasi bifecat lacum, ita ut una pars habeatur pro peculiari lacu, & appelletur Zembre. Ex hoc lacu fluunt tres ingentes fluvii, Nilus, Cuama & Zaire. Influunt autem in eum quidam parvi rivi, qui soli non videntur ejus magnitudini sufficere, ita ut verisimile sit, eum Scaturigines in fundo habere, etsi ipsa inundatio fluviorum sit ascribenda imbris in mensibus pluviis.

2. Zassan lacus non procul à Zaire inter decimum & sextum latitudinis australis gradum, adeoque sexaginta circiter milliaria in longitudine habens, mittit ramum in Nilum, accipit parvos fluvios.

3. Lacus Sachaf non procul à Zaire versus promontorium Bonæ spei. Emittit rivum, qui aliis auctus aquis facit deinde Fluvium Spiritus Sancti. Accipit exiguos fluvios.

4. Aquilunda lacus, accipit ramum ex Zaire lacu, & effundit multos fluvios in regnum Congo.

5. Onega lacus in Finlandia inter sexagesimum & sexagesimum tertium latitudinis gradum situs longitudine habet quadraginta quinque milliaria, latus triginta, ubi maxima est latitudo. Accipit multos parvos & mediocres fluvios ex aliis lacubus parvis prodeuntes, & emittit mediocrem fluvium Sueri in lacum Lodoga.

6. Lacus Lodoga, longus triginta, latus quindecim milliaria, accipit fluvium Sueri ex Onega lacu

lacu & ab aliis locis plures minores, mediocrem ex lacu Ilmen Moscoviæ insigni. Emitterit fluvium in sinum Finnicum.

7. Lacus Osera accipit Koufam fluvium & alios, emitterit Sosnam, qui in Volgam exit.

8. Enarack lacus vel palus in Lapponia, longus quadraginta milliaribus, latus quindecim. Accipit fluvium Avilam & alios minores: emitterit fluvium Paes in Lappicum mare.

9. Vla lacus in Moscovia, longus triginta, latus quindecim milliaribus. Habet in medio insulam ut Zaire lacus. Accipit fluvium, qui per decem lacus transit, & emitterit insignem fluvium. Sunt alii non pauci in Moscovia & Finlandia & Norrvegia.

10. In China quatuor insignes sunt lacus, qui fluvios accipiunt & varias in partes rursus distribuunt.

11. In Brasilia eodem modo ut China, sunt lacus Eupana & lacus Puerto de los Reyes, in quo coeunt & permeant fluvii, argenteus & Omaranna.

PROPOSITIO VII.

Lacus plurimi dulcem aquam continent, pauci salsam seu marinam.

Etenim qui vel à pluviis vel à fluviiis extiterunt, ut etiam qui scaturigines suas proprias habent à mari remotiores, illi plerique dulcem præbent causam: sed qui velex inundatione maris vel immissione maris per certum ductum originem habent, illi salsi sunt, ut etiam quidam qui fontes salsæ aquæ in fundo habent. Ita lacus Harlemensis & alii in Hollandia salsi sunt, vel marinam aquam gerunt: reperitur etiam salsus in insula Madaga-

scar, in Peru, in Cuba, qui duas leucas in circuitu habet, non procul à mari situs, & licet aliquot dulcis aquæ fluvios recipiat, & pisces atque testudines alat, tamen salus est. Ita lacus asphaltites etsi Jordanis dulcem aquam hauriat, tamen dulcis non est, sed emittit adeo fatidum & virulentum vaporem, ut ager circumjacens ad dimidium milliæ sit sterilis.

PROPOSITIO VIII.

Virum mare Caspium sit lacus an sinus Oceani?

Sunt qui mare illud esse velint proprie dictum. Mare autem proprie dictum nullum est, nisi Oceani pars sit, hoc est, Oceano manifesto tractu adhæreat. Sed illi per subterraneum ductum conjungi cum Oceano volunt. Veteres sanè aperto tractu illud cum Indico Oceano, alii cum Septentrionali conjungi scripserunt, sed utrosque deceptos fuisse, experientia satis superque testatur. De subterraneo ductu incerta res est. Videtur autem ex eo probari, quod tot fluvios & quidem multitudinem aquarum insignes recipiat, quam aquæ copiam non possêt alveus continere, nisi subterraneis cavernis & meatibus in Oceanum eam exoneraret. Sed alii aliter illam copiam aquæ absumi existimant, nimirum non in Oceanum eam penetrare, sed in vicinos montes, quorum magnus est numerus, & omnes ferè fontes emittunt. Scaliger quidem asseverat cum aliis, Caspium hoc mare subterraneo meatu in pontum Euxinum deferri, sed nullum indicium ejus affert. Id tamen indicio esse potest, quod Pontus Euxinus perpetuo emittit aquas per Bosphorum magnâ copiâ, quantam copiam à fluviis non accipere quidam putant, sed per subterraneum ductum à mari Caspio. Mihi

non

non videtur, quod cum mari conjunctionem habeat, & ideo lacum esse, & ita potius appellandum, quam mare, existimo. Vnde autem primo generatus sit, major est difficultas. Sunt qui multos montes falsos in ejus fundo reperiri testantur, & inde falsedinem ejus esse, aquam verò à multitudine fluviorum, qui in lacum hunc seu mare se exponant, esse autumant. Sed etsi hæ aquæ ad conservationem ejus faciant, magis tamen verisimile esse existimo, hoc mare abhinc aliquot annorum myriadibus olim fuisse cum ipso Oceano conjunctum, & varias ob causas fretum fuisse obstructum vel terras intercedentes progressu temporis generatas fuisse, ut Cap. docebimus. Neque dubium est, quin pontus Euxinus aliquando propter hanc causam futurus sit lacus, obstructo Bosphoro.

C A P V T IX.

In dato loco lacum efficere, si fieri possit.

Fieri id poterit, si in vicinia sit fluvius, vel in ipso loco fons reperiatur, & locus sit aliquantum depressior, quam vicina loca, etsi in fastigiis quoque montium lacus parvi fieri possint. Excavandus itaque erit locus & terra effodienda, ad tantam profunditatem & amplitudinem, quantam cupimus, atque latera seu littus aggeribus si opus videatur, muniendum. Tunc facto ductu ex alveo fluvii aqua immittenda, vel si fons in loco illo existens sufficientem aquæ copiam præbeat, non opus est illo ductu.

PROPOSITIO X.

Lacum exsiccare sive tollere.

Duplici id fieri poterit modo. Primò, si fundus illius lacus sit altior, vel æqualis etiam fere de-

pressionis quam vicina loca, facto alveo vel aquæ ductu, effluet aqua ex lacu, & tandem siccum fundum præbebit, adjuvante calore solis & injectis terræ cumulis.

2. Si fundus illius lacus sit humilior, quam vicina loca, muniendus erit primo aggere in toto circuitu, relictis tantum quibusdam canalibus seu aperturis. Tunc adhibitis moletrinis aquariis aqua expellenda & educenda erit, & deinde fundus terræ tegendus & fimo, atque talia semina injicienda, quæ celeriter radices agant, ut semen sinapi, brassicæ. Hoc modo Belgæ optime callent lacus exhaurire & sæcundos fundos agrosque ex illis efficere. Et hoc quo scribimus, tempore, de Lacu Harlemensi exsiccando consultatio instituta fuit aliquoties, quod aliquando susceptum iri non dubito, quandoquidem & multas terras abradit ille lacus, & magnum ex illo exsiccato redundaret in multos lucrum.

PROPOSITIO XI.

Paludes duplices sunt. Quædam uliginosa & mixta quasi substantiâ ex aqua & terrâ constant, ita ut vestigia hominum non ferat vel sustineat, aliæ parva stagna vel aquarum collectiones habent, hinc inde parvis terris sicca extantibus portionibus.

Prioris generis quæ sunt, illæ nullos fluvios recipiunt vel emittunt, Germani inferiores vocant Moerland, quales paludes in Hollandia, in Brabantia (ubi de Peel) in Vestphalia plurimæ reperiuntur, quibus tamen quædam secundæ classis admixtæ sunt. Sed hujus secundæ classis plurimæ reperiuntur ad origines seu fontes fluviorum, unde quidam fontes hosce solent appellare paludes, ut Tanais paludes in Moscovia, Nili. Tales paludes

des etiam videntur esse in provincia Finlandiæ Savolax magno terræ tractu, item paludes Enarack: Chelonides paludes Africæ, paludes Chaldaicæ, per quas transit Euphrates. Reperiuntur quoque hæ paludes frequenter in sylvis & desertis ericosis, quoniam pluvia illas terras irrigans & in cavitatibus hinc inde collecta non attollitur à Sole, quoniam folia arborum & erica arcent ejus radios tales. paludes fruticosæ hinc inde in Germania & Moscovia conspiciuntur.

Porro paludes hæ secundæ classis eodem modo, quo lacus, sunt quadruplices, quædam & recipiunt & emittunt fluvium, quædam tantum recipiunt, quædam tantum emittunt, reliquæ neq; recipiunt neque emittunt. Prioris generis partim ex fontibus ibi occultis & effusâ aquâ antequam per certum alveum deduceretur, & quando major aquæ copia, quam ut per alveum possit educi, generatæ sunt & conservantur, quales multæ in Moscovia & Finlandia, ultimæ speciei, paludes à pluviis vel exigua scaturigine nasci & conservari verisimile est.

Paludem Mæotin Aristoteles vocat lacum, & quidem rectius.

PROPOSITIO XII.

Paludes habent terram sulphuream, bituminosam & pinguem.

Id tum ex nigro colore tum ex cespitibus qui ex ea generantur & igne facile concipiunt, ut in Hollandia aliisq; locis probatur. Causa est, quoniam tales substantiæ & in pluvia & in terra, ubi paludes illæ existunt, continentur. Non tamen omnes paludes tales sunt: sed ubi terra est petrosa & non mollis, ibi paludes non existunt. Vbi autem mol-

lis terra, ibi sulphuream & pinguem substantiam contineri certum est.

PROPOSITIO XIII.

Paludes exsiccare.

Etsi quædam paludes ingentem habeant profunditatem, tamen non plus requiritur, quam ut ad aliquam profunditatem exsiccetur. Quod efficere possumus. 1. Si per aliquem ductum defluere faciamus aquam. 2. Si ubi aliquot hebdomadibus calore Solis aliquantum exsiccata sunt, inspergamus magnam terræ siccæ copiam. 3. Si ignem super illas accendamus. 4. Si allabentem ad illam aquam arceamus, ut pluvias, &c.

CAPUT XVI.

De Fluviiis in genere.

PROPOSITIO I.

Complectemur hac Propositione definitiones ad hanc doctrinam necessarias.

1. *Fluvius* dicitur aqua à certo Terræ loco fluens versus alium locum oblongâ viâ & intra alveum. *Alveus* aquæ in Tellure dicitur cavitas illa in qua aqua continetur, quæ magis depressa est quam aquæ illius litus.

2. *Rivus* dicitur fluvius, qui non habet eam latitudinem, eamque profunditatem ut navigia parva onerata admittere possit. *Amnis*, qui navigia illa admittit. Si verò mediocria navigia vel etiam magna onerata in eo vehi possint, dicitur generis vocabulo, Fluvius & Flumen. Est autem hæc differentia tantum secundum magis & minus. *Torrentis* dicitur aqua ex montanis locis cum impetu fluens.

3. *Confluens* dicitur locus, ubi duo fluvii conflunt; Ipse quoque confluentus ita appellatur, inde Germanicum Coblentz.

4. *Brachium* fluvii dicitur fluvius vel rivus, qui ex alio fluvio & alveo fluit. Plerumque tamen sumitur pro tali brachio, quod minus sit alterâ fluvii parte, quæ relinquitur: sed frequenter tamen brachia etiam dicuntur, quæ à fluvio in duos alveos divaricato existunt. Vocetur autem locus *divaricatio*, vel bivium; magis aptum esset vocabulum, *Sesfluens*, sed non est usitatum.

5. *Fons* dicitur aqua ex certo terræ loco scaturiens & profluens. *Puteus* verò dicitur, si scaturiat quidem, sed non profluat, verum colligatur.

PROPOSITIO II.

Torrentes & rivi interdum existere possunt à copiosa pluvia & resoluta nive.

Et enim in partibus Terræ montanis vel paulo elevationioribus reperiuntur multæ cavitates, parvi lacus, stagna. Si in hæc affluat à pluvia vel à nive tanta aquæ copia, ut eam continere non possint, effluit & in depressiora loca defluit, & quia singulis annis sæpe hoc fit, alveum sibi facit: sed interdum torrentes sine certo alveo defluunt. Ex hac causa, pluviis nempe & nivium resolutione in montanis locis, existunt plurimi rivi, torrentes, imò etiam mediocres amnes in illis locis, quæ jugum montium longo tractu habent, ut procurrens Africa, India, Peruviana regio, Sumatra, &c. Et hi rivi nec æstate nec nocte, sed tantum die fluunt,

PROPOSITIO III.

Pleriq; rivi oriuntur è fontibus. Fluvii autem insigni & mediocri magnitudine existunt, vel ex mul-

torum

torum rivorum & amnium congressu & compositione sive confluentia, vel profluunt ex lacubus & paludibus. Nullus autem fluvius alicujus magnitudinis (ut Albis, Rhenus, &c.) profluit ex uno fonte, sed ex coeuntibus multis parvis existunt, vel ex lacubus: sed & hi ex lacubus orti augentur aliorum accessione. VVolga seu Rha fluvius ducentos & plures partim rivos partim amnes accipit, antequam in mare Caspium se exoneret. Nec pauciores Danubius antequam in Pontum:

Et licet Plinius & Cardanus scribant, in Nilum nullos influere amnes, tamen experientia contrarium ostendit illis, qui in Abassia peregrinati sunt.

Propositio per exemplorum enumerationem facile probatur.

Fontes rivorum seu fluviorum quorundam sunt in montibus & montanis locis, quorundam in planitie existunt. De fontibus illorum fluviorum, qui è lacubus profluunt, diximus in præcedenti Capite, quod tales fontes in fundo seu alveo lacuum existant: Et lacus tales esse tanquam cisternas, & effusiones circa fontem, antequam certo alveo aqua fluxa vel majori copia. Nimirum fontes alii recti sunt terrâ vel aquâ, alii aperti.

Fontes in planitie sunt rivorum illorum, ex quibus Tanais, item ex quibus Albis existit in primo tractu, quibus deinde alii accedunt. Plura exempla facile colliguntur.

Cardanus negat hosce fontes in planis istis locis generari, sed ex montibus vicinis derivari subterraneo ductu. Ego verò existimo tales fontes primo efficere lacum vel paludes. Nam neque Tanais ex fonte videtur profluere, sed ex palude seu lacu minus profundo.

Fontes montani sunt plurimorum rivorum, ut Rheni, Rhodani, Danubii, Borysthenis, &c.

E lacubus profluunt, Nilus, VVolga, & fluvius ingens Canadensis S. Laurentii.

Vnus tamen modus esse potest, quo ex uno fonte magnus existat fluvius, nimirum si fons sit in levatis locis (ut plerique sunt) alveus autem fluvii parum altior sit, quàm ostii altitudo. Sic enim profluens aqua primò celeriori cursu, dein magis lento, colligitur in alveo & progressu temporis magnus potest esse fluvius, quia ex ostio non tantum effluit vel effluxit in prima generatione.

PROPOSITIO IV.

Fluvii admodum augentur à pluviis frequentibus & resoluta nive, & quidem diversis anni mensibus & temporibus.

Ita in Peruviana regione & Chili quidam fluvii ita parvi sunt, ut nocturno tempore non fluant, sed tantum de die, quia aqua tunc affluit ex resoluta in Andibus montibus nive per solis calorem. Ita fluvii tam in Orientali quam Occidentali latere procurentis Africæ, ut in Congo, Angola &c. die majores sunt, quam nocte. Ita in India tam Malabarico quam Coromandelio littore. Imò in hisce regionibus tempore æstatis fluvii sere exsiccantur, hyeme seu pluviali tempore turgent. Sic VVolga mense Majo & Junio abundat aquis, ut & pulvini & insulæ tunc tegantur ab aqua, reliquis mensibus pulvini vix transitum permittunt navibus onustis. Causa est, quia eo tempore resolvitur nix in montibus, unde profluunt rivus, qui in VVolgam se exonerant plures quàm centum. Sic Nilus, Ganges, Indus, &c. augentur ita

ita à pluviis vel nive, ut terras inundent. Diverso autem tempore sunt hæc augmenta, quia oriuntur à diversis causis & diversis locis. Etenim pluvix quia hyeme frequentiores, ideo hyeme fluvii altiores, nisi alia accederet causa à nivium resolutione, quæ in quibusdam montibus & locis in vere, aliis in æstate, aliis intermedio tempore fit. Inde accidit, ut alii fluvii in vere turgeant, quia tunc in montibus, qui rivis illorum fluviorum adjacent, resolvitur nix; alii in æstate, & sic de aliis. Præterea fluvii quidam præsertim majores ex remotis locis veniunt, ubi æstas, cum in loco, per quem fluunt, hyems, atque hæc varietates efficiunt, ut diversis temporibus turgeant. Plerique tamen fluvii in vere id faciunt, quia tunc in plurimis locis nives resolvuntur. Causarum varietas explicanda est in particulari singulorum fluviorum descriptione.

De fonte peculiari Japonix, qui singulis diebus per duas tantum horas fluit, dicemus capit. seq.

PROPOSITIO V.

Vnde oriatur aqua, quæ ex fontibus profluit?

Ita proponimus quæstionem hanc difficillimam, quæ tamen difficilior apparet, sicut alii eam proponunt: Vnde fluvii generentur? Etenim versantur nobis tunc ob oculos magni fluvii, Rhænus, Albis, &c. quorum generatio propter aquarum copiam videtur admirabilior quàm rivorum. Sed nos in præcedenti & tertia propositione docuimus, quod fluviorum aqua partim è pluviis & nivium resolutione, partim è lacubus, partim ex rivorum & amnium congressu oriatur. Itaque non tam de fluviorum ortu, quàm fontium origine & perpetuitate quæstio est.

Sunt

Sunt de ea *varia Physicorum sententia* & Geopaphorum.

1. *Quidam* existimant, omnem fluviorum & fontium aquam esse à pluviis vel resoluta nive. Initium ejus esse volunt, quod pluvix & resolutæ nives admodum augeant fluvios, ut sæpe extra alveum se proferant & inundent regiones: item, quod fluvii admodum decrescant & quidam minores omnino siccantur, ubi longo tempore inflate pluvix non decidunt, propterea quod alveus hisce sit minus profundus atque ideo parum quæ collegerint: illos verò, quibus profundus est alveus, non desinere neque exsiccari in æstate, propterea quod tantum aquæ ex præcedentibus pluviis & resolutis nivibus collegerint, ut non possit omnis in vaporem tolli nisi diuturno & constanti æstu. 2. quia paucissima flumina in illis locis ubi rarus est imber: ut in Africa interiori pauci sunt fontes.

Sed hæc non solvunt quæstionem, quia non de fluviorum ortu, sed de fontium tantum aquæ origine debemus quærere. Ideo qui ita dicunt, non considerant bene sensum quæstionis, ut jam nonnuimus: quanquam etiam experientia, quam adducunt, non sit generalis, quia reperiuntur fluvii in locis, ubi raræ pluvix, nullæ nives, etsi in Peruviana regione & Ægypto verum sit, quod asserunt. Præterea pluvia non ultra decem pedum profunditatem humectat Terram: fontes vero è majore profunditate scaturiunt.

2. *Alii existimant*, non esse quærendum unde illa fontium aqua oriatur, quoniam aqua sit elementum, non minus ac Terra & aër & ignis, de quorum ortu non quæritur; sic Seneca differit. Verum enimvero illi autores nodum Gordium Alexandri

xandri gladio dissecant. Non enim quæritur, quomodo existat aqua, sed quomodo ad loca fontium & non ad alia perveniat. Præterea Terra non improfluit, sicut fluvii. De aëre verò falsum est quod statuunt non esse quærendum.

3. *Aristotelici sequuntur opinionem* Præceptoris sui Aristotelis, qui libro 1. de Meteoris toto capite x i multis probare conatur, quod aqua fontium generetur ex aëre in terræ visceribus contento. Rationes adducit has 1. Ex aëre supra Terram existente aquæ generantur, pluvix nimirum: itaque cum in terræ visceribus & aër sit & eadem condensationis causa, nempe frigus, ideo absurdum esse dicit, si quis non putet ibi quoque ex aëre aquam fieri. 2. Experientia testatur, quod in terra grandiores guttæ ex parvis factæ stillent, & ideo fluviorum principia esse quasdam veluti scaturigines aquarum, quæ in unam aliquam terræ partem concurrant. Ideo enim, qui aquæ ductum struunt, scrobibus atque cuniculis aquam deducere, tanquam ab excelsis sudante terra solent.

3. Quia plurimi fontes, & quidem maximorum fluviorum in locis montanis reperiuntur pauci in locis planis: quod indicio est, aquam fontium ex condensato aëre esse vel vapore, qui aër & vapor versus altiora loca tendunt, & montana loca, sunt tanquam spongia locis incumbentiis humilibus. Hæ sunt Aristotelis rationes: quibus ego adjungo aliam non minus validam, nempe aër nebuloso vel minus tantum sereno, sive aliquantum condensato, aciduli fontes statim deprehenduntur minus acidi, quod indicium est augeri illos ab aëre.

4. *Cardanus* cum aliis censet, aquam fontium fieri à rivulis, qui ex aqueis vaporibus tam intra quam

uam extra terram existentibus & condensatis generati sunt, sed fontes solos vix efficere fluvijs, nisi pluvix vel resolutæ nives accedant. Rationes hujus sunt. 1. Si montes mane invisas, humidiores veniunt. 2. Fluvii matutino tempore excrescunt & quidem eo magis, quo fonti propior pars hujus sit.

Verum perpetuus & constans profluentis ex fontibus aquæ impetus non videtur à tam imbecilli causa & inconstante ortum habere. Neque differt hæc Cardani sententia multum ab Aristotelica, nisi quod Aristoteles aërem cum generatione, Cardanus vapores sine generatione ponit causam fontium, & vero exigua est inter aërem & vapores differentia.

5. Veteres nonnulli opinati sunt, pluvias intra terram in cavitatibus coacervari, & deinde tanquam ex alvo prægrandi erumpere, & aut fluvijs omnes ex una, aut alium ex alia scaturire, nec ullam gigni aquam, sed quæ hybernis mensibus in hujusmodi conceptacula collecta fuerit, hanc in annum evadere multitudinem arbitrabantur, & ob id majores semper hyeme, quam æstate producere, & quosdam perennes esse, quosdam minime. Causam eandem addebant, quam in prima opinione proposuimus. Eam sententiam rejicit Aristoteles, quia plus aquæ in uno anno ex ostio fluvii effluit, quam sit moles telluris totius.

6. Ex modernis Philosophis, ut etiam antiquis, plurimi statuunt, Terram, quicquid aquarum ex ostiis fluviorum in mare emisit, rursus accipere. Occulto enim itinere maris aquam subire terras & in transitu per multiplices anfractus terrarum verberatum & per arenas atque argillam colatum deponere salsedinem & amaritudinem & sic in finem.

sinceram aquam transire. Hanc sententiam ego quoque tueor & veram esse existimo, ita tamen ut nec tertio loco, nec primo loco positam causam excludam. Rationes sunt hæc. 1. quia plures quàm mille fluvii in mare se exonerant, & majores et illi tantâ copiâ, ut aqua illa, quam per totum annum emittunt in mare, superet totam Tellurem sicut VVolga in mare Caspium & alii. Itaque fieri aliter nequit, quin ex mari aqua in plurima Telluris loca & usque ad fluviorum fontes emittatur. Nisi enim hoc fieret, ne cogitari quidem potest quomodo mare non augeatur in immensum, vel cur fontes non desinant emittere aquam. Neque dicas, vapores tam multos è mari elevari, quantum aquæ mare acceperit à fluviiis. Primo enim vapores illos sola reddit pluvia: deinde falsissimum est, quod tanta copia vaporum è mari tollatur quanta generari possit ex aqua, quæ ex fluviiis in mare influit.

Secundò, probatur hæc sententia ex eo, quod fontes prope mare sunt salsi vel falsiusculi, & quod propiores mari èd magis plerunque salsi, ut in littore Africæ, Indiæ imprimis Coromandelio littore, ubi neque vites crescunt & omnes salsi putei. In urbe Suez, ubi mare rubrum terminatur, omne putei salsi & amari, & quæ à duobus milliaribus petitur aqua, falsiuscula est. Sic in multis mari insulis putei nulli dulces sed salsi (minus tamen quàm ipsum mare) reperiuntur, ut in insula sancti Vincentii, aliisque. In Peru humili seu littoralis regione lacus salsi sunt propter maris viciniam. Imo in locis maritimis Orientalibus nuces quæ Cocos vocant, falsiusculæ reperiuntur. Quid quod in locis Mediterraneis salsi fontes reperiuntur, ut in Lotharingia, Lunæburgi, Hallæ, &c.

3. Quia mare per subterraneos ductus aquam
etiam emittere manifestum est ex salinis Lunæbur-
gensibus, Hallensibus, &c. ubi infra terram repe-
iuntur illi ductus seu fontes pleni aquâ salsa seu
marina.

4. Quia ad insignem profunditatem fodientes,
et etiam in fodinis, copiosam invenimus aquam,
cujus nec pluviam nec aërem possumus efficien-
tem causam ponere.

Quomodo autem ex mari ad loca fontium per-
veniat aqua ita ut dulcis fiat, jam explicavimus,
nimirum fundus maris non est ubique petrosus &
axeus, sed in plurimis locis, arenosus, limosus,
argillaceus, spongiosus, quæ terræ aquam maris
imbibunt, (sicut videmus id non tantum in terris
nostris, sed etiam à filigine, tritico, hordeo, pis, is,
aryophyllis fieri) & per continuationem terræ ad
longam à mari distantiam paulatim deducunt,
ubi tandem guttulæ coeunt præsertim in angusto
loco, ut sunt montes, & datâ cavitare fontem effi-
ciunt: Quod si cavitatis illa testâ sit & clausa à ter-
ra, tunc collecta ita aqua vel aliam viam ubicun-
que factam sequitur, & sic in alio loco fons vide-
tur prorumpere, qui tamen in eo loco non est, sed
a priori loco derivatus fluvius subterraneo meatu:
vel si nullam viam circumcirca sese aqua illa cavi-
tatis reperit, neque violentiâ terram obtegentem
possit perrumpere, tunc non augetur illa aqua, sed
quæ ad illam tendebat augmentum futura, illa in
alium locum avertitur. Ea verò est humidorum
& liquidorum omnium natura atque proprie-
tas, ut omnes eorum partes & particule mo-
veantur versus eum locum, ubi defluxus fit. Ita si
vasculum impleveris aquâ vel liquore ut tumor
emineat supra vasis labrum, habent quidem tunc
omnes

omnes aquæ extantis partes æqualem inclinationem & defluendi potestatem in vicina labri parte sed propter mutuam particularum cohærentiam (cujus causa in physicis explicatur) si in una labri parte defluxus fiat, omnes reliquæ partes deferunt vicinum labrum & versus illam labri partem trahuntur, vel ipsæ sequuntur, ubi defluxus fit. Sic si oblongum panis frustum immergas unâ extremitate in aquam vel vinum, videbis aquam sursum ferri & non immersam panis partem etiam humectare. Præterea mare per cavernas subit terram ex quibus cavernis eodem modo proripere potest aqua, nisi evaporationi malis ascribere, quæ sursum feratur, & in angusto loco coiens guttas.

Verum quia multa sunt, quæ hanc sententiam videntur minus verisimilem reddere, ista etiam considerari debent, ut appareat, non labefactare hæc propositam sententiam.

1. Loca fontium sunt magis elevata, quam maris est superficies, quia pleraque sunt in montanis locis, ideo non potest à mari ad loca illa fluere aqua, quoniam natura aquæ est, ut ad loca magis depressa vel minus elevata moveatur, non ad altiora, ut patet ex fluviis & Aquilegorum artificiiis.

2. Etsi fundus maris sit argillosus, limosus, arenosus, ut ita aqua sese inserat per ejus particularas, tamen ratio sufficiens non apparet, cur non magis humectet subjectam terram & minus altam, quam ut sursum ad loca fontium proripat, præsertim cum hic petrosa & saxea sæpe sit terra ut in montibus insulæ S. Helenæ.

3. Nulla apparet ratio, cur aqua ita à mari proripens non media via inter mare & fontem prorumpat.

4. In profundissimis fodinis non invenitur aqua vel saltem pauca, teste Thurnheusero.

5. Deberet aqua ista fontium falsa esse, quia à mari proficiscitur. Hæc sunt præcipua argumenta, quæ propositam sententiam falsitatis arguere videntur. Nam leviora ab aliis allata prætereo, nimirum quod existimant, mare non posse sufficere tot fluviis, deinde quod fluvii nunquam deberent imminui, si vera esset fluviorum causa, quam proposuimus. Etenim ad hæc duo facilis est responsio, quoniam mare rursus accipit aquam à fluviis, quam emisit in fontes; deinde ad alterum, jam monuimus, non hic esse quæstionem, neque nos istud statuere, quod fluviorum aqua omnis ex mari sit, sed tantum de fontium aqua, quæ sola non facit fluviis, ut diximus: & simul asserimus, quod fontium aqua augeatur à pluviis & madido rore, quoniam hæc terram humectantes repunt vel trahuntur versus loca fontium, ubi effluxus aquæ fit, quod explicavimus aliis exemplis. Ad quatuor itaque allata argumenta, quæ aliquid momenti habere videntur, nos converramus.

Primum validissimum censetur à multiplici experientia desumptum: ideo diversæ à doctis sunt allatæ & excogitatæ solutiones. Primo illi se omnium facillime expediunt, qui defendunt, Oceanum esse altiore[m] quam Terras, sic enim negant assumptionem, & ajunt, hanc ipsam Oceani altitudinem esse causam fontium, quia fontes sint minus alti, quam aqua in medio Oceano. Præterea Olearius in Descriptione itineris sui Persici refert, quod montem, qui mari Caspio adjacet, conscenderit, atque astrolabio (vel potius gædetic[o] instrumento) exploraverit montis elevationem

supra maris istius superficiem,prehendisse autem nullam, sed maris extremam superficiem in Horizontali linea visam esse, imò aliquantum elevatam supra illam, ut ita maris istius tumor aliquantum altior deprehensus sit, quam montis vertex, in quo observationem instituit. Verum enimvero hæc solutio non potest admitti, quia capite x r r r ostendimus, quod Oceani aqua non sit altior quam Terræ montes & littora, atque id frequentes observationes Mathematicorum in littoribus vel turribus factæ testantur. Ad Olearii observationem quod attinet, ea non parum difficultatis hic facere videtur. Namque mare Caspium non esse altius, quam Terras vicinas, multo minus quam montes, id ex eo colligitur, quod plurimi fluvii se in illud exonerant. Dicendum itaque videtur, refractionem turbasse Olearii observationem & fecisse, ut aqua Oceani altior appareret, quam revera esset, & fortasse fluctus maris auxerunt hanc causam: & mons, quem descendit, minus altus fuit.

Hujus itaque solutionis debilitate perspectâ, alii adducunt hanc, quod aquæ naturalis locus sit circa Terram, & ideo debere illam totam terram regere, quoniam est levior quam terra. Quoniam autem à naturali hoc loco impeditur propter exstantes terræ montes monticulos & altitudinem terræ assurgentem versus loca Mediterranea, ideo illam Oceani partem, quæ ibi esse debebat ubi montes & elevatae Terræ partes sunt, cum non sit in suo loco naturali, premere aquam subjectam, quæ quidem in naturali suo loco est, sed ab immittente aqua, quæ non est in naturali loco, pellitur vel premitur ad fundum, ubi cum non inveniat viam neque cedere possit, abit versus latera & montium

montium radices subit, ubi collecta tanquam in aliqua cisterna exprimitur à premente Oceani aqua versus montis verticem, non aliter ac si in cantharum, cui à latere tubulus est vel emissorium, (ad fundum canthari pertingens) ex quo aqua, vinum vel cerevisia in vitra infundimus, si inquam in cantharum talem plenum liquore vel semiplenum immittamus lapidem, liquor exsiliret tubuli orificio. Hæc Scaligeri est subtilitas: Sed nimis profecto crassa. Etenim non ita è radicibus montanorum locorum expellitur aqua versus verticem, quia & experientia in fossis contrarium testatur, & si ita fieret, falsa esse deberet fontium omnium aqua: præterea falsum est, quod assumit, aquæ partem non esse in naturali suo loco & ideo premere subjectam partem. Etenim illud gratis sumitur & contra experientiam, quoniam aqua non premit subjectam partem, nisi cum altior est, quam vicina aqua, & ideo ubi superficies Oceani spherica est, quiescit: quod si motus aliquis fieret à pressura, is ad littora maris aquam detruderet, ubi laxior locus est, non per terræ parvas cavernas. Per magnas quidem cavernas è fundo maris influere aquam certum est, sed eæ non efficiunt fontem dulcè, quia salsedinem aquæ non tollunt.

Ego veram argumenti solutionem non difficilem esse existimo, si consideremus, quomodo aqua ad fontem perveniat, nimirum non per aliquem alveum vel tubulum ex alveo maris vel pede montis (sic enim salsedinem retineret) sed per continuam aquearum particularum progressionem vel reptionem (ut ita dicam) in materia terrestri ad loca vicina fonti, ubi demum in guttas colligitur propter cavitatem & continuam successionem aquæ, atque sic fontem efficit. Hoc enim in effossâ

ad insignem profunditatem terra deprehendimus, quod hinc inde guttulæ aquæ consistant, & à vicinis premantur, ut exiguus rivulus fiat, quos vocant venas aquæ (*aderen*) quales rivuli si plures in unam cavitatem congreuantur, fontem efficiunt, id quod optime norunt qui aquæ ductus vel fontem efficere aut puteum callent. In puteis enim colligitur aqua ex multis guttulis, quæ in fundo putei ex vicina terra coeunt, & qui aquæ ductus struunt, scrobibus atque cuniculis aquas deducunt in unum locum, ut ita ab excelsis locis guttulæ decendant in cavitatem.

Si objicias, fontes multos inter media saxa scaturire, per quod non sit verisimile aqueas particulas ita prorepissè, ad id respondeo, hoc ipsum confirmare sententiam nostram. Etenim illa saxa non à vertice montis usque ad pedem montis perzingunt, (saltem in illis montibus, ubi fontes reperiuntur) sed tantum superficiem montis & aliquam exiguam profunditatem occupant, intus vero terra montis mollior est vel minus saxeæ vel talis saltem, ut aquam recipiat & attrahat, ideoque ubi penetrando ad saxeam partem pervenitur, quia penetrare amplius non potest, ibi sistitur & in guttas colligitur, efficitque fontem inter saxeas partes prorumpentem, nimirum si via concedatur. Et montes petrasque insulæ S. Helenæ & fere omnium insularum non esse intus ita petrosas & duras colligitur ex eo, quod omnes fere illi montes aliquando arserint vel saltem sumaverint, quod ex cinerea terra item ex sulphure, (quod in illis locis reperitur) colligitur. Adde, quod jam in superioribus monuimus, aquæ fontem non semper ibi esse, ubi esse videtur, sed ex altiori loco per subterraneum ductum ad fontem meare, &

ita

ita efficere ut aqua profiliat cum aliquo impetu, quod in plurimis fontibus fieri existimo. Et magis persuademur si consideremus, ignem quoque deorsum moveri propter materiæ continuationem, cum revera, si liber sit, sursum tendat. Ita si oblongi ferri extremitatem admoveas igni, penetrabit hic per totum ferrum usque ad alteram extremitatem, etsi hæc extremitas altera non sursum, sed deorsum vergat.

Sic itaque primum argumentum, quod fontanæ aquæ originem à mari impugnabat, sufficienter dissolvimus. Ad secundum respondeo, causam dari posse, cur aqua maris non tam penetret & repat in terram versus centrum, quam versus montes, nimirum, quod ibi terra sit magis dura & metallica, id quod experientia testatur: ubi vero non est ita dura, ibi fit penetratio aquæ, & ideo etiam infra fundum maris intra terram versus centrum, ubi cavitas aliqua est, fluvios reperiri vel saltem dulces aut saltos lacus non negamus. Sed quia paucæ tales cavitates sunt, & ubique fere terra metallica & dura infra fundum maris, ideo non potest imbibere continuè aquam, sed ubi saturata est, cessat amplius imbibere, neque plus recipit. Tunc itaque repit aqua versus altiora loca. Ad quod promovendum verisimile est, quod multum faciat mutatio altitudinis maris, modo in hac modo in illa parte propter fluctus & tempestates. Etenim aqua altior facta magis premit aquam & promovet ejus ingressum per terras ad fontes. Cumque singulis diebus non tantum à tempestatibus, sed etiam à fluxu & refluxu augeatur altitudo maris & minuat in partibus Oceani, ideo talis pressura singulis diebus fit: sed dubito an hæc causa multum efficere possit.

Ad tertium argumentum dico, rationem esse dispositionem locorum & ipsius terræ, atque ut dixi, quod humor movetur & repit versus eam partem, ubi effluxus fit: neque opus esse puto proxiori explicatione.

Quartum vero argumentum à falsedine desumptum difficiliorem habet solutionem, quia per solam transcolationem non videtur posse tolli falsedo. Etenim falsedo aquæ consistit in duplici sale (quod Aristotelici non animadverterunt) quorum unum Chymici aptè vocant fixum, alterum volatile. Et fixum quidem sal separari potest à marina aqua tam per transcolationem continuam, quam per coctionem sive destillationem aquæ: sed volatile sal quia spirituosum est statim attollitur cum ipsa aqua, neque per destillationem utut frequentem & sæpius repetitam hætenus quidem separari potuit per artem aqua dulcis. Itaque difficile est, dare modum, quo volatilis hicce falsus spiritus in via inter mare & fontem separetur ab aqua marina. Sed interim pro solutione omnino sufficiunt hæc. 1. Etsi nobis nondum innotuerit artificium & modus, quo falsedo ista volatilis separetur ab aqua marina, non ideo negandum est, separari posse, quandoquidem deprehendimus à Natura illum separari, nimirum pluvie in medio Oceano dulces decidunt, quæ tamen generata fuit è vaporibus à mari sublatis. 2. Particulæ illæ marinæ aquæ terram penetrantes, antequam ad fontem confluant, miscentur hinc inde cum aliis humoribus dulcibus ex pluvia vel vapore ibi ortis, atque sic parva illa falsedo, quam adhuc habebant, omnino insensilis redditur. 3. Non verum est, quod in omnibus fontibus falsedo omnino insensilis sit, quia quidam fontes falsi sunt, ut antea dixi-

diximus & exemplis probavimus, quidam falsiusculi, ut duobus miliaribus ab urbe Suez, & locis minus à mari remotis. Longa itaque transcolatione & evaporatione lentissima opus est ad separandam aquam à sale volatili, atque hoc modo etiam per artificia efficimus aquam marinam minus falsam, atque talis quoque pluvialis aquæ generatio est, quæ ideo falsa non est, vel saltem minus. Namque in mari interdum falsiusculas cadere pluvias certum est.

Fontium itaque aqua partim à mari vel subterraneis aquis, partim à pluvii & rore terram humectantibus oritur. Fluviorum autem aqua partim ex fontibus, partim ex pluvii & nive oritur.

PROPOSITIO VI.

Fluvii quidam in medio itinere sub terram se conduunt, atque alio loco rursus egrediuntur tanquam novi fluvii.

Sunt autem celebrati hi. 1. Niger fluvius Africa, quem quidam Cosmographi subterraneo ductu volunt ex Nilo derivari, quoniam eodem modo & tempore exundat atque Nilus, neque alia ejus exundationis causa apparet. Ipse Niger occurrens montibus Nubiæ conditur sub illis, & ex altera montium plaga Occidentali egreditur.

2. Tigris in Mesopotamia transvectus lacum Arethusam occurrens monti Tauro in specu mergitur, & à latere altero ejus profluit. Deinde postquam transit lacum Thospitem, rursus in subterraneos cuniculos mergitur, & post sex circiter Germanica milliaria demum prorumpit. Olearii tamen Tabula non exhibet hæc latebras.

3. Circa Arcadium in Peloponneso plurimos tales rivos fuisse scribit Aristoteles lib. 1. Meteor.

cap. x. i. Quod etiam Poëtæ versus testantur, in quibus Lycus & Erasinus nominantur:

Sic ubi terreno Lycus est epotus hiatu

Existit procul hinc, alioque renascitur ore.

Sic modo combibitur, tacito modo gurgite lapsus

Redditur Argolicis ingens Erasinus in undis.

4. Alpheus Achajæ fluvius à terra abforbetur. Eum Græci scribunt sub mare & infra terram agere cursum usque in Siciliam, ubi in Syracusano littore emergere eum volunt atque illum esse, qui in Sicilia Arethusa dicitur. Hoc autem ex illo imprimis collegerunt, quod Arethusa in Sicilia, quinta quaque æstate stercora pecudum ejiciebat eo tempore, cum in Achaja Olympia celebrarentur & mactatarum victimarum stercus in Alpheum conjiceretur. Secundo itaque flumine delatum in Sicilia ejiciebatur.

5. Guadiana fluvius inter Lusitaniam & Bæticam, olim Anas dictus; totus ad oppidum Medelinam cuniculo se condit & post octavum circiter milliare Germanicum renascitur.

6. Dan fluvius (qui cum fluvio Jor confluens facit Jordanum) prorumpit aliquot miliaribus à fonte suo Phiala. In hunc enim conjectæ palææ redduntur vel prorumpunt in apparenti fonte vel prurptione ipsius Dan fluvii.

Plinius atque alii scripsere, Nilum quoque aliquoties in via terras subire, sed experientia ostendit, illum in toto itinere conspicuum manere. Sic Aristoteles atque alii Padum vel Eridanum celebrem Italiæ fluvium occultari sub terram aliquo intervallo scripserunt, sed experientia contrarium docet.

Causa autem, cur fluvii isti se condant sub terram, & rursus emergant, est 1. obstaculum loci magis

magis elevati, quam alveus fluvii. 2. Cavitas sub illa terra forte existens, vel inconstans materia, quæ facile cedat fluvio allabenti.

Sunt etiam alii qui sese condunt sub terram, sed non iterum emergunt, ut in sequentibus dicemus.

PROPOSITIO VII.

Fluvii magni, & mediocres plerique ut etiam minorum magna pars exonerant se in mare, vel lacum. Et locus, ubi hac exoneratio fit, dicitur Ostium fluvii. Quidam fluvii unum, quidam tria, quidam plurima ostia habent. Quidam ex mediocribus & minoribus exonerant se in majores fluvios. Reliqui vel stagnant vel à terra absorbentur.

De majoribus fluviiis res manifesta est exemplo Rhæni, Albis, Danubii, VVolgæ, &c. Etenim Danubius 7. ostiis in Pontum Euxinum evolvitur, VVolgæ ad minimum septuaginta numerantur ostia, Nilus septem, & ubi exundat plura.

Causa, cur majores fluvii in mare se exonerent est aquæ copia & vehemens latitudo. Cur autem plura ostia, quam unum, habeant, causa duplex est. 1. Copia aquæ. 2. Pulvinorum in ostiis generatio, qui progressu temporis ita augentur, ut pars terræ vel insulæ fiant, atque ita efficiunt, ut fluvius allapsus in duos ramos dividatur, & cum tales pulvini plurimi generentur, plurimos in ramos dividitur fluvius sive unum ostium in plura. Sed plerunque tunc ostia proferuntur & mare à terra recedit.

Sanè Nilum uno tantum ostio olim in mare se immisisse testantur Veteres, quod ostium Canobicum appellarunt. Hisce duabus causis tertia adjungitur potest, nempe humana industria. Etenim

homines ex fluvio aliquo sæpe ductus aquarum derivant atque illis in mare viam seu alveum parant, partim ad irrigandos agros, partim ad navigationis commoditatem, qui aquæ ductus progressu temporis ab aquarum impetu majores fiunt. Ideo veteres scribunt, neque id sine verisimili ratione, quod omnia Nili ostia, excepto uno Canobico, sint facta ab hominibus. De hoc plenius in sequenti Propositione agetur, ubi etiam explicabitur, Quomodo factum sit, ut unus fluvius in alterius alveum fluat.

VVolchda in Moscovia (non VVolga) oritur ex lacu & in alium lacum se exonerat.

Fluvii, seu rivi, qui neque in mare neque in alios fluvios se exonerant sunt vel brachia seu ramuli aliorum fluviorum, vel peculiare fluvii. Rami qui sunt aliorum fluviorum, eos verisimile est stagnare neque subire terras. Causa autem cur non ad mare tendant, duplex est. 1. quia alveus minus altus est, & ideò non multum aquæ habent. 2. durior terra impedit progressum. 3. multi ex illis manu facti sunt ad irrigandos agros & faciliorem aquæ usum. 4. Ostium obstructum est, nempe mari recedente & terrâ austâ aut in mare promotâ, vel pulvini in alveo generati ita austi sunt, ut aquam non admittant, sed repellant versus fontem vel locum, unde affluxit. Ita ramus Rheni, qui olim se exonerabat in mare Belgicum prope Cattorum vicum vel arcem Britannicam, hodie stagnat mediâ inter Leydam & Cattorum vicum viâ.

Peculiares verò fluvii, qui neque in mare neque in alios fluvios se exonerant, sed in terra orti à terra absorberi videntur, pauci sunt & admodum parvi, ut qui ex montanis Peruvianis & Indiæ &

Africæ

Africa profluunt, in arenosum solum absorbentur vel conduntur infra arenas. Sic ad Meten (est vicus ante sinum Arabicum) reperitur amnis alveo glareoso. Sub eam glaream in æstate latices tacito cursu ita se condunt, ut nihil humoris in summo prorsus appareat. Quod si non concedatur illis rivis via sub terra, efficiunt paludes & lacus parvos. Sunt tamen aliqui adeo lentâ scaturigine, ut per exhalationem tantum separetur ferre, quantum à scaturigine accipiunt, atque ita in terra sistuntur, neque lacus efficiunt, neque absorbentur: ut in Moscovia rivus Conitra, Salle, Mareffa, Jeleeffa, atque alii. Vide Mappam magnam Arctoi Orbis editam ab Hondio.

PROPOSITIO VIII.

Virum via vel alveus, quo fluvii decurrunt, sit ab hominum industria an à natura factus?

Verisimile est, eorum fluviorum, qui non cum ipsa Terra generati sunt, alveos, manu factos esse, hæc ob causas. 1. quia experientia testatur, cum novi fontes scaturiunt, aquam profluentem non facere sibi certum alveum, sed per adjacentem agrum se expandere, adeoque si fluere debeat, opus esse hominum adjumento ad excavandum alveum. 2. quia multos alveos ab hominibus factos esse constat. Sic Chineses alveum fecerunt, quo ex flavo fluvio aqua currit in alium fluvium. *Alia exempla minus celebria omitto, quia satis superque nota.* 3. quia lacus & paludes id confirmant, quales reperiuntur circa fontes plurimorum fluviorum in planitie existentes, ut sunt illi lacus seu paludes ex quibus Nilus, Tanais, Volga & alii profluunt. Quos lacus generatos esse & conservari ab effusione aquæ ex fonte circumcirca fa-

eta, non est quod dubitemus: atque ideo homines, ut agros à tali aqua defenderent, certum alveum fecisse, in quo deflueret & agros defereret. Idem de fluviis, quorum fontes in montibus sunt, intelligendum est.

Huic quæstioni vicina est illa: An fluvii, qui in alios se exonerant, vel congregiuntur, suo motu illam viam fecerint, an ab hominibus in illos alveo facto deducti? Posterius magis verisimile est ob causas modò dictas. Idem quoque de ramis fluviorum & circumductibus, quibus insulæ fiunt in Tanai, VVolga, intelligendum est. Sic Euphratis unum brachium per Chaldaicas paludes transiens olim evolvebatur in mare, postea ab incolis ad agros rigandos multis alveis & ductibus ex eo factis iter deseruit, neque mare petit, ostio præcluso, sed aqua partim in ductibus aquæ factis absorbitur, partim in alterum brachium avertitur, quod in Tigrim se exonerat. Atque ita quoque cum aliis fluviis res videtur se habere, quos hodie non ad mare exire, sed stagnare videmus. Verisimile est, eos olim in mare se exonerasse.

PROPOSITIO IX.

Cum nulli fluvii falsi reperiantur, cum fontes falsi multis in locis sint?

Causa est, quia homines non opus habent aqua falsa, & ideo non faciunt alveum, quo fontis falsi aqua fluat, quoniam minori compendio sal sibi comparare queunt. Si autem ab illis falsis fontibus alveus aptus pararetur, haberemus falsos fluvios vel rivulos, quales in salinis Lunæburgensibus & Hallensibus sub terram habentur. Neque dubitandum est, quin sub terram multi falsi amnes labantur à suis fontibus.

PRO-

PROPOSITIO X.

Alvei fluviorum quo fontibus sunt propiores, eo sunt altiores, & quo ostiis fluviorum seu mari propiores, eo magis depressi, ut plurimum.

In quibusdam vero alveis partes quædam remotiores à fonte sunt altiores parte magis vicina fonti, nempe vel ob colles & valles ut ita dicam existentes in alveis, vel ob voragines. Nulla tamen alvei pars fonte altior est.

Causa seu ratio Propositionis manifesta est, quia aqua non fluit nisi à loco altiori ad humiliorem, & ideo quævis alvei pars (inprimis ostium fluvii) est humilior fonte: aliàs enim versus fontem refluxeret aqua. Quod autem decrescat elevatio alvei usque ad ostium, id de plurimis saltem alvei partibus verum est. Quia enim hinc inde reperiuntur in alveis voragines, depressa magis loca, & contra, pulvini, monticuli, inde fit ut una alvei pars, etsi à fonte remotior, sit altior quam pars alvei quæ fonti propior, & nihilominus ab hac ad istam fluit aqua, quoniam ea copia aquæ influit in depressa loca, ut superficies ejus altior fiat quam monticuli aut pulvini vicini, sive vicinæ partes, quæ versus ostium jacent magis elevatæ.

Et vix ullus fluvius reperitur, cujus alveus non habeat hæc inæqualitates, inprimis in Nilo & VVolga abundant pulvini.

Atque ubi ex altiori loco ad magis depressam alvei partem aqua decedit, si magna sit depressio, dicitur is locus Cataracta fluvii, ubi cum impetu & celeritate fluvius deorsum ruit. Tales Cataractas habent majores fluvii, inprimis Nilus.

Etenim Nilus duobus alvei locis inter montes tanto impetu & fragore decedit, ut accolat surda-

ftri esse dicantur. VVolga quoque parvus Moscovia fluvius (non VVolga) duas habet Cataractas prope Ladogam.

Ita Zaire fluvius in Congo sex milliaribus à litore Cataractam habet ubi de monte decidit: Rhenus ad Bilefeldam, & ad Scaffusiam ingenti fragore. Cæterum Hydragogi observarunt, si alvei fundus in ducentis passibus deprimatur uno passu, eum vix navigabilem esse propter celeritatem. Cum itaque omnes fluvii sint navigabiles, colligimus, quod non major sit alveorum depressio, quam uno passu in ducentis. Sed particulares Cataractæ & voragines excipiuntur. Vocatur autem depressio hæc unius alvei partis infra aliam partem, libramentum. Et depressio ostiorum fluvii infra fontis locum, dicitur Libramentum fluvii.

PROPOSITIO XI.

Cur fluvii in una sui parte majorem habent vel acquirunt latitudinem, quam in alia parte?

Causæ quatuor sunt. 1. Si ripa seu littus in ista parte sit humilior, quam in hac. 2. Si terra littoris minus dura sit & cohærens, ut non satis resistat violento fluvii accessui, qui interdum vel à ventis vel ab aquæ copia oritur. 3. Si alveus in illa parte minus profundus vel excavatus sit, vel pulvinos habeat. 4. Si à cataracta aliqua defluat in illam partem.

PROPOSITIO XII.

Fluviorum alvei sunt magis vel minus depressi, modo in hac modo in ista parte.

Minus depressi vel altiores & minus cavi evadunt. 1. Si pulvini generentur. 2. Si fluvius ab ea parte fiat latior. 3. Si fluxus minus celer fiat.

Augetur

Augetur depressio seu cavitas alvei, si celer sit & vehemens fluxus fluvii præcipue à Cataracta aliqua, vel inter angustias littoris, inprimis si fundus constet terrâ minus cohærente.

PROPOSITIO XIII.

Cur fluvii quidam celeri cursu, quidam tardiusculo progrediuntur? Et, cur unus, idemque fluvius in uno loco celeri, in altero tardo cursu fertur, quod in Rheno multis locis observatur?

Causæ sunt 1. Fontis altitudo. 2. Incrementum declivitatis seu depressionis in partibus alvei vel fundi (inprimis in ostio.) Etenim si fundus inducentis passibus deprimatur uno passu, observantur Hydragogi, in eo alveo aquam ita celeriter & rapide moveri, ut non sine periculo navigetur. Vbi itaque Cataractæ sunt, ibi celerrimè ruunt fluvii. Et ideo torrentes ita rapide feruntur, quia à montibus defluunt. 3. Angustia alvei & profunditas cum aquæ copia, ut cum inter duos montes vel procurentes terras fluvius transit.

Celeritate cursus celebres sunt fluvii, Tigris, Indus, Danubius, Yrtis in Siberia, Malmistra in Cilicia, qui cum tanto fragore fluit, ut è longa distantia audiatur.

PROPOSITIO XIV.

Ostia fluviorum è facilius obstruuntur, quo latiora sunt, & quo altiora vel minus depressa, & quo aquæ fluvii copia minor, minusque celer & vehemens fluxus. Etenim hæ causæ faciunt, ut minori impetu feratur fluvius neque protrudat materiam terrestrem quæ in ostiis colligitur, sed potius subsidere eam patiatur.

PRO-

PROPOSITIO XV.

Fluvii pauci directo cursu à fonte ad ostium feruntur, plerique plagas diversas in fluxu petunt quidam plurimis curvaturis fluunt.

Causa esse videtur partim hominum industria, partim aquæ motus, partim objecti in directo cursu pulvini.

Flexuosi fluvii sunt 1. Rio de Orellana in Brasilia, innumeras curvaturas faciens, ita ut mille & quingentarum leucarum censeatur ejus iter seu alveus, cum directa linea à fonte ad ostium æstimetur tantum septingentis.

1. Fluvius des Madres in Natolia, cujus curvaturæ numerantur sexcentæ.

3. Fluvius Toera in Siberia oriens tam crebris & flexuosis curvaturis fluit, ut Russi & Siberienses cum in eo navigant, frequenter naviculam & onera per terram ab una curvatura ad aliam portent ad vitanda magna dispendia.

CAPUT XVI.

Utrum lacus, per quos quidam fluvii videntur transire (sive ingredi in eos & egredi) sint effecti à fluviiis, an vero suas scaturigines peculiare habent, & fluviorum aquam augeant? item, an fluvius prodiens è lacu sit idem cum eo, qui influit? Non omnes fluvii habent lacus tales, sed quidam tantum. Nubia Africae fluvius numerat quinque, Niger fluvius quatuor, Rhenus Lemanium lacum, &c.

De lacubus hisce jam in præcedenti capite diximus, nimirum conferendum esse fluvium ingredientem cum eo, qui egreditur. Si is, qui egreditur, major est illo qui ingreditur, erunt in fundo

istius

ius lacus peculiares scaturigines, quæ lacum efficiant: si minor vel saltem non major egreditur, ætus est is lacus & conservatur à fluvio ingrediente, & causa sive origo illius generationis fuit alveï latitudo & cavitas seu depressio. Et potest ex quovis fluvio lacus effici, ut in præced. capite dimimus.

Et si egrediens fluvius sit in directa circiter linea situs cum ingrediente, unus idemque fluvius sive unius fluvii partes erunt censendi duo illi fluvii, nempe cum egrediens major est ingressio, nam si minor sit vel non major, non puto quærendum esse vel dubitandum, an egrediens idem sit cum ingrediente.

Accedunt in quibusdam alia indicia. Vt Rhodanus Lemanium lacum ingreditur atque rursus egreditur, neque tamen efficit illum lacum, quod colligitur præter alia ex colore, quem fluvius hic diversum gerit à colore lacus. Neque Rhenus ullum lacum efficit, sed à pullulantibus subtus terram aquis producit & conservatur. Non tamen hæc tanquam indubitata propono.

PROPOSITIO XVII.

Fluvii plerique eò latiores fiunt, quo ostio propioribus, vel à fonte remotiores, atque in ostiis maxima est latitudo.

Causa est. 1. Quia alii fluvii ingrediuntur eum, qui in mare se exonerat, atque ita copia aquæ augetur. 2. quia alveus minus deprimitur in partibus ostio propioribus. 3. quia vento è mari spirante fluvii aqua repellitur ab ostio versus fontem, qui impetus tantum in partibus ostio propinquis non in remotis & fonti vicinis sentitur. 4. Ipsum mare vento tali spirante, ostium ingreditur & vehementi

vehementi agitatione amplius & latius illud reddit.

Atque eò majora & latiora sunt ostia in magnis fluviis, quo pauciora. Maxima ostia sunt fluviorum, Maragnon in Brasilia, Laurentii in Canada, Zaires in Africa, fluvii argentei in Brasilia. Etenim hic in mare fertur ostio quadraginta leucarum, ut quidam annotarunt, sed alii viginti tantum leucas ponunt, & puto illos, qui quadraginta scribunt, reliqua ostia istius fluvii simul comprehendisse. Zaires verò ostium viginti octo milliarium esse scribunt, qui in Congo fuerunt. Et fluvii hi tam patulis ostiis copiosam aquam effundentes vincunt sive delent & saporem salsum maris & motum versus littora, idque usque ad decem vel duodecim milliaria in mari.

PROPOSITIO XVIII.

Aqua fluviorum multas particulas variorum metallorum, mineralium, arenarum, oleosorum seu pinguium corporum secum deferit.

Ita quidam fluvii sunt auriferi, qui deferunt arenulas, quibus grana auri sunt admixta, quales sunt 1. In Japonia. 2. In insulis Lequeo non procul à Japonia. 3. Rivus, Arroë dictus in Africa, qui scaturit in Monomotapa è radicibus montium Lunæ, in quibus auriferæ fodinæ, & fluit in Magnicen Sossalæ fluvium. 4. In Guinea, ubi Nigritæ grana hæc separant ab arena & Europæis navitis (qui ob solius auri mercaturam istuc navigant) vendunt seu commutant cum Europæis mercibus. Interdum afferunt cum ipsis arenulis. Vocant grân gold: estque optimum neque indiget depuratione. 5. In rivis circa urbem Mexico etiam grana auri colliguntur, præsertim post pluvias, seu

eu imbres , quod de omnibus hisce rivis intelli-
gendum est. Namque extra imbrium tempus vix
vel parum admodum reperitur. 6. In Peru. 7. In
umatra. 8. In Cuba. 9. In Hispaniola & qui-
busdam adjacentibus insulis. 10. In Gujana Ame-
ricæ provincia. 11. In Caribæ rivis magna gra-
na reperiuntur post imbres : incolæ prætendunt
reticula hinc inde fluenti aquæ , & dein ab arena
facili negotio separant. 12. Plurimi rivi & fontes
sunt in regionibus circa Alpes Germaniæ in primis
in provincia Tirol , ex quorum aqua aurum & ar-
gentum elicitur , etsi nulla grana in eis sint con-
spicua : quia particulas vehunt admodum exiguas,
sive atomos. Rhenus quoque auriferum lutum ve-
nit in plurimis locis , ut etiam Albis. Olim Tagus
Hispaniæ fluvius admodum celebris erat propter
granula auri in eo reperta , sed hodie nihil am-
plius largitur , neque memini de ullo Europæo ri-
vo tales divitias prædicari. In Hassia quoque
hoc seculo dicitur repertus fluvius parvus , in
cujus arena fuerint auri grana. Sed fide dignum
autorem de eo nondum legi.

Argentiferi quidem fluvii seu rivi non sunt an-
notati à Scriptoribus ; non tamen dubito , quin
æque multi vel plures etiam rivi sint , qui granula
argenti deferant , sed quia non ita facile discer-
nuntur ab arena , neque inde magnum lucrum &
vix operæ pretium expectari potest , ideo à nemi-
ne hætenus observatum fuit. Eadem causa fecit ,
ut neque eorum rivorum , qui ferrea , cuprea , stan-
nea granula deferunt , facta sit hætenus mentio ,
exceptis paucissimis , quorum tamen magnus sine
dubio est numerus , quorum mirabiles effectus
cum vident homines , stupent , & Philosophi vul-
gares ad occultam qualitatem confugiunt. Illum
modo

modo spectemus fluvium in Germania superiori qui ferrum mutat in æs, ut vulgo putant, ita ut si ferream soleam suspendas in eo, cupream sis extrahiturus. Nimirum non ferrum mutatur in cuprum ut prædicant vulgo, sed cupreæ & vitrioli particulae seu granula, quæ in isto fluvio sunt, corroddunt ferrum adjuvante motu aquæ, & particuli ferri semotis cupreæ particulae in eorum locum succedunt. Hoc autem Physici moderni, qui chymix periti sunt, per aliud experimentum didicerunt.

Multo minus fossilium, variarum scilicet Terræ specierum atque salium particulis imprægnat rivi observati sunt. Explicabimus autem sequent capite fontes minerales & metallicos.

Ex hac variarum particularum admistione oritur magna diversitas aquarum in fluviiis atque puteis. Quorundam aqua si ad coquendos cibos adhibeatur subnigros eos reddit, (ferro imprægnatam esse indicio est) neque pisa ita facile ad mollietiem perducuntur, ac si in alia aqua decoquantur, quæ pinguis aliquantulum sit. Ex diversis aquis non potest eadem cerevisia vel similis confici. Inde est, quod quorundam fluviorum & puteorum aquam Germani vocant, *Ein hart wasser*, nempe quæ ferreis particulis, nullis vero oleosis & pinguibus imprægnata est. Albis autem ex pinguium numero est, ut ita loquar. Causa hujus varietatis petenda est ex varietate terrarum, per quas fluvius fertur, quæ vel saxeæ sunt, vel argillaceæ, vel metallicæ.

Atque experientia testatur, quod fluvii quorum aqua mollis seu pinguis est, fluant per argillaceas terras. Sic omnia loca, quæ adjacent Albi, sunt admodum sæcunda.

PROPOSITIO XIX.

Plurimorum fluviorum aquæ discrepant coloribus, gravitate, aliisque qualitatibus.

Etenim quædam aquæ sunt nigra, quædam subnigra, quædam ad rubrum vergunt, quædam ad albedinem.

Et diversitas hæc omnium maxime animadvertitur, cum duo fluvii coeunt. Possumus enim ad plures passus, ubi jam in eadem alvei parte exiunt, aquas illas adhuc discernere. Ex quo etiam patet, quod gravitate differant, dum una magis undum alvei petit, quam altera. Quanquam hoc manifestum magis fit per examen libræ.

Gangis aqua levissima & saluberrima censetur: tamque Imperator Guzaratenfis, sive Magnus Magol, quocunque loco agat, in phyalis sibi adferri curat, & hanc solam potat. Alii Nili aquam saluberrimam & foecundissimam esse volunt. Grares aquæ pleræque ferro vel Mercurio imprægnatæ sunt.

In magnis fluviiis respiciendum est ad rivos, & quibus componuntur: nam Rhenus plurimos accipit minerales rivos, ita quoque Danubius auriferos, ferri-feros, vitriolatos, &c. Hinc eorum qualitas, etsi plurimi fontes parum habeant de illis.

PROPOSITIO XX.

Quidam fluvii singulis annis statò tempore adeo augmentur ut extra alveos se proferant & vicinas terras inundent.

Celeberrimus inter hosce est Nilus, qui adeo crescit, ut totam Ægypti terram exceptis collibus tegat. Incipit inundatio circa decimum septimum Junii,

Junii, & crescit per quadraginta dies, totidemque diebus recedit, ita ut hoc tempore omnes urbes quæ in collibus pleræque extructæ sunt, videantur insulæ. Admodum antiquitas hanc Nili exundationem prædicavit, propterea quod in cognita ei terræ portione ante detectas Orientis & Occidentis regiones nullus alius fluvius reperiebatur, quod id faceret, excepto Nigro, quem ideo subterraneoductu à Nilo oriri argumentati sunt. Sed quoniam Seneca omnium pulcherrime descripsit Nili exundationem, facere non potui, quin illius verba hic subjicerem: Nilus ante exortum Caniculæ augetur mediis æstibus, ultra æquinoctium. Hunc nobilissimum amnem natura extulit ante humani generis oculos, & ita disposuit, ut eo tempore inundaret Ægyptum, quo maxime usta fervoribus terra undam altius traheret, tantum hausura quantum siccitati annuæ sufficere possit. Nam in ea parte, quæ in Æthiopiam vergit, aut nulli imbres sunt, aut rari, & qui insuetam aquis cælestibus terram non adjuvent. Vnam, ut scis, Ægyptum in hoc spem suam habet. Proinde aut sterilis annus aut fertilis est, prout ille magnus influxit, aut parcior. Nemo aratorum aspicit cælum. *Quar non cum poëta meo jocor, & illi Ovidium suum impingo?* qui ait:

Nec pluvio supplicat herba Iovi.

Vnde crescere incipiat si comprehendi posset causæ quoque incrementi invenirentur. Nunc vero magnas solitudines pervagatus, & in palude diffusus, gentibus sparsus, circa Philas primum ex vago & errante colligitur. Philæ insula est aspera & undique prærupta: duobus in unum coitus amnibus cingitur, qui Nilo mutantur, & ejus nomen ferunt. Urbem totam completitur

Hanc

hanc Nilus magnus magis quam violentus, egressus
Æthiopiam arenasque, per quas iter ad com-
mercia Indici maris est, prælabitur. Excipiunt
um Cataractæ, nobilis insigni spectaculo locus.
ibi per arduas excisasque pluribus locis rupes Ni-
lus insurgit, & vires suas concitat. Frangitur
nim occurrentibus faxis, & per angusta elucta-
tus, ubicunque vincit, aut vincitur, fluctuat: &
illic excitatis primum aquis, quas sine tumultu
eni alveo duxerat, violentus, & torrens, per ma-
gnos transitus profilit, dissimilis sibi. Quippe ad
d lutosus & turbidus fluit. At ubi scopulos ver-
teraverit, spumat: & illi non ex natura sua, sed ex
injuria loci color est. Tandemque eluctatus ob-
stantia, in vastam altitudinem subito deltitutus
radit, cum ingenti circumjacentium regionum
trepitu. Quem perferre gens ibi à Persis collocata
non potuit, obtusis assiduo fragore auribus, & ob
hoc sedibus ad quietiora translatis. Inter miracu-
la fluminis incredibilem incolarum audaciam ac-
cepi. Bini parvula navigia conscendunt: quorum
alter navem regit, alter exhaurit. Deinde multum
inter rapidam insaniam Nili, & reciprocos flu-
tus volutati, tandem tenuissimos canales tenent,
per quos angusta rupium effugiunt: & cum toto
flumine effusi, navigium ruens manu temperant,
magnoque spectantium metu in caput nixi, cum
jam adploraveris, merfosque atque obrutos tanta
mole credideris, longe ab eo, in quem ceciderant
loco navigant, tormenti modo missi. Nec mergit
cadens unda, sed planis aquis tradit. Primum in-
crementum Nili circa insulam, quam modo retu-
li, Philas noscitur. Exiguo ab hac spatio petra
dividitur Græci vocant: nec illam ulli, nisi an-
tistites calcant: illa primum saxa auctum flu-
minis

minis sentiunt. Post magnum deinde spatium duo eminent scopuli, Nili venas vocant incolæ: ex quibus magna vis funditur, non tamen quantâ operire possit Ægyptum. In hæc ora stipem sacerdotēs, & aurea dona præfecti, cum solemnē venit sacrum, jaciunt. Hinc jam manifestus novarum virium Nilus, alto ac profundo alveo fertur, ne in latitudinem excedat objectu montium pressus. Circa Memphim demum liber, & per campestria vagus, in plura scinditur flumina manūque canalibus factis, ut sit modus in derivantium potestate, per totam discurret Ægyptum. Initio diducitur, deinde continuatis aquis in faciem lati ac turbidi maris stagnat: cursum illi violentiamque eripit latitudo regionum, in quas extenditur, dextra lævaque totam amplexus Ægyptum. Quantum crevit Nilus, tantum spei in annum est. Nec computatio fallit agricolam: adeo ad mensuram fluminis responder, quam fertilem facit Nilus. Is arenoso & sitiēti solo & aquam inducit & terram. Nam cum turbulentus fluat, omnem in siccis atque hiantibus locis sæcēm relinquit: & quicquid pingue secum tulit, arentibus locis allinit: juvatque agros duabus ex causis, & quod inundat, & quod oblimat. Ita quicquid non adiit, sterile ac squalidum jacet. Si crevit super debitum, nocuit. Mira æque natura fluminis, quod cum ceteri amnes abluant terras & eviscerent, Nilus tanto ceteris major, adeo nihil exedit, nec abradit, ut contra adjiciat vires, minimumque in eo sit quod solum temperet. Illato enim limo, arenas saturat ac jungit. Debetque illi Ægyptus non tantum fertilitatem terrarum, sed ipsas. Illa facies pulcherrima est, cum jam se in agros Nilus ingessit. Latent campi, opertæque sunt vales: oppida insula-

insularum modo extant. Nullum in mediterraneis, nisi per navigia commercium est. Majorque est lætitia gentibus, quo minus terrarum suarum vident. Sic quoque cum se ripis continet Nilus, per septena ostia in mare emittitur: quodcunque elegeris ex his, mare est. Multos nihilominus ignobiles ramos in aliud atque aliud litus porrigit. Ceterum beluas, marinis vel magnitudine vel noxa pares, educat. Et ex eo quantus sit, æstimari potest, quod ingentia animalia & pabulo sufficienti, & ad vagandum loco, continet. Babilus virorum optimus, in omni litterarum genere rarissimus, auctor est, cum ipse præfectus obtineret Ægyptum, Heracleotico ostio Nili, quod est maximum, spectaculo sibi fuisse delphinorum à mari occurrentium, & crocodilorum à flumine adversum agmen agentium, velut pro partibus prælium. Crocodilos ab animalibus placidis morsuque innoxiiis victos. His superior pars corporis dura & impenetrabilis est, etiam majorum animalium dentibus: at inferior mollis ac tenera: hanc delphini spinis, quas dorso eminentes gerunt, submersi vulnerabant, & in adversum enixi dividebant. Recisis hoc modo pluribus, ceteri velut acie versa refugerunt. Fugax animal audaci, audacissimum timido. Nec illos Tentyritæ generis aut sanguinis proprietate superant, sed contemptu & temeritate. ultro enim insequuntur, fugientesque injecto trahunt laqueo: plerique pereunt, quibus minus præsens animus ad persequendum fuit. Nilum aliquando marinam aquam detulisse, Theophrastus est auctor. Biennio continuo, regnante Cleopatra, non ascendisse, decimo regni anno & undecimo constat. Significatam ajunt duobus rerum potentibus defectio-

M

nem.

nem. Antonii enim Cleopatrarque defecit imperium. per novem annos non ascendisse Nilum superioribus seculis, Callimachus est auctor. Sed nunc ad inspiciendas causas, propter quas æstate Nilus crescat, accedam, & ab antiquissimis incipiam. Anaxagoras ait, ex Æthiopiar jugis solutas nives ad Nilum usque decurrere. In eadem opinione omnis vetustas fuit. Hoc Æschylus, Sophocles, Euripides tradunt. Sed falsum esse, argumentis plurimis patet. Primo Æthiopiam ferventissimam esse, indicat hominum adustus color; & Troglodytæ, quibus subterraneæ domus sunt. Saxa velut igni fervescunt, non tantum medio, sed inclinato quoque die: ardens pulvis, nec humani vestigii patiens: argentum replumbatur: signorum coagmenta solvuntur: nullum materiæ superadornatæ manet operimentum. Auster quoque, qui ex illo tractu venit, ventorum calidissimus est. Nullum ex his animalibus quæ latent bruma unquam reconditur. Etiam per hiemem in summo & aperto serpens est Alexandriæ quoque, quæ longe ab huiusmodi immodicis caloribus est posita, nives non cadunt: superiora etiam pluvia carent. Quemadmodum ergo regio tantis subiecta fervoribus duraturas per totam æstatem nives recipit? Quas sane aliqui montes illic quoque excipiant: nunquam tamen magis quam Thraciæ juga aut Caucasus. Atqui horum montium flumina vere & prima æstate intumescunt, deinde hibernis minora sunt. Quippe vernis temporibus imbres nivem diluunt: reliquias ejus primus calor dissipat. Nec Rhenus, nec Rhodanus, nec Ister, nec Caystrus subjacent malo: æstate proveniunt. Altissimæ sunt & in illis Septentrionalibus jugis nives. Phasis quoque per id tempus &

Borysthenes cresceret, si nives flumina possent contra æstatem magna producere. Præterea si hæc causa attolleret Nilum, æstate prima plenissimus fluere. Tunc enim maximæ & integræ adhuc nives, ex mollissimoque tabes est. Nilus autem per menses quatuor liquitur, & illi æqualis accessio est. Si Thaleti credis; Etesia discedenti Nilo resistunt, & cursu ejus acto contra ostia mari sustinent: ita reverberatus in se recurrit: nec crescit, sed exitu prohibitus resistit, & quacunque mox potuit, inconcessus erumpit. Euthymenes Massiliensis testimonium dicit: Navigavi, inquit, Atlanticum mare. Inde Nilus fuit major, quamdiu Etesia tempus observant: tunc enim ejicitur mare instantibus ventis. Cum resederint, & pelagus conquiescit: minorque discedenti inde vis Nilo est. Ceterum dulcis maris sapor est, & similes Niloticis beluæ. Quare ergo, si Nilum Etesia provocant, & ante illos incipit incrementum ejus, & post eos durat? Præterea non fit major, quo illi flavere vehementius? Nec remittitur incitaturque, prout illis impetus fuit: quod fieret, si illorum viribus cresceret. Quid, quod Etesia litus Ægyptium verberant, & contra illos Nilus descendit, inde venturus, unde illi, si origo ab illis esset. Præterea ex mari purus & cæruleus efflueret, non ut nunc turbidus venit. Adde, quod testimonium ejus testium turba coarguitur. Tunc erat mendacio locus, cum ignota essent externa. Licebat illis fabulas mittere. Nunc vero tota exteri maris ora mercatorum navibus stringitur: quorum nemo narrat nunc cæruleum Nilum, aut mare saporis alterius. quod & natura credi vetat: quia dulcissimum quodque & levissimum sol trahit. Præterea quare hieme non crescit? & tunc

potest ventis concitari mare, aliquanto quidem majoribus. Nam Etesia temperati sunt. Quod si è mari ferretur Atlantico, semel oppleret Aegyptum. At nunc per gradus crescit. Oenopides Chius ait, hieme calorem sub terris contineri: ideo & specus calidos esse, & tepidiorem puteis aquam. itaque venas interno calore siccari. Sed in aliis terris augentur imbribus flumina. Nilum quia nullo imbre adjuvetur, tenuari, deinde crescere per æstatem: quo tempore frigent interiora terrarum, & redit rigor fontibus. quod si verum esset, æstate flumina crescerent, omnesque putei æstate abundarent. Deinde non calorem hieme sub terris esse maiorem. Aqua & specus & putei tepent: quia aëra rigentem extrinsecus non recipiunt. Ita non calorem habent, sed frigus excludunt. Ex eadem causa æstate refrigescunt: quia illo remotus, seductusque aër calefactus non pervenit. Diogenes Apolloniates ait: Sol humorem ad se rapit: hunc exsiccata tellus, tum ex mari ducit, tum ex ceteris aquis. Fieri autem non potest, ut una sicca sit tellus, alia humeat. Sunt enim perforata omnia, & invicem pervia. Sicca ab humidis sumunt aliquando. Nisi aliquid terra acciperet, exaruisset. Ergo undas sol trahit: sed ex his quæ premunt, maxime hæc meridiana sunt. Terra cum exaruit, plus ad se humoris adducit, ut in lucernis oleum illo fluit, ubi exuritur: sic aqua illo incubit, quo vis caloris & terræ æstuantis arcessit. Unde ergo trahitur? ex illis scilicet partibus semper hibernis, Septentrionalibus, unde exundat. Ob hoc Pontus in inferum mare assidue fluit rapidus, non ut cetera maria, alternatis ultro citro æstibus, in unam partem semper pronus & torrens. Quod nisi faceret; hisce itineribus, quod cuique deest, redde-

redderetur; quod cuique superest emitteretur, jam aut siccata essent omnia, aut inundata. Interrogare Diogenem libet, quare, cum Pontus & amnes cuncti invicem commeent, non omnibus locis aestate majora sunt flumina? Ægyptum sol magis percoquit. Itaque Nilus magis crescit. Sed in ceteris quoque terris aliqua fluminibus fiat adiutio. Deinde quare ulla pars terræ sine humore est, cum omnis ad se ex aliis regionibus trahit: eoque magis, quo calidior est? Deinde quare Nilus dulcis est, si illi è mari unda est? Nec enim ulli flumini dulcior gustus.

Ex hisce Senecæ verbis cognoscimus, quænam antiquorum, inprimis Græcorum Physicorum fuerint sententiæ de exundationis Nili causa. Ex quibus tamen nulla vera est, quoniam eis temporibus nemo ad Nili fontes & vicinas gentes ex Europa pervenerat, quoniam ab Ægypto remotissimi sunt. Sed hodie satis ea explorata sunt & vera causa inventa est, quandoquidem tam Lusitani, quam Belgæ & Angli cum gentibus, quæ vicinæ sunt fontibus Nili, commercia exercent in regnis Congo, Angola, Monomotapa, Soffala, Mosambique. Ex hisce cognitum est, fontes Nili esse ingentem lacum Zaire (sive in lacu Zaire) situm in procurrente Africa medio loco inter Orientale & Occidentale litus sub gradu x ab Æquatore versus Austrum, ut priori capite dictum est. Huic lacui vicina sunt multa juga montium, quos Lunæ montes & unum jugum Seth vocant, ita ut Lacus tanquam in valle inter montes jaceat. Quoniam autem loca hæc ab Æquatore versus Austrum jacent, ideo hiemem illis esse, cum nobis æstas est, motus solaris ratio postulat. Sed propter parvam ab Æquatore distantiam frigus nullum sentiunt,

verum pluvias (nivis loco) quotidianas duabus horis ante & post meridiem in regno Congi: nubes Solis conspectum nunquam fere permittunt: eisdem nubibus montium juga quasi testa conspiciuntur, atque in hisce montanis locis pluviae & imbres fere continui, qui tanquam torrentes deorsum ruunt, & omnes in Zaire lacum confluunt, ex hoc in alveum fluvii Nili, Zaire, Cuama & alios qui ex eodem lacu oriuntur, sed ideo non tantâ copiâ exundant, (Zaire tamen singulis annis inundat) sicut Nilus, quia alveus profundior & post brevem tractum in mare se exonerant. Omnes tamen eo tempore crescunt & immensam aquarum vim in mare expiunt. Hinc itaque manifesta est causa exundationis Nili, nempe copia, aquarum proxima causa sunt pluviae continuæ harum autem causa adhuc latet: sed verisimile est eandem esse, quæ nobis hyeme nives generat & pluvias, quæ non tantum in Nilo, sed in nostris quoque fluviiis exundationes efficiunt, ubi nimis cadunt, quod cuivis ex historiis notum est.

Consentit cum hac causa tempus, quo Nili exundatio incipit, & quo desinit. Etenim hyems in regno Congi & montanis illis locis, sive pluviae incipiunt cum nostro vere, medio circiter Martio vel Aprili, (quod tempus illis tanquam Autumnus est, nempe à Martio xxi & ad Junii xxi .) sed minus tunc vehementes ac in Majo, Junio & Julio. In Augusto quoque & Septembri lenes, & medio Septembri desinunt. Exundatio Nili incipit, ut dictum, decimo septimo circiter Junii, hoc nempe seculo. (Nam Herodotus de suo seculo testatur, centum diebus Nilum tunc exundasse, & totidem diebus decrevisse.) Aliquot itaque hebdomadibus prius incipere incrementum Nili necesse est, nempe

pe primo circiter Junii vel in Majo: & antequam
increfcere poffit, debuit jam aliquo tempore pluiffe
in montibus lacui vicinis, hoc eft à Martio ad Ju-
nium vel Majum. Ideo autem tardius hodie exun-
datio incipit, quam olim (nempe tempore Hero-
doticum Aprili videtur cæpiffe) quia ipfe Nilus
per adveftam limofam & terreftrem materiam al-
tiores fecit terras, quas inundabat, & ideo alveus
factus eft profundior & capacior, (ad quod ipfa
fluxus celeritas etiam aliquid fecit) ita ut multo
plus aquæ continere poffit quam olim, & ideo
tardius extra alveum effundatur. Neque dubitan-
dum eft, quin poft multa tandem fecula nulla fit
futura Nili exundatio: perpetuatâ enim alluvione
ita accrefcent vicinæ littoris feu ripæ regiones vel
tractus, ut margines riparum æquent & tandem
altiores fiant fluminis altitudine in aquæ copia
maxima.

Sed nimis multa de Nilo præter opinionem
noftam diximus.

Secundus fluvius ex iis, qui ftato anni tempore
exundant in terras vicinas, eft Niger, fluvius A-
fricæ non minori tractu, quam Nilus, fed minus
celebris. Eodem tempore exundat, quo Nilus.
Leo Africanus decimo quinto Junii die incipere
inundationem ait, & per quadraginta dies adcre-
fcere, totidemque diebus decrefcere. Et incre-
mentum fumente Nigro, cymbâ per totam Ni-
gritarum regionem vehere licet, non tamen fine
magno id fit periculo.

Tertius exundantium eft Zaires Congi fluvius,
ut dictum. Huic adde minores fluvios Congi.

Quartus exundantium fluviorum eft, fluvius
argenteus Brafilix, qui eodem quoque cum Nilo
tempore exundat in adjacentes agros, ut Maffeus
annotavit.

Quintus Ganges.

Sextus, Indus fluvius. Hi duo pluviis mensibus illarum regionum nempe Junio, Julio, Augusto extra alveos suos in terras se effundunt, ubi tunc incolæ factis stagnis aquam colligunt, ut reliquis anni mensibus, cum nullæ ferè pluvix, inde aquam petant. Magnam agris sæcunditatem hæc inundatio affert.

Septimus plurimos complectitur, nempe quatuor vel quinque qui ex lacu Chiamay profluunt mediocri alveo & in sinum Bengalensem se exonerant, transeuntes per regna Pegu, Siam & alia. Qui regiam Siamensem præterfluit, dicitur Menan. Exundatio fit mensibus Septembri, Octobri, Novembri, quo tempore agri recti sunt aquis & in urbibus plateæ ita ut cymbis innumeris ab una domo ad aliam tunc navigetur. Ingentem terræ fertilitatem creat.

Octavus, Macon fluvius Cambojæ, æstivis mensibus inundat. Mappæ illum male exprimunt.

Nonus Fluvius Parana, sive Paranaguasu, eodem modo ut Nilus & argenteus fluvius. Quidam eundem esse volunt cum argenteo.

Decimo. in Coromandeliam Indiæ parte fluvii exundant mensibus pluviis propter copiam aquæ à jugo Garis defluentem.

Vndecimus Euphrates, statis anni diebus Mesopotamiam inundat.

Duodecimus, Fluvius Numidiæ, Sus dictus inundat hyeme.

Alios fluvios, præter hosce, anniversario tempore exundare non memini me legisse: etsi quidam plerisque annis id faciant, nempe Obius fluvius, flavus fluvius Chinæ, &c.

Qui sine ordine vel stato tempore exundent fluvii,

vii, plurimi sunt, imo vix ullus fluvius insignis magnitudinis est, qui non aliquando in terras prorumpat ex alveo suo, ut exemplo Albis, Rheni, Visurgis manifestum est. Et nisi alvei capacitas vel riparum altitudo obstaret, omnes magni fluvii anniversario tempore inundarent, quia in vere plerique augentur valde. Et fieri potest, ut fluvius, qui antea non solebat exundare; incipiat id anniversario tempore facere, nimirum, si pars aliqua alvei propter pulvinos, vel alio modo fiat altior, littora verò non fiant altiora. Sed tunc homines solent aggeres excitare.

Causa exundationum harum unica est aquæ copia, quæ in quibusdam exemplis allatis à nivium resolutione fortassis oritur, sed in plerisque ab imbrium & pluviarum frequentia. Id tamen mirum, cur Indus & Ganges aliis mensibus inundent, quam vicini fluvii ex lacu Chiamay. Cæterum diversitatis, quæ in tempore hic observatur, causa petenda est partim ex anniversariis pluviis in vicinis locis, partim ex montibus & pluviis circa loca fontium, ut de Nilo diximus. Nos ad virandam prolixitatem singula exempla excutere superfedemus. Fluvius Bibara in Francia aliquando sine ullis pluviis aut certe non inusitatis, sic intumescit, ut adjacenti suburbio inferat magnam vastitatem.

Cur autem omnes fere exundationes fecundos faciant agros, causa est, quoniam aqua illa, quæ exundat, est vel pluvialis vel nivosa, quæ aquæ tum propter levitatem spirituosam tum propter sulphuream substantiam, quam in aëre admixtam habent, præ aliis mineralibus valent ad fecunditatem, & salubres sunt. Quod autem in aqua pluvia tales spiritus & sulphur sit, probatur ex vermibus qui in ea generantur. 2. Ex facili putredi-

ne. 3. Ex ipsa destillatione Chymica. Quædam tamen flumina inundatione sua non reddunt fecundos agros. Sed potius steriles, ut Ligeris in Gallia, cum sequana fecundos faciat, pinguem aquam.

PROPOSITIO XXI.

Quomodo fontes prorumpunt explicare.

Propositione quarta explicavimus, unde oriatur aqua, quæ ex fontibus profluit: hic autem querimus, à qua vi aqua illa in terra collecta protrudatur, cum hoc sine violenta terræ remotione non videatur posse fieri. Causæ autem variæ sunt, quæ in loco aliquo fonti viam faciunt. 1. Si in loco sit cavitas quædam, aqua ipsa sine alterius causæ adjumento, exsudet vel stillat in eam, quando rependo ad illam pervenit, & deinde progressu temporis majores sibi vias facit, donec impletâ illâ cavitare effluat & flumen efficiat. Idem etiam fit sine illa cavitare, & si fons in declivitate montis sit vel etiam fastigio. Hanc etiam ob causam frequentes reperiuntur scaturigines in sylvis & locis umbrosis. Etenim aqua pluvia terram humectat, & quia calore solis liberoque aëre non statim extrahitur, allicit paulatim ad se latentem fontis futuri aquam. 2. fontibus via paratur & terra remouetur à spiritibus, qui aquis in terra adhuc existentibus admixti sunt, item aquæ rarefactio in terra, propter quam amplio-rem locum poscit. Etenim aquæ dum adhuc intra terram abduntur, plures spiritus gerunt. Ignis quoque subterranei non parum ad hoc faciunt. 3. Ab imbris sæpe fontes proferuntur in lucem, nimirum imbres poros terræ ampliores reddunt, cum aqua fontis latentis se conjungunt, atque ita hæc illam sequitur propter mutuam conjunctionem & coherentiam. 4. A terræ motu interdum

fontes

fontes aperiuntur. Ita Ladon flumen, qui inter Helim & Megalopolim olim medius erat, terrarum motus effudit. 5. Hominum industriâ interdum proferuntur, qui terras effodiunt. 6. Multi fontes ab animalibus detecti sunt, qui rostris suis terram solent eruere. Sic primum falsum fontem ex illis, qui Lunæburgenses salinas efficiunt, porcus detexit. Etenim cum eruisset terram, factâque foveâ aqua profuisset, quæ foveam implebat, porcus juxta consuetudinem suam in ea decubuit. Dein cum surrexisset atque calore solis exsiccatum esset dorsum, conspexerunt quidam candidum in eo colorem, quem cum accuratius contemplarentur, sal esse deprehenderunt candidum. Inead fontem decursum est, atque dein plures quæsi & inventi. Vnde urbs omnes fere suas divitias omnemque splendorem obtinet. Porcus quadripartitus & infumatus in hunc usque diem asservatur in curia Lunæburgensi, ubi dependent à trabe, ita tenues factæ diuturnitate temporis, ut nihil præter corium esse videantur.

PROPOSITIO XXII.

Dato loco in terra, inquirere, an possit in illo fons seu puteus fieri.

Signa hujusce inquisitionis Vitruvius docte explicat libr. VIII Architecturæ cap. I. ex quo Plinius & Palladius desumsere. Bessonus quædam addidit in libro edito, anno 1569. Nos ipsa Vitruvii verba apponemus: Si fontes (inquit) non profluent, quærenda sub terra sunt capita, & colligenda: quæ sic erunt experiunda, uti procumbatur in dentes, antequam solexortus fuerit, in locis quibus erit quærendum, & in terra mento collocato & fulceto, prospiciantur eæ regiones. Sic

enim non errabit excelsius quam oporteat visus, cum erit immotum mentum: sed ad libratam altitudinem in regionibus certa finitione designabit. Tunc in quibus locis videbuntur humores se concrispantes, & in aëra surgentes, ibi sodiatur: non enim in sicco loco hoc signum potest fieri. Item animadvertendum est quærentibus aquam, quo genere sint loca. Certa enim sunt, in quibus nascitur: In creta, tenuis & exilis & non alta est copia, ea erit non optimo sapore. Item sabulone soluto, tenuis: sed si inferioribus locis invenietur, ea erit limosa & insuavis. In terra autem nigra sudores & stillæ exiles inveniantur, quæ ex hybernis tempestatibus collectæ in spissis & solidis locis subsidunt, eæ habent optimum saporem. Glarea vero mediocres & non certæ venæ reperiuntur, eæ quoque egregia sunt suavitate. Item sabulone masculo, arenaque & carbunculo, cerriores & salubriores sunt copię, eæque sunt bono sapore. Rubro saxo & copioſæ, & bonæ, si non per intervnia dilabantur & liqueſcant. Sub radicibus autem montium, & in saxis filicibus, uberiores & affluentiores, eæque frigidiores sunt & salubriores. Campestribus autem fontibus salæ, graves, tepidæ, non suaves: nisi quæ ex montibus sub terra submanantes erumpunt in medios campos, & ubi sunt arborum umbris contactæ, præstant montanorum fontium suavitatem. Signa autem quibus terrarum generibus suberunt aquæ, præter quod supra scriptum est, hæc erunt: si inveniantur nascentia tenuis juncus, salix erratica, alnus, vitex, arundo, hederæ, aliaque quæ ejusmodi sunt, quæ non possunt nasci, nec ali per se, sine humore. Soleat autem eadem in lacunis nata esse, quæ fidentes præter reliquum agrum excipiunt aquam ex imbr-

lumbribus, & agris per hyemem, diutiusque propter capacitatem conservant humorem, quibus non est credendum. Sed quibus regionibus & terris, non lacunis, ea signa nascuntur non sata, sed naturaliter per se creata, ibi est querenda. In quibus locis ex non significabuntur inventiones, sic erunt experiundæ. Fodiatur quoque versus locus, latus pedes tres, altus ne minus pedes quinque in eoque collocetur circiter solis occasum scaphium æreum, aut plumbeum, aut pelvis, ex his quod erit paratum: idque intrinsecus oleo ungatur, ponaturque inversum & summa fossura operiatur arundinibus, aut fronde, supra terra obruatur: tum postero die aperiatur, & si in vase stillæ sudoresque erunt, is locus habebit aquam. Item si vas ex creta factum non coctum, in ea fossione eadem ratione opertum, positum fuerit, si is locus aquam habuerit, cum apertum fuerit, vas humidum erit, & etiam dissolvetur ab humore. Vellusque lanæ si collocatum erit in ea fossura, in sequenti autem die de eo aqua expressa erit, significabit eum locum habere copiam. Non minus si lucerna concinnata, oleique plena & accensa, in eo loco operata fuerit collocata, & postero die non erit exusta, sed habuerit reliquias olei & ellychnii, ipsaque humida invenietur, indicabit eum locum habere aquam: ideo quod omnis tepor ad se ducit humores. Item in eo loco ignis si factus fuerit, & percalefacta terra, & adusta, vaporem nebulosum ex se suscitaverit, is locus habebit aquam. Cum hæc ita erunt pertentata, & quæ supra scripta sunt signa inventa, tum deprimentus est puteus in eo loco: & si caput erit aquæ inventum, plures sunt circa fodiendi, & per specus in unum locum omnes conducendi. Hæc autem maxime in mon-

tibus & regionibus septentrionalibus sunt quærenda, eo quod in his & suaviora, & salubriora, & copiosiora inveniuntur: averſi enim ſunt ſolis curſui, & in his locis primum crebræ ſunt arbores & ſylvoſæ, ipſique montes ſuas habent umbras obſtantes, ut radii ſolis non directi perveniant ad terram, nec poſſint humores exurgere. Intervalla quoque montium maxime recipiunt imbres, & propter ſylvarum crebritatem, nive ibi ab umbris arborum & montium diutius conſervantur: deinde liquatæ per terræ venas petcolantur, & ita perveniunt ad infimas montium radices, ex quibus profluenteſ fontium erumpunt fluctus. Campeſtribus autem locis contrario non poſſunt haberi copiæ, quæ & ſi ſint, non poſſunt habere ſalubritatem, quod ſolis vehemens impetus, propter nullam obſtantiam umbrarum eripiendo fervens ex planitie camporum humorem: & ſi quæ ibi ſunt aquæ apparentes, e his, quod eſt leviffimum tenuiffimumque & ſubtili ſalubritate, ær avocans diſſipat in impetum cœli: quæque graviffimæ duræque & inſuaveſunt partes, eæ in fontibus campeſtribus relinpuuntur.

Sed hodie neglectis ſignis per effoſſionem terræ ad ingentem ſæpe profunditatem res tentatur, & plerunque inveniuntur fibræ & capita fontium ſeu puteorum, vel ipſi putei & fluvii.

Alii ſuperſtitioſè per ramum coryli certo plantarum aſpectu abſciſſum id cognoscere volunt.

PROPOSITIO XXIII.

Dato loco, efficere in eo fontem ſeu puteum, ſi fieri poſſit.

Afferemus iterum verba Vitruvii, quippe Vi

in hisce operibus versati, cum nos nunquam huic operi manum admoverimus. Capite VII ita loquitur: In puteorum autem fossionibus non est continenda ratio, sed acuminibus solertiaque magna naturales rerum rationes considerandæ, quod habet multa variaque terra in se genera. Est enim uti reliquæ res, ex quatuor principiis composita, & primum est ipsa terrena, habetque ex humore aquæ fontes. Item calores, unde etiam sulphur, alumen, bitumen nascitur, aërisque spiritus immanes, qui cum graves, per intervenia fistulosa terræ, perveniunt ad fossionem puteorum, & ibi homines offendunt fodientes, naturali vapore obturant in eorum naribus spiritus animales: ita qui non celerius inde effugiunt, ibi interimuntur. Hoc autem quibus rationibus caveatur, sic erit faciendum. Lucerna accensa demittatur, quæ si permanserit ardens, sine periculo descendetur. Sin autem eripietur lumen vi vaporis, tunc secundum puteum dextra ac sinistra defodientur æstuaria, ita (quemadmodum per nares) spiritus æstuariis dissipabuntur. Cum hæc sic explicata fuerint, & ad aquam erit perventum, tunc puteus ita sepiatur structura, ne obturentur venæ. Sin autem loca dura erunt, aut in inum venæ penitus non fuerint, tunc signinis operibus ex testis, aut à superioribus locis excipiendæ sunt copiæ. In signinis autem operibus hæc sunt faciendæ, uti arena primum purissima asperrimaque paretur, cementum de silice frangatur ne gravius quam libarium, calx quam vehementissima mortario miscetur, ita ut quinque partes arenæ ad duas calcis respondeant: mortario cementum addatur, ex eo parietes in fossâ ad libramentum altitudinis futuræ depressa, calcetur vestibis ligneis ferratis.

Parie.

Parietibus calcatis in medio quod erit terrenum exinaniatur ad libramentum imum parietum, & exaquato solo ex eodem mortario calcatur pavementum ad crassitudinem, quæ constituta fuerit. Ea autem loca si duplicia aut triplicia facta fuerint, uti percolationibus aquæ transmutari possint, multo salubriorem ejus usum efficient. Limus enim cum habuerit quo subsidat, limpidior aqua fiet, & sine odoribus conservabit saporem: si non, salem addi necesse erit, & extenuari.

PROPOSITIO XXIV.

An aqua fontis sit salubris, probare.

De hoc ita Vitruvius: Expirationes autem & probationes eorum sic sunt providendæ. Si erunt profluentes & aperti, antequam duci incipiantur, aspiciantur, animoque advertantur, qua membratura sint, quicirca eos fontes habitant homines. Et si erunt corporibus valentibus, coloribus nitidis, cruribus non vitiosis, non lippis oculis, erunt probatissimi. Item si fons novus fuerit fossus, & in vas Corinthium, sive alterius generis, quod erit ex ære bono, ea aqua sparsa, maculam non fecerit, optima erit. Itemque in aheno si ea aqua deservescat, & postea requieta & desusa fuerit, neque in ejus aheni fundo arena, aut limus inveniatur, ea aqua erit item probata. Item si legumina in vas cum ea aqua coniecta ad ignem posita, celeriter percocta fuerint, indicabunt eam aquam esse bonam & salubrem. Non etiam minus ipsa aqua, quæ erit in fonte, si fuerit limpida & perlucida, & quocunque pervenerit aut perfluxerit, si muscus non nascetur, neque juncus, neque inquinatus ab aliquo inquinamento is locus fuerit,

it, sed puram habuerit speciem, inmutetur his signis, esse tenuis, & in summa salubritate.

PROPOSITIO XXV.

Dato loco, apparentem fontem in illo efficere, si fieri possit.

Apparens fons dicitur, ut propof. v. docuimus, ubi aqua profluit missa ex alio loco altiore per subterraneum ductum. Fieri autem poterit talis fons, si sit in vicinia aliquis lacus, vel fluvius, vel fons. Nimirum cuniculus agendus erit subrus terram à dato loco ad lacum vel fluvium vicinum, per quem aqua fluat ad datum locum, ut sequenti Propositione docebimus.

PROPOSITIO XXVI.

A dato fonte vel fluvio ad datum locum, fluvium deducere.

Si fons vel datus fluvius sit altior quam datus locus, facilis erit opera. Id autem exquiratur per instrumenta geodætica; & ipsa operatio dicitur librare loca producendis aquis, & differentia inter altitudinem fontis & loci dati dicitur libramentum ducendi fluvii. Effodiendus itaque est alveus à fonte vel fluvio ad datum locum, cujus libramentum magnum vel parvum sit prout celerem vel tardum volumus esse fluvium. namque Problema est Indeterminatum. Plerumque in aquæ ductibus, ut mediocris sit celeritas fluxus, ita observatur, ut in longitudine alvei ducentorum pedum depressio non sit minor semipede (aliàs enim non fluat aqua vel nimis tarde. Vitruvius in centum pedibus requirit non minorem semipede depressionem) neque major integro pede
vel

vel ad summum sesquipede (aliàs enim nimis cito & incitato cursu fluat.) Quod si fons non sit altior dato loco, instrumentis opus est, de quibus Mechanici consulendi sunt, ut etiam de multis aliis quæ in hoc negotio sunt consideranda. Galli quidam scribunt, quod Sequana spatio quo fertur ab armamentario Parisiensi ad hortum Regium Tuilleries, in quingentis hexapedis vix uno pede deprimatur. Cæterum sciendum est in quibusdam alvei partibus non opus esse tantâ depressione si in præcedenti parte alvei aqua inpetum adeptæ sit. Per hoc problema etiam fit conjunctio fluviorum duorum, quando ex uno fluvio in alium alveus ducitur, ut navigatio possit institui ex uno in alterum, ut ex Duina in vicinum. Ex Tanai in Volgam. Ex flavo fluvio Chinæ in Nanchinensem.

PROPOSITIO XXVII.

Quidam fluvii insignes sunt & celebres propter longos tractus, quidam propter latitudinem, quidam propter celeritatem cursus, quidam propter aquam quam vehunt, peculiare proprietates: quidam propter duas pluresve causas ex hisce. Propositionis veritas nulla indiget probatione. Illos tantum hic fluvios enumerabimus, qui maximi sunt ex omnibus, nempe longissimi tractus, qui etiam latitudine insignes sunt: tales numerantur in tota Tellure hæcenus cogniti sedecim: nempe Nilus Obius, Jenisceæ, fluvius Orellana, Argenteus, Parana, Maragnon, Omaranna, Ganges, Danubius Canadensis sive Laurentii fluvius, Niger fluvius Africae, Nubia, VVolga, Jansu Chinæ, Flavius fluvius Chinæ.

Post hosce, insignes sunt alvei amplitudine seminus longi tractus, ac priores, numero viginti circiter

circiter, nempe Indus, Zaires, Cuama, fluvii è lacu Chiamay, Euphrates, Tanais, Petzora, Pefida, Tabab Siberiæ, Yrtiis Syberiæ, flumen S. Spiritus in Africa, Amana in Castilia Americana, fluvius Magdalenæ, fluvius Juliani in Chica, fluvius S. Jacobi in Peru, Rhenus, Albis, Mosa, Borysthenes, Totonteac in nova Albione.

Maximorum fluviorum decem tractus hic tantum contemplabimur, accuratiorem explicationem cum reliquis fluviis Speciali Geographiæ relinquentes.

1. NILUS, Niger, Ganges, directa fere via incedunt, reliqui plurimis & ingentibus curvaturis. Nili fons in lacu Zaire statuitur, in latitudine Australi x grad. ostium Canobicum in latitudine Septentrionali x x x i graduum. fluit ab Austro versus Septentrionem: alicubi se effundit per latum spatium, alibi admodum angustus: Cataractas duas habet. Tractus seu longitudo est milliarium circiter 630 Germanicorum, sive Italicorum 2520, pro quibus ponere licet 3000 propter curvaturas. Inundat singulis annis.

2. NIGER fluvius Africæ, sive Senega: Fons ejus in latitudine x i graduum Septentrionali, è lacu: quidam subterraneo meatu à Nilo eum derivari scribunt: indicium esse, quod singulis annis exundet eodem tempore, quo Nilus. Ostium unum est in latitudine x i eadem, quæ fons. Sed remotissimum ab Æquatore est x v latitudinis. Fluit ab Oriente in Occidentem. Abscondit se alicubi sub terram & iterum emergit. Tractus ejus est 600 circiter milliar. German. Sed minor erit, si insignes ejus curvaturas omnino negligas, major, si omnes adnumeres.

3. GANGES, in Asia. Fons ejus remotissimus poni-

ponitur in latitudine Septentrionali 43^o graduum in Tartaria (sed quidam retrahunt ad 33 grad.) Ostium in latitudine eadem 22 gr. Fluit à Septentrione in Austrum. Tractus est 300 circiter miliarium Germanicorum. Exundat singulis annis.

4. **OBIUS**, fluvius Asiæ, ingens & ubique latus. Fons in 48 gradu latitudinis Septentrionalis ponitur in Tartariæ montibus prope turrim lapideam. Ostium in 69 gr. latitudinis. Tractus est 400 circiter miliarium Germanicorum, neglectis curvaturis. Divaricat se in duo brachia in Siberia, vel potius ramum de se emittit, qui curvo peracto itinere redit in illum, atque sic insulam efficit, in qua à Moscis & Siberis extructa est urbs, dicta Jorgoet.

5. **JENISCEA**, fluvius Asiæ, hætenus ignotus Geographis, sed à Moscis observatus. Multo major deprehensus est, quam Obius, à quo versus ortum abest, itinere x hebdomadam versus Tartariam: ad ejus ripam Orientalem juga montium longo tractu porriguntur: in Occidentali ripa habitat populus quem Tingæsos appellant. Singulis annis exundat in vere ad 70 miliaria in terras Occidentales, quo tempore Tingæsi cum pecore suo & suppellectile se conferunt in montes ripæ Orientalis. Fons & ostia ignorantur: tractus non minor esse putatur, quam Obii fluvii.

6. **PESIDA** fluvius, aliquot dierum itinere versus ortum à Jeniscea remotus: ejus Orientalis ripa existimatur attingere Chinam & regnum Cathajæ, si modo hoc existit. Fons & ostia ignorantur: non quidem est è maximorum fluviorum numero: Sed hic pauca de eo monui, quoniam à Geographo nullo hætenus ejus mentio facta fuit, sicut etiam de Jeniscea & Yrtiis fluvio.

7. *Fluvius ORELLANA*, in America, Rio de Orellana (à Francisco Orelli) censetur inter maximos totius Telluris. Fons in regno Peru provincia Quito, in latitudine 12 gr. australi (non noc omnino certum est:) ostium xv leucarum in latitudine 2 gr. australi. Tractus dicitur esse 500 leucarum Hispanicarum, propter magni flexum numerum, cum revera non superet 700 leucas. Alii confundunt cum eo, vel ejus ramum esse volunt fluvium Maragnon. Latus alicubi est 4 vel 5 leucarum, sed non tam ex fonte, quam plurius in montanis Peru cadentibus aquas accipit, unde mensibus siccis illorum montium non vehit aquæ multum, de quo vide Cap. Et quidam moderni multum detrahunt de ejus magnitudine.

8. *Fluvius argenteus, ARGYROPO TAMVS*, Rio de la Plata, Brasiliæ. Fons in montanis Peru. Ostium in latitudine 37 gr. australibus idque esse dicitur 20 leucarum: Sed quando exundat plurima ostia habet, quæ quidam pro uno numerant: alio tempore non vehit multum aquæ. Incolæ vocant Paranaguasu, hoc est, Aquam tanquam mare, ut quidam annotant.

9. *OMARANNAN*, itidem Brasiliæ fluvius est in montanis Peru profluens longo tractu. Tres hi magni fluvii Brasiliæ, nempe Orellana, Argenteus, Omarannan in mediterraneis locis Brasiliæ alicubi coeunt in quibusdam lacubus, & ex iis rursum emergunt se juncti.

10. *CANADENSIS*, sive fluvius S. Laurentii, inter Canadam & novum Belgium fluit in America Septentrionali. Fons in lacu qui dicitur des Iroquois: ostium amplum in 50 gr. latitud. Septentr. magna ejus est latitudo: tractus non minor 600 miliaribus Germanicis.

PROPOSITIO XXVIII.

In quorundam fluviorum alveis reperiuntur voragines & gurgites.

Sic in fluvio Sommona Picardiæ inter Ambiarum & Abbavillam cæcus gurgis est, in quem aquæ tanto impetu præcipitant, ut sonitus ad aliquot milliaria audiat. Plura exempla colligant studiosi harum rerum.

PROPOSITIO XXIX.

Aqua fluviorum est levior quam marina.

Causa facilis est cognitu, nimirum marina multum salis gerit.

Inde fit, ut quædam in fluviis mergantur ad fundum sive subsideant, quæ in mari natabant vel fluitabant, quod frequenter accidit in navibus valde oneratis, quæ à mari sustinentur, in fluviis, ubi fere in portu navigant, merguntur. Varia autem est proportio inter hæc aquas, quia neque marina ubique ejusdem gravitatis, neque diversorum fluviorum aquæ. Est tamen proportio circiter, quæ 46 ad 45, ut 46 uncia aquæ fluvii æque ponderent 45 marinis.

CAPVT XVII.

De Aquis mineralibus, Thermis & Acidulis. Quoniam multa liquidorum sive aquarum sunt species, quarum peculiare proprietates admirantur homines, ideo Geographi de illis quoque solent agere, sed omnes hactenus prater nudam appellationum recitationem & recensionem quorundam mirabilium fontium nihil solida cognitionis adjunxerunt. Nos vero magis clare & cum causarum explicatione hac tractabimus.

PROPOSITIO I.

NVlla aqua pura est & elementaris, sed continet siue admixtas habet particulas, quales in terrestribus corporibus reperiuntur, non tamen particulae terrae sunt, sed variae, spiritus, olea, &c. Mineralis autem aqua vocatur illa, quae tot talesve particulas diversae ab aqua natura continet, ut ex eis nascatur vel habeat insignes qualitates, quas sensu deprehendimus, siue sensu notabiles admodum vel sensum ferientes proprietates.

Propositionis veritas per experientiam manifesta est, & tam ex saporum differentiis quam ex ipsa destillatione probatur: atque omnes Physici consentiunt, aquam simplicem sicut & alia elementa ab aliis secreta in natura non existere. Causa est varia & perpetua. particularum agitatio. In aquis autem, ut in specie de nostra materia dicamus, causa admixtionis heterogeneorum
spi.

spirituosas particulas accipiunt. Pluvia vero & ipse aër aquam tangens multis diversis particulis constant.

Aquæ itaque universæ admixtas habent alterius naturæ particulas: sed non in omnibus eadem harum copia. In Rhenum quidem, Danubium, Albim, atque in omnes majores fluvios influunt alii rivi imprægnati mineralibus particulis, & quidem tali copia ut sensum feriant: sed quia præter hosce multi alii rivi in eos influunt non imprægnati tali ad sensum notabili copiâ particularum heterogenearum, & præterea maxima pars aquæ, quam vehunt, ex pluvia est & aëre, ideo quoque in istis majoribus fluviiis non manifeste sentiuntur particula illæ heterogenæ, quas diximus illos accipere; sed arte debent ab illis separari, si quis illas ad sensum cognoscere velit. Cæterum illas demum minerales appellabimus, quæ aliquam insignem proprietatem præter vulgarem aquam habent, hoc est, quæ heterogenearum particularum talem continent admixtionem, ut insignem & sensibilem inde possideant qualitatem.

PROPOSITIO II.

Aquæ minerales triplices sunt.

Quædam corporeæ, (deest aptius vocabulum) aliæ spirituosæ, reliquæ simul corporeæ & spirituosæ. Aquas corporeas minerales voco, quæ continent particulas solidas & rixas mineralium sive fossilium, ita ut hæ ab aqua separari & visu cognosci possint. Corporeæ hæ duplices sunt: quædam particulas illas fossilium sive mineralium vehunt insignis magnitudinis, ut sine aliqua opera vel levi certe in aqua conspiciantur; neque sunt proprie loquendo aquæ commixtæ. Tales sunt, de quibus

quibus in præcedenti capite, propositione diximus, quod in eorum aqua granula auri, argenti, &c. contineantur, qui fluvii propterea dicuntur auriferi, argentiferi, &c. Verum hæ aquæ non sunt, propriè loquendo, appellandæ minerales, quoniam non habent illas particulas sibi commixtas sed liberas, neque ab illis ullam accipiunt proprietatem vel qualitatem: quoniam tamen tales quoque fluvios homines admirantur, & habet illorum explicatio magnam affinitatem cum aquarum mineralium propriè dictarum enodatione, ideo sub generali mineralium appellatione comprehendere volui. Possunt ad hanc classẽ reduci fontes bituminosi, &c.

Corporeæ vero minerales aquæ, magis propriè dictæ, sunt, quæ solidas quidem particulas fossilium continent, sed adeo exiguas, & parvas, penitusque commixtas, ut visu non statim dignoscantur, sed vel arte vel longo temporis tractu subsidentes & concrecentes in sensilem collectionem sive copiam redigantur, ut sunt fontes salsi, sulphurei, &c. & aquæ Chymicæ, in quibus metalla dissoluta.

Aquæ spirituosæ sunt, quæ volatile tantum spiritum, qualis in mineralibus reperitur, non verò fixas particulas continent, & propterea nullæ ex illis possunt elici visu notabiles.

Aquæ corporeæ simul & spirituosæ dicentur à nobis illæ, quæ & fixas sive solidas & volatiles seu spirituosas mineralium particulas in se habent. Specierum harum exempla afferemus in sequenti.

PROPOSITIO III.

Quomodo aqua minerales generentur explicare,

N

1. Si

1. Si aqua feratur rapido cursu per subterraneos meatus, in quibus terræ metallicæ & minerales minus densæ sunt, manifestum est, quod ab hisce aqua illa abripere potest & secum avehere granula istorum mineralium. Hæc itaque est generatio aquarum mineralium corporearum grana vehentium.

2. Si sint mineralia imperfecta, vel minus densa, ut vitriolum, sulphur, &c. vel etiam salia, quæ suâ naturâ facile uniuntur aquis, per talium mineralium terras sive fodinas si feratur aqua aut rivus, vel si rependo per hasce terras (sine alveo vel ductu, ut in generatione fontium explicavimus capite præced. proposit.) aqua perveniat ad fontem, habebit hæc admixtas atomos istorum mineralium, & erit aqua mineralis corporea subtilis commixtionis secundum atomos. An verò aqua possit atomos metallorum per istum modum sibi unire dubitatur, quoniam ea dura sint & solida, neque facile uniuntur aquæ. Ego fieri id posse existimo, sed non ab aqua simplici, sed à vitriolata & falsa spirituosa, quæ similis sit aquæ forti Chymicorum. Sicut enim hæ aquæ fortes solvunt metalla in atomos & sibi intimè uniunt, ita ut non ad fundum cadant, nisi arte separentur: ita quoque si tales aquæ ferantur per terras metalles, poterunt metallicas particulas in atomos solvere & sibi unire. Hoc itaque modo explicata est generatio aquarum mineralium corporearum secundæ classis.

3. In terræ visceribus antequam generentur metalla, vapores & fumi condensantur ad extraneos petrarum angulos, quibus adhærent; & primò mollem in substantiam coeunt, deinde condensantur. Si itaque aquæ ferantur vel repant per terras, ubi

tibi tales vapores sunt & excitantur, imprægnantur illis, & ita fiunt aquæ minerales spirituosæ metallicæ. Mineralia vero imperfecta alio modo efficiunt aquas minerales suæ naturæ, nimirum quia ipsa à calore subterraneo vel proprio calefacta emittunt spiritus, vapores, ut sulphur, vitriolum, sal, carbones, &c. Et tales fumi & exhalationes continuè fiunt in locis talium mineralium, per quæ si aqua repat, imprægnabitur illo spiritu. Sunt, qui existimant, spirituosas hasce aquas generari posse à sola delatione per metallicas terras, vel à diuturna mora super eas sive in fodinis earum: sed certum est ex experientia, quod aquæ nullam accipiant à metallis & mineralibus qualitatem, si vel centum annis hæc in illa immersa jaceant. Opinione itaque hac rejecta, dicemus generari illas aquas, sive spiritum accipere 1. à semine metallorum, ut ita dicam, sive à primordiis. 2. Vel dicemus illas aquas jam imprægnatas esse aliis subtilibus spiritibus vitrioli, salis, quorum beneficio è duris metallis extrahatur spiritus: sed huic causæ vel modo generationis minus tribuo, quia iterum de generatione aquæ spirituosæ mineralis vitrioli & salis quæstio erit.

4. Ex hisce simul patet, quomodo aquæ minerales, quæ simul corporeæ sunt & spirituosæ generentur.

PROPOSITIO IV.

Aquarum mineralium innumera sunt species pro varietate & diversitate particularum, quas continent ex diversis mineralibus.

In præcedenti propositione ostendimus & explicavimus, quomodo aquæ minerales accipiant particulas illas, (ex quibus admirandæ earum

qualitates oriuntur) à mineralibus sive fossilibus. Quoniam itaque varix sunt mineralium species, inde fit ut etiam varix sint & qualitibus admodum differentes aqux minerales, imò infinitx ferè. Neque enim ab una tantum mineralis specie singulx aqux sunt imprægnatæ, sed simul à pluribus plurimæ. Quare aqux minerales erunt simplices vel mixtæ. Et mixtæ vel è duobus vel è tribus vel è quatuor vel è pluribus fossilibus aliquid habebunt.

Inde 1. aqux metallicæ, nempe aureæ, argenteæ, æreæ, stannæ, plumbeæ, ferreæ.

2. Aqux salium, nempe salis communis, nitrosæ, aluminosæ, vitriolatæ, &c.

3. Aqux bituminosæ, sulphureæ, antimoniales, carbonum, ambræ, &c.

4. Aqux terrarum & lapidum, nempe calcarix (quæ è lapide calcario acceperunt particulas) cretaceæ, ochræ, cinnabaris, marmoreæ, alabastrinæ.

5. Aqux mercuriales, &c.

Denominationes hæ sive species aquarum intelligendæ sunt juxta triplicem modum, quo in Propositione secunda diximus aquas minerales esse, sive ex fossilibus particulas accepisse, nempe 1. aliæ corporeæ, & quidem vel ad sensum manifestum, vel corporeæ per subtilem & accuratam commixtionem. 2. aliæ spirituosæ. 3. aliæ corporeæ simul & spirituosæ. Hæ differentix ad singulas mineralium aquarum species applicandæ sunt. Nimirum (ut uno vel altero exemplo id ostendamus) aureæ aqux sunt 1. corporeæ quæ grana auri vehunt ejus magnitudinis, ut in sensum incurrant levi operâ, neque ea sibi admixta accuratâ coherentiâ habent. 2. corporeæ quæ ad-

modum

modum exiguas auri particulas, & quidem arcu-
fatis ipsi aquæ commixtas possident, quales exi-
stere puto, etsi in natura auri vel minima granula
in aqua petunt fundum, posse tamen tales esse, ma-
nifestum est ex aqua regia Chymicorum, in qua
aurum in atomos dissolutum est. Sed hæc aqua
regis non est simplex: ideo neque aquæ illæ, quæ
in natura reperiuntur admixtas habere atomos
auri, aliis mineralium particulis carent. 3. aureæ
spirituosæ, quæ spiritum & vaporem in terra con-
cepit, ex quo aurum generari solet. 4. aureæ cor-
poreæ simul & spirituosæ, quæ & atomos auri &
vaporem generandi auri possident.

Eodem modo quadruplicem hanc differentiam
applicare debent lectores ad singulas aquarum
mineralium species tam simplices, quam mixtas,
(unde innumeræ species existunt, quandoquidem
vel corpora fossilium, vel spiritus, vel unius corpus
cum alterius Spiritu sunt conjuncta in aqua.) Sic
aquæ plumbeæ quadruplices, nempe 1. corporeæ
manifestò. 2. corporeæ subtili mixtione. 3. Spi-
ritu plumbi infectæ. 4. Spiritu simul & atomis
plumbi imprægnatæ. Sic ad vitriolatas, sulphu-
reas, mercuriales aquas, &c. applicandæ sunt
quatuor illæ diversæ participationes mineralium,
& magis quidem ad hæc, nempe ad falsas, vi-
triolatas, sulphureas, quoniam in hisce ipsa natu-
ra quadruplicem istam varietatem exhibet, in me-
tallis dubito, an corporeæ subtilis mixtionis exi-
stant per naturam: raræ quoque sunt spirituosæ
metallicæ: sed frequentissimæ sunt aquæ salium,
sulphuris, &c. tam corporeæ quam spirituosæ,
quoniam & in pluribus terræ locis hæc fossilia re-
periuntur, & in majori copia, & facile patiuntur
abradi particulas suas, fumum quoque & vapo-

rem frequenter emittunt. Explicabimus exemplo uno quadruplicem hanc varietatem participationis, & quidem in auro 1. In capite præcedente Propos. xvi. enumeravimus rivos, qui grana auri vehant & gaza hac accolas exhilarent quales in Tyrolensi Comitatu & vicinis locis multi sunt, & diximus, ipsum Rhenum, Albim, Danubium atque majores fluvios plerosque in quibusdam locis vehere grana auri (sicut etiam aliorum metallorum & mineralium) quoniam rivos auriferos accipiunt. Rhenus auri granula luto & arenæ commixta vehit plurimis locis sed præcipue ad hæc: 1. Prope Curiam in Rhætia. 2. Ad Meinfeldiam. 3. Ad Eglinsau. 4. Ad Seckingam. 5. Ad oppidum Augt. non procul à Basilea. 6. Ad Novoburgum. 7. Ad Seltz. 8. Ad VVormatiam. 9. Ad Moguntiam. 10. Ad Bacherach. 11. Ad Bononiam, &c. Rivos auriferos, quos Rhenus accipit, videre poterunt lectores in Thurnheusero, sicut etiam illos, quos Danubius & Albis. In hujus, Albis nempe, aqua, reperiuntur granula auri: 1. Ad Leutmeritz in Bohemia. 2. Ad Purn. 3. Ad Dresdam in Mísnia. 4. Ad Torgani. 5. Ad Magdeburgum. 6. Ad arcem Lauenburg, quinque miliaribus ab Hamburgo. Plurimos auriferos rivos vide in citato Thurnheuseri libro, ubi etiam aliorum metallorum & mineralium veâtrices videre poteris.

Hæ itaque aquæ sunt aureæ corporeæ primi modi nempe granosæ, quæ minus propriè minerales vel aureæ dici possunt, quoniam aurea granula non sunt aquæ permixta, sed tantum à rapido vel celeri cursu aquæ devehuntur: & ipsæ aquæ simplices sunt. 2. Aquæ aureæ corporeæ, subtilis commixtionis, nempe cujus aquæ atomi permixtæ sunt

sunt & unitæ atomis auri, sicut diximus esse aquas Chymicorum Regis, quæ aurum dissolvunt & sibi per atomos uniunt. Quoniam itaque in natura esse possunt aquæ similes aquis chymicorum, si illæ per aureas terras, vel fodinas ferantur, abradent & dissolvent quasdam ab eis atomos aureas cum terreis. Tales aquæ aureæ esse videntur plurimi rivi, quos Thurnheuserus auri participes esse scribit & enumerat in Descriptione Danubii, Rhœni, &c.

3. Aquæ aureæ spirituosæ paucae sunt & nonnullæ fortasse ex iis, quos enumerat nominatus Thurnheuserus. Minus autem sensiles vel notæ sunt tales aquæ, quoniam raræ & in parva copia sunt aureæ terræ & fodinæ, præterea, ubi sunt, minima aliorum mineralium copia simul adest, unde aqua multo plures spiritus accipit. Participes tamen spirituum aureorum statuuntur rivi quidam in astis Bohemiæ Alpihus, in Silesia & monte, quem vocant Fichtelberg: piperinæ quoque thermæ in Curienti Episcopatu imprægnatæ esse creduntur tali spiritu, sed propter aliorum admixtionem in majori copia minus sensilem qualitatem aquæ acceperunt ab illo.

4. Aquæ aureæ, quæ simul & atomos auri & spiritum vehant, sunt quædam ex rivis à Thurnheusero annotatis.

Addamus exemplum aquarum salinarum.

1. Salsæ corporeæ, quæ nempe particulas salis crassiores neque accurate mixtas vehunt, plurimæ sunt, & satis cuivis notæ, ut fontes quidam ex quibus sal conficitur: ipsa marina aqua huc pertinet, si crassior facta sit ignis calore.

2. Salsæ corporeæ subtiles, quæ in minimas atomos redactum sal continent, sunt illæ, quæ

cum falsissimæ sint, tamen admodum pellucidæ & subtiles existunt, sicut fontes multi falsi & aqua marina tenuis: etsi in hac subtili commixtione magna sit differentia: pertinet huc omnium animalium urina.

3. Salsæ spirituosæ, quæ non salis particulas, sed Spiritum salis continent tales sunt, ut si vel multa dolia earum coquas, nihil tamen salis accipies, quales non paucae in Germania & alibi, sed raro simplices inveniuntur.

4. Salsæ corporeæ simul & spirituosæ, quæ & salis particulas & Spiritum habent.

Omnes fere corporeæ habent quoque aliquam Spirituum salinorum portionem, sed pleraque exiguam. Ita ad urbem Saltzingam prope Rhenum fontes falsi sunt, quorum aqua etsi aliis aquis sit falsior, tamen minus salis largitur, quoniam æteris ejus & salsus sapor acuitur à spiritibus sive sale volatili, qui in coctione avolat.

Ex hisce patet, quomodo quadruplex ista differentia participationis sit applicanda ad singulas aquarum mineralium species, nempe ad aquas Vitriolatas, aluminosas, plumbeas, &c.

PROPOSITIO V.

Differentias celebriores aquarum mineralium enumerare.

In præcedentibus propositionibus explicavimus veras mineralium aquarum species & differentias desumptas ab ipsarum essentia nempe à particulis mineralium, quas vehunt, sive quibus imprægnatæ sunt. Verum enimvero illæ differentiæ quoniam non ita incurrunt in sensus & præterea propter variam mineralium mixturam varias aquis proprietates communicant, ideo minus vul-

go sunt notæ, quandoquidem à manifestis sive in sensum incurrentibus qualitatibus omnium corporum denominatio & aquarum celebritas oritur apud homines, quarum apertarum qualitatum & proprietatum explicatio & causæ petendæ sunt ex intima rerum compositione. Celebres itaque & ab hominibus vulgaribus quoque cognitæ aquarum vel potius liquorum è terra promanantium differentiæ seu species sunt hæ decem. 1. *Acida.* 2. *Amaræ.* 3. *Calidæ.* 4. *Frigidæ admodum.* 5. *Oleosæ & pingues.* 6. *Venenosæ, sive lethifera.* 7. *Coloratæ.* 8. *Ebullientes.* 9. *Convertentes res minus duras in duriores, vel alio modo corpora injecta aut tincta mutantes.* 10. *Salsæ.* 11. Hisce addi possunt illæ, quæ aliis quibusdam mirabilibus proprietatibus præditæ sunt. Ad hosce classes studiosi harum rerum redigere poterunt omnes aquas, quæ ab autoribus descriptæ reperiuntur. Nos breviter earum generationem, differentias & quædam exempla afferemus.

PROPOSITIO VI.

Aquarum acidarum causam sive generationem, differentias & species explicare.

Magna est aquarum vel fontium acidorum celebritas, vocant vulgo, Acidulas, Germani, *Sauerbrunnen.*

1. *Oriantur* ex admistione Spiritus Vitrioli, salis, & aluminis, quæ mineralia partim simplicia partim aliis mineralibus magis aut minus admixta in terræ cavitatibus reperiuntur, inprimis in ferro. Causam hanc acidularum veram esse, probamus 1. quia ubique fere, ubi tales acidulæ prorumpunt, reperiuntur fodinæ vitrioli, salis, aluminis. 2. quia Spiritus Vitrioli & salis sunt

acidi, sicut etiam sulphuris quidam spiritus, ut notum est ex Chymia. 3. quia ex aquis hisce acidulis nullum corpus acidum, sed Spiritus separantur, qui omnino similes sunt spiritibus Viatrioli, salis, &c.

2. *Magna est acidularum copia* in variis regionibus, præcipue ubi fodinæ abundant. In Sola Germania numerus earum ad millenarium fere accedit. Causa est, quia spiritus acidus omnibus ferè corporibus inest, quoniam elementarem eum esse diximus capite VII. Propositione I. Reperitur in omnibus herbis & fructibus.

3. Differentia acidularum insignis deprehenditur. Quædam adeo acidæ, ut aceti loco illis utantur homines, qualis fons in Sicilia provincia Nicana invenitur: in Germania fons ad Ellebogram insignis aciditatis. Alii acidi fontes appellantur vinosi, quod aciditate sua referant vini gratissimum saporem, inter quos insignis est ille, qui in Comitatu Germaniæ Catzenellebocensi ad oppidum Schvvalbach invenitur. In agro Lugdunensi Galliæ ad oppidum S. Baldomari fons, dictus fortis (fontaine fort) vini penuriam supplet, & si ejus una quarta pars vino misceatur, nil vini saporis deperit: si affundatur farinæ, fermentat statim: non possunt in ea coqui cibi: avolat enim propter subtilitatem: salubris est, adeo ut oppidani raro utantur Medico.

In Aquitania non procul ab urbe Bessa similis fons acidulus vinosus, cujus aquæ si tantum sextam vini partem misceas, merum te bibisse credideris nullâ aquâ dilutum. In Romano agro acidulus fons aluminosus, vino mistus gratissimum præbet potum. Ingens est in Germania superiori acidulorum numerus, quorum quidam in Danubium,

bium, alii in Rhenum influunt. Plurimi in dicto comitatu Catzenelleboci, in Trevirensi provincia, Tyrolensi, Rhætia, Vindelicia; celebris est prope Anderna, dictus Heilbrun. In agro Toletano Hispaniæ juxta pagum Valentiolam fontes sunt, qui in imo deprehenduntur acidi & vinosi saporis, in superiori parte dulces, quod Baccius fieri propterea existimat, quoniam acidæ & nitrosæ partes subsideant. Ego autem, modo vera sit traditio, fieri existimo propter spiritus subtilitatem, qui ad superficiem delatus statim exspiret.

Alii aciduli fontes sunt astringentes & palatum contrahentes, quod indicium est ferrearum particularum & calechanti sive vitrioli admixtionis, ut etiam aluminis, &c.

Acidulorum fontium aqua cælo nebuloso & pluviOSO minus acida deprehenditur, quod indicium est aëris condensati admixti.

Item si calori exponatur aqua illa, vel si in vase aperto stet aliquot horis, vel longo itinere non bene recta frigidis vasibus portetur, amittit statim aciditatem, quod indicium est à subtili Spiritu dependere illarum aciditatem.

Habent tamen etiam atomos ipsius vitrioli, aluminis, ferri, salis, atramenti, &c. & argillæ, sabuli, &c. Hoc probatur ex ea materia, quæ conspicitur adhærescere Canalibus, per quos fluunt fontium horum aquæ.

Exempla studiosi sibi met colligant ex autorum lectione. In Rhenum influunt acidi fontes sive rivi ad minimum ducenti: sed propter spirituum subtilitatem nihil in Rheno sentitur aciditatis.

Cur in locis Septentrionalibus nulli aciduli fontes sint, quæres? Causam esse puto defectum caloris subterranei & nimiam densitatem terra-

rum : sicut ob illam causam quoque fit , ut nulum vel exiguum in illis regionibus aurum inveniatur.

PROPOSITIO VIII.

Fontium calidorum, quos thermas appellant, generationem explicare, & celebrium loca.

Germani vocant, **Warmbad**. Celebres sunt, fons Islandiæ omnium fervidissimus iudicatus, quippe cujus aqua, nil differat ab ea, quæ igne ad summum caloris gradum perducta. Sed in Japonia fontem adeo fervidum prorumpere scribit Caxonius, ut ignis vehementissimi licet fervore nulla aqua ad eum gradum fervoris perducì possit triplo etiam diutius retinere aquam, quam nostra aqua calefacta consueverit. Fluit non continue, sed bis de die per unam horam cum ingenti spirituum impetu, & stagnum efficere, quod ex alio cognovi appellari ab incolis singacko, hoc est, infernum.

Post illum insignes calore fontes sunt sive thermæ Badenses in Helvetia, huic succedunt thermæ Apponenses in Italia. Vulgarium magnus in Germania superiori est numerus, sicut etiam aliis in locis. In Scotia lacus est & fluvius Nessâ, qui calidus quidem non est, nunquam tamen frigore congelatur.

Causa & generatio thermarum est. 1. Admixtio sulphurearum particularum dum aqua per subterraneos meatus fertur vel potius dum repit per fodinas sulphureas ad collectionem circa fontes. 2. Fumi vapores & exhalationes inter terram, ubi sulphur est, purum vel impurum, ut carbones fossiles, succinum, &c. Etenim hæc materia continue fumum calidum emittunt, quæ aquas illuc

istuc delatas vel per ista loca prorepentes calefaciunt. Plurimis tamen & plerisque thermis admixtæ sunt particulae aluminis, ferri, nitri, unde etiam acidiusculum & astringentem saporem habent. Thermæ omnes fere, quas novimus, sine cessatione fluunt, exceptis piperinis Germaniæ, quæ in Rhetia non procul à Cûria celebres sunt, & præter sulphur continent etiam auri aliquid & nitri non parum. Erumpit harum thermarum aqua quotannis circa tertium Maji: desinit fluere die XIV Septembris circiter. Celebres thermæ in Germania sunt plumbariæ in Lotharingia, Emsbadæ supra Constantiam, in Alsatia prope Gebersueilum, in Marchionatu Bada. In VVirtebergensi Ducatu, VVildbad. Cellenses; Blasianæ prope Tubingam, &c. In Japonia quoque & insulis Indicis multæ sunt. In Insulis Azoribus ita fervidæ, ut ovum in eis coqui possit.

PROPOSITIO IX.

Oleosorum & pinguium liquorum è terra manantium generationem explicare, & loca Telluris, in quibus reperiuntur, enumerare.

Quidam fontes bituminosum liquorem effundunt, alii aquam pinguem, sive aquam cui guttæ oleosæ innatant. In Scotia duobus milliaribus ab Edenburgo fons scaturit, cui olei nigri guttæ innatant totâ superficie: Incolæ eo utuntur ad cutem molliendam & tollendam scabritiem. Sic apud veteres celebre erat flumen Ciliciæ, dictum Liparis, in quo natantes vel lavantes ab ipsa aqua ungebantur. An hodie existat, dubito. Similiter Æthiopiæ lacus erat, qui unctos homines efficiebat, qui in eo nataverant: erat etiam Indiæ fons, qui sereno cœlo emittebat olei magnam multitudinem.

dinem. Carthagini fons erat, in quo natabat insuper oleum odore, uti scobe, citreo, quo oleo etiam pecora solebant ungi. Zacyntho & circa Dyrrachium atque Apolloniam (teste Virruvio) fontes erant, qui picis magnam multitudinem cum aqua vomebant. Babylone lacus amplissima magnitudine, qui Limne asphaltis appellatur, habebat supernatans liquidum bitumen, quo bitumine & latere testaceo structo muro Semiramis circumdedit Babylonem. Hodie quoque ad Monasterium Bavarix Degemsee fons est, cujus superficie oleum innatat & quotidie auferitur. Magni quoque in Syria & Africa lacus sunt, qui maximas moles bituminis emittunt. Acidulis quoque Schvvalbacensibus vase exceptis si per aliquot horas quietæ fuerint guttulæ exiguæ olei innatant. Major ejus copia in fonte quem vocant Oelbrunn non procul à Hagenavv ad pagum Lamperfschloch. In multis etiam thermis reperiuntur bituminosæ particulæ si quietæ steterint per aliquot dies: In regni Neapolitani thermis quæ dicuntur balneum Petrolei.

Fontes autem, qui non oleum aquæ innatant sed merum pinguem seu bituminosum liquorem effundunt, sunt etiam plurimi. Prope Gersbarchium in valle dicta Lebersthal ex antiquata & exhausta fodina crassum oleum seu bitumen profluit, quo rustici illinunt axes currum, neque incolæ ejus excellentiam norunt: Thurnheuserus docet ex eo parare nobile balsamum. In Sumatra insula fons est, ex quo naphta instar olei manat, alii balsami speciem esse dicunt: Ambræ quoque fontes ibidem esse dicuntur. In Peruvia prope mare fons bituminosus rivum in mare emittens, incolæ utuntur picis loco, neque aliâ utuntur materia.

teriâ. In Persia non procul à Schimachia ad excelsum montem Barmach in valle fontes bituminosi seu naphthæ triginta circiter sed in profundis puteis scaturientes cum impetu : profunditas est duarum circiter majorum ulnarum, (Klaffter) additi ad descensionis commoditatem gradus lingnei : emittit sulphureum validumque spiritum : duplicis est coloris , in quibusdam rubri , in aliis albi coloris, hujus odor gratior.

Causa horum bituminosorum fontium est sulphurea & bituminosa materia in terræ visceribus à calore & spiritu liquefacta atque protrusa. Differentiarum causa ex ipsorum pinguium mineralium differentiis , ut succinum, ambra, oleum Petrolei, pix, naphtha, bitumen, &c. petenda est.

PROPOSITIO X.

Aquarum amari saporis generationem explicare, & loca Telluris, in quibus reperiuntur, enumerare.

In Coromandelii littoris Indiæ regionibus fontes & putei multi aquam habent amaram , et si ex petris fluant vel in petris scaturiant. In Ponto sive Asiæ minoris provincia parvulus rivus ad Callipadum oppidum , dictus Exampeus amarus admodum reddit Hypanem fluvium, cui influit, amarum. Plura exempla lectores ipsimet colligant.

Oriuntur ab impuro sulphure, bitumine, nitro, atramento, cupro : sicut aqua in vase cupreo diu relicta acquirit amarum saporem. Quod vero Molina in descriptione Galaciæ tradit , non sit mihi verisimile, nempe in Hibernia lacum esse , cujus aqua per semissem diei sit dulcis , altera semisse sit amara.

Lacus Asphaltites Palæstinæ, quem mare mortuum

tuum vocant, amaram aquam habet propter impurum bitumen, unde ad pingues aquas prioris propositionis referri debuisset. Tetrum emittit odorem & vaporem: Ligna non sinit fundum perire: neque dulcescit, etsi Jordanum continuo fluentem absorbeat: venenatus est, quia arsenicum continet.

PROPOSITIO XI.

Fontium admodum frigidorum causam explicare & loca Telluris, in quibus reperiuntur, enumerare.

In Delphinatu Galliæ, non procul à Vienna fons est tantæ frigiditatis, ut bibentibus ora intumescant, neque manus in eo contineri queant: non minuitur exhaustâ aquâ, nec augetur ab infusa. In Troglodytica Arabia vel Æthiopia fontes frigidissimi, etsi magnus Solis ibi sit æstus. In stiria, quatuor milliaribus à Gretz fontes tam frigidi in profundo scaturientes, ut nemo possit ex eis fluentem vel haustam aquam potare.

Primo lapide à Culma fons magno spiritu emittit aquam quasi ferventem, cum tamen sit frigidissima, unde vocant insanam.

Causa horum fontium frigiditatis est. 1. admixtio nitri & aluminis, item Mercurii, ferri, &c. 2. profunditas scaturiginis, propter defectum radiorum solarium & sulphurei subterranei caloris.

Sunt etiam fontes quidam, qui alternatim sunt calidi & frigidi. In Catalonia lacus & fons falsula hyeme tepidus, æstate frigidissimus. Hoc illi cum multis commune est. Causam esse puto, quod æstate pori Telluris sunt aperti, per quos, calidi spiritus erumpunt: hyeme clausi, unde inus coercentur, calidi furni, qui aquam calefaciunt,

fiunt. Ita quidam fontes nocte sunt calidiores,
quam die.

PROPOSITIO XII.

*Earum aquarum, quæ corpora in aliam speciem
mutare videntur, generationem explicare, & loca
Telluris, ubi reperiuntur, enumerare.*

Quædam aquæ sunt, quæ lignum mutant in du-
rissimum lapidem. In Hibernia supra Armaca-
num urbem in stagno haud amplo hasta lignea
defixa si aliquot mensibus hæreat, pars luto infixæ
ferrea erit, pars quæ tingitur aquis versa erit in co-
tem: reliqua manet lignum. Ita narrant Gyr-
aldus & Maginus: sed Brietius meram esse fabulam
dicit nescio quo autore. In boreali Ultoniæ (Hi-
berniciæ provincia est) parte fons est, qui ligna per
septennium immersa obdurat in lapidem. Lo-
quix aquæ (à Loches) in Belsia Galliæ provincia
indurant omnia immixta in lapidem. Ad urbem
Senonensem Burgundiæ prope lacum fons fluit,
cujus aquæ durefcunt in lapidem. Vitruvius in
Cappadocia inter Mazacam & Tuanam esse dicit
lacum amplum, qui immixtam arundinem vel li-
gnum mutat in lapidem uno die. In Bohemia
prope thermas Caroli fons est, in quo lignum diu
jacens mutatur in lapidem. Similes aquæ in plu-
rimis locis reperiri diversi autores referunt. Aliæ
aquæ ferrum in cuprum mutare putantur, quod
tamen revera non faciunt, sed quia ipsæ aquæ vi-
trioli & cupri particulas & spiritum vehunt, ideo
ferri particulas dissolvunt & paulatim auferunt,
quod dum faciunt, cupræ aquæ particule in ab-
latarum ferrearum locum reponuntur sive ibi hæ-
rent, dum allabuntur cum fluente aqua.

Illarum vero, quæ ligna in lapidem mutant,
aquarum

aquarum ratio hæc est. 1. Quædam non mutant ipsa ligna in lapidem, sed terreæ & lapideæ atque salinæ particulæ in aquis contentæ applicant se ad ligna atque ita lapideo quasi tegmine obducunt ligna, non vero ea reverà immutant. 2. Quædam non in lapidem ligna vertunt, sed lapideam duri-
tiem lignis inducunt, quod quidem facere possunt aquæ quædam minerales. 3. Si vero aquæ quædam ligna verè mutaverint in lapidem, concipio istud hoc modo fieri. Inter lignum & lapidem ea præcipua differentia visu deprehenditur, quod in lignis sunt quasi longæ fibræ, quibus particulæ co-
hærent, & eæ minus densæ: in lapidibus autem particulæ granorum instar vel atomorum sunt sine certa in longas fibras extensione. Si itaque aqua aliqua particulas in ligno cohærentes secundum oblongam lineam dissolvat & quasi comminuat, ut jam non amplius isto modo cohæreant, sed tamen magis condensentur, non erit amplius magna inter lignum & lapidem differentia ut oculis notari possit: verisimile tamen est, aquas hæc minerales aliquam substantiam ipsis lignis com-
municare.

Aliæ aquæ sunt, quibus narratur inesse facultas mutandorum colorum in pilis & crinibus hominum & brutorum. In Momonia Hiberniæ provincia fontem esse tradit Gyraldus, cujus aquis si quis abluatur, statim canus efficitur, atque se vidisse, cujus pars barbæ lota cana erat, altera priorem retinebat colorem.

PROPOSITIO XIII.

Aquarum venenatarum & lethiferarum causam explicare atque loca Telluris, ubi reperiuntur, enumerare.

Talis

Talis est lacus Asphaltites propter arsenicale bitumen. Olim celebris erat Terracinæ fons, qui Neptunius vocabatur in Volscorum regione, ex quo qui bibebant, vitâ privabantur, ideo ab accolis lapidibus injeſtis obſtruſtus fuit. Apud Cythros in Thracia lacus fuit, ex quo non ſolum qui biberint, moriuntur, ſed etiam qui laverint. In Theſſalia fons profluit, ex quo nec pecus ullum guſtat, nec beſtiarum genus ullum propius accedit. In Macedonia non procul ab Euripidis ſepulchro ſimilem fuiſſe mortiferam aquam tradit Vitruvius. Celeberrima vel infamis eſt aqua, quam in Arcadiæ regione diſtâ Nonactris è rupibus ſaxeis ſtillaſſe ſcribunt veteres frigidiſſimam, & ſtygiam vel infernalem appellatam, quam neque argenteum, neque æneum, neque ferreum vas potuerit ſuſtinere ſed diſſilire & diſſipari: conſervare autem eam & continere nihil aliud potuiſſe, niſi mulinam unguſam, atque iſtâ aquâ interfeſſum ab Jolla filio Antipatri fuiſſe Alexandrum Magnum non ſine Ariſtotelis infamia ſcribunt Hiſtorici. In Alpibus quoque in Cotti regno aquam fuiſſe Vitruvius ſcribit, quam qui guſtabant, ſtatim conciderint. Hodie non pauci mortiferi reperiuntur in locis ſive ſegionibus ad Alpes, ſed plerique lapidibus obſtruuntur, quæ cauſa eſt, cur adeo pauci lethiferi fontes noti ſint.

Cæterum generatio talium aquarum fit, ſi aquæ repant vel fluant per arsenicales, mercuriales & antimoniales terras, atque earum fumis imprægnentur. Sicut enim fumus arſenici necat viventia, ita aquæ tali fumo imprægnatæ idem præſtant.

PROPOSITIO XIV.

Aquarum Coloratarum generationem explicare

& differentias, atque loca Telluris, in quibus reperiuntur, enumerare.

Ad urbem Chinon Belsiæ (Galliæ provinciæ) aqua è specu profluit subflava, & concrefcit in lapidem. In Regno Congi Africæ rivus rubri coloris in mare labitur. In valle S. Georgii prope Sultzmat in Elſatia fons aquæ rubicundæ, dictus *Rottwaſſer*. Rubicon eſt in Italia, profluit è ſummis alpium ſaſtigiis, hodie pis atello dicitur. Alicubi nigri, viridiuſculi, &c. coloris prefluunt fontes, ſed pauci.

Cauſa coloris harum aquarum eſt à terris per quas fluunt vel repunt, antequam ad fontem perveniunt.

PROPOSITIO XV.

Salſarum aquarum generationem explicare, & loca Telluris, in quibus reperiuntur, enumerare.

Earum generatio duplex eſt. 1. Ex Oceano per ſubterraneos meatus ad ſuperficiem terræ perveniunt & ſcaturiunt. 2. Generantur ex ſale intra terram contento, qualis in plurimis locis invenitur, per quæ dum aqua repit, ſalinas particulas & ſpiritum concipit, antequam ad fontem perveniat. Magna eſt & cuivis nota ſalſorum fontium copia. In Germania ſunt Hallæ Sueviæ, Hallæ Saxoniæ, Hallæ prope ceno Pontem, Hallopoli in Stiria; item in Saltzburgenſi Archiepiſcopatu; Salzè in Magdeburgenſi, in Lotharingia ad Saltzburgum, plurimæque aliæ in aliis locis ad centum uſque fere. Diximus quoque de illis in præcedenti capite, & facilem habet hæc res cognitionem propter copiam ſalis ubique fere in terra latentis, cum ipſum ſal elementum ſit.

PROPOSITIO XVI.

Causam fontium ebullientium & cum spiritu multo prorumpentium explicare, atque loca Telluris, in quibus tales reperiuntur, enumerare.

Causa est spiritus partim sulphureus partim nitrosus in terra aquæ commixtus: si sulphureus, quæ sunt calidæ, si nitrosus, frigidæ: neque enim omnes aquæ, quæ ebulliunt fervidarum instar, sunt fervidæ, sed non pauca frigidæ, ut patet ex la prope Culmam, insana dicta, de qua in Propositione xxi diximus. Fluvius Tamayus in Galæcia erit ex lacu: in exortu suo per aliquot annos enses edit mugitus ingentes. In Japonia fons le fervidus mirabilis, de quo Propos. vxi diximus singulis diebus non nisi bis prorumpit per nam plerunque horam. Quando autem aqua rofluere incipit, tanto spirituum impetu & vementia fertur, ut incumbencia puteo ingentia axa commoveat & ad trium vel quatuor ulnarum litudinem exsiliat tanto fragore, ut explosionem magni tormenti bellici referat. In VVestphalia ons prorumpit dictus, Bolderborn à strepitu.

Acidulæ quoque & thermæ pleræque cum spirituum copia exsiliunt & quasi ferventes bulliunt: in thermis id facit spiritus sulphureus, in acidis spiritus vitrioli, nitri, &c.

PROPOSITIO XVII.

Aquarum, quæ alias quasdam mirabiles proprietates habent, species enumerare & singularum causas scrutari.

Ad hanc classẽ omnes reduci debent, quæ ad priores species non possunt commode referri. Sic ons in Lusitania, est ad locum Cadima omnia in-
jecta

jecta absorbens: olim quoque ibi in vicinia fuit alius, omnia injecta respuens: sed is obstructus est. In Andalusia non procul ab urbe Guadajana lacum esse refert Eusebius Nierenbergius, qui indicet tempestatem futuram. Vbi enim hæc imminet, horrendis mugitibus eum perstrepere, qui sæpe ad XVIII milliaria audiantur. In Normanniæ pago Caletensi puteus est, in quem si lapidem projeceris, audies strepitum, quasi tonitruum frementis diu cieri in putei penetralibus. Ad alpes putei aquam præbent, ex qua accolæ bibentes strumas ingentes collo dependentes acquirunt. In regno Granadæ ad oppidum Antiquarium fons est tantæ potestatis, ut saxa dissolvat.

Prope Tours Galliæ urbem visuntur specus stilantes, vulgo les Caves gouttieres, ex quorum fornice dilapsa aqua efformatur in varias figuras, nuces, amygdala, &c.

Fons ille fervidus Japoniæ omnia adurit & exedit, ferrum, carnem, pannum, &c.

In Arcadia fons fuit olim ad urbem Clitori, cuius aqua pota reddebat abstemios.

In insula Chio fons, cujus aqua insipientes faciebat potantes. Suis in Persia fuit fonticulus, ex quo bibentes amittebant dentes. Similia exempla mirabilium fontium studiosi ex autorum lectione colligere & ad classem hanc redigere poterunt, si ad nullam priorum referri commodè possent videantur; causæ petendæ sunt ex peculiari singulorum locorum situ & proprietate.

PROPOSITIO XVIII.

Fontes illos enumerare, qui stato tempore, non continuo, prorumpunt explicare & causam & illos, qui intumescunt, & detumescunt.

Hæc

Hæc propositio non quidem ad hoc caput sed
ad præcedens pertinet, quia tamen ad aquarum
miracula pertinet, & in præcedenti neglecta fuit,
hic explicabitur.

In VVallia Angliæ non procul à Castello Dineu-
er in regione Canterbocan fons est, qui intume-
scit & detumescit singulis diebus cum maris flu-
u & refluxu.

Similis intumescencia & detumescencia depre-
nditur in fonte sito in vertice excelsi montis in
Connacia Hiberniæ provincia: aqua tamen dul-
cis est. *Idem observatur* in fonte Lou Zara qui est in
montanis Galæciæ dictis Cabreti, viginti leucis à
mari: *item* in Aquitaniæ vico Marsaco fons est,
qui æstus maris imitatur & simul intumescit cum
Garumnæ incrementis in Burdigala. *Alibi fontes*
flle dicuntur, qui contra maris æstum accrescunt
& decrescunt, qualem in Gadibus insula fuisse
scripsere Strabo & Mela.

In VVallia prope Sabrinæ fluvii ostia stagnum
est, vocant Linligunam, quod absorbet marinos
æstus, dum hi astringunt, iis tamen nullo modo
repletur. At detumescente æstu, tum magno cum
impetu exsurgit & aquas revomit, quibus ripas
cooperit.

In Cantabria (Biscaya) fontes Tamarici quatuor
sunt, quorum tres diebus singulis ita siccantur
duodecies, quasi hic nulla aqua extiterit. Plinius
refert: dubito an hodie reperiantur.

In Andegavenfi agro Belsiæ supra Salmunium
pagus est Varus dictus, ex quo rivulus bis in die
fluit, bis immotus stagnat.

In Sabaudia fons eximiæ magnitudinis, dictus
Mirabilis, qui qualibet horâ bis deficit, bis fluit,
& antequam fluat, ingenti murmure prorumpit.
Influit in lacum Burgitem.

In

In montibus de Foix, (in Languedoc provincia Gallia) prope pagum Bellestadium oritur fluvius Liria (Lers) qui mensibus Junio, Julio, Augusto, quater & vices quotidie deficit & renascitur. Biertius ex Papyrio refert.

In VVestphalia regione, quæ dicitur Paderborn, fons est, qui singulis diebus bis deficit & bis renascitur, etsi tantum aquæ effundat, ut non procul à fonte aqua circummagat trium moletrinarum rotas: erumpit cum ingenti strepitu: Est ille, quem diximus vocari Bolderborn.

In oppido Villanova Lusitanix visitur mons, qui fuit tantum à Kalendis Maji ad Kalendas Novembris: tunc cessat, referente Eusebio Nierembergio.

In Germania provincia VVallis, non procul à thermis, quas vocant Leuckerbad, fons est dictus S. Mariæ (unser Frauen brunne.) Ille fluere cessat in autumno ad diem Mariæ sacrum: redit Majo.

In Vindelicia non procul à Labach stagnum invenitur, quod æstate adeo siccum est, ut in eo ferant & metant: autumno redit aqua & quidem cum piscibus, in Majo recedit. Non procul inde fons visitur prope Sitich, qui eandem proprietatem habet.

Sic *stagnum seu lacus Maron* in Palæstina inter mare Galilææ & urbem Belena invenitur, quod æstate adeo exsiccatur & altas herbas fruticesque profert, ut Leones, lupi & aliæ feræ in eo stabulentur.

In Aquitania prope fanum S. Jean d'Angely fons visitur nullo pene fluento in hyeme, æstate abundanti.

Similis fons in Hispania duobus milliaribus à Vagliadolif, qui cum Majo oritur, cum initio Novembris occidit.

Therma omnes sine vicissitudine vel cessatione fluunt, exceptis iis qui in Rhætia sunt & piperinæ dicuntur: namque fluunt tantum æstate à die tertio circiter Maji ad xiv Septembris: Tunc cessant.

CAPUT XVIII.

*De Mutatione locorum Aqua & Terra,
sive de mutatione aquæ superficiei
in Terream & contra.*

PROPOSITIO I.

Superficiem Telluris, quam aqua occupat, cognoscere quanta sit, & illam, quam Terra occupat. Accuratè hoc scire non possumus, propterea quòd ignoramus, an superficiem Telluris polaris Septentrionalis & Australis mare occupet an Terra. Præterea quia superficies aquæ, ut etiam Terræ, in Globo terminatur irregulari linearum flexu, ideo difficilis admodum labor foret supputare illam superficierum, (aquæ & Terræ) quantitatem. Sed quantum ex inspectione terrestris Globi licet colligere crassâ Minervâ, pares fere & æquales esse videntur aquæ & terræ superficies, ut ita superficies aquæ sit dimidia totius Telluris superficiei, atque ita etiam superficies terræ.

PROPOSITIO II.

Superficies aquæ, ut etiam Terra non est omnî tempore ejusdem magnitudinis, sed modo major, modo minor, & cum augetur superficies aquæ, immittitur superficies Terræ.

Etenim mare modò hic modo illic in terras exundat, vel illas abradit & secum avehit: sic itaque

que augetur ejus superficies, magis aut minus, pro-
ut magnum vel parvum terræ tractum inundave-
rit, sicut olim Thessaliā, &c. Hæc tamen varie-
tas, quanta quidem hætenus cognita est, exigua
rationem habet ad totam aquæ superficiem: por-
est autem magna fieri, ut dicemus Proposit. XVIII.

PROPOSITIO III.

*Quantum aqua Tellus contineat, & quantum
Terra, supputare.*

Ad accuratam & veram quantitatem aquæ &
terræ inveniendam, debent prius cognita esse tam
tota aquæ superficies quam profunditas in variis
maris partibus: præterea subterraneæ aquarum
moles debebant esse exploratæ. Quæ omnia cum
nullâ methodo possimus investigare, ideo neque
accuratam aquæ quantitatem neque Terræ possumus
invenire: sed tantum ex certis hypothesebus;
nimirum ponamus aquæ superficiem esse dimi-
diam superficiem totius Telluris; profunditatem
quadrantis vel dimidii milliaris, neque habeamus
rationem aquarum in subterraneis alveis.

Invenietur quantitas aquæ ita: Auferatur à se-
midiametro Telluris quadrans vel dimidium mil-
liaris, & inveniatur soliditas sphaeræ, cujus semi-
diameter æqualis est residuo. Hæc soliditas aufe-
ratur à soliditate Telluris, residui dimidium est
aquæ quantitas. Idem dimidium à totius Tellu-
ris soliditate subtractum, relinquit quantitatem
Terræ, cui pro montium quantitate addenda est
quarta vel quinta molis aquæ seu dimidii prioris
pars. Verum hæc ex incertis suppositis incerta
sunt, vel saltem veritati propinqua.

PROPOSITIO IV.

Aqua littus & locum Telluris, quem occupat, deferere potest multas ob causas, ita ut terra arida conspiciatur, ubi aqua vel mare antea fuit, adeoque nova terra videatur generata.

Aquarum tractus septuplices sunt 1. Oceanus, 2. Sinus Oceani, 3. Freta. 4. Fluvii. 5. Lacus. 6. Stagnum. 7. Paludes.

1. *Paludes exsiccari posse vel per aquæ subductionem vel per exsiccationem sive evaporationem progressu temporis factam, vel per terræ admixtionem, nemini dubium esse potest. Multis enim in regionibus agri fertiles sunt, in locis, ubi paludes ante aliquot secula fuere; ut in VVestphalia, Geldria, Brabantia, Hollandia, Moscovia. Sic Argivorum regio in Peloponneso Trojanis temporibus pauculos alere poterat propterea quod palustris esset: at Aristorelis tempore exsiccata erat & admodum fertilis.*

2. *Eadem est stagnorum ratio, cum non multum differant à paludibus.*

PROPOSITIO V.

Fluvii alveum vel littus, (hoc est partem alvei) deserunt & novam terram præbent:

1. *Si multum terrestris materiæ, arenæ & sabuli secum devehant quæ in fundum subsidentia progressu temporis ita augent alvei altitudinem, ut non sit magis depressus, quam iste locus, unde aqua è vicinia fluit. Quod si in unum locum subsideat illa materia in parte alvei, separabit partem unam, quæ dein exsiccabitur.*

2. *Si alium alveum fluvius accipiat, sive id*

fiat per artem, siue per naturam, & violentâ causâ, ut vento, inundatione.

3. Si ipsi fontes fluviorum obstruantur vel aquam effundere cessent, collapsâ nimirum aut condensatâ terrâ vel magnâ arenæ copiâ vi ventorum in fontes & vicina loca compulsâ.

Exempla fluviorum, quorum alvei hodie exsiccati sunt ex toto vel ex parte, passim occurrunt apud Scriptores, non tamen magnorum fluviorum, sed parvorum, vel partium magni alicujus fluvii. Sic alveus brachii istius Rheni, quod Leydam præterfluens olim in Oceanum Germanicum effluebat, jam ante aliquot secula ab aqua desertus hodie terra est, stagnante Rheno inter Leydam & Cattorum vicum.

Littora ab aquis fluviorum detegi & alveo angustiori decurrere fluvios quosdam, quam olim fecerint, ex plurimis exemplis constat. Et ex eo, quod quidam hodie navigabiles non sunt, qui olim fuerunt, colligimus, aquæ altitudinem imminutam, & aliquando omnino nullam in illis alveis futuram, ut in Scaldi fluvio. Ideo rectores Rerum-publicarum fræces illas seu sedimenta curant extrahi ex alveis fluviorum, ut navigabiles maneant, ut multis in locis videre licet.

Magni autem fluvii non nisi multis annorum seculis vel myriadibus potius, exsiccantur vel in terram mutantur, propterea quod & multi minores fluvii ex diversis partibus fluentes illos constituunt, (quorum etsi quidam exsiccentur vel cursum mutant, omnes tamen non nisi longo tempore idem patientur) & alveus profundior est. Sed unus objectus pulvinus efficere quidem potest, ut fluvius alium alveum decurrat, & prior exsiccetur, ipsum tamen fluvium non tollet, nisi vel fontes,

tes,

tes, vel brachia illius obstruantur. Verum itaque est, nec Nilum, nec Tanain, nec Albim, nec Rhenum, nec alios fluvios semper fluxisse vel perpetuo futuros, sed terram & fuisse quondam & futuram olim, ubi ipsi jam fluunt.

PROPOSITIO VI.

Lacus exsiccantur & in terram mutantur.

1. Si lacus à fluviis influentibus constituatur, fiet illa mutatio per abductionem fluviorum vel cessationem & simul per evaporationem. 2. Silacus per subterraneum ductum ab Oceano vel mari aquas accipiat, fiet lacus illius mutatio postquam subterranei ductus fuerint obstructi. Et sic lacus primo mutantur in stagna & paludes, deinde in terram aridam. Perspicuum est, inquit Aristoteles, quod quia limum aut quippiam ejusmodi aquarum vis intulit, (loquitur de lacubus quos fluvii faciunt) ideo stagna facta sunt & tellus arida, quodque inibi relicta stagnansque aqua, successu temporis assiccata jam prorsus evanuit. Ita quæ ad Mæoticum lacum pertingunt terræ, annuum convectione in tantum excrevere, ut naves multo minores nunc, quam anno abhinc sexagesimo, quæstus gratia ingrediantur. Parvorum lacuum, qui in terram aridam mutati sunt, plurima exempla reperiuntur, imprimis in Hollandia.

PROPOSITIO VII.

Freta exsiccantur atque in isthmos mutantur, vel regiones continentes.

Accidit illud, postquam propter continuam terrestris materiæ subsidentiam longo tempore factam alveus freti ita altus evasit, ut mari transitum neget.

Sic isthmum inter Africam & Asiam olim fuisse fretum, quo mare rubrum & mediterraneum conjuncta fuerint, admodum est verisimile, & sequenti Propositione dicemus. In multis fretis hodie minor maris altitudo & major alvei altitudo deprehenditur ac olim, quod certissimo indicio est, freta illa aliquando sine aquis futura esse & in isthmum aridum mutatum iri. Sic fretum, per quod Oceanus Atlanticus efficit sinum, quem Hollandi vocant, Suyder-zee & fretum Texel, hodie non capit majoris formæ naves onustas & altitudo maris singulis annis minor evadit terra altior. Itaque ubi aqua est ad Texeliam, ibi post aliquot secula erit arida terra. De altero freto quod Vlie vocant, idem aliquando futurum est.

PROPOSITIO VIII.

Sinus, quos Oceanus medius inter terras præbet, exsiccantur progressu temporis & sunt arida vel sicca loca.

Fit illud duplici de causa. 1. Si fretum, quo sinus Oceano conjungitur, isthmus fiat, sive obstruatur ab arena & sabulo, quod progressu temporis fieri, dictum est in præcedenti Propositione. Hac enim ratione sinus Oceani & ipsius pars seu membrum resicabitur à corpore, & fiet lacus, deinde stagnum & palus, atque per exsiccationem fiet terra, & aqua nulla ibi conspicietur. 2. Si ipse alveus sinûs propter defluentes in eum fluvios & arenam secum deferentes altior fiat, ut mare deinde non recipiat: sic paulatim Mare recedet à littoribus illius sinus.

Mare itaque mediterraneum, Balthicum, rubrum, Persicum atque alia, quæ sinus Oceani sunt, desinent aliquando maria esse, & in terras mutabuntur,

buntur, quod sequenti Propositione pluribus probabitur.

PROPOSITIO IX.

Oceanus littora quadam deserit, ita ut terra sit, ubi antehac Oceanus erat.

Fit illud propter hasce causas. 1. Si aquæ allabentis ad littora impetus frangatur ab extantibus hinc inde in littore vel sub mari clivis, pulvinis aut scopulis. Impetu enim illo imminuto, subsident partes terrestres aquæ, & augent illorum pulvinorum altitudinem & magnitudinem, unde fit ut magis magisque frangatur Oceani impetus, atque ideo plus materiæ terrestris subsideat, ut tandem aucti pulvini excludant Oceanum vel alveum minus profundum efficiant. 2. Multum ad hoc augmentum littorum facit, si littora sint arenosa & petrosa, ut allabens Oceanus parum possit separare vel secum auferre. Sic enim cum nihil auferre possit, semper autem quasdam particulas deponat, progressu temporis altiora fient littora, & Oceanum à consueto loco arcebunt. 3. Si aliud vicinum littus habeat terram minus solidam, levē & cavernosam. Etenim Oceanus terras ab aliquo littore abrasas & abreptas defert ad vicina littora, præterea littus tegens vel inundans deserit vicini littoris partem, atque ita terram hic præbet. 4. Si fluvii magni exonerent se per littus in mare illud. Etenim fluvii hi deferentes secum multam arenæ & fabuli copiam, ubi ad ostium & littus, quo in mare se exonerare nituntur, pervenitur, deponunt illam partim quia alveus laxior & latior ibi fit, partim quia mare resistit illorum fluxui: & inprimis hoc observatur in regionibus, quas fluvii in-

undant singulis annis. 5. Si venti frequentes è mari ad littus spirent, & littus sit petrosum vel tenacis terræ, non arenosum. 6. Si affluxus maris celer & vehemens sit ad littus, refluxus autem tardus & lenis. Etenim materiam, quam celer fluxus advexit, lenis refluxus non aufert secum, sed subsidere sinit. 7. Si littus oblique descendat in mare ad longum spatium, non directe & perpendiculariter deorsum vergat. Sic enim impetus allabentis maris decrescit, & deponit saburram.

Multa terræ loca sunt, quæ constat olim fuisse Oceani sedes. *Ægyptus* ubi est, mare olim fuit antiquorum testimonio & comprobatione hodiernæ experientiæ. Nilus enim à remotis *Æthiopie* regionibus fluens & singulis annis alveum egrediens, ubi turget expandit se per totam *Ægyptum*, ubi cum fluminis impetus cesset, subsidet limus, cœnum & terrestris materia, quam celer fluvii cursus advexerat: atque ita *Ægyptus* fit altior. Et antequam à Nilo tantum erat advectum materiæ, tunc mare terram *Ægypti* tegebat: jam mare non admittitur propter altitudinem. *Aristoteles* testis præter alios: ejus enim verba hæc sunt: Locus iste totaque regio (*Ægypti*), quæ fluminis tantum invecu nata est, semper aridior effici videtur, At propterea quod paulatim arescentibus paludibus vicina loca incoli cœpere, temporis longitudo initium obliteravit. Omnia igitur Nili ostia, præter unum *Canobicum*, manu instituta, non ab amne facta videntur. Quin etiam antiquius tota *Ægyptus* urbe, quam *Thebas* vocant, constabat: id quod & *Homerus* declarat, qui non adeo multo (ut ita dixerim) post ejusmodi mutationes floruit. Nam loci illius mentionem facit, tanquam necdum existente *Memphi* aut certe
non

non tanta. Clarius Seneca ita hic explicat : Ægyptus ex limo tota concrevit. Tantum enim (si Homero fides est) aberat à continenti Pharos, quantum navis diurno cursu metiri plenis lata velis potest: Sed continenti admota est. Turbidus enim defluens Nilus, multumque secum limum trahens, & eum subinde apponens prioribus terris, Ægyptum annuo incremento semper ultra tulit. Inde pinguis & limosi Soli est, nec ulla intervalla in se habet, sed crevit in solidum arefcente limo quo pressa erat & cedens structura.

Ganges & Indus in India celebres fluvii, inundationibus suis idem effecerunt, quod Nilus: in Brasilia quoque fluvius argenteus. Et Chinam hoc modo generatam vel saltem auctam esse licet conjicere, propterea quod impetuofus fluvius, quem flavum appellant, ex Tartaria in Chinam fluens & sæpissime inundans (et si non anniversario tempore) tantum arenæ & sabuli habeat, ut tertiam aquæ ipsius partem faciant.

Hæc exempla quarto loco positam causam demonstrant, ubi nempe fluvii faciunt, ut mare deferat littora: sed ipsum quoque mare secessus sui causa sæpe in plurimis existit regionibus, nempe dum ipsum advehit & deponit materiam, quâ alveus & littus majorem altitudinem acquirunt & accedens mare non admittunt. Ita Hollandia, Zelandia & Geldria generatæ sunt; namque olim Oceanum hæc Telluris partes occupasse notum est tam ex vetustis historiarum monumentis, quam ex ipsa terræ qualitate. In clivis Geldriæ non procul à Noviomago repertæ conchæ satis superque id testantur, ut etiam frutices & uliginosa materia in profundo Hollandicæ terræ reperta: adde, quod ipsum mare altius est quam terra

harum regionum, atque illam inundaret, & obtegeret, nisi vel arenosis jugis vel aggeribus arceretur. Sunt tamen, qui à Rheno & Mosa adventam esse Hollandiam & Zeelandiam existimant, neque est vero ab simile.

Ita Borussia, Castubia, crevere, cum mare hodie littora illa deseruerit, quæ olim observabat.

PROPOSITIO X.

Pulvinorum generationem explicare.

Pulvinos appellamus arenosos tumulos seu clivos in aqua, exstantes supra alveum fluvii ad eam altitudinem, ut navium transitum impendant. Nautæ Belgæ vocant, *een droogte, een bank, een riff*, Lusitani, Abrolhos, Baixos. Neque differunt à scopulis, nisi quod eorum partes cohæreant & densatæ sint ac duræ: pulvini vero ex arenæ granis constent non admodum cohærentibus: sed sæpe confunduntur hæc vocabula.

Pulvini vel in alveis fluviorum jacent (ut in Albi, in VVolga plurimi) vel ad ostia (quod frequentissimum, ut in VVolga, Albi) vel ad littora maris, vel in medio mari. Modus generationis idem est, quo in præcedentibus propositionibus diximus alveos fluviorum sicari & mare littora deferere. Etenim plerunque ita fit, ut Oceanus, antequam partem Telluris omnino relinquat, prius pulvinos hosce generet non procul à littoribus, atque ita paulatim recedat & pulvini hi fiant pars Continentis. Eodem modo fit in alveis fluviorum antequam omnino arescant & ab aqua deserantur. Frequentissima causa est, quando fluvii augentur ab imbris vel resoluta nive, atque ideo rapide fluunt. Etenim tunc à littoribus vel ripis quibusdam, ubi motus vehementior, & al-

veus

veus angustior, abradunt limum, arenam, ipsa quoque fundi materia attollitur & simul defertur à rapido fluvii impetu, donec ad ampliorem vel latiore alveum pervenitur, atque à fonte vel causa copiae aquarum remotum. Hic enim remittitur motus vehementia, & tunc subsident partes terrestres, & generantur pulvini: quorum plurimi reperiuntur in locis, ubi fluvii lati sunt, in angustis nulli fere.

Neque est ullum malum, quod vel florentissimis & ditissimis emporiis omnem splendorem & dignitatem citius auferat sine ulla recuperandi spe, vel majorem navibus cladem inferat. Ut antiquas & dudum oblivione oblitteratas urbes taceamus, versantur adhuc ob oculos sturiorum urbs (Stavoren) in Frisia, Arnemuda Zelandiae (Armuyen) Dordracum Hollandiae, Antverpia Brabantiae, Stada Bremensis Episcopatus.

Hiscæ civitatibus negotiandi potestatem, unde omnis eis splendor & divitiarum, nihil aliud ademit, quam pulvini in fluviis vel mari vicino orti.

Neque ullum emporium fere maritimum est, quod ab hoc metu pulvinorum liberum sit. In Albi qui existunt, multas Hamburgensibus perdiderunt naves quæ grandia Oceani tormenta evaserant. Idem in aliis consideranti manifestum fiet, præsertim in portu Texel & Vlie Amstelodamensis emporii.

Conspiciuntur autem magno numero ad littora maris, ut ad Flandriæ littora, & Frisiae, & recedente æstu maris plurimi ex istis pulvinis sunt pars continentis, quippe alveus intercedens partium aquarum tunc habet, ut navigationem non admittat: Belgæ vocant eos *het VVad*, quasi Vadum. Celebres apud nautas vel potius infames propter

naufragia pulvini sunt, qui magno numero reperiuntur in uno maris loco, hi nempe. 1. Pulvini Brasiliæ, Abrolhos de Brasília, *het riss van Brasiliën*, item *de droogte van Brasil*. A littore Brasiliæ in mari jacent tractu septuaginta milliarium, quos nautæ Indiam petentes magna diligentia vitare debent, dum ad virandam Guineæ malaciam versus Brasiliam navigationem instituunt. Accedunt tamen ad illos pulvinos, quam proximè licet, ut ventis majorum virium utantur: sed ne inter Brasiliam & pulvinos deferantur, cautione opus est. 2. Pulvini S. Annæ, non procul à Guinea Africana, ad elevat. poli Arctici 6 gr. In hosce delatæ naves non sine magno periculo & opere deducuntur, plurimisque diebus detinentur, ubi nautæ existimant se jam evasisse illos. Etenim pulvini hi continui non sunt, sed latis & profundis voraginibus atque euripis sejuncti ita ut in parva distantia hic sit profunditas aquæ decem ulnarum, mox trium. 3. Pulvini inter Insulam Madagascar & Arabiam atque Africam, dicti Baixos de Judæa, sunt scopuli seu cautes acuti corolliorum variis coloris. 4. Pulvini Chineses. 5. Pulvini Flandrici, &c. Alios plurimos videre licet in Mappis Geographicis nauticis.

Vnum generationis modum, quo pulvini hi existant, per subsidentiam arenosæ materiæ, quam mare secum desert, explicavimus supra. Huic secundus modus adjungendus est, quo tales pulvini existere possunt, nempe si mare inundet terras & obtegat, in quibus clivi & colles arenosi sunt. Etenim colles hi tunc erunt & dicentur pulvini. Ita ad littora Geldriæ & Hollandiæ multi continui arenosi colles, quos Dunen vocant, conspiciuntur longo tractu, ipsa vero terra sive ager humilior est.

Si itaque per irruptionem mare inundet & tegat illas terras, tunc colles illi erunt pulvini. Ita de aliis judicandum.

Ad ostium fluviorum ideo frequentissimi sunt pulvini, quoniam ibi alveus latior est, & propterea impetus effluxus fluviorum ibi imminuitur, atque ideo materia hic subsidet, quam rapidus fluxus secum advexit. Oceani quoque fluctus repellunt effluentem ex ostiis fluviorum aquam, unde impetus omnino cessat.

Et operæ pretium est, distinguere & considerare duos hosce generatorum pulvinorum modos.

PROPOSITIO XI.

An pulvini, qui in mari non procul à continentibus jacent, sint futuri pars continentis istius, conicere.

Diximus in præcedenti propositione, quod duobus modis pulvini generentur, uno verè per subsidentiam arenæ in mari, altero per denominationem, nempe collem aquâ circumfluente & inundante terras. Si priori modo generati sint & adhuc magis magisque accrescere deprehendantur, indicium est, illos continenti terræ conjunctum iri, hoc est, alveum maris inter pulvinos istos & vicinam terram exsiccatum iri. Si verò pulvini secundo modo generati sint, neque amplius augeantur, tunc conicere licet, pulvinos non facile proximæ terræ conjunctum iri, sed mare potius terram hanc latius ingressurum. Hæc tamen conjectura tantum est.

PROPOSITIO XII.

Insula in mari & fluvio eodem modo producuntur, quo pulvini, imò ex pulvinis possunt fieri insulae: alio tamen etiam modo fiunt.

Etenim si in aliqua maris parte tanta arenæ, sabuli, limi, argillæ copia progressu temporis ag-

gregetur, ut altior evadat, quam mare, erit insula, qui est primus modus. Deinde secundo modo, si mare irrumpens in terras, tantum partes humiliores tegat, non vero altiores & colles, erunt hæc insulæ. Et hoc posteriori modo verisimile est generatas esse velexitisse insulas illas, quæ in magnam altitudinem assurgunt, ut S. Helena, Ascensio, &c. præsertim quæ saxæ & petrosæ sunt.

Huc etiam pertinent insulæ, quas mare abscidit à procurentibus terris. Sic Siciliam ab Italia maris violentia separatam, testantur antiquitatis Scriptores, & noti sunt Poëtæ de hac re versus.

Priori modo, nempe per subsidentiam & congregationem multarum terrestrium particularum extiterunt insulæ Zelandiæ, Danicæ, Japoniæ. Eadem Moluccarum insularum videtur origo fuisse: quippe fodientibus in planitie ad exiguum profunditatem occurrit arenæ & concharum copia.

Ceilanum insulam ab India procurrente separatam narrant Ceilani incolæ & valde est verisimile. Sic Sumatra insula Malaccæ olim adhæsisse creditur neque est vero absimile propter frequentes pulvinos & fyrtes. Certe olim Chersonesum auream fuisse multi putant, pro Chersoneso habitam fuisse verisimile est, quoniam è remoto loco spectata videtur adhærere Malaccæ.

De Maldivis insulis referunt Indi Malabarici littoris, quod ex olim adhæserint Indiæ, & continuam continentem fuisse, cum hodie & longe absint ab India & in undecies mille insulas divisæ. Neque dubitandum est, cum inter binas quasque harum Maldivarum angusti transeant euripi adeo ut quinque vel quatuor ulnas alicubi non superet, quin progressu temporis multæ ex illis in unam coalescent, Euripo imminuto, & demum omnes

in unam magnam oblongam insulam. Imò, omnes insulæ Orientales inter continentem Asiæ & Magellanicam sitæ magno numero videntur extitisse Oceani violentiâ separatis terris. Etenim Oceanus Pacificus in Zona Torrida perpetuo motu & impetu movetur ab Occidente in Orientem, hoc est, ab America ad insulas illas Orientales: præterea ventus perpetuus versus eandem plagam Orientalem auget magnopere Oceani impetum. Non itaque vero absurdum est, cum omnes istæ insulæ in Zona Torrida existant, olim continuo terræ tractu adhæsisse Asiæ Magellanicæ seu australi Terræ: deinde Oceani violentiam modo hic modo illic abraisisse & divulsisse terram, donec ubique factâ viâ Indico Oceano junctus est, & tot insulas effecit, quot hodie in illa plaga admiramur parvo distantes intervallo, Javæ, Celebes, Borneo, Maduram, Amboinam, &c.

De insulis in Mexicano sinu, ut etiam Magellaniçi freti, idem omnino conjicimus.

Insulæ Aegæi maris utrum per divulsionem à mari factam (mari ex Ponto Euxino fluente & mediterraneo mari contrarios fluctus ciente) extiterint, an priori modo per subsidentiam terrestri materiæ, quam Propontis ex Ponto Euxino advenit, dubito. Divulsionem factam esse, magis verisimile: & fortassis famosum Deucalionis diluvium hic etiam vires suas exercuit. Certe Eubœam insulam, hodie Negroponte dictam, Græciæ adhæsisse olim, Scriptores non ignobiles tradunt, quippe Euripus tam modicus interfuit, ut ponte jungatur.

Ex pulvinis insulas fieri multis exemplis docemur. Sic insulæ in fluvio Nilo, in fluvio Laurentii Americæ Septentrionalis olim pulvini fuerunt.

Alio

Alio modo fluvii insulas faciunt, quando ramum emittunt, quem alio loco in se recipiunt, ut in Tanai, VVolga, aliisque videre est. Hoc autem non à natura sed hominum industria esse factum, non est dubitandum. Obius idem facit.

Insulam Loanda sitam in littore Africae procur-rentis convexerunt duo fluvii Rengo & Coauza, qui in illo loco se in mare exonerant. Quoniam enim magnam limi & sabuli copiam deferunt secum ex altis & montanis locis cum impetu delatae, hanc deposuerunt & adhuc deponunt in ostiis suis, atque ita insulam Loanda progressu temporis effecerunt, prius pulvinum factam, jam vero & fertilissimam & incolis abundantem. Atque ita plurimas insulas ad littora sitas olim pulvinos fuisse existimamus, etsi quasdam etiam extitisse per divulsionem à continenti factam vi maris scimus, ut ad Norvegiam: Et in petrosis & rupeis insulis hic posterior modus generationis magis verisimilis est.

Sed in mari Indico tam per divulsionem quam per subsidentiam materiae possunt existere insulae, quoniam dum divellit, simul abradit inter mediam terram, quam deinde in alio loco deponit. Ad hoc multum faciunt furibundi venti & ecnephias frequens tempore mensium pluvialium à Majo ad Septembrem. Istitis enim mirum in modum Oceanus perturbatur ita ut ex fundo quoque argilla & arena separentur & ab aliis regionibus, quae materia ad Indiae littora expellitur. Sic fauces Goani portus impetu ventorum hyemalium (à Majo ad Septembrem) aggestis arenae cumulis ita obstruuntur, ut vix minoribus navigiis transitum praebeat. Sic Cocini portum cumuli isti arenae claudunt instar aggeris seu valli iis mensibus ita

ita ut neque majoris vel minoris formæ naves possint transire.

Etenim continua in montibus Gatis pluvia, & frequens ecnephias cum exhydria prorumpens è nubibus, quæ in jugo Gatis tanquam suspensæ conspiciuntur, tantam copiam aquæ & tanto impetu effundunt, ut multum arenæ secum ad littora rapiat, ubi reluctante Oceano coacervatur: quæ tamen arena cessante hyeme ab Oceano auferitur & portus aperiuntur.

Sunt terræ quædam littoribus adeo vicinæ, ut affluxus maris eas insulas faciat, in refluxu non insulæ, sed pars Continentis vicinæ dici possint, atque si interpositus alveus altitudinem majorem acquirat progressu temporis, excluditur deinde aquæ affluxus, atque insule illæ pars Continentis, sine reciproca mutatione existunt.

Sed & Nilus inundans Ægyptum singulis annis facit, ut urbes, & colles Ægypti tunc insulæ videantur. Sic VVolga fluvius ita crescit in Majo & Junio ut pulvinos & insulas regat. Et multæ ex insulis Indiæ adjacentibus proxime fiunt pulvinimentis pluvialibus, ubi Nilus & Ganges inundant regiones.

PROPOSITIO XIII.

Alius adhuc præter duos commemoratos modus, quo insula existant vel oriantur, à quibusdam Scriptoribus traditur, nimirum Terram coherentem è fundo maris subito ferri ad superficiem.

Alii fabulosum hunc modum non immerito judicant à fabulosis Græcis atque Poëtis profectum. Delon enim ita extitisse volunt. Sed Seneca quoque gravis auctor commemorat, insulam Therasiam

siam sua ætate enatam in Ægeο mari, & quidem nautis spectantibus. Et si itaque paucissima exempla talis productionis insularum reperiantur, impossibilis tamen non debet censi. Fieri enim potest, ut in fundo maris vel in alveo ejus, terra porosa, spongiosa, pumicosa, sulphurea existat, (ut est varia terrarum levium differentia & mixtura) quæ jam ad insignem altitudinem excreverit, ita tamen ut adhuc infra aquæ superficiem lateat. Si itaque fundo maris minus firmiter adhæreat talis terra vel pulvinus, poterit maris vi separari, & quia parum levior est, quam aqua, vel ejusdem ferè levitatis, ideo ascendet ad superficiem aquæ & subito videbitur enata insula: Vel sine aquæ violentia poterit Spiritus sub terra conclusus & erumpere moliens insulam illam sursum extrusisse. Magna enim Spirituum inclusorum & majus spatium exigentium potentia est, ut probatur ex terræ motibus, quibus aliquando monticulos è terra protrusos esse, aliquando absorptos constat: idem ex bellicis cuniculis manifestum est, ubi Spiritus magnas moles turrium & murorum disrumpunt & versus æthera pellunt.

Si itaque talis insula ita subito in mari enata adhæreat adhuc fundo maris, necessario dicendum est, vi Spiritus subterranei illam sursum pulsam esse: sicut aliquando montes è terra protrusos esse quidam scribunt, si vero non adhæreat fundo amplius, poterit tam spiritus quam aquæ violentia illam separasse à fundo, ut deinde ipsa sua levitate sursum ad superficiem delata sit.

PROPOSITIO XIV.

Vnde alia oritur dubitatio, *An insula quadam dentur,*

dentur, quæ mari innatent, sicut Thales dicitur existimâsse totam Terram, quam nos habitamus Oceano innatare? Thaleris quidem opinio satis superque refutata est, cum alveus maris nostræ Terræ continuus deprehendatur. Sed natantes insulas existere posse ratio suadet, nempe si terra sit pumicosa, levis & sulphurea. Seneca addit experientiam. Scribit enim se vidisse ad Cutylas natantem insulam, quæ & arbores habuerit & herbas nutrierit, aquâ illam sustineri & in hanc atque illam partem non tantum vento impelli, sed & aura, neque unquam illi per diem & noctem in uno loco stationem esse, quod lenissimo flatu moveatur. Aliam præterea insulam in Vadimonis lacu vehi, aliam in lacu stationensi. Sic Delon insulam & omnes cyclades olim innataisse mari narrant veteres. Neque est quod objicias, Cur illæ insulæ hodie quoque non innatent mari? Ad hoc quippe facilis est responsio. Etenim innatio illa non potest diu durare. Cum enim insulæ illæ ferè ad fundum maris pertingant, dum hinc inde agitantur, & ad pulvinos vel alveum magis elevatum deferuntur, præsertim si inter duos pulvinos mediæ veniant, sistitur ille motus & aggesta alia terrâ uniuntur cum isto pulvino vel alveo, atque ita ex natantibus fiunt firmæ. In provincia Americæ Fonduras hodiernum lacus est, in quo multi colles herbis & fruticibus confiti conspiciuntur hinc inde vento agitari.

In lacu maximo Scotiæ, dicto Loumond insulam esse quæ natet & vento circumferatur, eîsi pecori pascendo apta sit, tradit Boxthius Scoticarum rerum Scriptor.

Hactenus de generatione Terrarum five aridæ partis Telluris in superficie extantis egimus: jam quo-

quomodo Oceanus atque aquæ loca sua mutant,
& nova occupent considerabimus.

PROPOSITIO XV.

*Fluvii certos terrarum tractus occupant quos
antea non occupabant, varias ob causas.*

1. Cum primo oriuntur è fontibus suis & vel à natura vel ab arte alveum accipiunt, de quo diximus capite xv.

2. Si fluvius alium alveum sibi faciat vel ramum de se emitrat, quod plerumque ab hominibus fit, nimirum ut fluvii partem ad urbes ducant vel in alium fluvium, cujus exempla attulimus capite citato.

3. Si fluvii ripam magis magisque occupent progressu temporis, quod accidit. 1. Si alveus fiat altior à subsidente terra & arena. 2. Si celeri fluxu abradat latera ripæ. 3. Si alio fluvio augeatur, vel copiosis pluviis aut exhydria.

4. Si inundent terras. Quod si non recedant, sed magis magisque augeant, fiunt lacus, vel si alveum priorem repetant, effusa in campos aqua, si magna sit copia, palus fiet.

Corollarium. Fuisse itaque tempus verisimile est, quo tractus illi Telluris, quos jam Rhénus, Albis, Nilus omnesque alii fluvii tenent, aridi fuerint & à terra occupabantur.

PROPOSITIO XVI.

*Lacus, paludes, stagna occupant telluris partes,
quas antea non occupabant.*

1. Quando primum enascuntur & progressu temporis augentur. de quo diximus capite. xv.

2. Si

2. Si copiosa pluvia decidat.
3. Si in lacus fluvii magnam aquæ copiam deferant cum impetu.
4. Si alveus altior evadat.
5. Si crebris & vehementioribus fluctibus agitati lacus paulatim magis magisque abradant ripam & terras aqua tegant. Sic lacus Harlemensis intra triginta vel quadraginta annos vicesimam circiter milliaris partem ultra priorem ripam progressus est.

Coroll. Verisimile itaque est, quod tempus fuerit olim, quo tractus illi Telluris, quos jam vel Zaire lacus, vel Lemanus, vel Parima, vel Harlemensis, vel Mæoticus, vel paludes VVestphaliæ atque aliæ omnes occupant, aridi fuerint.

PROPOSITIO XVII.

Oceanus occupat Telluris partes, quas olim non occupabat.

Pluribus id modis fit. I. Cum medias perumpens terras freta facit & sinus, ut sinum mediterraneum, Arabicum, Bengalensem, Cambojensem, &c. Ita fretum inter Siciliam & Italiani, inter Ceilanum & Indiam, inter Græciam & Eubæam, Maniliensem, Magellanicum, Danicum, &c. Neque vero est absurdum, Oceanum Atlanticum hoc modo generatum esse, & ita Americam à Veteri Orbe, seu sola Europa avulsam esse, quod eo libentius quidam arripiunt, ut inde originem gentium Americanarum deducant ab Adamo. Sane Ægyptii sacerdotes Soloni Atheniensi sexcentis circiter annis ante natum Christum narrarunt (ut videre licet in Dialogo Platonis, qui Timeus inscribitur) insulam fuisse quondam contra fretum Herculeum Hispaniæ Gibraltar) Africâ simul & Asia

Asia majorem, nomine Atlantidem, postmodum verò immani terræ motu, ingentique unius diei ac noctis illuvione, sub vasto gurgitemersam fuisse (partem scilicet ejus). Ex qua narratione colligere licet, fuisse olim apud Ægyptios, quippe literarum monumentis & annotationibus deditos, quandam adhuc famam de separatione Americæ à nostro Orbe factâ ante multa secula. Longe est verisimilius, Septentrionalis Americæ partem, ubi Nova Francia, Anglia, Canada, &c. olim adhæsisse Hiberniæ. Fretum Gibraltar ab Hercule periosum esse scripsere veteres.

2. Cum vento vehementiori versus terram compulsus Oceanuseam inundat perruptis aggeribus à natura vel arte factis. Multa inundationum Oceani exempla sunt, ut olim in Thessalia, non ita dudum in Frisia, Holsatia, &c.

3. Cum propter easdem causas multis locis firmam Terram penetrat, atque insulas facit. Hoc modo diximus in præcedentibus quod verisimile sit mare illud extitisse, quod innumerabiles illas Indicas seu Orientales insulas interfuit, & illud quod inter Maldivas & Indiam fluit, atque etiam sinum Bengalem & Cambojensem.

4. Cum littora paulatim abradit atque ita progressu temporis quasdam littoris & adjacentis terræ partes tegit. Sic mare Balthicum Pomeraniæ littora invasit, perdiditque celeberrimum emporium Vineram. Sic à Norvvegiæ littore insulas parvas auferens, seipsum inter hasce insulas & Continentem immisit. Sic Oceanus Germanicus Hollandiæ littus prope Cattorum vicum magno tractu occupavit ita ut rudera arcis Britannæ, (quam vocant *het huys te Britten*) Romanorum olim castellum seu munitio jam procul à littore in mari

mari jaceant inconspicua & aquis tecta. A Ceilani insulæ parte Septentrionali Oceanus ad viginti milliaria abstulit, ita ut hodie sit multo minor, quam olim. Et sunt plura ejus rei exempla.

Corollarium. Ex hisce colligitur, illa loca Telluris, ubi jam Oceanus est, olim terras fuisse, & quondam terras futuras, nimirum si supponamus, Tellurem multa annorum millia jam extitisse, & adhuc duraturam. De hoc argumento legi potest Aristoteles cap. x i i. libr. i. Meteororum & Strabonius in Geograph. Si quæras, quomodo Oceanus montium loca occupet, respondeo, montes non regi à mari sed fieri tunc vel scopulos vel insulas, affluente nimirum vel appulsâ aliâ terrâ. Confirmatur id exemplo multarum insularum, imò omnium fere, quia experientia testatur, quod insulæ omnes fere habeant montes in medio, ut Ceilanum, Sumatra, Java, &c. Imo quædam sunt nihil nisi montes, ut Helena, Ascensio, Hebrides, &c. Cum itaque loca illa Oceani, in quod insulæ hæ jacent, olim terra erunt vel olim essent, tunc sane montes insularum harum fuerunt montes Continentis.

PROPOSITIO XVIII.

An fieri possit, ut tota Telluris superficies sit sicca sive Terra? vel ut tota liquida sive ut terrâ omnis aqua tegatur? vel ut partes plures superficiei sint terreæ uno tempore, quam alio, vel plures aquâ tecta?

Primò, ut modo majorem superficiei Telluris partem occupet Terra, quam alio tempore. item, quod consequens est prioris, ut aqua uno tempore majorem superficiei Telluris occupet, quam alio

alio tempore, id satis ostensum est Propositione secunda hujus capituli.

Secundo, An aqua sive Oceanus possit omnem terram obtegere, ut nulla sit extans vel insula, atque ita universale diluvium efficere? ad hoc respondeo, posse quidem explicari & concipi modum, quo id fieri queat naturaliter, sed tamen propter terrarum compactionem & montium altitudinem tale quid vix unquam futurum esse. Modus, quo id fieri queat, est idem cum eo, qui Propositione secunda est explicatus. Si enim Oceanus continue abradat terras à litoribus, easque in alvei sui loca profundissima deponat, atque hoc perpetuo temporis decursu faciat, tandem omnes terras superficiei sive extantes auferet, & ipse omnem terram teget. Montes vero vel scopuli fient vel vehementi aquarum impetu ablatis radicibus corruent vel subsidebunt paulatim. Multò facilius hoc fiet, si illorum opinionem velimus sequi, qui Oceano majorem tribuunt altitudinem, quam terræ: verum nos in præcedentibus satis ostendimus, falsam esse hanc opinionem.

Tertiò, An terra possit totam Telluris superficiem occupare, ut ita omnis aqua totusque Oceanus in cavernis terræ vel subterraneo alveo contineatur & à terra tegatur? ad hoc respondeo eadem ratione, non esse impossibile & modum concipi, quo illud fiat, posse, sed tamen vix unquam futurum. Modus autem unicus tantum concipi potest, nimirum si tot cavitates intra terræ profundum vel jam existant vel fiant, in quas Oceanus possit contineri. Neque enim à quoquam hætenus demonstratum est, quod tales cavitates in profundo terræ non existant. Etsi non existant, fieri poterunt 1. ab aquæ ipsius impetu. 2. à Spiritibus subterraneis.

PROPOSITIO XIX.

Cur in medio Oceano pauca insula & nulla insularum agmina reperiuntur, sed plurima ad magnas Continentes sive ad magnas Insulas?

De veritate Propositionis non est quod dubitemus: eam quippe experientia manifestè probat. In vasti Pacifici Oceani medio vix una vel altera parva insula conspicitur: Sic in Oceano vasto inter Africam & Brasiliam præter insulam S. Helenæ, & Ascensionis paucae repertæ sunt. At circa littora Continentium vel in Oceano non procul à littoribus Maximarum Continentium omnes existunt insulae (paucis illis exceptis, quas dixi) in primis hoc animadvertere licet in numerosis illis, quas Agmina insularum appellamus, quæ omnia Continentibus sunt vicina. Insularum Aggæ maris agmen adjacet Europæ & Asiæ: Hesperidæ Africæ: Maldivæ Indiæ, ut etiam omnes Indicæ insulae jacent inter Asiam & terram australem. Solæ Flandricæ sive Azores videntur in medio Oceano inter Veterem Orbem & Americam sitæ esse; etsi illi quam huic sint propiores.

Causa hujusce phænomeni sive situs insularum proculdubio est, quod ipsæ extiterint per Oceanæ irruptionem in Continentes, quo impetu terræ Continentes separatæ sunt, sed quia non tanta Oceani altitudo, ut potuerit terras omnes interceptas tegere, ideo hinc inde inter Continentes vel ad Continentes, insularum agmina extiterunt. Quasdam etiam alio modo generatas esse, verisimile est, nimirum quia Oceanus terras à littoribus abrasas & avulsas non potest longo à littoribus spatio secum avehere, sed illas paulatim subsidere patitur non magnâ à littoribus distantia, quæ
P sub-

subfidentia multis annorum seculis continuata tandem insulas efficit. In medio itaque Oceano paucae insulae sunt. 1. quia à littoribus remotior est locus ille, quam ut abraſae partes ad illum devehantur. 2. major ibi est aquae commotio & impetus, qui alvei terram commovet & potius profunditatem promovet, quam ut insulas generari patiatur. 3. quoniam ibi nullae Continentes, ideo neque agmina insularum existere possunt juxta primum modum, quo talia agmina generari diximus. Olim tamen, cum nondum hic esset medium vasti Oceani, ubi nunc est, talia agmina quoque hic extitisse & paulatim ab Oceano esse absorptas non est vero absimile.

SECTIO QUINTA

GEOGRAPHIAE ABSOLVTAE,

Continens explicationem Athmospharae & Ventorum capitibus tribus.

CAPIT. XIX.

De Athmosphara & Aëre.

PROPOSITIO I.

EX Telluris partibus tam siccis quam humidis, sive terra & aqua exhalant continuè vapores & fumi in spatium, quod circa Tellurem est.

Causa duplex est. Prima, Calor caelestis stellarum, imprimis Solis & Lunae. Altera, calor terrestris sive Ignis subterraneus vel potius terrestris, sive qui Telluris partibus admixtus est. Etenim vide-

videmus, omnia ferè corpora, admoto vel levissimo igne, halitus emittere. Cum itaque tam caelestis calor quam terrestris nihil aliud sit quam ignis aliquis, ideo necessarium quoque est, ut ex partibus Telluris vapores & fumi per illum extollantur. Ita à priori ostenditur veritas Propositionis. Eandem confirmat experientia. Nocturno enim tempore iter facientes præsertim Luna lucente & prope aquas, conspiciamus vapores multos circa telluris superficiem oberrare & attolli. Die quoque Solem multos vapores attollere vel vulgnotum est, cum Germani dicunt, *die Sonne ziehet das wasser* / item cum nebula sursum ascendit, quod futurarum pluviarum indicium certum est.

PROPOSITIO II.

Athmosphæra dicitur spatium circa totam Tellurem, in quo exhalationes ex Tellure elevata versantur. In hoc an aliud quoddam præter exhalationes istas corpus contineatur, incertum est.

Sumitur etiam pro ipsis exhalationibus circa totam Tellurem. Est autem non levis controversia inter modernos Philosophos de corpore, quod circa Tellurem consistit. Mathematici enim complures, iique insignes statuunt, nihil hic esse præter exhalationes elevatas ex Tellure, ideoque atmosphæram & aërem sumunt pro eodem, & post atmosphæram ponunt immediatè ætheream substantiam. Alii vero Philosophi existimant, quod præter illas exhalationes in spatio circa Tellurem sit corpus aliquod peculiare & simplex, quod aërem appellant, etsi ultro concedant, exhalationes in aërem posse mutari, & contrà aërem in nubes & densiores vapores. Iidem post aërem hunc usq; ad Lunarem orbem ponunt aliud subtile corpus.

diversum ab æthere, quod Ignem appellant quidem, sed minus proprie id fieri neque cum nostro igne convenire ipsi fatentur. Essẽ enim substantiam calidam, (non comburentem) siccam & admodum subtilem, ut refractiones radiorum Solis & stellarum non efficiat: quam tamen in aëre suo fieri volunt. Hisce bene consideratis, videntur hæc duæ sententiæ seu opiniones Philosophorum in verbis potius discrepare, quam in reipsa. Etenim quod aërem attinet, quoniam ita crassum concedunt, ut radiorum in eo fiat refractio, & præterea ex exhalationibus generari possit levi mutatione, nihil aliud videtur esse aër, quam subtilior exhalatio, etiamsi ex Tellure non exhalaverit. Quod ad ignem sublunarem attinet, cum eum improprie ita vocari fateantur, esse vero ita subtilem dicant, ut nullam radiorum refractionem efficiat, nihil is videtur differre ab æthere, vel exiguâ discrepantiâ: Dicamus itaque, Athmosphæram & Aërem esse corpus circa Tellurem, in quod incidentes radii refringuntur (sepositâ controversiâ, Vnde istud corpus ortum sit). Quæ quidem definitio cum priori convenit. Neq; enim verisimile est, posse ex Tellure elevari exhalationes adeo subtiles ut nullam refractionem vel impedimentum radiis luminosis ex æthere venientibus faciant: Si tamen tales dentur, earum altitudinem non possumus scire & excludantur ab athmosphæra. Quod tamen si quis acriter urgere velit, existimans, igniculos à Sole in Tellurem projectos, iterum remeare ad solem, ille posteriorem definitionem commodam esse non inficiabitur. Itaque athmosphæra & aër nihil aliud est, quam textura multorum corpusculorum, quæ Telluri adhæret, sicut lanugo pomum coto-neum circumvestit.

PROPOSITIO III.

Exhalationes interdum plures, interdum pauciores extolluntur è Tellure, præsertim in diversis locis.

Causa est 1. Diversa Solis supra Horizontem elevatio vel infra eum depressio. 2. Lunæ diversa ætas atque ejusdem supra Horizontem elevatio. 3. reliquarum stellarum ortus, occasus & supra Horizontem constitutio. 4. Diversitas in ipsis Telluris partibus. Aqua enim & humida loca facilius vapores emittunt quam terrea & sicca.

PROPOSITIO IV.

Exhalationes, quæ atmosphæram constituunt, sunt diversi generis (præsertim in diversis regionibus) nimirum aqueæ, salinæ, sulphureæ, terrea, spirituosæ: compositæ exhalationes sive partes atmosphæra sensiles admodum diversa sunt, mixtæ scilicet ex simplicibus particulis.

Causa est, quoniam in Telluris partibus talia corpora diversi generis existunt, & calore extolluntur quædam facile, quædam difficilius. De terreis particulis dubitare aliquis possit, quoniam hæc vix sursum elevari aptæ sunt: sed sciendum est, id fieri posse. 1. ob maximam pulvisculorum parvitatem, quæ levia sunt, cum gravitas compactorum sit affectio. 2. ob sulphurearum particularum admixtionem, quæ illas terreas secum avehunt violentè.

Porro sulphureas partes esse in aëre, probant meteora ignea, fulgura, ignis fatuus, tonitru, &c. imo odor sulphureus post tonitru & fulgura manifeste id arguit.

De aqueis nullum dubium esse potest: spirituo-

ſæ & ſalinæ propter tenuitatem & promptam è Tellure exhalationem concedendæ ſunt : arguunt quoque eas animalcula in aëre magno numero & incredibili copia generata.

Aristotelici exhalationes dividunt in duas ſpecies, Vapores & fumos. Vapores ex aqua generantur, & in eam facilè redeunt. Fumi ex rebus ſiccis. Sic armoniacum ſal totum in fumum abit ſuppoſito igne. Hæc quoque cauſa eſt, quod in diverſis regionibus diverſus admodum aër percipitur. Item quod in uno loco pluit, in altero non.

PROPOSITIO V.

Minima particula aëris & inſenſiles omnes radios repellunt vel reflectunt tanquam ſpeculum: ſed particularum aëris ſenſilium & compositarum quadam plures radios transmittunt, pauciores reflectunt, alia contra, pauciores radios transmittunt, plures reflectunt.

Ideo partes athmoſphæræ dividuntur in opacas & pellucidas: hæ ſunt quæ plures radios transmittunt, illæ quæ pauciores.

Quoniam enim minimæ particulae (tam aqua quam terra) utpote atomi, ſunt ſolida corpuscula ſine ullis poris, ideo radios non transmittent, ſed repellent, quoniam admodum veriſimile eſt, perſpicuitatem ſive radiorum tranſitum requirere ordinatos in corpore poros & vacua ſpatiola.

Partes vero aëris ſeu athmoſphæræ ex minimis particulis compositæ, ſiquidem ordinatos & multos poros habebunt, erunt perſpicua & radios multos transmittent, ſed ſi confuſe admodum illæ particulae fuerint compositæ vel aggregatæ, ſine multis poris paucos radios tranſitum transmittent.

Inde fit, ut Sol crassum nebulosum aërem opacum discutiens, faciat perspicuum, nimirum facit eum magis porosum.

Quod autem minimæ particulæ reflectant radios, ex eo constat. Aëre serenissimo in cubiculum obscurum per foramen angustum immittatur radius solaris. Videbis manifeste à particulis in aëre volitantibus ingenti numero reflecti radios ad oculum tanquam ex speculo, cumque illæ particulæ adhuc sensiles sint, idem de minimis & quæ sensum fugiunt, particulis concludendum est.

Qui autem exhalationes humidæ attenuatas volunt esse perspicuas, non autem siccæ & fumos, illi refutantur ab experientia & ratione. Ratione quidem, quod fumi & siccæ exhalationes æq; subtiles & porosæ fieri possint ac aqueæ: sed illi existimant perspicuitatem non in pororum ratione sed peculiari qualitate consistere. Experientiâ autem, quoniam aër serenus plures siccæ quam humidæ particulas habet. Hoc ex eo scitur. In novo illo pneumatico sclopetorum genere, quod non pulvere pyrio vel igne sed spiritus & aëris adminiculo exploditur, aër ita comprimitur & condensatur, ut vix sexagesimam prioris spatii partem occupet: neque tamen ullam humoris speciem creant in sclopeto quod omnino fieri deberet, si particulæ aëris sereni essent aqueæ.

PROPOSITIO VI.

Exhalationes non per se & ex sua natura ascendant sursum sed violento motu impulsæ, sive, aër non levis est sed gravis, absolute loquendo.

Nimirum id omne grave dicendum, quod ad centrum Telluris movetur, nisi impediatur. Id vero facit aër. Effossâ enim terrâ, descendit in fa-

etum spatium aër. Quod autem sursum fertur, fit ideo, 1. quia calor rarefacit ut majus spatium quærat, 2. quia ab alio vapore urgetur.

Sic in frigidis locis, ut Nova Zembla, & apud nos tempore nocturno nebula non ascendit, sed accedens Solis calor illam rarefacit, & facit, ut una pars alteram urgeat & trumat. Si autem particula minimæ aëris liberæ essent, nec sibi mutuo implicarentur, sic demum levis esset.

PROPOSITIO VII.

Partes atmosphaera suprema sunt subtiliores quam inferiores. Fieri tamen potest, ut partes mediae sint densiores & crassiores quam infima circa Tellurem.

Quoniam enim leviores partes petunt superiorem locum, sunt autem subtiliores etiam leviores, inde pater prioris propositionis membri veritas. Posterioris autem membri causa est, quod partes in medio aëre facile coeant rursus, & ita crassiores fiant, quandoquidem calidæ particulae cum illis evertæ deseruerunt eas, & radii à terra refracti in media illa regione propter distantiam nihil roboris habent.

Inde fit, ut post pluvias aër medius sit magis serenus, quoniam partes crassiores separatae sunt.

PROPOSITIO VIII.

Atmosphaera sive aër incallescens, majorem locum occupat quam antea: Calore autem quo magis destitutus est, eo magis se contrahit, & minus spatium occupat.

Hoc luculente ostenditur illo instrumento, quod thermometrum vocamus, propterea quod caloris vel temperiem aëris in calore & frigore illo

lo metiamur, in quo videmus aërem densiorem fieri, & minus spatii in vitro occupare, quo aër frigidior est, & contra eo majus spatium, quo aër plus caloris acquirit, uti sequenti propositione dicemus. Causa autem, five ratio propositionis prior est, quoniam calidæ particulæ five Solis radiorum five alterius ignis sunt subtilissimæ omnium particularum totius mundi, & in continuo motu. Illæ itaque atmosphæræ dum sunt admixtæ, separant & divellunt illas particulas magno impetu, atque ita plures poros efficiunt: & his igniculis discedentibus, particulæ aëris sibi reliquæ rursus coeunt, vel sibi mutuo implicantur.

Corollarium. Itaque altitudo aëris vel atmosphæræ non est constans, sed decrescit & accrescit. Nimirum in meridie maxima esse debet, in media nocte minima, circa tempus ortus & occasus solaris mediocri. Vide Propos. xiv.

PROPOSITIO IX.

Thermometrum five Thermoscopium conficere, quo aëris mutationes in calore & frigore explorare possimus.

Sumamus vitrum oblongi & cylindracei colli cum sphaerico capitulo L H. Hoc alligetur tabulæ M N P Q, capite sursum erecto. Orificio supponatur vas aqua (quam præstat esse coloratam) ita impletum, ut pars tubuli seu colli L F in ea abscondatur. Eligatur autem tempus mediocri aëris constitutionis, five ad cujus temperiem, reliquorum dierum aëris temperiem comparare vis, atque illo tempore aqua infundatur in vas. Ita fiet, ut aëre factio frigidior, aqua ultra F sursum ascendat, nimirum quia aër frigore condensatus, qui antea implebat spatium F A, jam minus spa-

tia occupat. Contra, aëre facto calidiore, aqua ab F versus L descendet, quia aër FH rarefactus jam plus spatii postulat.

Gradus autem accretionis vel imminutionis caloris & frigoris cognosces, si lineam F A in tabella divideris in certas numerorum partes.

Vel sine vase supposito, habeat vitrum LH etiam ad extremitatem L, sphæram cum exiguo foramine à latere, & hæc sphæra impleatur aëre. Nam & sic ostendentur aquæ ascensione vel descensione gradus caloris.

PROPOSITIO X.

Aër serenus vehementissimo ab igne ita potest rarefieri, ut spatium septuagies majus occupet, quam antea. Contra ita condensari, in sclopeto pneumatico, ut tantum sexagesimam partem prioris spatii occupet. Sed neque tantam rarefactionem calor solaris neque tantam condensationem frigus aëri inducit.

Probatur ex eo, quod si æolopila sumatur, & igne candescat, ea tunc capit aquæ uncias tredecim. Sed eadem æolopila frigida, sive ad naturalem statum rediens capit uncias tredecim & sescquidrachmam. Itaque spatium, quod aër dum calidus erat, occupabat in æolopila, majus est eo spatio, quod occupat idem aër refrigeratus, estque differentia spatiorum ea pars æolopilæ, quæ sescquidrachmam aquæ capit, si tota capit tredecim uncias cum sescquidrachma. Atqui hæc pars æolopilæ est ferè septuagesima totius spatii in æolopila. Itaque aër fervidus exillens occupavit spatium septuagies majus, quam deinde cum ad naturalem temperiem redit.

PROPOSITIO XI.

Cur in locis Zona frigida, eo tempore, quo Sol illis

illis omnino non oritur, quibusdam diebus aer est serenus, plerumque autem crassus & nebulosus?

R. Nebulæ istius crassæ & fere semper durantis causa est exilis calor ipsius Terræ subterraneæ, vel etiam à Sole ut etiam Luna (quæ tempore delitescentis Solis dies multos & noctes continue supra Horizontem manet) reliquisque stellis derivati, qui calor quoniam debilis est, ideo nebulam discutere nequit. Quod autem aliqui dies noctesve serenitatem aëris præbent, id fit non ideo quod vapores crassi attenuati sint, sed quod vel ad Tellurem subsederint, vel ventis in alia loca repulsi.

PROPOSITIO XII.

Cur sæpe in maximo hyemis frigore aer tamen subtilis est & serenus, cum tamen frigus aërem denset & contrahat?

Frigus duplex est mediocre & sævum. Mediocre frigus non reddit aërem serenum sed nebulosum, quia ab exili calore, qui illi frigori adjunctus est, vapores elevantur, sed non discutiuntur. Sed sævum & vehemens frigus aërem serenum præbet duplici de causa 1. quia crassiores aeris vapores magis crassos facit & sic efficit ut decidant, aeremque magis subtilem præbeant. 2. quia pori Telluris clauduntur & constringuntur & vapores ipsi, ita exhalare, aeremque turbidum reddere nequeunt. Mare ipsum quidem gelu non constringitur, nihilominus particulæ ita gelu densantur, ut ad exhalationes non ita promptum sit, etsi plurimas emittat, quandoquidem alia est ejus conditio ac Telluris.

PROPOSITIO XIII.

Cur aer inspectus juxta lineam horizontalem

sive aer Horizontalis apparet crassior & magis nebulosus, quam is in quo versamur.

Causa duplex est. Prima, quia aer circa Horizontem revera est magis nebulosus. Altera est fallacia visus vel iudicii ex visu. Etenim particularum aeris Horizontalis distantias oculus apprehendit angulis admodum parvis, sicut distantias columnarum ordine & longa serie positarum, & ideo sicut columnas remotas conjunctas esse iudicium autumat, ita quoque particularum aeris Horizontalis distantias non apprehendit, sed conjunctas existimat: particularum autem aeris elevati distantias aspicit oculus sub angulis majoribus, & ideo melius eam apprehendit.

Eadem causa est, cur aer, qui nebulosus nobis ab illo remotis apparet, ubi ad illum accedimus vel in eo versamur, minus nebulosus esse videtur.

PROPOSITIO XIV.

An atmosphaera sive aeris altitudo supra tellurem sit in omnibus locis eadem ad idem tempus. Et, an ejus figura sit spherica?

Quod non eadem sit, sed admodum diversa altitudo in diversis locis, ex eo videtur sequi, quod Sol uni tantum loco ad unum tempus est verticalis, ad reliqua loca radios mittit obliquos & eo debiliores, quo locus à Sole remotior & polis vicinior. Itaque diversa admodum est potentia radiorum solis ad elevandos vapores & ideo ad diversas altitudines extollentur, nimirum in loco cui sol verticalis est, maxima erit altitudo, in opposito loco minima, in locis circa polum media, ut ita ovalem figuram aer accipiat.

Contrariam vero magis verisimile est, nimirum quod eadem sit altitudo atmosphaerae in omni-

omnibus locis. Etsi enim in quibusdam locis vapores & aer magis elevetur quam in aliis, tamen quia aer fluxilis est & suâ gravitate ad Telluris centrum tendit, ideo pars aeris elevatior premet aerem sub se positum & hic alium depressiorem à latere trudet, donec omnes partes eandem altitudinem acquirant.

Atque ita eodem modo demonstrabitur aeris figura sphærica, sicut capite XIII. de Aqua cum Archimede eandem probavimus, quia valent hic eandem hypothesen, quas ibi assumimus, nimirum pars aeris minus pressa expellitur à magis pressa: premitur autem unaquæque pars aere supra eam existente. Quare aeris figura est sphærica non ovalis, ut quidam volunt. Sed nisi hypothesis dicta concedatur, ruit demonstratio.

Cartesius quoque ovalem facit aeris figuram peculiari ratione. Vide Cap. XIV.

PROPOSITIO XV.

Condensatio vel rarefactio aëris non mutat ejus altitudinem.

Nimirum, quia non tota athmosphæra condensatur vel rarefit, sed quædam partes; atqui in omni tempore quædam partes condensantur vel rarefiunt, modo hæ, modo illæ: Quare condensatio vel rarefactio unius temporis non magis mutat altitudinem, quam condensatio vel rarefactio prioris temporis. Differentia tantum esse videtur, quod in uno tempore major possit esse condensatio vel rarefactio quam in alio: sed hæc differentia parum augere potest altitudinem.

PROPOSITIO XVI.

Athmosphæra sive aëris altitudo non tantum

eadem est in diversis locis, sed etiam omni tempore tam æstate quam hyeme eadem & constans manet.

Etenim etsi calor in æstate nostri loci, nostrum quoque aerem magis attenuet & elevet, quam in hyeme, tamen quia eodem tempore in alio loco Telluris hyems est, in illo minus attolletur aer. Quare pars aeris nostri movebitur versus aerem locorum illorum, ubi aer minus altus est, nempe ad locum depressiorem, ut Propos. xiv est dictum. Et contra, dum aer nostri loci propter frigus hyemis deprimitur, pars aeris istius loci ubi æstas est vel major calor, movebitur versus nostrum locum, nimirum donec totus aer æqualiter absit à centro Telluris.

Eadem ratio de die ac nocte. Dum enim nobis nocte aer contrahitur & deprimitur, in alio loco rarefit magis & sic versus aerem nostri loci movetur, donec iterum sphæricam figuram faciat. Et quia ubique omnia paria sunt, manebit eadem ubique altitudo in omni tempore. Quod vero uno tempore & loco magis condensetur vel rarefiat aer, quam in alio loco vel tempore, ea differentia cum admodum parva sit, parum potest altitudinem variare, ut præced. propos. monuimus.

Eadem est ratio nebularum, vel pluviarum, vel vaporum, quæ fiunt in nostro loco vel alio. Hisce enim videtur altitudo aeris vel major vel minor debere. Sed respondeo, vix ullum tempus esse, quonon in aliquo loco Telluris pluat, nebula cadat, &c. Et propterea dum in uno loco pluit, non ideo minor fit aer, quam antea erat, quoniam antea in alio loco pluebat: Et sic par est ratio, & aeris quantitas nec augetur nec minuitur.

PROPOSITIO XVII.

Quo aer frigidior est, eo densior est; & propterea plerunque hyeme densior, quam estate est, (nimirum in aliquo Telluris loco) item nocte, quam die, atque illam densitatem augent aquosi crassi halitus in hyeme & nocte, praesertim matutinis & vespertinis horis.

Veritas Propositionis manifesta est ex praemissis propositionibus. Neque obstat, quod pars calidioris aeris versus frigidiorum tanquam depressiorem locum moveatur, quoniam non ipse sed alius vicinus accedit propter continuam protrusionem, & si vel ipse accedat, tamen in loco frigidus & ipse frigidus evadet.

PROPOSITIO XVIII.

Aëris tres regiones vulgo constituuntur, quarum media ea ponitur, in qua nix, pluvia, grando generetur: prima ea, in qua nos versamur, extendens se usque ad mediam. Tertia, qua à media termino supremo incipit & usque ad extimam aeris superficiem se extendit (ad Ignem sublunarem usque ut Aristotelici loquuntur.)

Media frigidior est quam prima & tertia, quæ calidiores censentur: Tertia quidem; propterea quod subtiliores, igneas, & sulphureas exhalationum partes continet, quæ ad illam supra aquearum particularum locum evolant, vel protunduntur utpote leviores. (Aristotelici calidam esse dicunt propterea quod igneæ sphaeræ vicina sit:) prima autem, quoniam radii Solis incidentes vicini ibi sunt reflexis, & sic calorem duplicant: accedit quod particulæ ignis subterranei exhalantes

lantes quædam in hac regione versantur. Media vero frigidior est, propterea quod neque reflexi radii incidentibus in Tellurem ibi vicini sunt, neque particulas igneas & sulphureas multas continent, sed aqueas: quippe sulphureæ & igneæ, quæ aqueas evexerunt, altius evolant.

PROPOSITIO XIX.

Quo locus Telluris à loco illo, cui Sol verticalis est, magis recedit ad polos, sive quo locus vicinior est poli, eo minori distantia à Tellure abest locus aeris, in quo pluvia, nix, grando generari incipiunt.

Causa est, quod radii solis obliquius incidunt in loca circa polos, quam in loca circa Aequatorem, & ideo refracti multum abducentur ab incidentibus & sic minorem calorem efficiunt & ad minus spatium quam radii sub loco solis sive sub Zona Torrida, atque ideo in loco propiori vapores aquei poterunt coire ad generanda aquea meteo-
ra.

Corollarium. Superficies terminans regionem primam aeris est ovalis, vel potius Elliptica sive sphæroidica, protuberans in Zona Torrida.

PROPOSITIO XX.

Quo locus Telluris polo vicinior est, eo majori distantia abest à Tellure illa aeris regio quæ incipit tertiam, sive in qua subtiliores & sulphurea particula versantur.

Etenim pauciores sulphureæ & subtiles particulae in parte atmosphæræ versantur, quo polo vicinior est, propterea quod calor Solis pauciores ex terra eliciat. Quoniam itaque pauciores sunt particulae tertiæ regionis sub Zona frigida, quam temperata, & in hac pauciores quam in torrida, &
tamen

tamen terminus extremus regionis illius tertiae æqualiter abest à centro Telluris juxta Propos. XVI, inde sequitur, quod initium illius regionis sub Zona Frigida longius absit à centro Telluris, quam initium illius in Zona Torrida & Temperata.

Corollarium. Superficies terminans secundam aeris regionem, sive eam à tertia distinguens, est sphæroidica, protuberans in Zona Frigida.


Hæc omnia adolescentibus per Diagrammata ostendenda sunt.

PROPOSITIO XXI.

Radii Solis, Lunæ & reliquarum stellarum ex æthere per aërem ad oculos nostros non directè perveniunt, sed ubi ingrediuntur aërem, à directo itinere abducuntur vel deflectunt aliquantum, quod optici vocant, refringi radios, atque ita radii refracti ad oculos nostros perveniunt, & stellam conspiciendam præbent.

Subtilissima est doctrinæ opticæ pars, quæ de Luminis refractione agit. Experientia siquidem testatur, radios à quovis visibili vel corpore progressos, si ex uno medio incidant in aliud medium, quod vel densius vel subtilius sit priore; illos ubi hoc aliud medium ingressi sunt refringi sive à directo itinere deflectere ad latera. Facilis est explicatio ex vulgari experimento. Sumatur vas aliquod, & fundo affigatur globus aureus vel cupreus, sive moneta aurea: Dein recede à vase, donec propter laterum vasis obstaculum non amplius videre possis monetam in fundo. Tunc infundatur in vas aqua; quo factò, iterum conspicias in priori distantia monetam. Ex hoc itaque sequitur, cum à moneta nullus radius directè potuisset

ruisset pervenire ad oculum propter interpositionem laterum vasis, & nihilominus post infusam aquam radii ad oculum perveniant, sequitur, inquam, ex hoc, quod radii à moneta progredientes ubi ex aqua in aerem ingrediuntur, deflectere vel refringi à directâ via, & sic refractos ad oculum pervenire. Dicitur refraction, quia ob illam causam contus parte in aquam immersâ apparet fractus.



Ita sit centrum Telluris T, L oculus in superficie : *drfp* superficies athmosphæræ vel aeris.
Nullus

Nullus itaque radius directè ad oculum L pervenire potest, qui sit infra Lfg : alii enim inferiores radii inciderent in tumorem terræ Lo . Quare nulla stella directo radio apparere potest, antequam in lineam Horizontalem Lfg perveniat. Atqui stellæ prius apparent, nimirum dum adhuc sunt infra Lg , exempli gratia in S , & tamen ab S ad oculum L nullus radius directè potest pervenire, quia incideret prius in terram Lo . Itaque necesse est, ut radius qui à stella S ad L oculum pervenit, non sit directus, sed aliquis refractus, nempe Lf , qui refractus ab incidente radio Sf propagatus est, nimirum Sf ex æthere in crassius medium, nempe atmosphæram in f incidens, refringitur & fit fL , cum directus esset in n . Et sic stella apparet, antequam revera apparere radio directo potest, hoc est antequam in lineam Horizontalem Lfg perveniat.

Sic stella in se existens non videtur per directum radium fL , sed per refractum rL , cujus incidens est sr , directus rm . Et ideo stella s apparet altior propter refractionem, quam revera est, & in alio loco nimirum altus apparet arcu xg , sive angulo rLg , quasi esset in x , cum sit revera in f .

Est enim hæc refractionum natura, ut radii ex rariori medio in densius incidentes ut ex æthere in aerem, refringantur vel declinent versus perpendicularem ductam per punctum incidentiæ ad superficiem incidentiæ sive medii. Ex.gr. Sf radius incidit ex æthere in aerem: f est punctum incidentiæ, Tf perpendicularis per f ducta ad superficiem $drsp$. Itaque radius Sfn refringetur versus fT , ut ex fn fiat fL .

Ita ex rm fit rL . Contrarium fit cum radii ex aqua

aqua in aerem egrediuntur. Tunc enim magis recedunt à perpendiculari dista.

Deinde hæc quoque refractionum est natura, ut radii perpendiculariter incidentes superficiei alterius medii non refringantur, sed tantum illi, qui oblique sive non perpendiculariter incidunt, & quidem eo magis refringuntur, quo minus perpendiculariter incidunt, sive quo magis à perpendiculari abscedunt. Ita radii ST , IT , HT non refringuntur, quia sunt perpendiculares in superficiem $d r f p$, sed radii Sf , fr , refringuntur quia oblique incidunt, & quidem Sf magis quam fr .

Ex quo sequitur id, quod experientia quoque testatur, quo stellæ Horizonti sunt viciniore, eo magis ipsarum radios refringi, quo altiores, eò minus. Et observarunt Astronomi, refractionem insensibilem esse, ubi stella altitudinem 20 graduum adepta est, non quod nulla sit refraction, sed quod admodum exigua.

Atque ex observationibus multis Optici & Mathematici recentiores derivarunt regulam refractionis, omnium radiorum oblique incidentium, nimirum quod in omni medio una & constans sit ratio inter sinum anguli incidentiæ & sinum anguli refracti: nempe angulus $n f T$ dicitur angulus incidentiæ, $L f T$ angulus refractus, $n f L$ angulus refractionis: & sic in refractione radii $f r m$. Itaque quæ est ratio sinus anguli $T f n$ ad sinum anguli $T f L$, eadem est ratio sinus anguli $T r m$ ad sinum anguli $T r L$. Vnde sequitur, si ex observatione constet quantitas refractionis ad elevationem unius radii, posse inde cognosci quantitatem refractionis pro omnibus aliis, aliis utcumque elevatis.

PROPOSITIO XXII.

*Athmosphæra sive aer facit, ut Sol & stellæ re-
liquæ prius videantur, quam in Horizonte oriun-
tur, item ut videantur adhuc aliquantulo tempo-
ris, postquam occiderunt, item ut videantur altio-
res, quam sunt, & in alio cali loco, quamdiu non
sunt altiores, quam 20 gradibus.*

Causa in præcedenti propositione satis expli-
cata est: Experimentias tantum quasdam addemus,
sive phænomena naturalia. Cum Belgæ in Nova
Zembla hybernarent, Sol illis apparuit sedecim
diebus citius, quam revera in Horizonte existe-
ret, hoc est cum adhuc infra Horizontem depres-
sus esset quatuor circiter gradibus, & quidem aere
sereno. Atqui celebres Astronomi cum Tychone
experti sunt, quod in nostris locis aere matutino
serenissimo existente, Solem conspiciamus eleva-
tum supra Horizontem minutis 34, cum totus ad-
huc infra Horizontem est, ita tamen ut limbus
Horizontem stringat. Et videtur Sol oriri, cum
totidem circiter minutis 34 adhuc depressus est
infra Horizontem, nimirum aere serenissimo exi-
stente nostri loci.

Ita Spica Virginis, splendida stella videtur no-
bis oriri, cum adhuc 32 minutis deprimitur infra
Horizontem, quod inde colligitur, quia videtur
oriri, cum cauda leonis alta est 34 gr. 30. min. &
in eadem plaga, in qua hæc stella Leonis tunc est.
Atqui cauda Leonis & spica Virginis distant 35 gr.
& 2 min.

PROPOSITIO XXIII.

*Quo aer seu atmosphæra pars, in quam radius
stellæ incidit, crassior est, eo majorem efficit re-
fractionem.*

fractionem, positis cæteris paribus, nempe eadem elevatione stellæ & eadem altitudine aeris.

Ita angulus $n f L$ (qui est & dicitur refractio) eo major est, siue refractus $f L$ eo magis accedit ad $f T$, quo athmosphæra crassior est. Ita Optici in omnibus mediorum generibus verum esseprehenderunt.

PROPOSITIO XXIV.

Quo aer crassior est, eo magis stella infra Horizontem depressa est, cum primum apparere incipit.

$L f$ est radius refractus qui primus apparere facit stellam: $L f T$ angulus refractus. Et sit incidens radius $S f n$, & angulus incidentiæ $n f T$, erit refractio $n f L$.

Jam ponamus aerem $f n L o$ esse crassiorem, quam est ubi refractionem $n f L$ radii facit. Si itaque crassior est, faciet angulum refractionis majorem, nempe $c f L$, & radius incidens erit $K f c$. Itaque stellâ existente in K , radius $K f$ refringetur, ut refractus $f L$ stellarum conspiciendam præbeat. Aere vero minus crasso existente, stella in S existente primum conspiciebatur.

PROPOSITIO XXV.

Quo aer est humilior, eo stella magis depressa est infra Horizontem, cum primum apparere incipit (cæteris paribus, positâ eadem aeris serenitate vel crassitie) siue eo diutius vel citius ante ortum suum conspicitur.

Etenim posito aere humiliore, angulus refractus $T f L$ erit major, ex. gr. si aeris altitudo sit $T 4$, erit angulus refractus (pro radio refracto primum ad L perveniente) $T 4 L$. Ducatur 49 parallela cum

cum *fn*. Quoniam itaque est, ex hypothesi proposita. *xxi*. ut sinus unius anguli refracti *T f L* ad sinum alterius refracti *T 4 L* namque tantum altitudine non densitate differre ponuntur) ita sinus anguli incidentiæ *n f T* ad sinum anguli incidentiæ, *3 4 T* pro refracto *4 L* & incidente *3 4 6*. Atqui sinus anguli *T 4 L* ad sinum *T 4 9* habet majorem rationem, quam sinus *T f L* ad sinum *T f n* ut facile demonstratur descripto ad hoc lemma diagrammate. Quare sinus anguli *T 4 L* ad sinum *T 4 9* habet majorem rationem, quam sinus idem *T 4 L* ad sinum *T 4 3*. Et ideo sinus *T 4 9* est minor quam sinus *T 4 3*. Et ideo angulus *T 4 3* est major angulo *T 4 9*, & *3 4 L* major quam *9 4 L*, hoc est quam *n f T* refractionis: sinum *T 4 L* est major quam excessus sinus *T f n* supra sinum *T f L*. Quare angulus *3 4 L* est major quam angulus *n f L*, & ideo *4 3* protracta, nempe *3 4 6* radius incidens pro refracto *4 L*, cadet infra *S f*, & stella erit in *6*, ut faciat refractum radium *4 L*, atque ideo depressa magis, quam cum in *S*, ubi altitudo aeris erat *L f*.

PROPOSITIO XXVI.

Eadem potest esse stella alicujus refractionis ad eundem ejus situm, etsi diversa sit aeris altitudo, si modo in densitate aeris sit differentia.

Forma problematis rectius proponitur ita: *Data altitudine aeris & refractione, quam stella facit addatam altitudinem, & data præterea alia altitudine aeris, invenire hujus aeris densitatem sive proportionem refractionis talem ut ad datam altitudinem eadem sit refractionis, qua in prima altitudine aeris erat.* Ex. gr. in altitudine aeris *T f*, radius stellæ *S f* facit angulum refractionis *n f L*.

Si

Si jam sit alia altitudo aëris T_4 , & tamen stellæ S in eodem situ radii incidentis 3_4 (qui propter ingentem distantiam quasi parallelus est cum S) refractionis 3_4L sit æqualis refractioni $n f L$.

Quæritur an hoc fieri possit, & si possit, utrum densior vel rarior esse debeat hic alter aer, & in qua proportionem densitatis vel raritatis?

Respondeo, id fieri posse, & quidem si altera data altitudo aeris sit major quam prior $T f$, debet alterius hujus sive secundi aeris major esse densitas vel crassities: si vero altera data altitudo sit minor, ex. gr. T_4 , debet hujus alterius crassities esse minor, sive raritas major. Quanta autem ea debeat esse raritas vel densitas, cognoscitur ita.

Invenitur prius angulus $T_4 L$ (ex data T_4 & $T L$) item $T f L$. Deinde sinus anguli $T_4 L$, item sinus anguli $T_4 3$ (qui est angulus incidentiæ radii $3_4 6$). Habetur igitur proportio densitatis hujus aëris vel raritatis ad raritatem ætheris, ex quo radius incidens venit. Eodem modo sinus anguli $T f n$ & $T f L$ sumantur, sic sinus hi indicabunt prioris aeris raritatis proportionem ad raritatem ætheris. Ex comparatione harum rationum innotescet, quanto posterior aer minoris altitudinis debeat esse rarior vel minoris crassitiei quam prioris.

Proprie tamen loquendo non est eadem refractionis, quia eadem refractionis intelligitur, si radii incidentes æqualiter elevati sint super superficies mediorum.

PROPOSITIO XXVII.

*Si unius loci aer sit & crassior & humilior, quam alterius loci aer, Sol & reliqua stella magis de-
pressa*

pressa erunt infra Horizontem prioris loci cum primum apparere incipient, quam in secundo loco.

Hujus propositionis ex præced. x x v & x x i v manifesta est demonstratio. Sequitur quoque ex ea, si in locis Zonæ frigidaë aer sit & crassior & humilior, quam in locis Temperataë Zonæ & Torridaë, Solem in illis locis longe citius ante ortum & diutius post occasum videri posse, quam in posterioribus locis. Etenim cum magis depressus sit infra Horizontem & præterea multò obliquius & longiori tempore ascendat ad Horizontem illorum locorum, inde sequitur, quod longe citius ante ortum videatur in Zona frigida quam in Zona Torrida. Sed dubium est, an aer sit humilior in Zona frigida, & licet Sol citius videatur ante ortum, annon sola crassities aeris sufficiat, de quo postea.

PROPOSITIO XXVIII.

Si unus loci aer sit crassior & altior, quam alterius loci, potest is esse excessus crassitiei, ut non videant stellas ante ortum tanta in depressione infra Horizontem, quam in altero aere: potest etiam talis esse excessus crassitiei, ut in eadem depressione stellas incipiant conspiciere: denique tantus potest esse excessus crassitiei, ut stellas in multo majori depressione infra Horizontem conspiciant, quam in altero aere.

Imo crassities longe majorem potest hic inducere depressionem, quam aeris humilitas. Et pro refractionibus in Nova Zembla altitudo insignis aeris cum crassitie requiritur.

PROPOSITIO XXIX.

Fieri nequit, ut stella alicujus in duabus altitudinibus refractiones in uno aere sint æquales ejusdem

dem stella in eisdem altitudinibus existentis refractionibus in alio aere qui altior sit, vel humilior, sive crassior vel subtilior.

In præcedenti propositione monstravimus, si in altitudine aeris Tf , radius incidens Sfn faciat refractionem $n fL$, posse in alia altitudine aeris nempe $T4$ radium $S4$ (qui parallelus est cum Sf propter ingentem distantiam, & sunt radii ab uno puncto) facere eandem refractionem $34L$ quæ æqualis sit refractioni ncL , nimirum si aer $4oL$ vv sit minus crassius, quam $foLd$. Jam itaque quæritur; an hoc quoque in duabus stellæ altitudinibus fieri possit, exempli causâ, positò, quod in situ stellæ S , aer $foLd$, & aer $foLvv$ ita se habuerint, ut fecerint æqualem refractionem: an in alia altitudine stellæ, ex. gr. in f , in eisdem atmosphæris $frdLo$, $4vvLo$ possit iterum æqualis esse refractione sive eadem mcL . Et dico, quod id fieri non possit.

Sit enim centro T intervallo alterius altitudinis aeris $T4$ descripta peripheria sive superficies hujus aeris, secans Lr in 3 . Erit $3L$ radius refractus in altero hoc aere, per quem stella f videtur. Debet enim radius $3L$ idem esse cum rL propterea quod eadem ponitur stellæ f apparens altitudo xg , vel angulus rLf . Porro pro hoc refracto incidens radius per 3 ducatur $73vv$, quæ quidem parallela erit cum $fr m$, si refractione $L3vv$ esset æqualis refractioni $Lr m$. etenim ducatur etiam $T3$. erit angulus $T3vv$ angulus incidentiæ, TrL angulus refractus, $vv3L$ refractione.

Est itaque ut sinus $34T$ ad sinum $L4T$ ita sinus $vv3T$ ad sinum $L3T$.

Erit ut sinus $n fT$ ad sinum $L fT$ ita sinus $m rT$ ad sinum $L rT$.

Et

Et vero $34L$ est æqualis $n fL$. Quare $vv3L$ non est æqualis mrL : five $vv3$ non est parallela cum mr .

Hæc autem consequentia operosiores & difficiliorem requirit Demonstrationem, quam ut hoc loco proponi possit, cum ad Geometriam potius spectet: Ex sequentis tamen propositionis analyfi fiet manifesta.

PROPOSITIO XXX.

Observatis duabus refractionibus stellæ alicujus in duabus altitudinibus, invenire inde & altitudinem aeris & crassitiem aeris respectu ætheris, five regulam refractionis in isto aere.

Refraçtio stellæ est æqualis differentię inter observatam ejus altitudinem & veram quæ ex calculo cognoscitur, & ideo facile est observare refractiones stellarum. Jam ad ipsum propositum.

Si Geometricè hoc solvendum sit, reducitur ad problema hoc:

Dentur nimirum stellæ in S existentis & radium S ejaculantis refraçtio $n fL$.

Deinde in altitudine sg ejusdem refraçtio mrL . Itaque in circulo $drfpd$, cujus centrum T , datur TL (semidiameter terræ) & ductis Tr , Tf , Lf , Lr dentur anguli TLf , TLr (ex altitudine stellæ & 90 min. compositus) & dantur anguli $n fL$, mrL , & scimus præterea, quod eadem sit ratio sinus anguli $n fT$ ad sinum $L fT$, quæ est ratio sinus mrT ad sinum $L rT$. Ex hisce inveniendæ est semidiameter circuli Tf vel Tr , & præterea ratio sinus $n fT$ ad sinum $L fT$, five inveniendus est angulus $T fL$. sic enim illa ratio sinuum simul nota erit.

Id quidem inveniri posse, docet analysi, sed

difficillima solutione, ita ut Synthesis non possit fieri sine multis propositionibus præmissis instar Lemmatum, quod hoc loco omnino alienum est. Afferamus tamen analyfin, tum ut problema hoc determinatum esse ostendamus, tum ut præcedentis propositionis veritas simul confirmetur.

TL sit f

Sinus anguli recti TLf s. b

Sinus TLr s. c

Sinus n fL s. d

Sinus Complem. f. g

Sinus m rL s. h

Sinus Complem. k

Sinus LfT s. a.

Quæramus angulum LfT, quia hunc postquam nati sumus, etiam Tf & reliqua innovescent.

Est itaque in Triang. fLT.

Vt sinus LfT ad sinum TLf ita TL ad Tf.

Vt a ad b ita f ad $\frac{bf}{a}$.

Et quia datur utriusque anguli TfL, Lfn sinus, dabitur etiam sinus totius anguli n fT, nimirum si multiplicetur alternatim sinus unius anguli in sinum complementi alterius, & productorum aggregatum dividatur per radium b. Est itaque sinus anguli n fT, $\frac{ha\ tdb - d\sqrt{(bb-aa)}}{f}$

Dein in Triangulo TLr, nota jam sunt Tr, TL, sinus TLr.

Itaque ut Tr ad TL ita sinus TLr ad sinum TrL.

Vt $\frac{bf}{a}$ ad f ita c ad $\frac{ca}{b}$ pro sinu TrL.

Atqui datur etiam sinus m rL: itaque invenietur juxta priorem regulam sinus totius m rT, nempe, si, $gf + \frac{kca}{bf} - \sqrt{\left(\frac{ggffbb - ggccaa}{bbff}\right)}$ sive si $\frac{kc}{b}$ æqualis

æqualis sit m , & $\frac{ggcc}{bb}$ sit nn . erit sinus ille

$$g + \frac{ma}{f} - \sqrt{\frac{ggff-nnaa}{ff}}$$

Habemus itaque sinus quatuor angulorum
L f T, n f T, L r T, m r T: hosce autem propor-
tionales esse novimus. Itaque erit.

Vt sinus T f L ad sinum T f n ita sinus T r L
ad sinum T r m.

$$Vt a ad \frac{ha + db - d \sqrt{(bb-aa)}}{f} ita \frac{ca}{b} ad g + \frac{ma}{f} - \sqrt{\frac{ggff-nnaa}{ff}}$$

$$Et ideo ut b ad c ita $ha + db - d \sqrt{(bb-aa)}$
ad $gf + ma - \sqrt{(ggff-nnaa)}$$$

$$Et - b g f + c d b - b m a + c h a + b \sqrt{(ggff-nnaa)}$$

$$\text{Æqu. } + d \sqrt{(bb - aa)}.$$

Pro- b g f + c d b sume p, & pro- b m a + c h a
pone q q a.

$$\begin{aligned} Et - p - qaa - 2 p q q a \\ + b b g g f f - b b n n a a \\ + c c d d b b - c c d d a a \end{aligned}$$

$$\text{æqu. } 2 \sqrt{\left\{ \begin{aligned} &b b g g f f c c d d b b - b b g g f f c c d d a a \\ &- c c d d b b n n a a \end{aligned} \right\}} + b b n n c c d d a a$$

Et facta divisione per $2p$, & substitutis aliis
signis, erit

$$r - taa + qqa \text{ æqu. } \sqrt{(x - yaa + \mathfrak{D}\mathfrak{D}a)}$$

$$\begin{aligned} Et r + tta + qaa \\ + 2. r q q a \text{ æqu. } x - yaa + \mathfrak{D}\mathfrak{D}a \\ - 2. t q q a - 2. r t a a \end{aligned}$$

Et facta iterum divisione per $tt - \mathfrak{D}\mathfrak{D}$, & substi-
tutis aliis signis erit $a - \beta a - \theta \theta a a + \omega \omega a \text{ æqu. } \gamma$.

Ex hac æquatione patet, problema determina-

zum esse, & ipsam a , hoc est sinum anguli TfL posse invenire tam per Geometriam quam Arithmeticam analyticam Vietæ: vel etiam facilius, si divisione possit æquatio ad minorem potestatem redigi: Ex hoc itaque colligitur, duas refractiones sufficere ad inveniendam aeris Tf altitudinem & ipsam proportionis regulam: quod ideo moneo, quia Keplerum video in Epitome Astronomiæ pag. 65, tres requirere refractiones, etsi ipse hanc viam non tentaverit.

Et si autem ita est ostensum, solutionem problematis haberi posse tam per Geometriam quam Arithmeticam, tamen quia utraque admodum operosa & difficilis est, præsertim Geographiæ studiosis, quorum plerique ista non capiunt, ideo in illorum gratiam monstrabimus aliam methodum, quâ problema facilius quidem absolvatur, etsi minus Mathematica sit, nimirum per regulam positionis. Assumatur itaque Tf in certa mensura ad TL .

Itaque in Triangulo fLT ex fT , TL , TLf invenietur angulus TfL . Ita in Triangulo TLr ex Tr , TL , TLr invenietur angulus TrL .

Sumantur deinde sinus angulorum TfL , Tfn , TrL , Trm . Item ad sinus TfL , Tfn , TrL sumatur quarta proportionalis. Si itaque sinus Trm sit æqualis quartæ huic proportionali: tunc assumpta magnitudo seu altitudo aeris Tf erit vera & legitima: si vero sinus Trm sit major quam quarta illa proportionalis, erit Tf minor assumenda, si minor, tunc major assumenda atque hoc eousq; faciendum erit, donec sinus Trm inventus æqualis sit inventæ quartæ proportionali.

EXEMPLUM.

Spica Virginis & quælibet alia stella, sive Sol, ponatur in Horizonte Lf conspici, cum adhuc

40 32 minutis depressa est, nempe in S. Itaque refraction n f l est 32.

Deinde cum eadem stella vel Sol habet altitudinem g x apparentem 1 gr. 22 min. five veram g f 1 gr. tunc refraction Lrm deprehenditur 22.m.

Semidiameter T L est 860 mill. Germ. ponatur esse 10000, & altitudinem o f ponamus esse talium partium S, (nempe $\frac{5}{10000}$ five $\frac{1}{2000}$ totius semidiametri T L, hoc est $\frac{1}{8}$ circiter unius milliaris.)

Itaque in Triangulo T L f, assumto sinu toto 10000000.

Vt f T ad T L ita sinus illi T L f ad sinum T f L
2001 - 2000 - 10000000 - 9995992. sinus
38 gr. 22 min. 40 sec.

Itaque T f n est 88 gr. 54 min. 40 sec. cujus sinus 9998200.

Rursus in Triangulo T r L.

Vt T r ad T L ita sinus anguli T L r ad sinum T r L.
2001 2000 9997155 9992159. sinus
87 gr. 43. min. 40 sec.

Ergo T r m est 88 gr. 5 gr. 40 min. cujus sinus 9994500.

Inveniatur jam ad sinus T f L, T f n, T r L quarta proportionalis, nempe

T f L T f n T r L
Vt 9995992 ad 9998200 ita 9992159 ad 9994366.

Cum hoc quarto numero comparetur sinus anguli T r m, qui est 9994500.

Deprehendimus itaque quod hic sinus sit quartæ illi ferè æqualis, & ideo altitudinem aeris assumtam ($\frac{5}{8}$ unius milliaris) non multum à vera discerepare. Si tamen accuratius eam habere cupis,

pis, assumere potes aliam altitudinem atque eodem modo operari, donec sinus $T r m$ magis æqualis sit quartæ isti proportionali: vel etiam regulam Falsi adhibere, sive ex duarum positionum defectu colligere veram altitudinem, quantum id licet. Nam omnino accuratam non licet invenire, propterea quod sinus in minimis numeris admodum variant, etsi vel dimidii minuti saltém vitium fuerit. Præterea Canon sinuum debet esse accuratissimus.

Concludimus itaque, quod altitudo aeris sit bis millesima pars circiter semidiametri Telluris: est autem semidiameter hæc perticarum 1633190, itaque altitudo aeris est 816 perticarum, qualium una continet 12 pedes Rhynlandicos: sed rectius assumitur dimidium miliare Germanicum, quia refractionis $L f n$ à Tychohe observata est major, quam nos sumimus, & sumi potest 36, imo 43 quo posito, altitudo aeris non minor erit quam unum miliare.

Cognitâ jam altitudine aeris, simul quoque habetur ratio densitatis vel crassitie aeris ad crassitiem vel subtilitatem ætheris, sive regula refractionis in isto aere, qui nempe tales refractiones & fecit ad tales stellæ situs nimirum ratio sinus $T f L$ ad sinum $T f n$ antea inventa est quæsitæ ratio.

Vt, 9995992 ad 9998200. Atque quod refractiones hæc tam parvæ sunt, causa est, quoniam aerem serenissimum sumimus, qui non adeo multum ab æthere differt in raritate, ut quidam sibi imaginantur.

Porro an inventa altitudo aeris eadem sit ubique & in omni tempore, id cognoscetur, si ex duabus refractionibus ad duas stellæ altitudines in alio aere & alio tempore observatis calculetur alti-

altitudo aeris eodem modo, ut jam fecimus. Atque ut horum Naturæ secretorum studiosi habeant, in quo calculum exercere & periculum ejus rei (an eadem sit ubiq; & omni tempore altitudo) facere possint, dabo ipsis hic exempla ex observationibus Tychonis, qui Solis & Lunæ refractiones observavit ad singulos altitudinis eorum gradus; & quia Lansbergii observationes (quia in diverso aere observavit, si modo observavit) à Tychonianis discrepant, illas quoque addam.

TABULA REFRACTIONUM.

Gradus altitudinis.	Refra-ctio Solis juxta Ty-chenem.	Refra-ctio Lu-næ juxta Tychonē.	Refra-ctio So-lis & Lunæ juxta Lans-berg.
gradus	minuta L.	minuta L.	minuta L. II.
0	34	33	34.
1	26	25	26.
2	20	20	21.
3	17	17	18.
4	15	15	15. 45.
5	14	14	14. 0.
6	13	14	12. 30.
7	12	13	11. 15.
8	11	12	10. 5.
9	10	11	9. 5.
10	10	11	8. 15.
11	9	10	7. 35.
12	9	10	7. 5.
13	8	9	6. 40.
14	8	8	6. 19.
15	7	8	6. 0.
16	7	7	5. 42.

Gradus altitudi- nis.	Refra- ctio Solis juxta Ty- chonem.	Refra- ctio Lu- næ juxta Tychonē.	Refractio So- lis & Lunæ juxta Lans- berg.
-----------------------------	--	--	---

gradus	minuta I.	minuta I.	minuta I. II.
17	6	7	5. 24.
18	6	6	5. 7.
19	5	6	4. 50.
20	4	5	4. 33.
21	4	4	4. 16.
22	3	3	4. 0.
23	3	3	3. 44.
24	3	3	3. 28.
25	2	2	3. 12.
26	2	2	2. 56.
27	2	2	2. 40.
28	2	2	2. 24.
29	2	2	2. 9.
30	I	I	I. 54.
31	I	I	I. 39.
32	I	I	I. 24.
33	I	I	I. 9.
34	I	I	0. 55.
35	I	I	0. 41.
36	I	I	0. 27.
37	0	I	0. 13.
38	0	I	0. 0.

Lansbergius easdem ponit tam Solis quam
Lunæ refractiones: Tycho autem aliquantulum
differ-

diversas, nimirum circa Horizontem facit Solis refractiones majores quam Lunæ, dein ad gradum altitudinis quintum facit æquales ab hoc, dein Lunæ refractiones facit aliquantulum majores solaribus. Hujus sane causam fateor me ignorare, nisi debilitati Lunaris luminis ascribenda sit. Præterea Tycho omisit secunda minuta, quæ tamen non negligenda sunt, si ad 60 prope accedant, quoniam in calculo altitudinis aeris eorum usus est. Sciendum autem est, omnium stellarum easdem esse refractiones vel insensilem saltem esse differentiam, nimirum in uno aere, sed si aer sit crassior, erunt refractiones majores. Cujus exemplum sit hoc (cujus causa à nemine hactenus sufficienter data est). Belgæ in Nova Zembla hybernantes conspexerunt Solem post aliquot mensium noctem, cum adhuc quatuor gradibus infra Horizontem esset ad minimum Solis limbus. Itaque refraction n f L est 4 gr. 30 min.

Dein cum depressus esset adhuc infra Horizontem 3 gr. 45 min. viderunt eum elevatum supra Horizontem 30 gr. (nimirum superior limbus). Itaque refraction m r L (concipiamus m r f infra Horizontem cadere & r L g esse 30 min.) erit 4 gr. 11 min. & L L T 90 gr. 30 min. Ex hisce invenitur altitudo aeris L f, & ratio densitatis illius aeris Novæ Zemblæ, qui tamen serenus fuit tempore observationis. Invenitur autem altitudo multò major, quam aliæ refractiones patiuntur, nimirum duorum fere milliarium, neque positione majoris crassitie aeris corrigitur, (ut seq. proposit. docebitur) propterea quod angulus T f L non possit esse major quam 85 gr. 30 min. (si n f L est 4 gr. 30 min.): sit autem major si d f ponitur minor quam duorum milliarium. Non immerito

itaque dubitare possemus de fide annotationis nautarum, quandoquidem nullum simile exemplum observatum sit: imò contrarium observatum est in eodem loco. Vide xxvi caput Propos. in fine: præterea nulla causa dari potest, ut in illis locis post tam longam solis absentiam aer sit altior, quam eo tempore, quo post tam longam moram Sol discedebat cum potius contrarium sequitur, nimirum aerem factum & crassiores, & humiliorum (propter contractionem) si quis velit urgere, aeris altitudinem esse inconstantem. Hæc tamen cum accuratius pensito, tria mihi incidunt, quibus salvari possit apparentia illa & ingens refraction (namque cum nauticus fuerit peritus rei Astronomicæ & præterea sequentibus diebus quoque Solem viderint elevatum supra Horizontem, quo adhuc depressus erat, ideo non licet ipsam observationem negare. Neque de errore in dierum numeratione propter longam illam noctem suspicari debemus quandoquidem ad populares suos redeuntibus numerabant eundem diem anni quam populares, quod sane non contigisset, si prius dierum falsum numerum adhibuissent.) Etenim si tantam altitudinem aeris velimus admittere, qualem refractiones in Zona Temperata & Torrida non patiuntur, dicendum erit, quod aer quidem sit ubique ejusdem altitudinis tam in Torrida & Temperata, quam Frigida, sed in Torrida & Temperata superiorem aeris regionem ita subtilem esse ut non faciat refractionem, sed tantum media regio: unde nil mirum, si refractiones in Zona Torrida & Temperata sint minores, namque etsi humilior sit aer, qui eas facit, (ob quam causam debebat major esse refraction.) tamen multo magis rariorem esse altero aere. Sed

contra.

contra hoc objici posset, Nautarum observationem factam esse aere sereno, ut ipsi testantur. Ad hoc respondeo, non tamen verisimile videri, ita subtilem fuisse aerem, sicut in Zona Torrida & Temperata coelo serenissimo existente. Secundo dici potest, aerem illum zonæ frigidaë, cum Sol post diurnam absentiam redit ad illum, primo in superiori regione attenuari, mediam adhuc paulo crassioresse, & ideo Solem per duas refractiones visum esse, sicut stellas per aerem & vitrum: duplex autem refractione multo magis deprimat stellam infra Horizontem quam simplex, & sic sufficiet aeris altitudo unius miliaris vel $\frac{3}{4}$.

Neque hic objicias, cur non idem fiat eo tempore quando Sol discedit ab illo aere & longæ noctis initium facit. Tunc enim minorem esse differentiam in aeris crassitie propter longam Solis moram est verisimile. Vel dicemus, matutinis temporibus in illa Zona post longam illam absentiam consistere crassiorem exhalationem. Tertio, si non placeat duplicem refractionem admittere, neque etiam concedere velis, partem supremam aeris in Zona Torrida & Frigida non facere refractionem, si inquam, duæ præmissæ responsiones vel explanationes non placeant, tunc fatendum est, aerem in loco illo zonæ frigidaë tunc temporis multo altioresse fuisse quam in Zona Temperata nostra & simul multo crassiorem (Sola quippe altitudo minuit refractionem, sed magna crassities si adsit, multo magis augetur ab hac refractione, quam ab altitudine decrescente minuitur. Sed mihi ex tribus hisce causis placet prima, quæ ponit altitudinem aeris duorum milliarium (namque non licet pro refractione Horizontali 4 gr. 30 min. minorem statuere in Nova Zembla): reliquæ duæ plu-

ribus urgentur difficultatibus. Cur autem eadem manente altitudine non tot diebus Solem conspexerint postquam oriri desit, die 3 Novembr. causam dixi esse differentiam crassitie aeris. Ita quoque respondendum est, cur Belgæ iidem anno 1596 die 30 Maji non conspexerint Solem mediâ nocte sub elevat. 69 gr. 24 min. cum tamen ne uno quidem gradu sub Horizonte exstaret: cur hic non effecerit refractionem, causa eadem esse potest. Sed nimis multa de hoc negotio, quam prolixitatem difficultati doctrinæ ascribant lectores. Ad accuratam hujus rei cognitionem requiruntur observationes accuratissimæ. Neque tamen, si observationes institutæ ad diversas ejusdem stellæ in eodem loco elevationes non efficiant eandem altitudinem, ideo asserendum est diversas esse ejus altitudines. Causa quippe esse potest diversitas raritatis aeris, nimirum quo Horizonti propior, eo minus rarus. Hoc si ita sit, observationes eandem altitudinem nequaquam producent, etsi eadem sit, quoniam in calculo supponitur, eandem esse in utraque parte aeris raritatem & ideo eandem regulam refractionis.

PROPOSITIO XXX.

Data depressione stella infra Horizontem, cum primò apparere incipit, (hoc est, datâ stella refractione Horizontali) invenire minimam, quæ esse possit, altitudinem aeris illius; aeris crassitiem pro tali refractione, & maximum, quæ esse potest, excessum densitatis illius aeris super densitatem ætheris, hoc est regulam maximam quæ esse potest refractionis. Item generalius: Datâ stella refractione ad datam ejus apparentem altitudinem supra Horizontem, invenire minimam quæ esse potest altitudinem.

Sit data refractionis Horizontalis $n f L$, sive depressio stellæ infra Horizontem $g f s$ vel $g L s$ cum primo apparere incipit, qualis fuit in Nova Zembla 4 gr. 30 min. Constat itaque ex opticis, si radius $s f$ tangat aerem in f , hoc est, si angulus $S f \omega$ vel $n f T$ sit rectus, tunc quidem radium illud non refringi, si vero stella consistat infra tangentem in n , tunc nullum radium ad f accedere potest (immediate). Itaque requiritur, ut stella supra tangentem illam consistat, & angulus $S f \omega$ vel $n f T$ sit minor recto sive quam 90. Ponatur itaque esse 89 gr. 59 min. (vel ponatur 90) utcumque magnus, modo non major sit quam 90. Porro auferatur ab $n f T$ angulus datus sive refractionis Horizontalis 4 gr. 30 min. Relinquitur angulus $T f L$, 85 gr. 29 min. maximus qui esse potest. Vnde si fiat, ut sinus $T f L$ ad sinum totum $f L T$, ita $L T$ ad $T f$. Et inventa $T f$ erit minima, quæ esse potest altitudo aeris. Quoniam enim sinus $T f L$ est maximus qui esse potest, erit quarta proportionalis $T f$, minima quæ esse potest si medii termini, nempe sinus totus $T L f$, & $T L$ maneant eadem. Si non refractionis ad apparentem radium Horizontalem $T f$ detur, sed ad altitudinem stellæ $x L g$: agemus eodem modo, in Δ , $t L r T$.

Item ratio sinus anguli $n f L$ 89 gr. 59 min. ad sinum $T f L$, 85 gr. 29 min. erit maxima quæ esse potest, ratio densitatis aeris ad densitatem ætheris.

PROPOSITIO XXXI.

Datâ altitudine aeris & una refractione stellæ in eo ad certam ejus altitudinem, invenire ex eo regulam refractionis, sive proportionem sinuum angulorum incidentia ad angulos refractos, sive crassitiem illius.

illius aeris pro data refractione ad datam altitudinem.

Debet autem data altitudo aeris esse major eâ, quæ juxta præcedentem Propositionem invenitur minima esse. Si enim major non sit, signum est refractionem non recte esse observatam, & problema est impossibile. Sit itaque major illa. Tr data. Ex. gr. ad apparentem altitudinem x L g sit cognita refractione m r L. Itaque in Triangulo T L v datur T r, T L, & angulus T L v: ex hisce invenitur angulus T r f, refractus, cui si addatur m r L, habebitur angulus incidentiæ m r T, & ratio sinus m r T ad sinum L r T invenietur: hæc erit regula refractionis in isto aere, sive ratio crassitudinis ejus ad densitatem ætheris.

PROPOSITIO XXXII.

Datâ altitudine aeris & refractione ad unam stellæ altitudinem, invenire refractionem in alia stellæ altitudine.

Exempl. gr. detur altitudo aeris T f vel T v, & refractione n f L ad apparentem altitudinem o, nempe radius Horizontalis f L est ipse refractus. Dein detur altitudo stellæ apparens r L g vel x L g. Inveniat per præced. Propos. regula refractionis, sive ratio sinus n f T, T f L, sive sinus n f T, T f L. Dein in Triangulo T r L ex notis T r, T L, & angulo r L T inveniat angulus T r L. Et ut sinus T f L ad sinum T f n ita sit T r L ad alium sinum, qui erit ipsius anguli m r T: à quo si aufertur T r f, relinquitur refractione m r L quæ sita.

Veteres optici longe aliâ & intricata magis sed tamen falsa methodo agebant.

PROPOSITIO XXXIII.

Datâ aeris altitudine & regulâ refractionis invenire refractionem ad datam stellæ altitudinem apparentem, & inde veram altitudinem.

Hoc idem est cum priori, quia in priori ex data refractione ad datam altitudinem invenienda erat illa regula refractionis. Exempla pro exercitio ex Tabula antea posita desumi possunt.

De Reflexione luminis in Aeris.

PROPOSITIO XXXIV.

Radii Solis & Luna in aerem seu atmosphæram ingressi non tantum refringuntur, sed etiam à particulis aeris reflectuntur vel reperiuntur tanquam ex speculo aspero propter particularum inordinatum situm.

Etenim nisi à particulis aeris radii solares reflecterent ad oculos nostros, nulla pars aeris nobis lucida appareret præterquam ea, supra quam Sol consistit, & sic Sole in parte Orientali constituto non esset lucidus aer meridianus neque Occidentalis. Quidam ergo radii refracti transeunt per atmosphæram, quidam reflectuntur hinc inde multis reflexionibus ab una particula ad aliam & sic aerem luminosum efficiunt.

PROPOSITIO XXXV.

Reflexio radiorum solarium à particulis aeris est præcipua causa crepusculi, hoc est lucis ante ortum & post occasum solis.

Manifestum est ex præced. Propositione. Sicut enim Sole existente in Oriente radii ejus ad Occidentem ejaculati reflectunt ad oculos nostros, & sic

fic Occidentalem partem conspicuam faciunt, ita Sole infra Horizontem existente radii ejus in aerem nostrum missi reflectuntur ad oculos nostros & ad ipsum Occidentem & ab Occidente ad oculos nostros.

PROPOSITIO XXXVI.

Crepusculi matutini initium fitus, hoc est, aer Orientalis illuminatus vel albicans conspicitur, cum Sol octodecim circiter gradibus infra Horizontem depressus est: & crepusculi vespertini finis est, (hoc est, nulla amplius in Occidentali aere apparet illuminatio) cum Sol octodecim gradibus infra Horizontem Occidentalem depressus est.

Hæc propositio experientiæ innititur & observationi. Etenim si matutino tempore (hoc est post horam primam à media nocte vel secundam) oculis ad Orientem conversis diligenter observemus, quando aliquis albicans color in aere Orientali circa Horizontem sese ostendat, atque ad id tempus horam & minuta horæ sciamus, possumus inde scire depressionem Solis infra Horizontem.

Intelligimus autem aerem serenum, cujus cum magna sit vel esse possit differentia, inde factum est, ut alii ad vigesimum gradum depressionis Solis infra Horizontem crepusculum extendant, alii tantum ad decimum sextum. Etenim quo aer crassior est, eò minus sentitur crepusculi lux, contra quam in refractione fieri diximus.

PROPOSITIO XXXVII.

Ex crepusculi quantitate non potest inveniri altitudo aeris vel materiæ, quæ crepusculi lucem per reflexionem creat, ut hactenus existimarunt, neque

cre-

Hæc tanta aeris altitudo nequaquam concedenda est, cum alia phænomena repugnent: quod autem juxta illam methodum tanta invenitur, id sit ex falsa hypothese, quam assument, nimirum radium ghf , qui facit reflexum fL , provenire ab ipso sole: hoc enim falsum est, quia provenit per reflexionem ab alio radio, exempli gratia à radio gl . Quod autem ad efficiendam lucem exiguam in f non sit necesse ut fg radius ab ipso Sole proveniat, sed quod alius radius reflexus idem præstare possit, id probatur ex eo, quod in aere Occidentali lucem perspicimus ante ortum Solis, cum tamen certum sit nullum radium directum à Sole f , ad aerem Occidentalem m tunc pervenire, sed ab alio aeris puncto, ex. gr. ab $f \& o$, & sic radius Lm reflexus provenit ab incidente fm , qui ipse fm est reflexus ab incidente gf , & hic gf ab alio gL , qui fortasse & ipse ab alio ad huc provenit. Secundo, id quoque animadversione dignum, quod reflexionem ab aere tanquam à speculo cavo fieri statuerunt, cujus cavitatis centrum sit T , idem nempe, quod Telluris: falsum quippe & hoc est. Etenim radii reflectuntur à particulis aeris nulla habitâ ratione centri T , sed juxta superficiem illarum particularum: hoc manifestum est ex radio Lm qui ab Occidentali aere m allabitur ad L ; si enim ex m tanquam ex speculo cavo centri T veniret, deberet ejus incidens à plaga x venisse, jam autem venit ab o vel inter $f \& o$. Itaque radius Lm ita reflexus est à particula m , sicut hujus figura postulavit. Et sunt in aere particulae diversissimæ figuræ; ideo diversas reflexiones hinc inde in omnes plagas fieri nihil mirum est.

PROPOSITIO XXXVIII.

Supposito, quod lux crepusculi non per simplicem sed duplicem reflexionem generetur, invenire inde aeris altitudinem, qua magis cum aliis observationibus consentiat.

In priori proposit. dictum est, quod radius is, g h f qui reflexum primum f L facit in initio crepusculi, non proveniat ab ipso sole, sed quod ipse quoque sit reflexus in g, sit itaque ejus incidens g L (qui tangat terram in p, sic enim L g est primus radius qui ad g pervenire potest) & hunc jam ponamus ab ipso Sole immediate provenire, propter refractionem tamen aliquantum deviasse, nimirum Q L sit ipse radius Solis, l p g refractus, g h x reflexus, f L reflexus secundus. Invenienda est altitudo aeris T x. Quoniam itaque radius g l x est refractus incidentis Q L, ponamus refractionem factam esse 30 min. angulum nimirum Q l x: præterea Solis centrum existere infra Horizontem septendecim gradibus, cum crepusculum incipit; ideo limbus Solis Q distabit infra Horizontem 16 gr. 45 min. & propter refractionem ablati 30 min. erit angulus n K x 16 gr. 15 min. depressio Solis limbi infra Horizontem refracta. Quoniam porro K L, K p sunt æquales, & quoque f L, g p, ideo K g, K f sunt etiam æquales, & angulus K f g æqualis angulo K g f: sunt autem ambo simul sumti æquales angulo n K g, 16 gr. 15 min. Quare K f g est 8 gr. 7 min. & f T L est 4 gr. & T f L 86 1 $\frac{1}{2}$ min. Vnde invenitur T f 861 $\frac{1}{2}$ milliar. & ideo altitudo aeris invenitur 1 $\frac{1}{2}$ mill. quæ longe minor est, quam antehac Mathematici ex crepusculo deduxerunt: & minor adhuc multo in.

invenietur, si triplex reflexio ponatur initium crepusculi facere, quod non est impossibile. Atque hæc duplex vel triplex reflexio rectius admittitur pro causa durationis crepusculi, quam illa quam Keplerus affert de splendida materia in vicinia Solis. Reliqua de crepusculorum tempore & variatione longitudinis vide parte secunda hujus libri.

PROPOSITIO XXXIX.

Nubium altitudinem per geodaticam dimensionem invenire.

Aere sereno & quieto existente eligatur in nube aliquod punctum præ reliquis insigne vel nubecula facile notabilis: Atque hujus altitudinem tanquam fastigii turris dimitere ex duabus stationibus, ita ut eodem tempore unus observator in una statione, alter in altera consistat. Sic invenietur altitudo nubis istius, quæ nunquam deprehensa est excedere quadrantem milliariis.

PROPOSITIO XL.

Quantitatem aeris supputare, datâ ejus altitudine.

Nihil aliud hoc est, quam spatium inter Tellurem & extimam superficiem aeris supputare, quod quidem facile est, modò de altitudine aeris constet. Supputetur enim soliditas Sphæræ, cujus semidiameter composita est ex semidiametro Telluris & altitudine aeris: atque ab inventâ soliditate auferatur soliditas Telluris: quod relinquitur, est soliditas seu quantitas aeris.

PROPOSITIO XLI.

Aer in quibusdam locis quadam habet peculiaritatem.

Ita

Ita in Ægypto rarissime pluit, vel nunquam potius : & si quando levis pluvia cecidit, catharri, pulmonia, febres atque alii morbi sequuntur. Nili inundatio & quotidiana fere in matutinis horis pruina supplent vices pluviae. & in regno Peru nunquam pluviae visae sunt. In multis locis sub Æquatore pluit integra semisse anni, & alterâ semisse nunquam. Vide parte secunda caput xxv.

Insula Pulon Timor plerunque tegitur nebula & pruina.

In insula Sumatra gravis aer propter multa Stagna. Simile in multis aliis locis : ita in veteri Mexico, item Malacca, &c.

Insula Divi Thomæ, sub Æquatore jacens, censetur pessimum & insaluberrimum omnium regionum aerem habere, etsi omnium fructuum fertilissima sit.

In Provincia Chili aer adeo subtilis, ut ensis vagina reconditus sine abstersione, ferrugine tamen non inficiatur.

In insulis Azoribus aer & ventus adeo acris, ut ferreas laminas & lateres in domuum tectis brevi tempore exedat & in pulverem redigat.

Aristoteles narrat, quod in Olympo monte nullus sit aeris motus, (imò ne aer quidem, si verum est, quod sequitur) & characteres inscriptos pulveribus post multos annos inventos esse absque ulla perturbatione; & ascendentes in montem illum non posse continuare vitam, nisi spongas humectas secum ferant, quarum beneficio inspirationem trahant.

In America, Hispanis transeuntibus ex Nicaragua in Peruanam provinciam, in summis montium interjectorum jugis multi subito cum ipsis equis animam exhalarunt vel gelu obriguerunt, manen-

manentes statuarum instar usque ad cæterorum redditum qui evaserant. Quidam defectum aeris putant fuisse causam : sed non verisimile id est, neque id quod Aristoteles de Olympo retulit , pro vero receperim, quoniam in altioribus montibus contrarium deprehensum est, quorum vertices nive teguntur. Vnde firmè concluditur , quod non supra aerem extent , sed quod aer supra eos meet, Vide caput de montibus. Busbequius oculatus testis refert, Olympum montem in æstate quoque nive oppletum esse.

Circa Insulas Oceani Indici aer fragrans odore aromatum , præsertim tempore eo , ubi matura sunt aromata. Eum odorem nautæ percipiunt, cum adhuc tribus vel quatuor etiam miliaribus absunt ab istis insulis , nimirum flante vento opposito itineri eorum.

Aer marinus gravior est terrestri & minus gratus illis, qui non sunt assueti. Ea differentia manifeste percipitur cum nautæ appropinquant littori. Etenim à distantia integri miliaris ex haustu terrestris aeris cognoscunt , quod non longè absint à Terra, inprimis hoc nautæ de Soffala in Orientali nimirum Africæ littore sita referunt nautæ.

Cum hæc à Typothesis essent disposita incidi forte in observationem quandam à Davide Froelichio in monte Carpatho Hungariæ institutam, quæ quoniam non parum facere videbatur ad iudicium de aeris altitudine & regionum ejus constitutione ferendum , ideo eam hic adjungendam existimavi , etsi ad Propositionem xviii debuisset adjungi. E Montibus, inquit, (Hungariæ) primas tenet Carpathus ; qua vulgata appellatione nominatur omnis tractus Sarmaticorum montium, qui Hungaros à Ruthenis, Polonis, Moravis, Sileis, & eâ

& eâ Austriæ parte, quæ citra Danubium est, dirimunt. Horridiora & sublimiora illorum juga, nubes transcendentia, existunt in Comitatu Sepusienfi, ad patriam meam dulcissimam, Cæsareopolim, vulgo *Kesmarck* dictam, à qua civitate etiam *das Kesmarcker Gebürg* / item *das Schnee Gebürg* / quod perpetuis fere nivibus tegantur, à Slavis *Tatry*, vel *Tarczal*, quasi calvi & abradi montes, nuncupantur. Et hæc rupes asperitate & præcipitiis suis Alpes Italicas, Helveticas ac Tyrolenses longè superantes, ferè impervix sunt, & nonnisi à naturæ admiratoribus rarissime petuntur.

Ego (ut incidenter hæc recenseam) mense Junio Anni Christi. 1615. tum adolescens, sublimitatem horum montium, cum duobus comitibus Scholaribus, experiri volens, ubi, cum in primæ rupis vertice, magno labore, me summum terminum assecutum esse putarem, demum sese obtulit alia multo altior cautes, ubi per vasta, eaque vacillantia saxa (quorum unum, si loco à viatore dimoveretur, & versus convallem dejicitur, aut volvitur, aliquot centena, decuplo majora secum rapit, & quidem tanto cum fragore, ut illi metuendum sit, ne totus mons corruat eumq; obruat) enixus essem, iterum alia sublimior prodiit: atque ita aliquot minores vertices, quorum posteriores semper anteriores altitudine superarunt, per totidem convalles, summo vitæ periculo emetiri coactus sum, donec ad supremum cacumen penetraverim. Ex declivioribus montibus, cum in subjectas valles, vastis arboribus confitas prospexissem, nil nisi obscuram noctem, aut cœruleum quid, instar profundi aëris, quod vulgo cœlum sudum appellatur, observare potui, mihiq; videbar,

videbar, si de monte caderem, non in terram, sed recta in cœlum me prolapsurum. Nimia enim declivitate, species visibiles, extenuatæ & hebetatæ fuerunt. Dum vero altiorem montem peterem, quasi intra nebulas densissimas hærebam. His eluctatis, post aliquot horarum intervallum, cum jam non procul à summo vertice essem, de sublimi quiescens prospexi atque animadverti iis in locis, ubi mihi antea videbar intra nebulas hæsisse, compactas atque albas sese movere nubes, supra quas, per aliquot milliaria, & ultra terminos Sepusi commodus mihi prospectus patuit. Alias tamen etiam nubes altiores, alias item humiliores, nec non quasdam æqualiter à terra distantes vidi. Atq; hinc tria intellexi, 1. me tum transivisse principium mediæ aëris regionis, 2. Distantiam nubium à terra, non esse æqualem, sed pro ratione vaporis, alicubi altiorem, alibi humiliorem. 3. Distantiam nubium, terris proximam, longe minorem esse, quam quidam Physici statuunt, & quidem non 72. mill. Germanica, sed tantum dimidiatum mill. Germ. In summum montis verticem cum pervenissem, adeo tranquillum & subtilem aërem ibi offendi, ut ne pili quidem motum sentirem, cum tamen in depressioribus montibus ventum vehementem expertus sim: Vnde Collegi summum cacumen istius montis Carpathici ad milliare Germanicum à radicibus suis imis exsurgere, & ad supremum usque aëris regionem, ad quam venti non adscendunt, pertingere. Explosi in ea summitate Sclopetum, quod non majorem fonitum primo præ se tulit, quam si ligillum vel bacillum confregissem, post intervallum autem temporis, murmur prolixum invaluit, inferioresque montis partes, convalles & sylvas opplevit.

Descen-

Descendendo per nives annosas intra convalles, cum iterum Sclopetum exonerarem, major & horribilior fragor, quam ex tormento capacissimo inde exoriebatur: hinc verebar ne totus mons concussus mecum corrueret: duravitque hic sonus per semiquadrantem horæ usque dum abstrusissimas cavernas penetrasset, ad quas aër undique multiplicatus resiliit. Et talia quidem objecta concava in summitate sese non illico offerebant, idcirco ferè insensibiliter primum sonus repercutiebatur, donec descendendo antris & convallibus vicinior factus, ad eas fortius impegit. In his quoque celsis montibus, plerunque vel mediâ ætate ningit grandinatae, quoties nempe in subjectâ & vicina planitie pluit, uti hoc ipsum etiam expertus sum. Nives diversorum annorum ex colore & cortice duriore dignosci possunt.

CAPUT. XX.

De Ventis in genere, & Plagis mundi.

Aeris quædam affectio est Ventus, atque ideo ad absolutam telluris contemplationem ejus consideratio pertinet, præsertim cum & in hydrographia & omnium maxime in arte Nautica, quæ Geographiæ pars est, ejus cognitio requiratur: quam etsi magis Physicam esse libenter concedam, tamen quoniam plurima continet ad Geographiam spectantia, ideo paucis de ea hic agendum.

PROPOSITIO I.

Ventus est commotio aëris sensibilis tactu, sive cum aliquo nisu.

Ita definiendum cenſeo cum omnium gentium conſenſu, neque libet hic argutulos quosdam oppugnare. Si levior ſit commotio, dicitur aura & Spiritus. Si autem ita parva ſit agitatio, ut non feriat per ſe ſenſum tactus, non dicitur ventus: & tali agitatione particularum nunquam caret aër, ut probat immiſſus in conclave per anguſtum foramen ſolis radius: ideo vocabulum, tactu, addidimus in definitione. Ille enim atomorum motus tantum oculis percipitur.

PROPOSITIO II.

Venti plerique ab una plaga ad oppoſitam tendunt, & corpora impellunt.

Hoc videre eſt tum ex ventorum in corpora noſtra impetu, tum inprimis ex vexillis ſeu apluſtribus in faſtigio malorum navis defixis, quæ verſus contrariam vento plagam extenduntur.

Non tamen omnino directe & continue id ſit, ſed cum aliqua vexillorum hinc inde factâ agitatione. Sunt qui in definitione addendum eſſe exiſtimant, Commotionem factam verſus unam plagam, vel verſus eaſdem partes, ſed nos hæc rectius omittenda eſſe exiſtimamus, cum & venti quidam circulares deprehendantur, & accuratè loquendo, ventus nullus eandem conſtanter plagam obſervet.

PROPOSITIO III.

Plaga dicitur imaginarium planum, quod concipimus extenſum à quovis telluris loco perpendiculariter verſus unum punctum ex illis, qua locum illum circulariter circumſtant.

Talis videtur eſſe vera & vulgaris plagæ notio, in quo invenienda non parum laboravi. Germani vocant,

vocant, sic gegend. Interdum ipsa puncta circumstantia vocantur plagæ.

Explicatio quidem plagarum non pertinet ad hanc Geographiæ sectionem, sed ad tertiam de comparatis affectionibus: Verum quoniam ventorum species ab eis vel hæ à ventis denominantur, ideo hic anticipamus illam tractationem. Is autem plagarum usus est, ut cum variæ res & apparentiæ in vario à nobis situ appareant, id explicare possêmus.

PROPOSITIO IV.

Plagæ numero infinitæ sunt, cum per singula Horizontis puncta duci possint plana: sed triginta duæ tantum ex illis peculiæ appellationses hodie sortitæ sunt, quæ etiam communes sunt ventis, qui à talibus plagis spirant.

Sunt autem plagæ duplices, (sicut & venti) Cardines, siue Cardinales, & collaterales. Cardinales, quæ transeunt per puncta quatuor circumstantia à circumvolutione quotidiana stellarum dependentia, qualia sunt Septentrio, Auster, Oriens, Occidens: quibus nominibus & plagæ & venti quoque designantur. Sed & dicimus plagæ & ventus Septentrionalis, Australis, Orientalis, Occidentalis: & venti uno vocabulo appellantur: Aquilo seu Boreas, Auster seu Notus, Eurus, Zephyrus. Collaterales sunt, quæ inter duas cardinales interstant quarum cum infinitæ sint, numerantur hodie tantum viginti octo, nimirum septem inter binas Cardinales, ut inter Septentrionem & Orientem, Orientem & Austrum, Austrum & Occidentem, Occidentem & Septentrionem.

Ex intermediis hisce, quatuor sunt primariæ

plagæ seu venti, nempe quæ exactè mediæ sunt inter Cardinales, & ab illis distant 45 gradibus, quæ sunt EuroBoreas, Nord Ost/EuroNotus, Sund Ost/ZephyroNotus, Sund West/ZephyroBoreas, Nord West.

PROPOSITIO V.

Plaga illa triginta duæ aequaliter à se invicem distant: unaquæque scilicet à vicinis suis unde efficitur inter duas plagas intercedere gradus Horizontis undecim & unam gradus quartam, (11 gr. 15 min.) Cardinales absunt à se invicem gradibus 90.

Etenim cum Horizon, tanquam circulus complectens omnia puncta circa locum aliquem, habeat 360 gr. ut omnes alii circuli; si 360 gr. dividantur inter 32 plagas, accipiet unaquæque gradus 11, & 15 min. sed si inter quatuor cardinales dividatur, accipiet unaquæque cardinalium 90. Itaque plaga à Septentrione prima versus Ortum est, quæ distat à Septentrione versus ortum, 11 gr. 15 min: secunda, quæ 22 gr. 30 min: tertia, quæ 33 gr. 45 min: quarta, quæ 45 gr: hæc media est, &c. & ita porro in reliquis quadrantibus.

Vocabula hisce triginta & duabus plagis & Ventis imposita à Germanis, commodissima, sed quæ aliæ linguæ difficulter possunt imitari: Ea atque ordinem plagarum in adjuncta Tabula videre est, cum gradibus: simul etiam Latinam atque Italicam applicationem addidimus.

PROPOSITIO VI.

Quoniam autem inter duas plagas satis magna adhuc intercedunt intervalla, à quibus venti spirare possunt, & in quibus alia corpora constituta saepe sunt, quorum situm ad nostrum locum cupimus

mus scire, ideo quidam bisecant unamquamque ex triginta duabus illis plagis & unam interlocant, ita ut sexaginta quatuor plagas & Ventos numerent, quod in longinquis navigationibus quidam nauta observant.

Sed Mathematici videntes, quod ne hæc quidem ad accuratam designationem sufficiant, illi tot plagas numerant, quot in Horizonte sunt gradus & minuta, illasque denominant & designant numero graduum & minutorum, quibus à Cardinali aliqua plaga distant, sive quantus est arcus Horizontis interceptus inter Cardinalem plagam & quodvis punctum Horizontis: ita plaga 1 gr. ab Austro versus ortum, &c. Sed in ventorum observatione nautica non requiritur tam subtilis divisio.

Possæt tamen excogitari ratio quibus 32 venti commodius appellarentur, ita ut omnium gentium linguæ & sermoni per æque facilis est; Nimirum si ab ordine denominarentur quò se mutuo insequuntur ab uno Cardinali ad alterum.

Ex. gr. Primus ab Austro ad Eurum, sive primus EuroNotus, primus EuroBoreas, secundus, tertius, quartus, &c. Germanicè, *der eerste Wynd* Ost/ *der ander* der dritte Wynd &c.

PROPOSITIO VII.

Veteres tam Græci quam Latini, pauciores ventos numerarunt, sive, ut rectius dicam, paucioribus ventis peculiaria imposuerunt nomina, neque in hisce consentiunt, sed eundem ventum diversis appellant nominibus quæ non ab ordine sed aliunde desumserunt: unde non levis existit difficultas de ventorum distributione ab illis usurpata.

Olim quidem apud Græcos quatuor tantum

venti nomina acceperant, nempe cardinales, Eurus ab ortu spirans, Zephyrus ab occasu, Boreas à Septentrione, Notus ab Austro: neque ab Homero aliorum ventorum fit mentio. Deinde hisce, quatuor alios ventos, vel ventorum nomina addiderunt, nempe illorum, qui spirant à plagis, hisce 1. in qua Soloritur, cum solstitium hybernum est inter Austrum & Eurum, quæ plaga dicitur ortus solstitialis brumalis: & Ventus dictus est Eurus: nam ipsum Orientalem vocarunt Subsolanum: sed Gellius Vulturum vocat & Orientalem appellatum esse Eurum mavult. 2. in qua tunc occidit qui dictus est Africus & $\lambda\psi$. 3. in qua oritur tempore solstitii æstivi, inter Eurum & Septentrionem, quæ plaga dicitur ortus solstitialis absolutè, & ventus ab illis dictus est Aquilo. 4. in qua occidit illo tempore solstitii, quæ plaga dicitur occasus solis æstivus seu solstitialis: Ventus vero hic appellabatur à Græcis Corus.

Horum ventorum ordinem repræsentat adiunctum diagramma, juxta Senecæ enumerationem in libro v. Natur. quæstion.

PROPOSITIO VIII.

Ea Græcorum designatio ad navigationem aliofque usus perincommoda est, quam tamen incommoditatem illi non magnopere senserunt, cum non longo spatio à Græcia recederent in navigationibus.

Etenim in locis diversæ latitudinis sive diversæ à polo distantia, diversa quoque est distantia ortus solstitialis & brumalis distantia à Cardinibus, Septentrione, Austro, &c. Græci tamen eam retinuerunt, sed auctam aliis intermediarum quatuor ventorum appellationibus, ita ut duodecim venti essent, quos propriis singulos vocibus designarent;

rent; etsi quosdam alii aliter. Latini præter illos duodecim addiderunt aliorum duodecim ventorum nomenclaturam, qui inter binos priorum duodecim spirarent. Appellationes & ordinem exhibet sequens diagramma, in quo Græcorum venti literis majusculis designantur; illi, quos Romani inter binos quosque interposuerunt, minoribus. Seneca tamen monet, jam olim à Varone illam incommoditatem animadversam esse atque ideo hunc duodecim ventos ordinasse ita, ut æqualibus distantis binæ quæque distarent, non habitâ ratione ortus solaris plaga. Quod autem idem Seneca affirmat non esse plures ventos, quam duodecim, id falsum & ridiculum est. Sunt enim infiniti.

PROPOSITIO IX.

Hactenus ventorum distributionem à plagis desumptam explicavimus, & veterum tam Græcorum quam Romanorum divisionem minus aptam esse usus rei Nauticæ & Geographiæ simul ostendimus.

Itaque recentiore, quæ 32 ventos, ab æqualiter distantibus plagis spirantes constituit, merito retinemus. *Venti autem oppositi*, dicuntur & contrarii, qui spirant à plagis per diametrum oppositis. Ventos quippe concipimus, tanquam ex alio loco ad nostrum accedentes: plagam vero à nostro loco ad alium extendi cogitamus.

PROPOSITIO X.

Causæ ventorum variæ sunt. Etenim cum ventus nihil aliud sit, quam continua aëris protrusio, omnia illa, quæ talem protrusionem efficere possunt, erunt causæ ventorum. Sunt autem hæc:

R 5

I. Præ.

1. Præcipua & generalis causa est ipse Sol, qui igneo suo jubare aërem rarefacit & attenuat, in primis illum, in quem perpendiculares radios mittit, sive supra quem hæret. Aër enim rarefactus multò majorem locum postulat. Inde fit, ut aër à sole impulsus alium vicinum aërem magno impetu protrudat, cumque Sol ab Oriente in Occidentem circumrotetur, præcipuus ab eo aëris impulsus fiet versus Occidentem. Atque ejus indicium esse potest, quod in Zonæ Torridæ plerisque locis, & ubique in mari, continuus spirat ventus Orientalis, nimirum, aërem Sol protrudit ab Oriente versus Occidentem, & non excedit Zonam Torridam. Protruditur quidem aër rarefactus circulariter versus omnes plagas, Septentrionem, Austrum, Orientem, Occidentem atque ad intermedias plagas, sed non admittitur in omnibus plagis: vehementior autem fit protrusio versus Occidentem, quia Sol versus eam plagam movetur, itaque versus hanc plagam magis sensibilis est ventus in Zona Torrida ferè continue, in nostra autem Zona plerisque diebus, horis matutinis ante Solis ortum & post eum, ubi plerunque alii venti cessant. Ex aliis plagis aliæ aliis interdum sunt magis dispositæ ad recipiendum hunc impetum. Itaque ubi major fit protrusio versus Septentrionem, ventus austrinus spirare dicitur, cum versus Orientem protruditur, ventus Occidentalis; cum versus Austrum, ventus Septentrionalis, & sic de aliis plagis. Et notandum est, cum hæc protrusio fit ad plagam aliquam extra quatuor illas Cardinales, tunc in diversis regionibus diversum videri ventum. Et si enim plaga illa una sit respectu loci, cui sol verticalis est, tamen respectu aliorum locorum diversa est. Et sic eadem causa eundem ven-

tum

tum facit diversis nominibus appellari in diversis regionibus. Hæc autem causa vel adjuvatur vel impeditur ab aliis causis ; si adjuvatur, vehementer ventum facit, si impeditur, minus vehementem ab illa plaga, & sæpe alius ventus tunc spirat, qui potius ab illa generali causa juvatur.

2. Secundam causam ventorum pono, eamque frequentissimam, exhalationes ex mari & terra copiose & cum impetu quodam elevatas : sed vix ventose efficiunt, nisi cum rarefieri incipiunt.

3. Nubium & nubecularum attenuationem & rarefactionem, sive illa à sole & aliis stellis fiat, sive ab inclusis & adjunctis igniculis & sulphureis particulis.

4. Nivium & glaciei resolutio præsertim ejus, quæ in montanis jacet. Neque enim in aquam integræ solvuntur.

5. Lunæ & reliquarum stellarum ortus & varius situs.

6. Condensatio & rarefactio aëris atque vaporum à quovis frigore vel calore.

7. Nubium descensus, quò subjectus aër premitur.

Ad causas hæc facilius intelligendas multum facit consideratio æolopilarum, in quas inclusa aqua admoto igne per angustum orificium magno impetu ventum emittit, donec omnis aqua exhalaverit. Angusti autem orificii vicem in aëre præstant, 1. Aër circumstans densior. 2. Si idem aër vicinus urgeatur vel cedere prohibeatur ab aliis vaporibus vel nubeculis. 3. Si aër versus unam plagam magis condensetur, atque ita viam præbeat flatibus.

PROPOSITIO XI.

Cur venti ita spirent, ut perpendicularem lineam supra Horizontem faciant? sive, cur incessus ventorum sit perpendicularis ad Horizontem?

Causa est, quod aër sphaericâ figurâ Tellurem ambit, & protrusio aëris fit plerunque per circum sphaeræ maximum, qui per centrum Telluris transit. Et si enim quoque cogitare possimus aërem secundum transversam lineam impelli, tamen quoniam à lateribus minor est impetus, & major resistantia, inde fit, ut in medium iter venti incumbant.

Commodius autem concipimus hunc modum, si consideremus primam ventorum causam. Protrudit enim Sol aërem, versus omnes plagas illius loci, cui verticalis est, sed non in omnibus ille impetus recipitur, ut dictum. Si jam consideremus ab illo loco ductos circulos maximos & inter hosce illos, in quibus aër protruditur, vel impetus recipitur omnia loca Telluris sita in hoc circulo vel semicirculo ventum experientur perpendiculariter allabentem, propterea quod omnis circulus maximus Telluris transiens per aliquem ejus locum, est perpendicularis ad Horizontem ejus loci. Eadem ratio est, si quando ex nubecula vel nubibus resolutis ventus erumpit. Illa vero loca, quæ extra hosce circulos sita sunt, non experientur ventum, etsi aër moveatur supra eorum Horizontem, quia ad illum Horizontem non perpendicularis est sed obliquus.

Generaliter tamen non est verum, quod ventus perpendiculari via ad Horizontem incedat, quia sæpiuscule in ipso aëre transversæ spirationes deprehenduntur.

Sic

Sic fumum è camino egredientem videmus non à vento auferri versus unam plagam, sed partem ejus in alias plagas ferri.

PROPOSITIO XII.

Cur venti interciso quasi vel interrupto impetu spirant, ut modo cessent, mox resumtis quasi viribus cum importunitate vel cumulo redeant? Et, cur in mari magis continui videntur spirare, ut minus illa quies sentiatur?

Causam esse puto, quod causa ventos excitans non continue duret, sed ad copiam & collectionem ejus quantitatis, quæ tali impetu aërem perumpat, requiratur tempus. Et ideo, quia in mari exhalationes magis continuæ sunt, & minus impeditur motus, ideo illa quies in mari minus sentitur, etsi non omnino tollatur.

PROPOSITIO XIII.

Cur ventus nullus perpendiculariter ex aëre in loca Telluris spirat?

De hac questione Aristoteles libr. 2. Meteor. cap. 9. admodum obscure agit, ita ut Peripatetici de illius sententia non sint concordēs, neque libet hic eorum placita recensere. Causa facilis explicatu esse videtur, nimirum quod aër deorsum protrusus versus centrum Telluris non possit perumpere hac viâ, propterea, quod alii vapores continue sursum expellantur vel ferantur, & ideo nimia resistentia aëris, qui directe situs est sub moto aëre, facit ut protrusio fiat ad latera illius loci, in quo impetus incipit. Quod eò magis verisimile fit, cum venti materia plerunque levior sit aëre illo & magis rarefactus, quam qui Telluri vicinior est.

PROPOSITIO XIV.

Cur venti Occidentales minus frequentes, quam Orientales.

Hujus causa manifesta est ex Propos. x, ubi ventorum primam causam fecimus Solem qui aërem rarefacit ab Oriente ad Occidentem progrediens, & ideo magis truditur aër versus Occidentem. Itaque ut hæc generalis causa impediatur, oportet copiosos admodum halitus vel nubes in occidentalibus plagis consistere, quod minus frequenter contingit.

PROPOSITIO XV.

Cur venti Septentrionales & Orientales magis rigidi & impetuosius sunt, contra, Austrini & Occidentales laxiores? & debiliores?

Causa est, quia Septentrionalis aër propter frigus densior est, austrinus (in nostra Zona) propter majorem à Sole & calore factam dissipationem rarior. Quò autem rarior est aër, eo minus impetuoso fertur motu. Sciendum tamen est, Australes ventos frigidos esse & siccos & impetuosos in Temperata Zona nostræ opposita sive Arctica, non minus ac nobis Septentrionales. Orientalis autem rigidus est, sive magis intensus propter aliam causam, nimirum quia plerunque ab aëris per Solem rarefactione oritur, qui cum continuè feratur ab Oriente in Occidentem, majori quoque impetu protruditur aër ab Oriente in Occidentem.

Sed alias accedere causas, quæ vel juvent vel impendant impetum illum, verisimile est. Nautæ Lusitani vocant Brysas, ventos Boreales & Orientales: sed Vendavales appellant Austrinos & Occidentales.

P R O-

PROPOSITIO XVI.

Cur venti Austrini & Occidentales deprehenduntur calidiores, quam Orientales & Septentrionales, qui insignem præ illis frigefaciendi potestatem obtinent.

Ita solet hæc quæstio vulgo proponi: verum sciendum est, non generaliter de omnibus locis esse intelligendam, sed tantum de nostræ Zonæ locis. Etenim in altera Zona Temperata versus Austrum ab Æquatore sita contrarium est verum, quia hisce locis Septentrionales venti tepidi sunt, australes verò magis frigidi deprehenduntur. Atque ita postulabat rei Natura & causæ conditio. Etenim, quod nobis auster magis tepidus sentitur, & Septentrionalis frigidior est, inde fit, quod austrini venti veniunt ex plaga, & locis quæ viciniora sunt Zonæ Torridæ sive viæ Solis, Septentrionales autem à locis remotioribus ab ea via solari, hoc est à locis frigidis. Contrarium autem obtinet in locis ab Æquatore versus Antarcticum polum sitis, quia Septentrionales venti illis accedunt à via solari, Austrini à locis polo vicinioribus.

De Orientalibus verò & Occidentalibus aliter respondendum est, neque hic locum habet illa diversitas locorum nostræ Zonæ & alterius oppositæ. Primò itaque dictum est in præced. propos. quod venti Occidentales minus frequentes sint in omnibus locis, cujus causa eadem, est cum illa, propter quam Occidentales tepidiores sentiuntur, nimirum, quoniam plerunque spirant de nocte & post Solis occasum, ubi aër qui protruditur versus nostrum locum est calidior vel minus frigidus quam aër nostri loci, quippe qui
ab

ab Occidente Sole est remotior, quam ille, qui inter Solem & nostrum locum jacet. Accedit altera causa, (quæ etiam in differentia inter Septentrionales & austrinos valet) quod venti Occidentales minus impetuoosi & intensi spirant, sed cum quadam laxitate. Notum autem est, auram quamlibet vel ventulum eò magis frigidum sentiri, quo majori vel magis intenso impetu spirat, etsi revera calidior vel frigidior non sit, quod vel exspiratio nostra testatur, quam frigidam & calidam exhalare possumus.

PROPOSITIO XVII.

Cur nauta ex conspecta nubecula, præsertim quæ pallidi vel subnigri coloris est, ventum ab ea plaga sibi promittunt. Simul alia ventorum futurorum signa exponere.

Duplex potest reddi ratio. Vel enim nubesejus coloris indicant, quod mox in flatus resolvendæ & dissipandæ sint: Vel ipsæ nubes suâ gravitate subsidentes & ab aliis nubibus segregatæ aërem suppositum premunt atque ita spirare faciunt. De peculiari nubecula, quam Belgæ vocant oculum bovis, vide cap. seq.

Sol in ortu suo maculosus apparens & sub nube pallida latens vel atra, vel imbres vel ventos futuros prænuntiat. 2. si Sol exoriens concavus videatur, ita ut è medio fulgeat & radios jaciât, humidam & ventosam significat tempestatem. 3. si sol in occasu palleat: sed si rubeat, serenus & quietus erit sequenti die aër. 4. Si pallidus Sol in nigras nubes occidat, aquilonem ventum significat. 5. Luna rubens instar auri censetur certum futuri venti signum juxta versiculum: Pallida Luna pluit, rubicunda flat, alba serenat. 6. Corona circa

circa Lunam. 7. Si Lunæ cornua tetra fuerint. 8. Si aquilonium cornu Lunæ apparet porrectius, aquilonius ventus imminet, si australe sit erectius, imminet Notus. 9. Lunæ & stellarum illustrium ortus, ut Arcturi, Orionis, hædorum præsertim cum sole. 10. Si parvæ stellæ in Cancro, quas asellos vocant, tegantur nubecula, & quidem si Septentrionalis ex illis duabus tegatur, ventus erit australis, si australis, Septentrionalis. 11. Pluviis cessantibus plerumque venti flare incipiunt. 12. Strepitus & murmur quoddam, tanquam ebullitio fieret, in mari auditum. 13. Veteres etiam ab animalibus, ut ave cornice, pisce Delphino signa desumserunt. 14. Ab ignitis meteoris, fulgure, Chasmate, Capris, stellis cadentibus: sed non ex ignibus fatuis.

PROPOSITIO XVIII.

Cur in Vere & Autumno venti frequentiores & majori nisu spirant, quam in fervida æstate vel gelida hyeme?

In Vere id fieri existimandum partim propter nivium resolutionem præsertim in montanis locis, partim quia pori Telluris tunc aperiuntur & plures halitus emittunt: partim quia aer & vapores magis rarus tunc fit, cum hyeme densatus esset. Adde quod plerumque mense ante initium Veris & in ipso Vere multæ cadant pluvie, propterea quod humidæ constellationes jam eas Zodiaci domos occupaverint, in quas ingressio Sole, Veris initium numeramus. In Autumno autem pluvie frequentes & exhalationes ventorum causæ censendæ sunt, non minus ac in Vere, propterea quod calor mediocri à Sole profectus extollat quidam vapores & exhalationes sed crassiores nec
satis

fatis attenuatos. In æstate autem fervida ideo nulli venti sunt plerunque eandem ob causam, ob quam pluvix raræ sunt eo tempore, nimirum quia Sol nimis attenuat exhalationes, neque permittit eas coire in eam copiam, quæ requiritur ad ventorum generationem. Quæ causa generalis quidem non est, nec semper vera: at neque generaliter verum est, in fervida æstate nullos ventos esse: hoc enim tantum de eo, quod sæpius fit, est intelligendum. In hyeme sæva venti sunt rariores, ideo quod & pauciores vapores è terra eleventur, & qui elevati sunt vel in nives condensentur vel certe præ gelu non ita dissipentur vel rarefiant, ut ventum faciant.

PROPOSITIO XIX.

In quanta æris altitudine sive in quam æris regione venti flare incipiant?

Sunt qui ventos non transcendere infimam regionem æris existiment, propterea quod fastigia altorum montium, ut Olympi nullos flatus sentire deprehendantur. Ego de observatione dubito, cum fumus ex summi montis Ætnæ apice ejectus vento agitari hinc inde cernatur. Ideo in suprema quoque regione æris talem commotionem ventosam fieri posse arbitror.

PROPOSITIO XX.

Ad quantum spatium unus idemque Ventus se extendat?

R. Admodum magna in hoc est diversitas. Et enim venti ab Oriente in Occidentem flantes sub Zona Torrida, videntur totam circumire Tellurem. Illi quoque, qui vel à Septentrione vel ab Austro spirant, per multos dies & longa spatia solent

lent sequi nautas vel comitari. De collateralibus ventis idem videtur esse verum, sed hæc diversitas adest, quod idem ventus in diversis locis diversus est, ut propos. x. in fine explicationis primæ causæ diximus.

CAPUT XXI.

De Ventis in specie, & Tempestatibus.

PRæcedenti capite Ventorum distributionem, differentias, vel potius denominationes attulimus, quas à plaga unde spirant vel spirare nobis videntur, accipiunt; quæ proinde divisio accidentalis est, quoniam respectu certi loci Telluris (ad quem plagæ illæ referuntur) sumuntur. Hoc capite alias ventorum divisiones & phænomena quæ vel certo tempore anni, vel certis tractibus Telluris proprii sunt afferemus etsi plures cuperemus habere & accuratiores de hisce observationes. Sed adducemus, quæ ex nautarum diariis multo labore collegimus.

PROPOSITIO I.

Ventus alius constans est, alius inconstans.

Constans est, qui ad minimum una vel altera horâ spirat ab eadem plaga, Belgæ nautæ vocant, *Een door-gaende vvind.*

Inconstans, qui modo spirat, modo in alios ventos ab aliis plagis spirantes mutatur: Belgæ vocant, *variable vvind*, item *de vvind loopt rondsom het compas.*

Causæ majoris vel minoris durationis ejusdem venti, itemque celeris immutationis esse videntur. 1. Si sit à generali causa, vel magis aut minus diuturna & constante.

Ita

Ita venti à motu aëris cum motu Solis in Zona Torrida sunt constantes: ita illi, qui à nivium resolutione in montibus præsertim, spirant. 2. Si forte in aliis plagis non consistant tales vapores, qui ad ventos generandos apti sunt. 3. Si aër circumstans illam nubeculam, è qua venti generantur, sit densior, neque concedat viam illis halitibus. Sed si aër sit minus densus vel laxior sit, & vapores pauci hinc inde in diversis locis seu plagis, si denique causæ generales cessent, tunc quidem venti variabiles deprehenduntur, qui plerunque lenes sunt.

PROPOSITIO II.

Ventus alius est generalis, alius particularis.

Generalis ventus dicitur à nautis (*den generalen vvind*, vel *passaet vvind* appellant) qui in multis simul locis longo Telluris tractu per totum fere annum spirat in mari. Particularis contra, qui non simul pluribus locis per totum annum spirat.

Generalis autem impeditur 1. In partibus maris Terræ vicinis: hic enim ex aliis plagis vapores interpellant: & ideo generalis ventus præcipue consideratur in medio mari à terris remotissimo. 2. potest tamen etiam in medio mari alius flare ventus, nempe si in alia plaga nubecula vel alia causa ventum generans satis valida extiterit. Ex hisce duabus causis fit, ut generalis ventus magis & minus constans vel continuus sit in diversis locis.

Reperiuntur autem generales venti tantum in mari Zonæ Torridæ, sive quod inter Tropicos jacet, circa totam Tellurem: alicubi tamen extra Tropicos se extendit ad septem gradus, & sunt omnes Orientales, hoc est Eurus vel Eurî collaterales,

rales, ut Euroauster, Euroboreas; nimirum ab Oriente versus Occidentem, qui per totum annum spirant. Non autem pari constantia consistunt in omnibus illius maris partibus, sed in quibusdam magis, in quibusdam minus impediuntur. Constantissimi sunt in Pacifico mari (eâ nempe illius parte, quæ inter Tropicos jacet) ita ut naves, quæ à Novæ Hispaniæ (in America) portu, Aquapulco solvunt versus Philippinas, hoc est quæ ab ortu in occasum tendunt, sæpe sexaginta diebus navigent continuè sine ulla velorum mutatione vel collectione cum constanti vento Euro vel Euroborea, neque in hunc usque diem ulla navis in vastissimo illo itinere (milliar. 1650) periit. Unde nautæ dicunt, licere sibi in hac navigatione securè dormire, neque ullâ gubernandæ navis curâ opus esse, cum generalis ille ventus deducat navem ad optatum portum, hoc est Philippinarum insularum conspectum. Hic enim alii venti interpellant generalem. Eadem constantia hujus generalis venti Orientalis deprehenditur in mari à capite sive promontorio Bonæ spei in termino Africæ, vel potius ab Africæ procurrentis parte ea, quæ in Torrida Zona jacet usque ad ipsam Americam Brasiliensem, in cujus itineris medio jacet Insula S. Helenæ, ad quam cursum dirigere solent nautæ ex India redeuntes in Europam. Abest insula S. Helenæ à promontorio Bonæ spei milliar. 350. & sæpe diebus sedecim absolvitur vel etiam duodecim (prout generalis ventus vehemens est vel debilis, namque in hoc non est perpetua similitudo) eadem securitate utentibus nautis, (quando primum ad parallelum illius insulæ navigarunt, namque promontorium bonæ spei jacet extra Tropicos) quâ diximus uti eos qui
in

in mari Pacifico ab Aquapulco ad Philippinas navigant: imò, superato promontorio Bonæ spei, omni fere ventorum periculo & variatione defunctos se esse judicant, & secure dormiunt, vento constanter implente vela versus insulam illam & Brasiliam, hæc tantum illis maxima cura est & sollicitudo, ne Insulam prætervehantur, cum admodum parva sit. Etenim si vel octavâ milliaris parte eam præterveſti ſint, non poſſunt eam repetere, vento nimirum Orientali impellente navem versus Occidentem: ideo tunc aquationis causam vel ipsa Brasiliæ littora cum magno itineris dispendio, vel aliam Insulam dictam, Ascensionem adire. Si quæras, quamnam itaque ratione navigent, ubi contrarium iter faciunt naves in hoc mari, nempe dum à Philippinis ad Novam sive Americanam Hispaniam tendunt, vel dum à Brasilia & Insula S. Helenæ ad promontorium Bonæ spei, dum Indiam petunt. In hisce navigationibus sciant Lectores, quod triplici utantur navæ modo sive artificio. Vel enim navigant mare extra Tropicos situm, (ideo non adeunt Insulam Helenæ dum ex Europa in Indiam navigant) vel ubi necessariò ipsis hoc superandum est, non directè ab Occidente in Orientem cursum instituunt, sed oblique à Septentrione ut collateralis ejus plaga ad Austrum aut hujus collateralem: vel denique illa tempora navigationis eligunt, in quibus norunt generalem illum ventum ab aliis crebro impediri: sed hoc postremum quia raro fit, ideo potius prioribus duobus modis utuntur, de quo pluribus dicemus in Capite de Navigatione.

Duo itaque maria sunt Zonæ Torridæ, in quibus generalis ille Orientalis ventus cum suis collateralibus per totum annum dominatur, nimirum

rum id, quod inter Africam procurrentem & Brasiliam interjacet, alterum id, quod inter Novam Hispaniam sive rectius inter Americam & Insulas Orientales, quarum pars Philippinæ sunt, extenditur. Tertia autem pars hujus maris sub Zona Torrida existentis, nempe inter Africam procurrentem & Philippinas seu Orientis insulas non quidem destituitur hoc generali vento, sed sæpius in hocce mari interpellatur propter frequentes insulas, quæ tamen interpellatio in quibusdam locis crebrior est, quam in aliis. Inter Mozambique Africæ & Indiam ventus ille Generalis maxime viget mense Januario, Febuario, Martio, Aprili, reliquis mensibus alii venti spirant, de quibus sequenti Propositione dicemus. Magis impeditur ventus hic generalis in mari Insularum Indicarum. Ad Insulam Bandam cum Majo mense Orientales vigere primum incipiunt vehementes & cum pluvia: ad Malaccam in Septembri & aliis locis aliter, ut sequenti Propositione dicetur.

Illud tamen sciendum est, ventum hunc generalem in maribus hisce non æqualiter se ad Tropicos usque extendere in omnibus partibus, sed magnam esse in hoc differentiam.

Etenim Tropici distant ab Æquatore utrinque gradibus $23\frac{1}{2}$: ventus autem generalis in uno meridiano sentitur ad latitudinem 20 graduum, in alio ad 15, in alio ad 12 &c.

Ita in Indico Oceano cum mense Febuario & Januario ventus Orientalis (vel Euro auster) spirat, non deprehenditur is, antequam ad decimum quintum gradum latitudinis pervenias.

Sic à Goa ad promontorium Bonæ spei navigantibus ventus hic generalis occurrit ad 12 gr. latit. Australis & ad 28 gr. latitud. ejusdem comitatur illos.

Item

Item inter 4 gr. latitudinis Septentrionalis usque ad 10 vel 11 gr. in mari inter Africam & Africam nullum generalem ventum spirare nautæ annotarunt, quippe ubi à S. Helena ultra Æquatorem navigarunt eo vento usque ad quartum gradum latitudinis Arcticæ, tunc destituuntur eo vento usque dum ad 10 gr. latitudinis perveniant. Ab eo enim gradu usque ad tricesimum spirare rursus manifeste & continue deprehenditur Euroboræas, etsi tricesimus hic gradus septem gradibus absit à Zona Torrida. Nihilominus in parallelorum latitudinis 6 gr. 7 gr. 8 gr. &c. nonnullis locis quoque spirat, sed in decimi gradus parallelorum omnibus locis fere usque ad 30 gr. borealem. Eodem modo ultra Tropicum Capricorni in mari inter Promontorium Bonæ spei & Brasiliam ventus Euroauster spirat usque ad 30 gr. latitudinis, hoc est septem gradibus extra Torridam Zonam versus Austrum, idque per totum annum.

Et licet, ut diximus, in omnibus littoribus, multo minus in locis mediterraneis hic generalis ventus non ita sentiatur, tamen in quibusdam factis notabilis est. Ita ad littora Brasiliæ Orientalis ad littora regni Lovvango in Africa, Austro AustroEurus quotidianus est, etsi alii venti se admisceant.

Causa hujus generalis continui venti triplex affertur à Physicis recentioribus. (namque veteribus omnino ignotus fuit cum ipsa Torrida Zona, qui ne verbo quidem ejus meminerunt.) Quidam statuunt, Solem hujus venti ab Oriente ad Occidentem spirantis causam esse, quoniam is ingenti suâ facultate rarefaciat aërem in Zona Torrida & ita protrudat ab Oriente in Occidentem, cum ipse incedat hac viâ.

Alii vero, & quidem ex illis, qui cum Pythagoreis cælum stare, Tellurem circumrotari statuunt, illorum, inquam, quidam existimant, ventum hunc generalem ex eo provenire, quod, dum Tellus circumrotatur atque aër cum eo, hic minus sequatur motum Telluris, sed aliquantum tardior sit ad motum, atque ideo dum nos cum Tellure ferimur ab Occidente in Orientem, aër verò minori celeritate in eandem plagam movetur, videtur nobis occurrere & ab Oriente in Occidentem moveri, cum tamen nos illi potius occurramus.

Tertiam causam, eamque omnino novam affert Cartesius propositione 222 in suis Principiis, ubi Lunam efficere hunc motum conatur ostendere non minus ac motum maris ab Oriente in Occidentem. Sed quia sententia ejus non potest intelligi, nisi omnes ejus hypotheses Physicæ explicentur, ideo nihil hic de ea dicemus, præsertim cum causam illam non esse veram alio loco ostensuri simus. Nobis prima causa placet; secunda autem ideo non videtur recipienda, quod & Copernicani plurimi eam non concedent, & ratio dari non possit, cur tantum intra Tropicos vel ad 30 gr. latitudinis, & non in Temperatis totis Zonis is ventus deprehendatur spirare.

PROPOSITIO III.

Ventorum quidam sunt periodici & statii, alii vagi seu erratici.

Statii dicuntur & periodici, qui certis anni diebus spirant & deinde certo dierum numero cessant, donec iterum spirare incipiant. Horum quidam sunt anniversarii, quidam semissis anni intervallo redeunt, quidam mensuri qui unius vel alterius mensis intervallo redeunt, quidam diarii,

diarii, qui singulis diebus spirant. Aliter quoque subdividuntur statim venti, nempe quidam ubi incipiunt spirare, durant per aliquot menses, alii per semissem anni, alii uno mense, alii paucis diebus.

Inter hosce præcipue illi observantur à nautis, qui per aliquot menses spirant in certis maris partibus, atque illos (ut etiam ipsa tempora quo tales venti spirant) vocant Motiones, Belgæ, Mousson. Atque tales motiones imprimis in Oceano Indico ab Africa ad usque Philippinas Insulas notabiles sunt, etsi neque aliis locis desint. Magnum momentum in observatione harum motionum situm est, quippe tempus illarum nautæ eligere debent ad navigationem quam instituunt versus eandem (vel collateralem) plagam, ad quam ventus ille spirat, neque suscipere navigationem in plagam motionis istius, sed expectare motionem contrariam. Etenim in Indici Oceani partibus ubi unus ventus per aliquot menses spirans cessat, succedit alius ventus priori contrarius, atque eadem constantia durat, donec suum tempus absolverit, atque ideo hasce motiones vocant contrarias. Tempus autem commutationis motionum (*verandering van Mousson*) appellant illos dies, qui intercedunt inter finem unius motionis & principium contrariæ. Neque enim cessante unâ motione statim altera incipit spirare, sed dies aliquot intercedunt interdum plures interdum pauciores, item, in quibusdam locis plures, in quibusdam pauciores. Atque hisce diebus intermediis quibus nulla certa motio spirat, ventus est variabilis, insidiosa malaciæ & plerunque incertis fluctibus agitur mare, atque tempestates crebræ ingruunt. Quidam ex motionibus bis in anno redeunt, sed non eadem vehementia, unde nautæ unam

unam vocant, *de groote Mousson*, alteram, *de kleine Mousson*.

1. In Oceani Atlantici parte ea, quæ in Zona Torrida jacet, ut etiam ea, quæ in Temperata Boreas spirat frequens mensibus Octobri, Novembri & Januario. Et ideo hi menses maximè idonei sunt capeßendæ navigationi ex Europa in Indiam, ut Æquatorem superent ope illorum ventorum. Etenim experienciâ constat, quasdam naves, qui mense Martio ex Europa solverant, non citius pervenisse ad Brasiliam, quam illas, qui mense Octobri solverant, nimirum utræque pervenerunt illuc mense Febuario, adjunctæ Boreâ. Quia tamen non est ita continuus & certus hic ventus, ideo nautæ non consueverunt eum appellare Motionem. Neque facile est causam reddere hujus venti in istis mensibus, nisi ad copiosos & densos vapores, vel ad continuam pressuram à nubibus gravibus factam eum velis referre. Sed & qui in Nova Zembla hybernarunt, testantur frequentissimum ibi fuisse ventum Septentrionalem toto hyemis tempore, ubi Soli rarefacienti aërem nequit ascribi hic effectus, cum infra Horizontem delitesceret. Id tamen in genere existimo posse suos defendere, quod motionum harum pleræque proveniant à resolutione nivium vel crassarum nubium per hyemem in Septentrionalibus & Australibus locis, præsertim montibus collectarum. Ad quod credendum inductus sum eo potissimum argumento, quod motiones hæ maximæ ex parte spirant à Boreali vel Australi plaga, vel harum collateralibus. Quoniam itaque nix & crassiores nubes in Septentrionalibus locis resolvuntur à Sole, eâ potissimum semisse anni quo Septentrionalem Eclipticæ peragrat, ideo motio-

nes tunc erunt Septentrionales. Eodem modo in australibus vel Antarcticis locis altera semisse anni Sol resolvit nivem & crassiores nubes, ideo tunc motio Australis sentietur.

Quod autem motiones hæ in mari magis spirant à collateralibus plagis, nempe Austro Euro, Euroborea, vel vicinioribus plagis ad Boream & Austrum, ejus causa videtur referenda vel in diversum locorum situm, in quibus nix & nubes crassiores collectæ sunt, vel potius in generalem ventum, qui admodum motiones illas in aliam plagam trahere potest. Etenim cum generalis ventus per se & ex sua natura tendat directè ab Oriente ad Occidentem, motiones autem istæ ab uno polo ad alterum tendant, inde oritur mutuum impedimentum atque inde fieri potest, ut plagam intermediam inter Eurum & Austrum, vel inter Eurum & Boream ventus sortiatur. Motiones vero Austrozephyrinæ & Boreazephyrinæ inconstantes, raræ & debiles sunt, ideoque vix inter motiones numerantur, cum Boreas & Auster per accidens videantur interdum ad Zephyrum declinare, ad Eurum verò trahantur à vento generali. Ad reddendas autem causas de magna illa diversitate harum motionum in diversis locis requiruntur observationes magis accuratæ & quidem non unius anni, sed plurium, cum annotatione temporum hyemalium, pluvialium, nivalium, montium illorum locorum, ex quorum plagis venti hi statim spirant, Lunæ quoque motum & phasin, quidque ea varietatis hic inducat, scire debemus.

2. Mense Julio & aliquot vicinis spirant australes venti ad promontorium viride Africæ. (Ibi tunc hyems est pluvix nempe) atque hoc non aliam

aliam ob causam fieri videtur, quam ob eam, quâ in nostra Zona Septentrionales spirant hyeme.

3. Ad promontorium Bonæ spei in Septembri Euroboreas flat.

4. Ad Patanen (regnum est & urbs ejusdem nominis in India trans Gatem) mensibus Novembri, Decembri & Januario continuæ pluvix & ventus Euroboreas, sed reliquis mensibus ventus Orientalis perflat, & æstas est.

5. Circa Sumatram motionum mutatio fit Novembri & Decembri.

6. In insula del Mayo, una ex Azoribus sive salinis, in fine Augusti aspirat ventus vehemens ab Austro, & multas pluvias affert, quæ terram aliàs aridam humectant, & tunc primum gramen progeminat, quo hirci plurimi impinguntur ad finem Decembris.

7. In regno Congi Africæ, medio Martio ad Septembrem (quo tempore hyems ibi est) spirant venti boreas, Zephyrus & borea Zephyrus vel alii intermedii, qui cogunt nubes in fastigia montium & obscurum aërem cum pluviis generant. (Vide Propos. sequ.) Sed à Septembri ad Martium venti sunt prioribus contrarii Austro, Eurus & Euro-auster aliique intermedii. Hasce statuum & anniversionum ventorum differentias desumimus ex observationibus nautarum, qui illos vocant Motiones, Moussons, si in maris longo tractu spirent. Jam de causis illorum agendum esset, sed omnium regionum montes, nivium & colliquationis earum tempora, aliaque multa ignoramus: præterea observationes illæ nautarum non satis accuratæ sunt, ut sollicitam inquisitionem de causis videantur mereri.

Motiones celebriores sunt hæc:

1. In Oceano Indico inter Africam & Indiam, & ad ipsas Moluccas motio Orientalis versus Occidentem incipit cum Januario & spirat per sex menses usque ad Junii initium : Mense Septembri & Augusto incipit motio contraria, nempe venti Occidentales. Mense Junio, Julio & Augusto motionum est mutatio, & sævæ tempestates à Septentrione. Quando autem dicimus, Orientales vel Occidentales venti, intelligimus non tantum Eurum & Zephyrum, sed etiam collaterales, Euro austrum, Zephyroboream.

2. Ad littora verò variat admodum motio Orientalis, ita ut tantum à Januario usque ad finem Martii vel medium Majum naves ex India eis Gatem vel Malabarico littore solvant petentes Persiam, Arabiam, Moçam, Africanique : namque cum fine Maji, & toto Junio, Julio & Augusto crebræ & vehementissimæ tempestates sæviunt, immiscetur se frequenter vento boreali vel furente Euroborea : itaque hisce mensibus nullæ naves abeunt ex India cis Gatem : sed in littore Indiæ trans Gatem hoc est Orientali vel Coromandelio littore ignorant tales tempestates. A Ceilano insula Java aliisque ad Moluccas instituitur navigatio mense Septembri, quia tunc incipit motio Occidentalis, impediens ventum generalem. Ubi tamen ad 15 gr. latitudinis Australis ab Æquatore receditur, non ita animadvertitur Occidentalis motio in Oceano Indico, sed generalis ventus Euroauster vela inflat.

3. A Cocino ad Malaccam hoc est ab Occidente in Orientem instituunt navigationem in Martio, quia motio Occidentalis tunc ibi incipit vel potius Zephyroboreas frequenter spirat.

4. In regno Guzaratenfi, hoc est in India cis Gatem

Gatem & littore hujus semiffle anni spirant venti Septentrionales à Martio ad Septembrem : alterâ semiffle australes , & quidem sine crebra interpellatione ab aliis ventis factâ.

5. Belgæ ex Java solvunt plerunque mense Januario & Februario , ubi Europam repetere volunt, navigant tunc vento Orientali usq; ad 18 grad. latitud. Australis : hîc incipit spirare Auster vel Austro-Eurus, quo navigant usque ad S. Helenam.

6. Et si in Oceano Indico à Januario usque ad Junium sit motio Orientalis , & dein ab Augusto ad Januarium motio Occidentalis , nihilominus in diversis ejus partibus quando ab uno loco ad alium est navigandum, diversa tempora censentur magis vel minus commoda, propterea quod venti collaterales magis vel minus spirant , vel minus aut magis vehemens est motio illis temporibus, vel alii venti crebro aut raro se immiscunt illo tempore. Ideo aliam motionem observant navigaturi à Cocino ad Malaccam ; aliam à Malacca ad Maccou Chinæ emporium, aliam à Maccou ad Japoniam.

7. Ad Bandam Insulam cessant Occidentales cum fine Martii : atque ad finem Aprilis venti variabiles & Malaciæ : Cum Majo incipiunt venti Orientales vehementes & cum pluvia.

8. Ad Ceilanum Insulam circa promontorium dictum Punto Gallo , die xiv Martii primus ventus Occidentalis , nempe *West-zuyd-vest*, dein Zephyro auster in fine Martii constans & continuus usque ad 1 Octobris. Tunc Euroboreas & *Ost-nord-ost* incipit , qui ad Martium usque medium spirat ibi. Sed interdum diebus decem vel etiam pluribus, venti hi statim sive motiones serius vel citius adsunt.

9. In itinere à Mozambique Africa ad Coarū Indiæ mense Majo, Junio, Euroaustri dominantur usque ad Aequatorem, sed ab Aequatore ad Coam Zephyroaustri & austri mensibus quoque Julio & Augusto, & sequentibus.

10. In gradu 35 Elevationis Meridiani, qui per Insulam Tristan de cunha transit, mense Majo in novilunio furit Zephyrus.

11. Ad $2\frac{1}{2}$ latitudinis borealis, in mari septuaginta milliaribus à Guinea, ventus Euroaustri dominatur à xx Aprilis ad v Maji (sed non in littore vel ipsa Guinea) post quintum Maji sentitur etiam idem ventus ad 3 gr. & $3\frac{1}{2}$ latitudinis.

12. Ad insulam Madagascar, à xv Aprilis ad ultimum Maji ventus Boreas & Zephyroboreas: sed in Februario & Martio ab Oriente & Austro spirant venti.

13. Mense Martio & Aprili in tractu Telluris & maris ab insula Madagascar ad promontorium Bonæ spei ventus Boreas & Boreæ collateralis ad Eurus spirat continue, ita ut pro miraculo habeatur, si duobus diebus spiret Auster vel EuroAuster.

14. Post xx Aprilis in mari de Bengala ventus Auster vehemens est: ante illum diem vigent ZephyroAustri & ZephyroBoreas, illique impetuosi.

15. Motio pro navigatione à Malacca ad Maccou mense Julio, Octobri, Novembri, Decembri, nempe Austrini venti, & AustroZephyrus, sæpe quoque Euroauster. In Junio verò & Julio initio sæviunt Zephyri circa Malaccam & mari Chinesis.

16. Motio, quâ à Java ad Chibani navigant,
(ab

(ab Occidente in Orientem) incipit cum Majo mense.

17. Motio, quâ à China in Japonem navigatur (ab Occidente in Orientem) viget mense Junio, Julio, nempe ZephyroAuster; interpellant autem crebro Boreas & Boreæ collateralis ad Eurum, idque inprimis de die: de nocte verò interpellant Euroauster & Austri primus collateralis ad Eurum.

18. Contraria motio, nempe à Japone ad Maccou ab Oriente in Occidentem est in Februario & Martio, nempe Eurus & Euroboreas, sed hi in mari non dominantur, sed ad littora Chinæ, quæ navigantes in itinere suo à Japonia observant: vocant eos, *uvindt over land*.

19. Motio, quâ navigatur à Philippinis vel China ad Americanæ Hispaniæ portum Aquapulco nempe venti Occidentalis flatus, mense Junio, Julio & Augusto observantur, sed admodum debiles, nisi in plenilunio: sunt autem ZephyroAustri: vitant autem Zonam Torridam sed Americæ Septentrionalis littora legunt ad vitandum ventum generalem ab Oriente qui tamen tunc minus vehemens est. Id enim in genere sciendum est, Motiones Occidentales sive Zephyri flatus esse debiliores motionibus Orientalibus: quia hæc juvantur à vento generali, illi imminuuntur ab hocce.

20. In mari Chinensi motio Austrina & AustroZephyrina Julio, Augusto, Octobri, &c. Si hi venti in Orientalem commutentur, nunquam stantim ad Austrum redeunt, sed primo ad Boream, hinc ubi aliquot dies spirarint, redeunt ad Orientem, & denique ad Austrum: interdum tamen Euroboreas immediate muratur in Zephyro Austro-

strum, interdum à Borea statim ad Austrum, idque satis hic frequens est.

Sic in mari se habent anniversarii venti constantiores, quibus addo illos, qui minus sunt constantes, & illos qui in littoribus vel etiam maritimis locis observantur anniversarii.

PROPOSITIO IV.

Etesia, venti anniversarii in Græcia, oriuntur à nivibus & pluviis resolutis in montibus.

Duplices Græci observarunt in singulis annis statos ventos, quos Etesias appellavere, nempe 1. æstivos, sive caniculares, quos generali vocabulo appellaverunt Etesias, quia validiores sunt & magis sensibiles. 2. hybernos, quos vocarunt Chelidonios, sive Ornithias.

Etesia caniculares, sunt aquilones seu boreales, in quorum initio ad diem certum constituendo Scriptores dissentiunt. Aristoteles cum post solstitium æstivum eos spirare dixisset, nihil addidit de vero tempore, magnâ certè negligentia, quam auxit deinde, ubi ornithiarum mentionem faciens tam tempus quam ventorum horum plagam omisit: Cæterum, qui annotarunt Etesiarum tempus, illi prodromos illorum vel ad sextum Julii mensis diem, vel ad xv Julii, initium spirandi facere cum Caniculæ ortu annotarunt, flare autem illos per quadraginta dies caniculares atque ideo cum Augusto desinere illos, sed alii ad medium Septembrem extendunt: spirant autem tantum de die, nocte cessant, neque matutinè surgunt, ideo nautæ olim illos vocarunt somniculosos & delictos.

Causa horum ventorum proculdubio est resolutio nivium in montibus Septentrionalibus facta à Solis

à Solis magno æstu, qui tunc temporis maximus est, propterea quod jam per aliquot menses continue fere illos montes sine occasu illustravit. Atque cum hac causa aptè consentit, quod Etesiae nocte cessant, nempe quia tunc cessat nivium resolutio vel minor saltem est, quam generatio venti requirit, propterea quod Sol tunc Horizonti nimis vicinus sit vel etiam omnino occidat.

Idem hic canicularis boreas non tantum in Græcia, sed etiam in Thracia, Macedonia, mari Aegeo. ejusque insulis (quas omnes regiones sub Græciæ nomine aliquando comprehendi non ignoro) imo in Aegypto quoque & Africa, atque verisimile est, eum quem in regno Congi (ultra Aequatorem sito) spirare diximus priori propos. à Borea inter Martium & Septembrem, eum, inquam, eundem esse cum hisce Græcorum Etesis, vel saltem ab eadem causa foveri: sicut etiam illum Boream, quem eisdem mensibus diximus spirare in regno Guzaratenfi à Martio ad Septembrem, nimirum hunc à resolutis nivibus montium Asiae, quos Sarmaticos appellaverunt & orbis cingulum, provenire statuendum, & ideo inter motiones recensuimus illum.

Secundus anniversarius ventus Græcorum est Chelidonius, vel avicularis quem incipere post brumam scripserunt, sed initii diem non annotarunt. Sunt autem hi australes (canicularibus contrarii) & admodum debiles, sine omni nisu: præterea inconstantes & minus continui. Vnde mare placidum reddunt, & avibus hybernis, quas Chelidones vocant, Aristoteles eos per vices spirare refert usque in mediam æstatem, donec Etesiae caniculares, aquilones nimirum incipiant, sed minus sensiles esse.

Horum ventorum causa itidem est resolutio nivis in montibus Lunæ Mononomotapæ, quos nivosos appellant Lusitani, quas nives Sol liquefacit & rarefacit, quoniam in nostra & Græciæ hyeme ibi æstas, Sole australera Zodiaci partem permeante. Atque hic etiam ventus in regno Congi, Ægypto, mari Ægeo, similisque in regno Guzaratenfi deprehenditur, sed per multo plures menses, cum in regno Congi & Guzaratenfi incipiat cum Septembri, & spiret usque ad Martium.

Græcorum anniversarius est, quem ornithias vel avicularem vocarunt, eumque post æquinodium vernali Sole ascendente ad Europæorum verticem spirare dixerunt.

PROPOSITIO V.

Cur in Italia, Gallia, Germania, Persia, aliisque regnis Etesia non spirant? præsertim cum viciniore sint montibus Septentrionalibus, à quibus Etesia Græcorum, Congi, Guzarata, &c. oriri & spirare asseveravimus?

Dubium non leve habet hæc quæstio: & sanè optarem magis accuratas habere de hoc negotio observationes, nempe annotationes ventorum qui eo tempore in singulis regnis observantur, an singulis annis nunquam iidem redeant, namque in Galliæ parte Aquitanix anniversarium esse aliquem ventum memini me legisse aliquando.

Si quid tamen dicendum est ad quæstionem, hæc videntur mihi esse commoda: Primò, in canicularibus nostris Boream sæpe flare non est negandum. Secundò, quod minus continue neque singulis annis sentiatur, causa fortassis est aliorum ventorum crebri flatus, qui illius perceptionem impediunt. Tertiò dici posset, montem à quo
prima

prima incipit nivium resolutio, situm esse directè è Græcia, atque ideo primum ventum canicular-rem huc ferri, vapores verò è reliquorum mon-tium nive huc ferri, propterea quod hic jam li-beram viam factam reperiant. Sed hæc meas ex-temporaneas cogitationes libenter rejiciam, ubi meliorem causam & accuratiores observationes videro.

PROPOSITIO VI.

*Venti quidam proprii sunt & ferè perpetui ali-
eni loco vel tractui Telluris, alii cessantes.*

Paucissima loca Telluris sunt, quæ ventum ali-quem perpetuo tempore experiuntur, hæc ni-mirum.

1. Loca Zonæ Torridæ, præsertim maris Paci-ficæ & Æthiopici partes in Zona ea sitæ fruuntur perpetuo vento, Orientali nempe vel ejus collate-rali, quem generalem vocari, diximus Propositio-ne 11, ubi prolixè egimus de illo. Imò hic ventus non tam inter proprios est numerandus, quam omnibus locis communis statuendus; quando-quidem per accidens fit, quod in omnibus locis non sentitur, nimirum quia alii venti spirant for-tius. Causa ejus loco citato allata est.

2. In littoribus Peru regni & partis Chili, atque adjacenti vicino mari ventus perpetuus ferè est Auster & collateralis ejus ad Zephyrum. Incipit ad 46 gradum latitudinis atque perflat ultra Pa-namam Isthmi Americani, atque efficit, ut paucis diebus naves è Lima ad Panamam argento atque auro onustæ perveniant: sed à Panama ad Limam multorum dierum navigatione opus sit. In mari autem à littoribus Peru remoto non spirat hic ven-tus. Causam hujus venti reddere difficile est, pro-

pterea quod Terra Australis, ex qua spirare videtur, nondum cognita nobis est. Verisimile tamen esse puto, quod in ea quidem perpetuis tecti nivibus montes reperiantur, ex quarum continua resolutione venti hi generentur. Sed nolo hic suspicionibus vel conjecturis meis lectorum inficere animos. Fortasse enim nives, quæ in excelsis montibus ad fretum Magellanicum toto anno reperiuntur, causa sunt horum ventorum, sed id obstat, quod montes illi ab Austro versus ortum jacent, venti autem hi spirant à plaga versus Zephyrum ab Austro declinante: relinquamus itaque hæc diligentiori inquisitioni vel majori cognitioni Terræ australis.

3. Ad littora Terræ Magellanicæ sive del fuego circa fretum le Maire, continui ferè vel saltem admodum frequentes spirant venti Occidentales & quidem cum impetu ita ut arbores quoque inclinent versus ortum à perpendiculari rectitudine. Neque est ulla pars Telluris in qua toties illi Occidentales spirent sed ab altera parte freti le Maire ad littora terræ Australis spirat Auster. Occidentalium illorum causam aliam reddere nequeo, nisi quod existimem eos excitari à nivibus & nubibus in Terra Australi, quæ à latere Occidentali illius freti, ab Austro versus Septentrionem se extendit. Dubia hæc sunt & diligentius inquirenda.

4. In littoribus Malabaricis Indiæ toto ferè anno Boreas & Zephyroboreas spirant. Causa à resolutione nivium in montibus Sarmatiæ Asiaticæ, Imao, Caucaſo, vel à nubibus in montibus aliis Asiæ congregatis & suppositum aërem prementibus petenda est.

5. In mari propè Guineam frequens est Zephyroboreas, in remoto Euroboreas.

6. Medio itinere inter Japoniam & Liampo, urbem maritimam Chinæ usque ad hæc semper reperiuntur venti Occidentales, qui in Japonia spirant mense Novembri & Decembri.

7. Ad insulam Guoton non procul ab insula dos Cavallos in mari Chinenfi ventus australis frequens est, cum in vicino mari Borealis dominatur.

PROPOSITIO VII.

Ad periodicos seu statos ventos pertinent illi quoque quos diales appellavimus, qui in quibusdam regionibus & certo anni tempore, singulorum dierum quibusdam horis spirant.

Sunt autem illi duplices deprehensi & quidem tantum in locis quibusdam maritimis. Quidam enim spirant è locis mediterraneis ad littora versus mare: alii contra à mari ad littora. Illos vocant Lusitani *Terreinhos*, item, vento di terra Belgæ *Landt-vvindt*, hosce viracoinis, *vvindt nyt de Zee*.

I. In Malabarico littore tempore æstatis, nimirum à Septembri ad Aprilem spirant venti terrestres sive *Terreinhos* ab hora duodecima noctis ad duodecimam diei, nimirum Orientales venti, neque sentiuntur in mari ultra decem miliaria. Sed à duodecima die ad duodecimam noctis spirat marinus ventus sive *Viraconus*, nempe *Zephyrus*: verum hic admodum debilis est, ut vix ejus beneficio naves possint littora attingere. Illorum Orientalium à XII noctis ad XII diei causam esse puto partim generalem ventum, partim nubes in montibus *Gatis*: Occidentalium vero à XII die ad XII noctis spirantium è mari causa

causa est nubium resolutio per accidentem Solem facta, quæ nubes antea per ventum Occidentalem versus Occidentem erant coactæ. Hæ sunt meæ conjecturæ. Extra verò dictos illos menses dominatur ibi Boreas, Eurus & Euroboreas. Neque propter tempestates crebras sentiuntur lenes hi terrestres & marini venti.

2. In Coromandelii littoris urbe Masulipatan incipiunt spirare Terreinhos cum primo die Junii, durant tantum quatuordecim dies, & tunc abeunt inde naves. Sed hi potius ad Motiones referendi sunt, quia quantum ex verbis nauticæ descriptionis conjicere possum, illi terrestres per illos dies ibi sunt continui, neque marini succedunt.

3. In littore Americanæ seu Novæ Hispaniæ ad Pacificum mare spirant venti terrestres media nocte: sed marini de die.

4. In regno Congi & in provinciis ad Lopo Consalvo spirant terrestres à vespere per noctem: marini mane incipiunt atque ita calorem diei minuunt.

5. Subsolani quoque venti qui ante Solem & cum Sole Oriente spirare deprehenduntur singulis diebus in omnibus locis præsertim mari, nimirum quando ab aliis ventis quies est, præsertim in Brasilia, ubi singulis diebus matutino tempore. Causam explicare non est difficile. Vel enim generalis venti particulam esse dicemus, vel Solem crassiores aëris per noctem densatas particulas discutere & rarefacere.

6. Pertinent etiam ad diarios ventos Etesiae Græcorum & Chelidonii.

7. In littore Cambojensi à Varella ad Pulo Catte, à vicesimo octavo Julii ad quartum Augusti

sti sæpe spirant terrestres & marini venti successi-
ve singulis diebus, quia tunc motiones ibi cessant
& malaciam faciunt. Terrestres sunt Zephyrus &
Zephyroboreas : marini autem collaterales Euri,
qui in Boream transeunt, statim ad Austrum resse-
cuntur, tunc malacia succedit, donec terrestres
iterum spirare incipiant, qui tamen in mari non
ultra duo milliaria à littore sentiuntur.

8. Reperiuntur quoque terrestres illi & marini
venti ad Havanam nocte spirantes in America.

PROPOSITIO VIII.

*Quo propius ad aquatorem ab Arctico polo ac-
ceditur, eo venti Septentrionales minus vigere de-
prehenduntur, & superato Equatore in parte Ter-
ra Australi vigent venti Australes, qui in hisce
locis frigidi sunt & sicci, præsertim in Chili &
Peru.*

Causa utriusque est eadem, quia à locis polari-
bus veniunt. Reperiuntur tamen in Septentrio-
nali Tellure venti australes, & in australi Septen-
trionales.

PROPOSITIO IX.

Ex dictis hætenus constat, *Ventorum differen-
tias esse quatuor.*

1. Communes, qui omni tempore & omni lo-
co spirant, nisi impediuntur ab aliis qualis est uni-
cus nempe Generalis.

2. Proprios, qui omni tempore sed tantum in
certo loco vel tractu Telluris, non in omni.

3. Qui multis locis, sed non continue sive o-
mni tempore ut sunt motiones, anniversarii &
diarii venti quidam.

4. Quia nec omni tempore nec plurimis locis.

PRO-

PROPOSITIO X.

Venti quidam subitanei sunt & impetuoſi, non diu durantes.

Tales ſunt Preſter, Typhon, Turbo, Exhydrias, ecnephias. Hi venti quibuſdam locis ſunt anniverſarii, quidam locis quibuſdam in mari magis frequentes.

Preſter dicitur impetuoſus ventus cum fulgure ſeu flamma erumpens. Raro tales obſervantur, & vix ſolitarius ſine ecnephia. Seneca autem preſterem dicit eſſe typhonem ſeu turbonem cum incenſo aëre.

Ecnephas dicitur ſubitaneus & impetuoſus ventus prorumpens ex aliqua nube vel nubecula; Tales ecnephiæ crebri ſunt in mari Æthiopico inter Braſiliam & Africæ procurrentem, inprimis ad promontorium Bonæ ſpei, & ab altero Africæ latere ad Terram de Natal, item ad Guineam ſub Æquatore. Nautæ eos vocant Travados vocabulo Luſitanico, Latinis dicitur procella: ſed græcum vocabulum eſt aptiſſimum. Quibuſdam etiam anni menſibus in quibuſdam maribus magis frequentes.

Nubecula illa, & interdum plures nubeculæ atræ & ſubnigræ manifeſto à nautis conſpiciuntur, coire paulatim & augeri, & quidem cælo ſereniſſimo, antequam prorumpat ventus: atque ideo cum eas vident, illico vela colligere & navem contra mox aſſuturam ſævitiâ munire debent. Sed antequam nubecularum harum naturam & prognſticon didicerant nautæ pelagus iſtud ingreſſi, pluribus navibus exitio fuit, quod primi experti ſunt Luſitani, quandoquidem hi primi ex Europeis Oceanum Æthiopicum navigaverunt.

verunt. Etenim cum patefactâ per Gammam Indiâ, Rex Lusitanus novam classẽ, & quidem majorem, nimirum tredecim ingentis alvei & majoris formæ navium sub Prætorẽ Caprali illuc ablegassẽt anno millesimo & quingentesimo, hæc prima omnium ex Europeis delata est ad Brasiliam ingenti Lusitanorum gaudio.

Hic cum aliquo tempore nempe per Aprilem mensem hæsisserent, solverunt inde mense Majo versus Promontorium Bonæ spei: sed sævissimam ab ecephia cujus signum etsi videbant tamen ignorabant, tempestatem experti sunt, quam Maffeus ita descripsit: A Brasilia ad Bonæ Spei promontorium immani trajectu leucas numerant fere mille ducentas (mille circiter Germanica miliaria.) Oceani sævientis, ventorumque furentium ea præcipue regna sunt. In id spaciũ audacius quam feliciter ingressis Majo mense Lusitanis, flammeus Cometes horribili specie in decimum usque diem continenter apparuit. Jamque variante sæpius cælo, pælagoque, atræ ac fordidæ nubes ad Septentrionem conglobatæ, omnem in se statum quasi reciprocando collegerant: mare languidum erat, insidiosa tranquillitas. Nautæ locorum atque tempestatum ignari, ad auram undique captandam totos velorum expanderant sinus: Cum ex iis, quas dixi, nubibus, universo repente impetu sese effundens Aquilo transversas quatuor naves, quarum ad contrahendum minus aptè fuerant armamenta disposita, inspectantibus cæteris, momento ita evertit, obruitque, ut è tanto hominum numero nemo prorsus evaserit. Saluti reliquis fuerẽ vel demissæ raptim antennæ, vel ubi id non licuit, vela ipsa vento disrupta. Deinde, Boreâ pertinaciter flante pelagus identidem intui-

intumescere, fluctus modo ad astra ferri, modo ad tartara pæne ima subsidere: salum ipsum interdiu piceo, noctu igneo colore terrebat. Vîginti ipsos dies tempestas atrocissima tenuit, &c.

Hactenus Maffæus. Inprimis autem tali ecnephia (Travados) infame est Promontorium Bonæ Spei.

Est non procul ab eo littore excelsus mons non in apicem desinens, sed planitiem in fastigio habens instar mensæ, unde Belgæ illum vocant, *den Tafel-bergh*. Ab illo fastigio ecnephias frequentissime prorumpit ingenti cum impetu & mirabili prognostico. Etenim cælo serenissimo existente & mari placido nubecula conspicitur super illam montis mensam consistere, quæ adeo parva est, ut vix granum hordei, deinde juglandem nucem æquare videatur, unde Belgæ vocant Oculum bovis, Lusitani Ollio de Boy quoniam huic similis esse dicitur illa nubecula. Deinde mox augetur, atque extendit se super totam planitiem montis, quod Belgæ vocant, *de tafel vvoort gedeckt*, quia narrant, quod non aliter hæc appareant ac si mensa sterneretur & cibi varii in patinis apponerentur. Tum verò illico ecnephias prorumpit e montis illo fastigio, tanto quidem impetu, ut naves imparatas & non munitas, præsertim si vela expansa sint, obruat & in tartara præcipitet. Sed nautæ jam cautiore facti ubi oculum illum bovis viderunt, statim recedunt à littore, quantum possunt, & vela dein colligunt, aliisque utuntur ad tuendas naves artificiis. Neque enim unquam fallit hoc prognosticon: ideo ferale convivium fugiunt. Eodem modo ad terram de Natale ecnephias furit, præcedente oculo bovis, quo multæ naves perierunt: Et toto tractu inter illam terram &

pro-

promontorium Bonæ Spei. In Delphinatu quoque Galliæ non procul à Vienna mons altus est, in cuius vertice stagnum, unde tempestas omnis in his locis oriri videtur. In ejus vertice procreatur nebulosa exhalatio, quæ statim futura tonitrua aut imbres prænotat.

In mari sub Æquatore inter Americam & Africam, atque in vicinia Æquatoris frequentes sunt tales ecnephiæ & Travados, præsertim illis mensibus, quibus nulli venti ibi continue & constantes spirant vel admodum rari, nempe fere per totum annum, imprimis mense Aprili, Majo, & Junio (in aliis mensibus rarior est) atque admodum insignes sunt ad littora Guineæ: Lusitani, ut dixi, vocant Travados, quam vocem Belgæ quoque retinent: incolæ Guineæ vocant Agremoute. Illi frequenter ingruunt, ter vel quater in uno die mox cessant, nimirum sesquialteram plerunque horam dominantur, sed primus impetus est vehementissimus. Erumpunt ex atris & fordibus nubeculis cælo serenissimo & mari quieto existente, unde nautæ eos affuturos conjiciunt. Eorum adminiculo nautæ plerunque superant Æquatorem, quia alii venti continui ibi sæpiuscule desunt, præsertim tribus illis mensibus, neque navibus adimunt navigandi potestatem excepto primo impetu.

Sed in mari, quod vicinum est ei parti Africæ, in qua regnum Lovvango situm est, ecnephas frequens est mense Januario, Februario, Martio, Aprili. Atque in aliis locis Africæ alios observat menses. Sic ad promontorium Africæ veteribus dictum Aromata, hodie Guardafuy, non procul à faucibus maris rubri, mense Majo singulis annis sævit boreas & vehementissimus ecnephas.

Namque sciendum est, quod sicut venti quidam minus

minus impetuoſi ſunt anniverſarii, ita quoque tempeſtates & ecnephix anniverſarii ſunt certis locis. Tali ecnephia non procul ab illo promontorio periit Prætor Luſitanus Sodreus, anno c1010 v circiter, quia præmonitus ab Africanis noluit optimis conſiliis obtemperare.

Sed in faucibus hiſce Arabici maris, ut etiam in Arabia & Æthiopia peculiaris, & mirabilis interdum ecnephas accidit: nimirum denſa & atra nubes mixta cum flammeis nubeculis inſtar candentis & reſplendentis camini (horrendum viſu) tenebras inducit diei, mox erumpit procella cuius tamen ſævitia mox ſedatur, ſed rubram arenam ingenti copia ejicit in terram atque mare, ita ut Arabes aſſerant, aliquoties contigiſſe, ut arenales tales procellæ obruerint annuos illos mercatorum & peregrinantium cætus vel comitatus cum iſtis Camelis (Caravvanen vocant, vel Caſſilam nimirum ſingulis annis bis vel ſemel mercatores ex variis Aſiæ partibus in Syria congregati, ex Alepo proficiſcuntur in Arabiam, ab 6000 perſonæ, quia propter crebra Arabum latrocinia & viæ moleſtias non audent ſolitarii iter capeſſere quod itidem ex India in Chinam & Tartariam faciunt) atque inde volunt exiſtere Mumiam Arabum & Egyptiorum, nimirum corpora illa arenis obteſta magno Solis æſtu exſiccantur. Oritur autem ille ecnephas à plaga Septentrionali, in qua rubrum mare extenditur, atque ideo veriſimile eſt, cum in littore illius maris magna copiâ reperiatur talis arena, quod vi venti in ſublime rapiatur atque inde rubicundum illum calorem in nubibus exiſtere, atque deinde arenam è nubibus ejici.

Talem etiam arenalem ecnephiam oriri in Lybia

bia propter copiosos illius arenæ cumulos non est vero absumile, & jam antiquis innotuit de hac re, qui ideo difficilem accessum ad templum celeberrimum Jovis Ammonis in Lybia esse scripserunt, neque Mumia generationis modus illis omnino ignotus fuit. In India regno Guzarath nubes arenas vel pulvisculorum ingentem copiam continentes (qui propter fervorem solis elevati sunt) sæpe viatores opprimere autor est Tvivistius Belga, qui ibi diu vixit.

Jam de causis hujus venti procellosi, nempe unde ecnephias existit, dicendum est. Ex nube eum erumpere manifestum est. Duo autem modi sunt, quibus à nube talis ventus videtur posse generari. Primus si nubes suâ gravitate deorsum vergens aërem magno impetu elidat, sicut experimur, si vela passa decendant, commoveri inde cum impetu aërem. Atque inde fit, ut quo minor apparuerit nubecula sive oculus bovis, eò major sequatur tempestas, nimirum, quia nubes altior est, & ideo parva apparet: demittens autem se ab altiori loco vehementius elidit aërem. Alter generationis motus est, si spiritus in nube inclusus repente erumpat, vel propter aliquem ignem sive sulphuream materiam ex nubibus angustâ factâ viâ & aliis effugiis prohibitis vapor elidatur, sicut ex vase angusti orificii aquam continente, si calefiat, prorumpit ventus. Sed prima causa videtur verisimilior.

PROPOSITIO XI.

Exhydrias dicitur ventus ex nube prorumpens cum magna aquæ copia.

Germani vocant ein *Wolkenbruch*. Parum differt ab ecnephia, nisi quod nubes illa, ex qua prorumpere

rumpere videtur, in aquam jam densata sit & ab aliis circumstantibus nubibus tamdiu sustentata & forte à ventis in unum coacta, donec gravitate sua deorsum ruat, aëremque elidat, unde magnus ventus existit. Sed rari sunt exhydriæ: ipse tamen eenephas plerunque habet comites pluvias & imbres sive potius nimbos: ideoque ab exhydria tantum differt secundum magis & minus. Nimbus enim nihil aliud est, nisi ventus cum impetuosa pluvia, ideo generalior est quam Eenephas. Exhydrias autem plerunque perpendiculariter à vertice decedit.

PROPOSITIO XII.

Typhon dicitur impetuosus ventus cum celeritate per omnes plagas circumcirca locum aliquem vagans, ac plerunque desuper à vertice irruens.

Sataceni vocant Olifant, Indi Orancan. Frequens est in Orientali Oceano, inprimis in mari Sionis, Chinenfi & Japoniæ (inter Malaccam & Japoniam.) Is ex Occidentali ferme plaga violentus erumpens, & rapidâ vertigine circa Horizontem rotatus, assiduis incrementis horarum circiter viginti spatio circulum conficit, impetu horribili, sævisque turbibus vasta illa æquora vehementissime commovens, decumanis undique fluctibus insurgentibus, qui inter sese velut arietantes atque collisi omnem salutis spem navigantibus adimunt. Et tum propter typhones hosce tum propter procellas alias navigatio ex India in Japoniam periculosissima est, ita ut faustum censeatur iter, si ex tribus navibus una cursum tenuerit. Autumni maximè tempore furiosissimus typhon dominatur sæpe tanto impetu & rabie, quantam qui oculis non subjecerint, animo concipere

cipere non possint, ita ut mirum non sit, quasvis ingentes ac validas naves immensis fluctibus verberatas laxatis compagibus labefactari: dicas, cælum & Terram chaos velle repetere.

Nectantum in mari, sed in littoribus quoque furit, multasque domos prosternit, ingentes arbores radicitus evellit, magnas naves ex mari in Terram ad quadrantem milliaris propellit.

Nautæ vocant, *de vvinde draeyt rond-om het compas*. In Indico Oceano raro ultra sex horas dominatur. Mare autem primò ita planum sternit, ac si dolabra lævigatum esset sed mox horribiles sequuntur fluctus. Ita circa urbem Ardebil in Persia, mensibus Junio, Julio, singulis diebus Sole meridiem occupante turbo oritur durans ad unam horam, quo pulvis ingens excitatur.

Causa typhonis proculdubio est, quod ventus magno impetu ex aliqua plaga erumpens versus aliam, in hac reperit impedimentum atque ideo in seipsum contorquetur & circumagitur, sicut videmus aquam celeriter motam, si obstaculum ei objiciatur, ibi in gyrum quasi celeriter & cum impetu circumagi. Potest etiam esse ut ab oppositis ventis simul impetuosè spirantibus oriatur typhon, qui superficiem maris ita planam reddant & naves medias comprehendant. Si desuper irruat, dicitur Cætegis: & tunc mare primo planum redditur ac si scopis purgatum esset, sed mox decumani insurgunt fluctus.

PROPOSITIO XIII.

An venti quidam ex ipsa Tellure, Terranimirum vel aqua erumpant?

Id quidem fieri posse facile comprehendimus. Etenim cum in Terra & fundo aquæ hinc inde

T

sint

sint cavitates, sint quoque spiritus, substantia sulphurea & humor, nihil obstat, quin flatus ibi satis vehemens generetur, nempe si prohibeatur paulatim ut genitus est, exire, vel si statim magnâ copiâ, quantam venti requirunt, generetur.

Si autem exitus prohibeatur, generatur terræ motus, vel spiritus violento impetu sibi viam facit & Terram protrudit. Sic in Mauricis insulis sæpe è terra erumpit fumus: sic è specubus quibusdam. In Japonia fons est ingenti cum strepitu certis diei horis erumpens.

E mari erupisse ventum, non me minime legisse.

PROPOSITIO XIV.

An ventus quidam oriatur à fluxu maris & fluviorum?

Testatur experientia, quod in illis locis, ubi fluxus & refluxus maris sentitur, si quando aër ab aliis ventis liber est, plerunque cum affluente aqua ex mari etiam ventus ex mari spiret. Verisimile itaque videtur, aërem propter contiguitatem moveri vel rapi cum aqua in eandem plagam. Sed diligentius hoc observandum est, an aëre quieto cum affluxu maris perpetuo sentiatur is ventus. Puto tamen aliam quoque ejus venti posse dari causam nimirum quod aër pellitur è loco ab affluente aqua: movetur autem aër multum ad levem impressionem. Sic volunt aërem moveri cum fluviis celeriter currentibus, ut Zaire, Rheno, &c.

PROPOSITIO XV.

Cur ignes fatui, Castor, Pollux, Helena existant inter tempestates?

Lusitani vocant Corpo Santo, Hispani Sant Elmo: Belga, Vrede-vyer. Non autem una tantum sed

sed sæpe plurimæ hinc inde in navibus ad malos conspiciuntur, vagantes incerto motu, ut alii ignes fatui etsi aliquando velis & malis insidere videantur: sed plerunque saltantes sursum & deorsum sine ulla intermissione similem præbent flammam, ac obscure ardens candela. Si quinque tales candelæ vicinæ conspiciantur, vocantur à Lusitanis, Cora de nostra Senhora, Corona Domina nostræ, hoc est Mariæ, atque hæc pro certissimo signo habent cessaturæ mox tempestatis. Causa illorum ignium est pars sulphurea & bituminosa per magnum illum æris motum deorsum pulsa & in unum coacta atque incensa per agitationem vel congregationem. Ita videmus per agitationem lactis butyrum separari. Ex hoc phænomeno quoque colligitur, quod tempestates illæ sævæ plerunque fiant à sulphureo spiritu nubes rarefaciente & commovente.

PROPOSITIO XVI.

Cur tam frequens malacia est in mari prope Guineam & sub Æquatore in mari Atlantico inter Americam & Africam?

Est hoc unum ex phænomenis circa ventos non parvæ difficultatis, quod ad Guineam, quæ duobus gradibus abest ab Æquatore, & sub ipso Æquatore perpetua ferè sit malacia, inprimis mense Aprili, Majo, Junio, ubi moriones nullæ ibi reperiuntur, cum tale quid in aliis Oceani partibus sub Æquatore sitis non sit observatum. Ecnephias quidem quibusdam temporibus satis frequens ibi est, sed interdum hic quoque desideratur à nautis, quoniam frequentium ecnephiarum impetu solent conari Æquatoris transnavigationem. Accidit non raro, ut naves Indiam ex Europa petentes

integrum mensem detineantur ad Aequatorem, antequam transire eum possint. Inprimis autem Guineæ littora fugiunt, & malaciam, atque ideo cum dispendio itineris Brasiliam versus navigant. Imò quædam naves per tres menses hic detentæ sunt, antequam in medium Oceanum à littore recedere possint. Causam phænomeni nondum inveni, nisi fortassis hæc sit, quod in Africæ inter Guineam & Barbariam interceptæ nullis montibus nives reperiantur, quæ flatus continuos generent.

PROPOSITIO XVII.

Quibusdam regionibus tempestates anniversariæ sunt.

Hujus exempla jam dedimus in prioribus propositionibus quædam, nempe 1. de mutatione motionum. 2. de ecnephia. 3. de typhone. 4. ad promontorium Bon Spei mense Junio, Julio. 5. in insula del Majo cum fine Augusti Austrina. Hisce adde 6. tempestatem ad Tercera mense Augusto. 7. In 35 gr. meridiani Tristan de Cunha, mense Majo in novilunio ventus Zephyrus furit & absorbet naves. Sed in 33 gr. ejusdem meridiani Boreas & Euroboreas. 8. In Junio & Julio in mari Chinenfi ad Pulon Timor venti Zephyri impetuosus & periculosus. 9. Inter Chinam & Japonem multæ procellæ à novilunio Julii ad xii diem Lunæ. 10. Ibidem si in mense Julio alii venti præter motionem spirent, modo ab hac modo ab alia plaga, donec constiterint in Euroboreali plaga, certò ingruit tempestas.

GENERALIS
GEOGRAPHIÆ
LIBER SECVNDVS.

DE

*Affectioibus locorum Telluris à motu stellarum
apparente dependentibus.*

CAPUT XXII.

De Præcognitis hujus doctrinæ.

HActenus in absoluta Telluris contemplatione occupati fuimus, jam accedimus ad secundam hujus doctrinæ partem, in qua proprietates seu affectiones illas considerabimus, quæ Telluri à motu Solis atque stellarum apparente accidunt, neque essent, nisi motus ille appareret, quarum explicatio majori jure ad Geographiam pertinebit, si ipsi Telluri motus ille tribuendus sit, de quo cap. v. diximus. Ad illas rectè intelligendas requiritur cognitio sequentium Definitionum & hypothesium.

Definitiones.

1. *Globus terrestris* artificialis dicitur globus factitius, ex cujus superficie partes Telluris, earumque situs ita repræsentantur, sicut in ipsa Tellure existunt, juxta proportionem hujus superficiæ ad superficiem Telluris.

T 3

Mappe

Mappa sive *Tabula Geographica* dicitur figura plana, in qua partium superficiei terrestris situs repræsentatur. Estque Vniversalis vel particularis.

Illa quæ totam superficiem Telluris exhibet, hæc quæ unam vel alteram regionem.

Præterea quædam mappæ sunt rectilineæ, aliæ curvilineæ. Illæ, in quibus circulorum terrestrium peripheriæ repræsentantur lineis rectis. Hæ, in quibus per curvas lineas eadem peripheriæ exhibentur. Cæterum de compositione tam globi terrestris quam mapparum Geographicarum, docebimus in fine libri, quia ea intelligi nequit, antequam doctrina, quam trademus, intellecta sit.

2. *Poli Telluris* dicuntur duo puncta in superficie ejus per diametrum opposita, quæ in diurna circumrotatione immobilia manent, vel quæ polis apparentis syderum quotidiani motus subjacent. *Axis* autem Telluris dicitur diameter polos connectens. Vel ita: *Axis Telluris* dicitur ea Telluris diameter, circa quam diurnus motus stellarum vel ipsius Telluris perficitur. Poli autem Telluris dicuntur puncta extrema axis in superficie globi terrestris.

Et ille polus, qui sideri ursæ subjacet, dicitur Arcticus & Septentrionalis, alter dicitur Antarticus & Australis. Hæc multo facilius per globum artificialem terrestrem, quam per verba, explicantur. Si ille circumroretur, conspiciuntur duo illa puncta immota, quæ poli sunt, & diameter per imaginationem ab uno polo ad alterum per centrum Telluris ducta erit axis.

3. *Æquator* dicitur peripheria circuli maximi in globo terrestri ab utroque polo æqualiter distans, sive medio loco inter polos sita, sive cujus poli sunt iidem, qui poli Telluris: Dicitur etiam

etiam Linea æquinoctialis. Nautæ vocant, lineam, *dielinie*, per excellentiam, unde phrasis, *de linie passerem*, quando æquatorem transeunt. Omnes stellæ motu diurno describunt peripherias æqui distantes seu parallelas Æquatori; ideo Æquator est regula motus diurni.

4. *Paralleli Æquatoris* dicuntur peripheriæ minores, quæ Æquatori parallelæ sunt. In globo artificiali Æquator magnitudine præ reliquis conspicuus est, & ipsum nomen ascriptum, divisusque est in 360 gradus. Paralleli quoque conspicui sunt, qui etiam dicuntur circuli latitudinis locorum, ut sequenti capite docebimus.

In mappis quoque Geographicis Vniversalibus hæc ostendi possunt. In rectilineis quidem, poli non repræsentantur, sed cuiusvis meridiani extremitates poli sunt: in curvilineis autem mappis poli sunt illa puncta, in quibus concurrunt curvæ lineæ. Æquator in utrisque mappis transversus per medias transit & latitudinem majorem præ reliquis habet, estque linea recta (et in particularibus Asiæ atque Europæ curva fiat.) Paralleli Æquatoris in rectilineis mappis sunt lineæ rectæ, in curvilineis curvæ.

5. *Ecliptica* dicitur circulus cæli maximus, quem Sol annuo motu describit, sive in cælo designat. In Tellure quidem non existit, sed propter insignem usum in globo artificiali, ut etiam mappis Geographicis denotatur.

6. *Tropici* dicuntur duo Æquatoris paralleli, qui tanto intervallo ab Æquatore distant, quantum est maximus Solis recessus ab Æquatore versus polos, sive quanta est maxima Solis declinatio vel Eclipticæ obliquitas.

Tropicus cancri is, qui inter Æquatorem & Po-

lum Arcticum jacet; Tropicus Capricorni, qui inter Aequatorem & polum Australem.

In globo & mappis notari solent duplici peripheria, & ipsa appellatio ascripta est. Polares circuli dicuntur duo paralleli, quorum unus à polo Arctico, alter ab Antarctico distat tot gradibus, quot Sol in maximo recessu ab Aequatore.

Et prior dicitur circulus Arcticus, alter Antarcticus.

Circuli haftenus explicati non dependent à certis locis, quales sunt sequentes, qui in diversis locis alii atque alii sunt.

7. *Meridianus loci* alicujus in superficie Telluris dicitur linea per locum illum transiens, in quam cum sol venit, meridies illo in loco est. Meridies autem dicitur momentum diei, quod à tempore ortus atque occasus solis æqualiter abest, siue diem bifecat in æquales partes.

Theorema. Meridianus cujusvis loci transit per utrumque polum Telluris.

In globo per denos quosque gradus Aequatoris ducti sunt Meridiani, qui sunt omnium illorum locorum meridiani, per quæ transeunt. Sed pro omnium locorum meridianis inservit is, qui æneus est, in quo globus pendet, nimirum si locus quicumque in globi superficie adducatur ad æneum Meridianum, erit hic illius loci meridianus.

In mappis rectilineis, meridiani sunt rectæ lineæ à summo ad imum ductæ. In curvilineis sunt illæ lineæ curvæ, quæ in polis cœeunt.

8. *Horizon loci* alicujus in superficie Telluris dicitur circulus maximus in cælo conceptus qui partem cæli visibilem in illo loco terminat. Dicitur etiam rationalis Horizon, ut à visibili Horizonte


zonte distinguatur, qui improprie ita appellatur. In globo artificiali non habet locum, sed ligneus circulus, in quo globus cum æneo meridiano sustinetur, inservit pro cujusvis loci Horizonte, ut sequ. capite docebitur, ideoque dicitur ligneus Horizon. & simpliciter Horizon.

Hæ sunt Definitiones, quarum cognitio necessaria est ad sequentem doctrinam: præter illas quoque ex *Astronomia* scire oportet modum motus solaris & stellarum.

1. *Motus primus & communis* dicitur is, quo Sol, Luna atque omnes stellæ spatio viginti quatuor horarum circumvolvi circa Tellurem, nobisque oriri, meridiem agere atque occidere videntur. Singulæ stellæ atque Sol singulis diebus hoc suo communi motu videntur describere circulos parallelos Equatori: quia motus hic fit super axem Telluris & polos ejusdem, & ideo Equator est circulus maximus hujus motus & regula atque norma, per quam reliquorum parallelorum motus metimur. Singulis horis quindecim gradus tam Equatoris quam cujusvis paralleli transeunt per meridianum, quia 360 gradus divisi inter horas 24 dant singulis horis quindecim. Itaque hora una & quindecim gradus Equatoris faciunt paria. Horas indicat cyclus horarius, qui in globo artificiali affixus cernitur æneo Meridiano, ubi index extremitatî axis Telluris adhæret & in cyclo horario circumducitur ad indicandas horas.

2. *Motus Solis proprius & secundus item annuus* dicitur is, quo Sol movetur (sive id Tellus faciat) ab Occidente in Orientem sive contra primum motum. Tempus sive numerus dierum, quibus Sol redit ad punctum unde digressus fuit sive quibus integram periodum seu circuitum perficit,

dicitur annus. Sunt autem dies 365 & una quarta diei circiter. Via hujus secundi solaris motus dicitur Ecliptica, ut antea diximus, quæ dividitur in duodecim partes, quæ signa dicuntur. Etenim Astronomi observarunt illa sydera seu constellationes cæli, per quas via ista solaris transiret, & ab istis constellationibus denominarunt duodecim Eclipticæ partes, & quia constellationes hæ sunt omnes animalium, ideo ipsam illam viam seu Eclipticam vocarunt veteres Zodiacum. Sed qui distinctius loquuntur, Zodiacum vocant fasciam seu Zonam in cælo, cujus medium quidem sit ipsa Ecliptica seu orbita solis, at extremitates ab utraque Eclipticæ parte octo gradibus ab ea distent, propterea quod reliqui etiam planetæ motum quendam proprium ab Occidente in Orientem habeant, quo quidem motu non ipsam Eclipticam describunt, sed orbitas aliquantum ab Ecliptica declinantes, quæ declinatio quia non superat octo gradus, ideo Zodiaco attribuunt sedecim gradus latitudinis, nimirum octo ab utraque Eclipticæ parte, ut ita Zodiacus sit illud cæli spatium, in quo omnes planetæ semper versantur, neque unquam extra illud: Ecliptica vero linea media Zodiaci, quam Sol annuo motu describit, & in qua semper hæret. Porro signa illa cæli seu constellationes, per quas Ecliptica & Zodiacus transit, sunt hæ, quas duo versiculi comprehendunt: Sunt



²¹Mart. ♈ ♉ ♊ ♋ ²¹Jun. ♌ ♍

 Aries, Taurus, Gemini, Cancer, Leo, Virgo

²¹Sept. ♎ ♏ ♐ ²¹Decem.

 Libraque, Scorpius, Arcitenens, Capricorn, Am-

 phora, Piscis.

Arci-

Arcitenens dicitur alias Sagittarius: Caper, Capricornus: Amphora, Aquarius. Porro Ecliptica oblique secat Aequatorem, ita ut maxima ejus distantia sive puncti remotissimi distantia sit 23 gr. & 30 min. circiter. Vbi itaque Ecliptica secat Aequatorem, quod fit in duobus punctis, in illorum uno statuitur Eclipticæ initium & numerationis principium signorum. In illis punctis Sol existens facit diem nocti æqualem in omnibus locis, atque veris & autumnii initium. Fit autem numerationis initium ab eo puncto, in quo Sol nobis (hoc est ab Aequatore versus polum Arcticum sitis) veris facit principium, & primum signum sive prima pars duodecima Eclipticæ dicitur Aries, secunda, Taurus, tertia Gemini, &c. juxta ordinem, quo in versiculo sequuntur, quoniam olim, ante viginti secula circiter, signa illa cæli erant in hisce Eclipticæ partibus, à quibus jam excesserunt: appellatio tamen manet, nullâ habitâ stellarum illarum ratione.

Singula ex duodecim hisce partibus seu signis dividuntur in triginta gradus. Etenim tota Ecliptica habet 360 gradus, qui si dividantur inter 12, accipient singuli triginta.

Præterea cum Sol totam Eclipticam (hoc est 360 gradus) percurrat diebus $365\frac{1}{4}$, inde colligitur, quod singulis diebus progrediatur 59 min. 8 sec, hoc est paulo minori via, quam unius gradus, pro quibus tamen assumimus integrum gradum, ubi numerus dierum non est magnus, neque accuratâ inquisitione opus est, ut plerumque facimus, quando animi tantum causa ista tractamus.

Quemadmodum autem Sol toto anno, hoc est duodecim mensibus percurrit totam Eclipticam, hoc est omnes duodecim partes seu signa Zodiaci,

ita singulis mensibus unam absolvit circiter partem seu unum signum, sed ingressus ejus in signa non incidit in mensium initium, sed in vicesimum primum circiter diem mensis cujusvis juxta Calendarium Gregorianum vel undecimum diem juxta Calendarium vetus Julianum, nempe die xxi Martii, Arietis signum vel ipsam sectionem Eclipticæ cum Aequatore ingreditur, dein xxi Aprilis Taurum, & sic porro. Non quidem in singulis mensibus incidit ingressus iste in vicesimum primum diem, sed in quibusdam ante hunc, in quibusdam post. Ideo ubi accuratum locum solis scire desideramus, petendus is erit vel ex ephemeridibus vel calculo, vel Tabulis vulgaribus. In Horizonte quoque ligneo globi artificialis reperitur locus Solis ad singulos anni dies, ubi inquiri potest, quando globus in promptu habetur. Qui vero contenti sunt cognitione, quæ facilis sit memoriæ, absque libris, etsi aliquantum à vero abluat, illi ex vigesimo primo diei cujusvis mensis poterunt ex tempore deducere locum Solis pro quovis alio die. Nimirum firmiter memoriæ infixere debent signorum ordinem, ut antea posuimus, sunt Aries &c. Deinde mensium ordinem, Martius, Aprilis, Majus, Junius, Julius, Augustus, September, October, November, December, Januarius, Februarius.

Hiscæ memoriæ infixis & præterea illo signo, quod Sol ingreditur vigesimo primo die unius mensis, cognoscere poterunt locum Solis ad quemcunque anni diem. Etenim si sciant, quod die xxi Martii Sol ingrediatur arietem, inde juxta ordinem signorum & mensium concludent, quod xxi Aprilis ingrediatur Taurum, xxi Maji Geminos, xxi Junii cancerum, &c. Pro diebus itaque

itaque intermediis inter vigesimum primum unius mensis & vicini numerandi erunt tot gradus in signo illo, quod in vigesimo primo diem propositum proximè antecedente Sol ingressus est, quotus dies est propositus ab illo vigesimo primo. Ita invenietur locus, qui à vero non multum aberit. Exercitium facillimam ostendet hanc esse methodum, ideoque adolescentes oportet crebro usui hanc memoriæ infigere. Turpe enim est, literatum & doctum hominem ignorare Solis motum, cum ab eo omnes anni tempestates, dies noctesque atque alia multa dependeant, quorum in vita humana maximus est usus.

CAPUT XXIIL

De locorum latitudine & elevatione poli.

PROPOSITIO I.

Latitudo loci in superficie Telluris dicitur distantia ejus ab Æquatore.

Hanc autem distantiam metitur perpendicularis linea vel arcus à dato loco ductus ad Æquatorem. Et quoniam meridianus cujusvis loci est perpendicularis ad Æquatorem, ideo latitudo loci est arcus meridiani ejus loci interceptus inter eum locum & Æquatorem.

Latitudo autem Telluris dicitur extensio ejus in superficie ab uno polo ad alterum: sicut Longitudo Telluris dicitur extensio ab Occidente per Orientem ad Occidentem rediens, quæ est ipsa æquinoctialis linea. Sed nullus harum definitionum usus est, & præstaret illam homonymiam tollere è Geographia. Alia est significatio horum vocabulorum, cum alicui regioni attribuuntur.

Circulus latitudinis loci alicujus dicitur parallelus per locum illum transiens.

PROPOSITIO II.

Elevatio poli loci alicujus, sive supra Horizontem loci alicujus, dicitur arcus meridiani cælestis illius loci, interceptus inter polum cælestem alterutrum & inter Horizontem illius loci.

Potest etiam dici, quod sit arcus meridiani terrestris interceptus inter polum alterutrum Telluris & Horizontem. Etenim hoc modo majori jure definietur, si Terra primum motum efficiat: sed Astronomi ad cælestem polum imaginarium definitionem plerumque accommodant.

PROPOSITIO III.

Latitudinem loci in superficie globi dati invenire in gradibus & minutis (si magnus sit globus) Eandem latitudinem in Mappis Geographicis.

In Globo. Adducatur datus locus ad Meridianum, & numerentur gradus ab Æquatore ad illum locum. Illi erunt quæsitæ loci istius latitudo.

In Mappis Geographicis. Si Mappa sit rectilinea, ducatur per datum locum linea recta æquatori parallela, nisi jam in Mappa sit ducta: vel applicetur tantum regula loco, ita ut æquatori parallela sit. Sic terminus hujus lineæ in lateralibus Mappæ lineis indicabunt loci latitudinem.

Si vero Mappa sit curvilinea, neque parallelus aliquis per datum locum transeat, erit unus pes circini constituendus in polo Mappæ & alter pes in datum locum atque hoc intervallo parallelus loci describendus qui in laterali linea iterum indicabit latitudinem loci, si paralleli ex isto polo sint descripti.

Simul invenietur distantia loci à polo.

PROPOSITIO IV.

Dato loco in superficie globi, ita constituere globum, ut Horizon ligneus sit illius loci Horizon.

Datus locus ad meridianum adducatur, & ab eo numerentur nonaginta gradus versus polum vicinum in Meridiano. Terminus numerationis constituatur in crena Horizontis. Sic erit Horizon ligneus loci propositi Horizon. Id tamen in Corollario sequentis Propositionis facilius expedire docebimus.

PROPOSITIO V.

Latitudo loci æqualis est altitudini sive elevationi poli supra Horizontem illius loci.

Offenditur per globum ita: Assumatur locus pro libitu in superficie globi: dein Constituatur globus ita ut Horizon ligneus fiat Horizon istius loci. Numerentur jam gradus latitudinis istius loci & elevationis poli. Æquales deprehenduntur.

Per Mathematicam vero Demonstrationem ita ostenditur theorema: Sit C centrum telluris, L locus in superficie quicunque. P polus, erit H P L Z Meridianus, & H Z Horizontis diameter: P H elevatio poli. Q T sit diameter Æquatoris, sive sectio meridiani & Æquatoris. Erit itaque P Q quadrans meridiani, sive 90 graduum, quia P est polus Æquatoris. Eandem ob causam L H arcus erit 90 graduum, quia L est polus Horizontis. Igitur L H arcus est æqualis arcui P Q & ablata parte communi L P, erunt residui arcus P H, L Q æquales.

Corollarium. Cognitâ itaque latitudine loci alicujus, habetur quoque elevatio poli pro eodem. Distantia autem loci à polo & distantia ab Æquatore.

tore simul junctæ faciunt 90 graduum. Itaque unâ cognita innotescit quoque reliqua.

Corollarium II. Dato loco in superficie globi, elevare polum ita ut hujus loci elevatio poli postulat. Hoc idem est cum eo, quod in Proposit. præced. proponebatur, facere ut Horizon ligneus fiat dati loci Horizon. Inveniatur primò latitudo loci, & hæc à polo numeretur in Meridiano deorsum versus Horizontem. Terminus numerationis constituatur in creta Horizontis. Ita polus elevatus erit, prout dati loci situs postulat.

PROPOSITIO VI.

Dato loco in superficie globi vel data loci alicujus latitudine, exhibere omnia Telluris loca, quæ eandem latitudinem vel distantiam ab Æquatore, sive elevationem poli habeant. Vel: Invenire omnia Telluris loca; quæ datam distantiam ab Æquatore habeant.

In Globo. Locus datus adducatur ad Meridianum æneum, vel numeretur ab Æquatore in meridiano versus polum data latitudo. Deinde creta acuminata applicetur termino numerationis, & globus circumvolvatur. Ita creta describet peripheriam, quæ omnia illa loca continebit, quorum eadem est cum dato loco latitudo.

In Mappis rectilineis ducatur per datum locum linea recta Æquatori parallela. Omnia loca, per quæ illa linea transit, habebunt eandem cum dato loco latitudinem. In curvilineis Mappis describatur ex polo Mappæ tanquam centro peripheria transiens per datum locum. Sic eodem modo, quo antea, quæsitæ loca invenientur. Si vero non certus locus, sed latitudo detur, unus pes circini in polo Mappæ collocandus, alter in lateralem

ralem lineam ad datum latitudinis gradum, & tunc parallelus describendus.

PROPOSITIO VII.

Invenire lineam meridianam, sive plagam Septentrionis & Austri, in dato loco Telluris, sive in dato plano.

Varii sunt modi, quibus quæsitæ linea inveniri potest.

1. Facillimus est modus, qui acu magnetica utitur. Etenim cum acus magnetica unâ extremitate Septentrionem, alterâ Austrum respiciat, indicabit illius extensio lineam meridianam. Quoniam autem in paucis locis ipsam Septentrionalem & australem plagam respicit, in plurimis verò locis declinat ab eis, ut cap. xxxviii docuimus, ideo non accuratè invenitur per illam lineam meridianam, sed tantum vicina, quæ etsi sufficiat, ubi non magni momenti est negotium, ad quod illam habere cupimus, tamen in majoris momenti operibus magno errori causam præbere potest. Si tamen declinatio acûs magneticæ à vero meridiano, nota sit per aliorum observationes (est autem in plurimis locis nota, præsertim illustrioribus) designabitur in dato plano linea meridianæ satis accurate. Ducatur enim primò linea, quam acus magnetica monstrat: dein assumpto quovis puncto in hac linea, describatur ex eo tanquam centro peripheria circuli, in qua numerentur gradus declinationis acûs incipiendo à ducta falsa linea meridianâ, idque versus Orientem si data declinatio sit versus Occidentem, & contra, versus Occidentem, si data declinatio sit versus Orientem. Denique per terminum numerationis vel resectionis & centrum peripheriæ ducatur linea recta. Hæc erit vera linea meridianâ.

Non

Non opus erit hac opera, si pyxis nautica in promptu sit, in qua jam correcta sit declinatio acûs magneticæ ad locum propositum: Solent enim qui instrumenta hæcce parant, signum Septentrionis, quod est lilium, non pingere supra locum ipsius acûs magneticæ (quæ infra papyrus latet) sed tot gradibus ab ea remove, quantam cognoverunt esse declinationem acûs in loco illo.

II. Beneficio stellarum accuratius invenitur linea meridiana. Primò, lucente Sole observetur hora duodecima, erectoque stylo umbra denotabit lineam meridianam. Sed quia horologiis non satis tutum est credere, ideo neque hic modus omnino accuratus est, veramque lineam monstrat, parum tamen à vera distantem.

III. Ductâ peripheriâ in dato plano, erigatur stylus è centro ejus, & notetur terminus umbræ ante meridiem: vel notata primum umbræ extremitate describatur ex loco styli peripheria per umbræ extremitatem. Deinde tamdiu expectandum donec post meridiem umbræ extremitas attingat eandem peripheriam. Arcus inter duo notata loca bifariam secandus est per lineam è centro ductam. Hæc erit ipsa linea Meridiana.

IV. Si nota sit elevatio poli sive latitudo in loco observationis, poterimus beneficio globi invenire lineam meridianam, hoc pacto. Inveniat primo per observationem altitudo Solis supra Horizontem: & ducatur in plano linea recta, in qua Sol tunc existere videtur, & sumto in ea quavis puncto tanquam centro describitur peripheria circuli: Deinde polus in globo eleveatur pro data loci elevatione locus Solis in Ecliptica pro dato die notetur; quadrans applicetur vertici, & in eo notetur observata altitudo Solis Tunc globus at-

que

que quadrans simul moveantur donec punctum quadrantis, notatusque Solis locus convenient. Globo ita manente, numerentur in Horizonte ligneo gradus intercepti inter Meridianum & quadrantem verticalis. Tot gradus abscondantur in peripheria antea descripta incipiendo à linea plagæ solis, versus ortum vel occasum, prout tempus observationis fuerit, & per terminum resectionis atque centrum circuli ducatur linea recta. Hæc erit vera linea meridiana.

Facilior multo erit inventio & sine usu quadrantis verticalis, si observetur plaga, vel linea in plano ducatur, in qua Sol Oriens vel Occidens conspicitur. Descripto enim iterum circulo adducatur locus Solis ad Horizontem, & numerentur gradus intercepti inter locum Solis & Septentrionem vel Austrum. Totidem gradus abscondantur in peripheria descripta à ducta linea. Et per terminum resectionis & centrum ducatur linea recta. Hæc erit vera linea Meridiana.

PROPOSITIO VIII.

Globum constituere, ut cardines ejus respiciant cardines Telluris, hoc est, ut meridianus æneus in vero loci meridiano situs sit.

Inveniatur linea meridiana in plano illo, cui globus insistit, & globus ita constituatur, ut æneus meridianus lineæ meridianæ exactè superimmineat. Sic erit globus constitutus secundum plagas mundi. Vel, pyxis nautica imponatur pedimento globi, & globus cum pede tamdiu moveatur in plano, donec meridianus æneus & linea meridiana pyxidis in eodem plano existere deprehendantur. Sic iterum erit globus constitutus juxta plagas Telluris, hoc est ita ut Septentrio globi respiciat Septentrionem Telluris,
auster

auster austrum, Oriens Orientem, Occidens Occidentem.

Potest etiam de Mappis Geographicis problema proponi, (& in arte Nautica usus ejus est) nimirum illas in plano ita ponere, ut loca Septentrionalia Septentrionem Telluris, australia austrum, &c. respiciant. Solutio facilis est, si inventa sit linea meridiana in plano illo vel si pyxis nautica accurata habeatur. Etenim linea Mappæ lateralis ponenda erit supra lineam meridianam plani. Sic Mappa habebit postulatum situm.

PROPOSITIO IX.

Latitudinem loci de calo observare, sive Elevationem poli supra Horizontem loci alicujus invenire beneficio stellarum.

Et si latitudo loci in superficie Telluris existat, nempe distantia ejus ab Æquatore, tamen inveniri nequit sine stellis. Modi varii sunt.

I. Observetur altitudo Solis supra Horizontem, quando is in meridianam lineam venit, ejusque complementum sive distantia Solis à vertice sumatur. Ab hac auferatur Solis declinatio ad diem observationis, si quidem Sol in Australi Zodiaci parte hæreat, sed addatur, si in Septentrionali. Residuus vel aggregatus numerus erit latitudo loci vel elevatio poli. Declinatio autem Solis (distantia ab Æquatore) in die observationis invenitur ex loco solis, idque vel ex Tabula Declinationis partium Eclipticæ, vel ex globo. Etenim in Globo locus Solis ad diem observationis notetur & ad meridianum adducatur. Gradus meridiani inter æquatorem & locum Solis intercepti exhibent Declinationem Solis ad datum diem.

II. Orien-

II. Oriente vel Occidente Sole, beneficio globi ita invenietur latitudo loci. Observetur plaga in qua Sol oritur vel occidit, quod nautæ per pyxidem suam vel compassum facere consueverunt. (requiritur autem ad id vera linea meridiana.) Eadem plaga vel gradus notetur in Horizonte ligneo globi. Locus etiam solis in Ecliptica pro die observationis notetur. Dein meridianus æneus in crena Horizontis eousque moveatur, polo magis minusve elevato, donec notatus locus Solis conveniat cum notato Horizontis puncto. Sic elevatio poli in globo erit ea, quam locus habet, ubi observatio instituta est. Calculo accuratior erit solutio. Sed quia Sphæricorum Triangulorum solutionem pauci Geographiæ studiosi callent, ideo eam omitto, quod in sequentibus quoque observabitur.

NOTA. Tempore æquinoctiorum, ubi Sol in Arietis vel Libræ initio versatur, non habet locum hæc methodus, quia tunc omnibus locis Sol in una & eadem plaga oritur & occidit, nempe in plaga veri Orientis vel Occidentis, vel in plaga ortus æquinoctialis & occasus.

III. Lucente Sole in meridie, erigatur stylus AB perpendicularis super planum Horizontale, & longitudo umbræ AC atque ipsius styli AB in divisa aliqua linea sumatur. In Triangulo itaque rectangulo ABC erunt nota ambo crura AB, AC, unde invenietur distantia Solis à vertice angulus ABC: nimirum si fiat, ut AB ad AC ita sinus totus ad tangentem anguli ABC. Ex hac invenietur latitudo loci, ut in primo modo dictum est. Si vero observatio sit instituta die æquinoctii, tunc ipsa inventa Solis à vertice distantia est latitudo loci.

Ira

Ita Plinius cap. 72. lib. 2. scribit, in urbe Roma nonam partem gnomonis deesse umbræ, unde elevatio poli colligitur 41 gr. 25 min. Carthagine gnomon ad umbram habet rationem, sicut 11 ad 7. Vnde elevatio poli colligitur 32 gr. 13 min.

IV. Nocturno tempore, ubi stellarum aspectus conceditur, si instrumento capiamus altitudinem stellæ alicujus in meridiano existentis, & ex Tabula Declinationem stellarum cognoverimus, inde haud difficili opera inveniemus latitudinem loci seu Elevationem poli.

Etenim si stella illa sita sit inter verticem nostrum & æquatoris semicirculum nobis extantem vel elevatum, addemus.

Si declinatio stellæ fuerit Septentrionalis & stella sita sit inter verticem nostrum & stellam polarem, subtrahemus à declinatione illa distantiam stellæ à vertice nostro: residuus numerus erit loci latitudo.

Si declinatio fuerit Septentrionalis & stella sita sit inter stellam polarem & proximam Horizontis partem, complementum declinationis addendum erit inventæ altitudini stellæ. Aggregatus numerus dabit latitudinem loci seu elevationem poli.

Si declinatio fuerit Septentrionalis, & stella versetur inter verticem nostrum & partem Horizontis à polari stella remotam, addenda erit declinatio illa ad distantiam stellæ à vertice, sive ad complementum altitudinis. Aggregatus numerus erit latitudo loci.

Denique si declinatio stellæ sit australis, ascendenda erit hæc à complemento altitudinis observatæ. Residuus enim numerus indicabit latitudinem loci. Neque in hoc casu varietas occurrit, sicut in stella Septentrionalis declinationis: quod quidem

quidem de locis inter Aequatorem & polum Septentrionalem sitis intelligendum est: nam de illis, quæ inter Aequatorem & polum Australem jacent, contrario modo se res habet.

V. Si observetur plaga, in qua stella aliqua oritur vel occidit, invenietur latitudo loci illius beneficio globi cælestis, non aliter ac modo tertio dictum est.

VI. Si tabulæ declinationis stellarum non sit in promptu, poterimus quæsitum obtinere, si stellam aliquam non occidentem observemus, nimirum quæ in tota circumrotatione supra Horizontem manet. Etenim illæ stellæ bis accedunt ad meridianum, & ideo altitudo meridiana earum duplex est, una major, altera minor. Utraque hæc observanda erit, & dimidia differentia addenda minori altitudini vel à majore auferenda. Sic nanciscemur quæsitam latitudinem loci vel elevationem poli.

VII. Si non accuratam quæramus latitudinem loci, sed contenti velimus esse tali, quæ non multum à vera recedat, sumemus stellæ polaris altitudinem, quando ea à meridiano longissimè recessit. Ea enim fere æqualis est latitudini loci.

PROPOSITIO X.

Loca Telluris in æquatore sita nullam habent latitudinem vel elevationem poli, sed ambo poli in illorum Horizonte jacent. Locus sub polo habet latitudinem nonaginta graduum, nempe polum in vertice, Aequatorem in Horizonte. Loca inter polum & Aequatorem habent latitudinem minorem, quam nonaginta gradibus.

Manifesta est veritas hujus Propositionis: ideo probatione vel explicatione non eget.

PRO-

PROPOSITIO XI.

Si in mari vel terra versemur, ignorantes locum in quo versemur, inventa autem sit latitudo loci, exhibere in globo illum parallelum, in cujus uno puncto constitutos esse certi esse possimus.

Fit eodem modo, quo in Propositione VI usus sumus, nimirum parallelus describendus erit ad datam vel observatam latitudinem. Hic parallelus est is, qui quaeritur. Idem in mappis facile est.

CAPUT XXIV.

De Divisione Telluris in Zonas, & apparentiis calēstibus in diversis Zonis.

PROPOSITIO I.

A motu Solis proprio sive annuo oritur divisio quadam superficiei Telluris in quinque partes, quas Zonas vocamus.

Etenim cum Sol non perpetuo permaneat in Aequatore, sed ab eo declinans describat motu suo Orbitam quæ Aequatorem secat, ita ut maxima declinatio sit 23 graduum cum dimidio tam versus Septentrionem ab Aequatore, quam versus Austrum, in qua declinatione describit Tropicum Canceri & Capricorni, inde fit ut non perpetuo verticalis sit locis in Aequatore jacentibus, neque ab aliis locis unam distantiam perpetuo servet, sed modo vicinior modo remotior sit à certo loco atque calorem, frigus, pluvias atque alias tempestatum conditiones varie mutet. Hæc quæ jam diximus, adolescentibus tam in globo, quam in Mappis monstrari possunt.

Zona itaque dicitur pars Telluris inclusa Tropici

picis atque circulis polaribus. Quoniam autem duo sunt Tropici, & duo polares, inde efficitur ut Zonæ quinque sint, quæ dicuntur Torrida, Temperatæ duæ, Frigidæ duæ.

Zona Torrida dicitur pars Telluris quæ inter Tropicum Canceri & Tropicum Capricorni jacet. Temperatæ, quæ inter Tropicum unum & vicinum polarem jacent : & Temperata Septentrionalis, quæ inter Tropicum Canceri & circulum Arcticum : Temperata Australis, quæ inter Tropicum Capricorni & circulum Antarcticum.

Zonæ frigidæ dicuntur illæ Telluris partes, quæ circa polos jacent usque ad circulos polares, suntque Zona frigida Septentrionalis & Zona Frigida Australis.

PROPOSITIO II.

Loca Telluris, quorum latitudo vel elevatio poli minor est quam 23 gr. 30 min. illa jacent in Zona Torrida. Quorum latitudo est 23 gr. 30 min. illa jacent in Tropici, nempe in Torrida Zona extremitate.

Quorum latitudo major est, quam 23 g. 30 min. minor verò quam 66 gr. 30 min. illa jacent in Zona Temperata. Quorum latitudo est 66 gr. 30 min. illa jacent in circulis polaribus, nempe in Temperatarum termino. Quorum latitudo est major, quam 66 gr. 30 min. illa jacent in Zonis frigidis.

Hæc manifesta sunt ex Definitionibus circulorum Tropicatorum & Polarium, quas capite XXIII tradidimus.

PROPOSITIO III.

ÆQUATOR Telluris transit per loca hæc : Per insulam S. Thomæ in magno sinu Africa, qui Oceanus

ceanus Æthiopicus appellatur : per Æthiopiam Africæ procurentis partem : per Oceanum Indicum, per mediam Sumatram sive Taprobanen, per Chersonesum auream sive Malaccensem, aliasque insulas Oceani Indici, perque ipsas Moluccas : per Oceanum Pacificum : per Peruanæ provinciæ initium, per lacum Parimam, per Oceanum Atlanticum usque ad insulam S. Thomæ.

ÆQUATOR dividit Zonam Torridam in duas æquales partes, ut non immerito duæ Zonæ Torridæ dici possent, una Septentrionalis, altera Australis. Res clara est ex Definitione, Zonæ Torridæ, Æquatoris & Tropicorum.

IN ZONA TORRIDA *jacent hæc loca*: Maxima Africæ pars, Abassia, Oceanus Indicus, Arabiæ portio, Cambaja, India, insulæ Oceani Indici, Java, Ceilanum, &c. Peruvia, Mexicana Hispania, Oceani Atlantici magna pars, insula S. Helenæ, Brasilia, Nova Guinea.

TROPICVS CANCRI *transit per loca hæc*: Paulo ultra Atlantem montem in Occidentali Africæ littore, per confinia Libyæ aliaque Africæ interioris loca, per Syenen Æthiopiæ. Inde trajecto mari Rubro ultra montem Sinai & Meccam Mahometis patriam, Arabiam felicem transit: hinc ingreditur Oceanum Indicum, Persiæ extrema tangit, & pervadit Cambajam, Indiam, Cambojam vel Sinenfis regni terminos, donec perveniat in mare Pacificum, quo superato infra Americæ Chersonesum Californiam in Mexicanum regnum incidit, iterumque in Oceanum Atlanticum ingressus per sinum Mexicanum radit littora Cubæ insulæ, atque inde ad Occidentale Africæ littus redit.

TROPICVS CAPRICORNI *transit per loca*

loca admodum pauca in Terra, sed maxima ejus pars in mari jacet: nempe transit per Africam procurentem sive Africæ linguam, Monomotapam., per Madagascar, per Oceanum Indicum, Novam Guineam, Oceanum Pacificum, Americam Peruvianam & Brasiliam, Oceanum Atlanticum.

IN TEMPERATA ZONA SEPTENTRIONALI jacent plurima Terræ loca, eaque omnia fere nota & habitata, nempe tota Europa, Asia (exceptâ India, Chersoneso aurea atque insulis Oceani Indici) Americæ Septentrionalis magna pars, Oceani Atlantici atque Pacifici pars.

IN TEMPERATA ZONA AVSTRALI jacent pauca Terræ loca, eaque non omnia cognita, plurima vero maris pars: nempe pars procurentis Africæ, Monomotapæ, promontorium Bonæ Spei, Terræ Magellanicæ seu Australis magna portio, Brasiliæ portio, Chili, Magellanicum fretum, portio magna Oceani Atlantici, Indici, Pacifici.

POLARIS CIRCULUS ARCTICUS transit per mediam fere Islandiam, per supremam Norvegiæ, per Oceanum Septentrionalem, per Lappiam, Sinum maris Russicum, Samojedam, Tartariam, Americam Septentrionalem, Gronlandiam.

POLARIS CIRCULUS ANTARCTICUS transit per Magellanicam terram sive Australem, cujus hodie nihil cognitum habemus.

IN ZONA FRIGIDA SEPTENTRIONALI jacent, dimidia Islandia, pars Norvegiæ & Lappiæ ultima, Finmarchiæ, Samajedæ, Nova Zembla, Gronlandia, Spitzberga, Americæ Septentrionalis incognita quædam.

IN ZONA FRIGIDA AVSTRALI quid sit

fit Terrane an aqua , ignotum est. Hæc, quæ hæcenus dicta sunt , ostenduntur per globum & Mappas , probantur autem ex tabulis latitudinis locorum, quæ ex observationibus factæ sunt.

PROPOSITIO IV.

Locis Telluris , quæ in ipsis Tropiciis jacent , Sol quovis anno semel tantum fit verticalis in meridie. Locis vero in Zona Torrida jacentibus bis quovis anno fit verticalis, nempe duobus diebus, qui à longissimo die æqualiter distant. Locis vero extra Zonam Torridam atque extra Tropicos sitis Sol nunquam, si ve nullo anni die fit verticalis.

Etenim cum Sol versatur in primo gradu Cancræ , quod fit die xxi Junii circiter, tunc describit Tropicum Cancræ in celo , atque quanto spatio hic Tropicus ab Æquatore cælesti distat , tanto spatio Tropicus Cancræ terrestris ab Æquatore terrestris distat , atque ideo Tropicus terrestris subjicitur cælesti , & Sol ideo verticalis fiet locis in Tropico cancræ sitis. Locis vero in Tropico Capricorni eodem modo idem fiet die xx Decembris circiter, Sole Capricornum ingressò. Hæc ex globi inspectione manifesta sunt, ut etiam ex Mappis.

Sumamus jam locum in Zona Torrida jacentem ostendendum est, quod Sol ei bis verticalis fiat in anno. Adducatur locus sumtus ad Meridianum , & applicatâ cretâ acuminata , circumvolvatur globus , ut parallelus loci illius describatur. Is secabit Eclipticam in duobus punctis, quæ æqualiter à primo gradu Cancræ vel Capricorni distabunt. Dico, quod Sol existens in hisce Eclipticæ punctis verticalis fiet sumto loco. Etenim parallelus, quem Sol iis diebus describet, directè imminebit parallelo loci descripto. Transi-

bit itaque Sol per verticem loci illius, adeoque verticalis illi fiet in meridie duorum illorum dierum: aliis vero diebus nequaquam. Quod autem non nisi in meridie locis fiat verticalis, ex revolutione diurna notum est & perspicuum.

Quod vero locis extra Zonam Torridam & Tropicos sitis Sol nunquam fiat verticalis, id ex eo patet, quoniam nullus Solis parallelus imminet parallelo illorum locorum. Temperatis itaque Zonis & Frigidis Sol nunquam fit verticalis.

PROPOSITIO V.

Locis in Zona frigida alterutra sitis Sol quovis anno aliquot diebus non occidit, & totidem diebus non oritur, & quidem pluribus eò diebus, quo loca sunt polo magis vicina: ita ut in loco ipsius poli integro semestri non occidat, & altero non oriatur. Locis vero in ipso Arctico vel Antartico circula jacentibus uno tantum die Sol non occidit in anno, & uno die non oritur, reliquis diebus occidit & oritur.

Assumatur in globo quilibet locus Zonæ frigidae pro libitu: & polus ita elevetur ut latitudo loci postulat, sive ut Horizon ligneus fiat Horizon illius loci, juxta Propos. cap. præced. Dein creta acuminata applicetur crenæ Horizontis, quæ polo elevato viciniore est, & circumrotetur globus, ut creta in eo designet aliquem Æquatoris parallelum. Hic parallelus secabit Eclipticam in duobus punctis, quæ à primo gradu Cancræ æqualiter distabunt, & Sol in his punctis Eclipticæ & omnibus intermediis existens non occidet, quod ex eo manifestum est, quoniam paralleli ejus in hisce punctis existentis manent supra Horizontem in tota circumrotatione.

Contra, si cretam acuminatam applices alteri crenæ Horizontis, & parallelus describatur, reperiemus ea Eclipticæ puncta, sive eum arcum circa initium Capricorni, in quo dum Sol versatur, non oritur loco illi Zonæ frigidaæ sed manet infra Horizontem. Contrarium obtinet, si locus sumtus sit in Zona frigida Antarctica.

Quod verò dictum est de locis in ipso Arctico vel Antarctico jacentibus, ostenditur eodem modo. Nimirum polus elevandus est ad 66 gr. 30 m. ita Horizon ligneus erit Horizon cujusvis loci ex illis, quæ in Arctico circulo jacent. Et manifestum erit, quod Tropicus Cancræ non occidat, & Tropicus Capricorni non oriatur, sed quod tangant Horizontem: ideo Sol in primo gradu Cancræ existens non occidet & in primo gradu Capricorni non oriatur, sed ambobus diebus rader Horizontem. In aliis vero gradibus Eclipticæ oriatur & occidet, quod conspicietur ex punctis Eclipticæ Orientibus & Occidentibus.

PROPOSITIO VI.

Locus extra Zonas frigidæ sitis, hoc est in Temperatas vel Torrida Zonis, Sol singulis diebus oritur & occidit.

Assumatur in globo aliquis locus pro libitu extra Zonas fridas & polares circulos jacens, & polus elevetur juxta illius latitudinem, ita ut Horizon ligneus fiat illius loci Horizon. Si jam globus circumrotetur, conspicuum erit, quod omnia Eclipticæ puncta oriantur & occidant, hoc est, quod aliquo tempore infra Horizontem depressa maneant, aliquo supra Horizontem existant. Sol itaque in illis punctis existens idem faciet.

PROPOSITIO VII.

Dato loco in Zona Torrida sito, invenire duos illos anni dies, quibus Sol verticalis fit illi loco.

Datus locus adducatur ad Meridianum æneum, atque in hoc fiat signum creta, sive gradus latitudinis notetur supra locum. Deinde moveatur globus, donec unum & alterum Eclipticæ punctum transeat per hocce notatum Meridiani punctum. Hæc duo puncta notentur: sunt enim illa, in quibus Sol existens fiet verticalis dato loco. Inveniantur itaque dies anni, quibus Sol illa puncta Eclipticæ occupat, quod vel in Horizonte ligneo vel ex Tabulis, vel ex methodo capitis *xxi* fieri potest. Illi erunt quæriti dies, quorum unus erit ante solstitium, alter post illud, quibus Sol loco illi verticalis fiet, ubi ad Meridianum accesserit.

In Mappis quoque Vniversalibus problema hoc facile dissolvitur.

Etenim per datum locum si ducatur linea parallela Aequatori, recta vel circularis ex polo Mappæ in Curvilineis, hæc ducta secabit Eclipticam in duobus punctis: ex quibus dies anni innotescunt.

Si vero sine Globo & Mappis placeat problema solvere, nota debet esse loci Latitudo. Cum hac ingredi Tabulam Declinationis capite *xxi* positam, & excerpe dies, quibus Sol talem declinationem habeat. Illi erunt quæriti.

NOTA. Hisce diebus ipsum Solis centrum imminet loci vertici, aliquot tamen vicinis diebus ante & post illos Sol adhuc videtur imminere illi loco, quia limbus Solis à centro distat.

PROPOSITIO VIII.

Dato loco in Zona Frigida sito, indicare illos dies, quibus Sol illi loco non occidet, & quibus diebus non oriatur: item, diem primum & ultimum ex illis, quibus non occidit illi loco, vel, quibus non oritur eadem.

IN GLOBO. Datus locus adducatur ad Meridianum & elevetur polus pro loci illius latitudine. Dein circumrotato globo notentur juxta crenas Horizontis puncta Eclipticæ, quæ non occidunt, & in altera crena, quæ non oriuntur. Ille itaque gradus, qui inter 1 gr. Arietis & 1 gr. Cancræ existit, indicabit primum diem, quo Sol illi loco non occidet: & alter gradus inter 1 gr. Cancræ & 1 gr. Libræ diem ultimum. Et hisce diebus Sol radet Horizontem, manebit tamen supra eum, quod de centro Solis intelligendum est. Diebus autem intermediis perpetuo manebit supra Horizontem. Eodem modo illi dies inveniuntur, quibus in opposita anni parte Sol manebit infra Horizontem, diesque primus ac ultimus ex illis.

Faciliori quidem methodo per globum hoc fieri potest, sed minus manifestæ Demonstrationis, nempe quot gradibus datus locus à polo distat, totidem numerentur in meridiano ab Æquatore, atque terminus notetur ab utraque Æquatoris parte. Deinde observetur globo circumvoluto, quænam Eclipticæ puncta transeant per notata Meridiani puncta. Duo enim illa, quæ initio Cancræ vicina sunt atque arcus comprehensus indicabunt dies perpetuæ moræ Solis supra Horizontem loci dati. Alter arcus inter puncta circa initium Capricorni indicabit dies perpetuæ absentiae Solis seu delitescentiæ infra Horizontem loci dati.

IN MAPPIS. Latitudinis loci complementum sive loci distantia à polo numeretur in laterali Mappæ linea ab Æquatore versus utrunque polum, & describatur per terminum numerationis linea parallela Æquatori, sive retilinea sive curvilinea mappa fuerit, ut in præcedentibus Propositionibus docuimus. Hæ ita ductæ secabunt Eclipticam singulæ in duobus punctis. Hæc puncta indicabunt diem primum & ultimum perpetuæ moræ Solis supra Horizontem, atque arcus interceptus omnes dies perpetuæ moræ, Contra altera linea in oppositis Eclipticæ punctis monstrabit dies perpetuæ Solis infra Horizontem delitescentiæ.

PER TABULAM DECLINATIONIS fit ita, si nota sit loci latitudo. Ingredere cum complemento latitudinis, tabulam Declinationis, atque quære eam declinationem, qualis est latitudo loci, quam quidem quater inuenies, & sume quatuor dies illos, quibus Spleam declinationem habet. Duo ex illis, quorum unus inter xxi Martii & xxi Iunii, alter inter xxi Junii & xxi Septembris est, sunt primus & ultimus perpetuæ Solis moræ supra Horizontem. Reliqui duo perpetuæ moræ infra Horizontem loci propositi. Intermedii autem dies erunt perpetuæ Solis moræ supra vel infra Horizontem.

Quæ dicta sunt hætenus, intelligenda sunt de Solis centro. Quod si de extremo Solis limbo proponatur problema, sumendus erit locus in Mappis, qui quindecim minutis sit Æquatori propior vel remotior, vel quærendi erunt dies pro punctis Eclipticæ, quæ limbus Solis occupet.

PROPOSITIO IX.

Dato die anni, invenire illa loca Telluris in globo vel mappa, quibus Sol eo die verticalis sit in meridie, nimirum uni loco post alterum.

Ex dato die inveniat locus Solis in Ecliptica juxta methodum capitis XXII.

IN GLOBO. Adducatur locus Solis ad Meridiani punctum, quod ei imminet: Volvatur globus: sic omnia loca, quæ notatum punctum transiunt, sunt illa quæ quærentur: vel cretâ acuminatâ applicatâ describatur parallelus: hujus omnia loca sunt quæsitâ.

IN MAPPIS. Locus Solis in Ecliptica notetur & per eum ducatur parallelus Aëquatoris rectus vel curvus, prout Tabula rectilinea vel curvilinea fuerit. Sic omnia hujus paralleli loca erunt illa, quæ quærentur. Debet autem in utroque Mappæ hemisphærio id fieri.

PER TABULAM Declinationis traditam capite præced. invenietur latitudo locorum illorum, nempe declinatio respondens dato diei, est illi latitudini æqualis.

PROPOSITIO X.

Dato die anni, invenire illa Telluris loca, quibus Sol (centrum ejus) non occidit, ita ut dies hicce primus sit ex omnibus illis, quibus Sol non occidit in illis locis. Et illa loca invenire, quibus Sol non oritur, eadem cum conditione.

Debet autem datus dies esse unus ex illis, qui inter XXI Martii & XXI Junii vel inter XXI Septemb. & XXI Decemb. cadunt.

Inveniat primo omnium, locus Solis in Ecliptica ad datum diem: deinde reliqua fient ita.

IN GLOBO. Locus Solis in Ecliptica notatus addu-

adducatur ad meridianum; & quot gradus inter illum & Aequatorem in meridiano sunt intercepti, totidem numerentur à polo versus Aequatorem, vel quot gradus inter locum Solis & polum sunt, totidem numerentur ab Aequatore versus polum. Terminus numerationis notetur creta vel parallelus ad eum describatur.

Omnia loca, quæ in hoc parallelo sita sunt, satisfaciunt quæsitio primo. Illa vero loca, quæ secundo loco quærentur, erunt in parallelo ab altero polo æqualiter distante.

Ad demonstrandam veritatem solutionis, elevetur polus pro locorum inventorum latitudine.

Ita conspicuum est, quod Sol in notato Eclipticæ puncto existens non occidat infra Horizontem locorum illorum (qui jam est Horizon ligneus) in punctis vero ante notatum Eclipticæ punctum occidet infra Horizontem. Præterea omnia loca inter polum & parallelum hunc jacentia habebunt Solem perpetuo apparentem illo die, sed non erit illis locis hicce dies primus.

IN MAPPIS. Declinatio loci Solis notati numeretur à polo versus Aequatorem in laterali linea, & per terminum ducatur parallelus Aequatoris. Omnia loca in hoc parallelo jacentia utriusque planisphaerii sunt quæsitæ. Secundi quæsitæ loca in parallelo ab altero polo distant eisdem gradibus reperientur.

EX TABULA DECLINATIONIS invenietur latitudo pro locis quæsitis.

Corollarium. Eodem modo solvetur hoc: Dato die anni, invenire loca Telluris, quibus ille dies ultimus est illorum dierum, quibus Sol non occidit illis locis. Debet autem datus dies esse situs inter xxj Junii & xxj Septembris, vel inter

xxi Decembr. & xxi Martii. Possêt hic etiam illud solvi: Dato numero dierum, invenire illa loca Telluris, quibus Sol tot diebus non occidit, & totidem non oritur. Sed reservabimus hoc ad Caput sequens, ubi commodior locus hujus problematis erit.

PROPOSITIO XI.

Latitudinem & magnitudinem singularum Zonarum supputare in milliariis vel alia famosa mensura.

Latitudo Zona Torridæ est 47 graduum, nempe $23\frac{1}{2}$ ab utraque Æquatoris parte: Vtriusque Temperatæ latitudo est 43 graduum. Vtriusque Frigidæ Zonæ latitudo est 47 gr. Hosce gradus si in milliare commutentur, æstimatô uno gradu quindecim milliariis Germanicis, erit latitudo Zonæ Torridæ milliarium 705

Vnius ex Temperatis 645

Vnius ex Frigidis 705

Magnitudinem verò, vel superficiem singularum Zonarum inveniemus per hanc proportionem, quam ex Geometricis deduxi: ut sinus totus vel radius cujusvis circuli 100000 ad sinum 23 gr. 30 min, qui est ita superficies dimidia Telluris capite xv inventa, milliarium 0 ad superficiem dimidiæ Zonæ Torridæ milliarium quadratorum & proinde superficies totius Torridæ erit milliarium

Deinde, Vt sinus totus 100000 ad differentiam sinuum 23 gr. 30 min. & 66 gr. 30 min. ita dimidia superficies Telluris, milliarium ad superficiem unius Zonæ Temperatæ, milliarium quadratorum.

Si itaque dimidiæ Zonæ Torridæ atque integræ

græ Temperatæ superficiem auferas à dimidia superficie Telluris, relinquetur superficies unius Frigidæ, milliarium statuunt quidem plurimi Astronomi, non esse constantem Eclipticæ & Tropicorum declinationem ab Æquatore, unde fiet ut Zonarum magnitudo non sit semper eadem, sed quia ea est exigua differentia, & præterea à Tychone in dubium revocata, ideo non est necesse eam hoc loco considerare.

Postularet quidem locus, ut jam de tempestatibus in diversis Zonis & locis ageremus, sed quia quædam sequentis Capitis sunt, quæ ad rectius formandum iudicium faciunt, ideo illud interponere consultum duxi,

C A P V T XXV.

De longitudine dierum in diversis Telluris locis, & inde orta Divisone Telluris in Climata.

PROPOSITIO I.

D Vobis anni diebus sunt æquinoctia sive noctes æqualis diei in omnibus Telluris locis.

Dies illi sunt, quibus Sol Æquatorem ingreditur sive motu vel circumvolutione diurna describit, quod fit, quando primum gradum Arietis & primum Libræ ingreditur, nempe die XXI Martii & XXI Septembris juxta Calendarium Gregorianum. Hisce itaque diebus noctem diei æqualem fieri, nempe duodecim horarum, ostendendum est in omnibus Telluris locis. Dies autem hic denotat tempus moræ Solis supra Horizontem: nox moram infra Horizontem.

Assumatur in globo locus quilibet pro libitu,

& polus eleuetur pro illius loci latitudine, ita ut Horizon ligneus fiat illius loci Horizon. Deinde primus gradus Arietis vel Libræ collocetur in Horizonte Orientali, Index ad horam xxi cycli horarii. Circumvolvatur globus, donec primus gradus Arietis perveniat ad Occidentalem Horizontem. Videbis in cyclo horario Indicem duodecim horas transiisse. Eodem modo de nocte manifestum fiet, quod duodecim horas habeat.

Vel sine cyclo horario, perspicuum est, quoniam Aequator est parallelus, quem Sol illis diebus, hunc ab Horizonte in duas æquales partes secari ab Horizonte, ita ut pars extans supra Horizontem sit æqualis parti infra Horizontem. Sol itaque cum æquabili motu circumrotetur, æquales partes peragrabit æquali tempore.

Et quoniam locus Telluris pro lubitu assumptus fuit, ideo quod de uno hoc ostendimus, de omnibus verum est.

Locis vero sitis in ipsis polis Telluris, quæ tantum duo sunt, Sol neque orietur neque occidet illis duobus anni diebus, sed centrum ejus in Horizonte (qui idem hic est cum Aequatore) circumrotabitur, ut ita simul diem noctemque habeant. Cum enim in aliis locis terminus seu intermedium diei ac noctis sit momentum, ibi contra, integra revolutio sive dies naturalis est terminus sive medium perpetuæ apparentiæ Solis & perpetuæ delitescentiæ. Atque istis duobus diebus æquinoctiorum (xxi Martii & Septembr.) dimidius Sol supra Horizontem illorum duorum locorum, dimidius infra eum hærebit, & die quidem xxi Martii polo Arctico faciet initium longi diei sex mensium, die vero xxi Septembris erit initium longa noctis totidem mensium, ut in sequentibus docebi-

cebimus. Non itaque absurdum est, dari loca, ubi viginti quatuor horis nec dies sit nec nox. Placet hic plura enumerare, quæ poli habent peculiariora præ cæteris locis Telluris, nimirum,

2. Sol integro anno semel tantum oritur, semel occidit, nempe in uno æquinoctio oritur illi, in altero occidit.

3. Non habent meridiem vel mediam noctem definito tempore, sed omnibus horis sive perpetuam meridiem habent sex mensibus, contra sex reliquis mensibus perpetuam mediam noctem.

4. Nullæ stellæ fixæ oriuntur, nullæ occidunt, sed quædam perpetuo supra Horizontem manent, quædam semper infra eum. Hasce nunquam vident, si qui sunt ibi incolæ; quod verisimile non est, illas semisse anni integro, quo Sol infra Horizontem est, conspiciunt, nisi nubes vel alia meteoræ impedian.

5. Stellæ eandem altitudinem supra Horizontem atque distantiam à vertice servant, sicut etiam Sol integra circumvolutione diurna.

6. Nullus ibi ventus dici potest Septentrionalis, Australes omnes, nempe in polo Arctico, contra, in polo Antarcticico omnes venti Septentrionales, nulli Australes, nulli Orientales vel Occidentales.

7. Si non stellæ & Sol moventur sed juxta Copernicanam hypothese in ipsa Tellus, siquidem oculi punctum esset, ut in ipso polo constitui posset, omnes stellæ & ipse Sol atque Luna immobiles atque in eadem plaga apparerent.

Hæc omnia per globum facili opera ostenduntur.

PROPOSITIO II.

Locis in Æquatore sitis perpetua est dierum ac noctium aequalitas. Locis ipsorum polorum unus est dies totius anni & una tantum nox. Dies autem est longior quam nox in polo Septentrionali : sed in polo Australi dies brevior est, quam nox.

Assumatur in Æquatore globi quilibet locus pro libitu. Ostendendum est, quod in singulis anni diebus nox æqualis sit diei, hoc est quod Sol tanto tempore sive tot horis infra Horizontem maneat, quanto supra Horizontem. Sumatur dies anni pro libitu, & inquiratur ad eum locus Solis, qui in Ecliptica notetur. Deinde assumptus locus constituatur in vertice, ut poli incumbant ipsi Horizonti; sic enim Horizon ligneus erit Horizon locorum Æquatoris. Locus Solis adducatur ad meridianum & describatur parallelus, quem Sol illo die perficiet. Deinde notentur hujus paralleli puncta duo existentia in Horizonte. Et manifestum erit, quod arcus hujus paralleli existens supra Horizontem sit æqualis arcui infra Horizontem existenti. Et quia Solis motus diurnus sicut omnium stellarum est æquabilis, ideo æquali tempore perambulabit arcus æquales paralleli. Ita de quovis die ostenditur Propositionis prima pars. Ad alteram partem de locis polorum ostendendam, collocandus erit polus alteruter in vertice Horizontis lignei: ita enim hic erit Horizon poli.

Et circumvoluto globo conspiciemus, quod una integra Eclipticæ semissis maneat supra Horizontem, altera infra eum. Itaque Sol dum versatur in illa semissè, non occidet, dum in hac, non orietur. Pluribus autem diebus versatur in Se-

pten-

ptentrionali Eclipticæ semicirculo, quam in Australi propter eccentricitatem motus sui proprii, nempe in illo dies 187 moratur, in altero dies 178. Itaque perpetua mora supra Horizontem erit longior quam mora infra Horizontem poli Arctici, contra in polo Antartico.

PROPOSITIO III.

In locis inter Aequatorem & polum jacentibus nulli dies aequales sunt noctibus suis præter duos æquinoctiorum dies, sed reliqui omnes majores vel minores noctibus.

Assumatur in globo aliquis pro libitu locus inter Aequatorem & polum, atque polus elevetur juxta illius loci latitudinem, & sumto quovis anni die, exceptis æquinoctiorum diebus (nempe xxi Martii & xxi Sept. circiter) inveniatur locus solis ad eum diem, atque is in Ecliptica globi notetur, & ad meridianum adducto, describatur parallelus ejus, quem Sol circumrotatione sua diurna efficiet. Notentur duo hujus paralleli puncta in Horizonte existentia, & manifestum erit, quod arcus paralleli supra Horizontem existens sit major vel minor quam arcus delitescens infra Horizontem, atque ideo dies sive mora Solis supra Horizontem major vel minor erit quam mora infra Horizontem, major quidem, si locus Solis fuerit in semicirculo Eclipticæ magis vicino, minor vero, si in semicirculo magis remoto.

Vel, adducto loco Solis ad Horizontem Orientalem collocetur Index supra xxi horam cycli horarii & volvatur globus, donec locus Solis ad Horizontem Occidentalem perveniat. Index in cyclo monstrabit horarum diei numerum: dein indice ad xxi reducto volvatur globus donec lo-

cus Solis infra Horizontem transiens redeat ad Orientem : Index iterum monstrabit horarum noctis numerum, & manifesta erit inæqualitas.

PROPOSITIO IV.

Dato loco in globo vel latitudine ejus datâ & dato die anni, invenire quot horas Sol supra Horizontem illius loci illo die commorabitur & quot infra eum, hoc est invenire longitudinem diei ac noctis pro illo loco ad datum diem.

Ad datum diem inveniat locus Solis in Ecliptica, atque is in globo Ecliptica noetur. Elevetur polus juxta dati loci latitudinem, locus Solis ad Orientalem Horizontem adducatur, & Index ad XII cycli. Volvatur globus, donec locus Solis ad Horizontem Occidentalem perveniat. Index monstrabit numerum horarum diei : reliquæ horæ ad 24 erunt horæ noctis.

PROPOSITIO V.

In omnibus locis inter Aequatorem & polum Arcticum sitis, dies longissimus, & nox brevissima fit Sole in primum gradum Cancrî ingressò, (XXI Junii) brevissimus contra dies & longissima nox, Sole primum Capricorni gradum occupante (x xi Decembr. circiter.) In locis vero inter Aequatorem & Antarcticum polum sitis contrarium verum est, nempe dies brevissimus est Sole primum Cancrî gradum occupante, longissimus, primum Capricorni gradum.

Ad ostendendum hoc in globo, assumatur locus pro libitu, & elevetur polus juxta illius latitudinem. Inveniat per præced. prop. horarum nu-

numerus, Sole in 1 gr. Cancrī existente. Deinde alio quovis puncto Eclipticæ assumptō pro quovis alio anni die inveniatur iterum numerus horarum pro hoc die. Et manifestum erit, quod numerus horarum diei, Sole in 1 gr. Cancrī existente sit major, quam numerus horarum alterius diei: & quoniam hic alter dies pro libitu est assumptus, & in singulis diebus eadem valet demonstratio, ideo dies Sole in 1 gr. Cancrī est longissimus omnium & ideo nox brevissima omnium.

Eodem modo ostendemus, Sole in 1 gr. Capricorni existente diem esse brevissimum, noctem longissimam.

Eadem quoque demonstrationis methodus observabitur pro locis ab altera Æquatoris parte versus Antarcticum polum sitis.

COROLLARIUM. Dato loco in globo vel latitudine loci invenire horas longissimi diei pro illo loco. Inveniatur per præcedentem propos. numerus horarum pro illo loco Sole in 1 gr. Cancrī existente (siquidem locus fuerit inter polum Arcticum & Æquatorem, sed si ab altera Æquatoris parte, sumatur 1 gr. Capricorni.) Is enim est dies longissimus. Eodem modo quantitas diei brevissimi invenietur, quanquam ea ex inventa diei longissimi quantitate deducitur facillimè. Est enim æqualis nocti diei longissimi.

PROPOSITIO VI.

In locis Telluris Septentrionalibus, dum Sol movetur à primo gradu Capricorni ad primum gradum Cancrī, (à xxi Decembris ad xxi Junii) dies accrescunt continue, dum verò à primo Cancrī gradu movetur ad primum Capricorni, continue de-

cre-

crescunt. In locis Australibus contrarium verum est, accrescunt enim à 1 gr. Cancrì ad 1 gr. Capricorni, decrescunt à 1 gr. Capricorni ad 1 gr. Cancrì.

Assumatur in globo locus pro libitu Septentrionalis, hoc est, inter Æquatorem & polum Arcticum jacens, & elevetur polus pro illius loci latitudine. Assumptis deinde duobus & pluribus Eclipticæ punctis inter 1 gr. Capricorni & 1 gr. Cancrì & 1 gr. Cancrì jacentibus inveniatur quantitas diei pro illis punctis, sive sole occupante ista puncta. Et manifestum fiet, quod dies à die 1 gr. Capricorni remotior sit major, quam is, qui eidem diei 1 gr. Capricorni propior fuerit. Eodem modo cum diebus inter 1 gr. Cancrì & 1 gr. Capricorni sitis agemus. Et in locis australibus non dissimili methodo ostendemus propositum. magis perspicua erit Démonstratio, si per ipsos parallelorum arcus supra & infra Horizontem existentes fiat.

PROPOSITIO VII.

Si locus Telluris ab Æquatore est remotior, vel polo propior, quam alius locus, major est differentia inter dies & noctes, & dies longissimus major, dies brevissimus minor. Contra, si locus propior est Æquatori, minor est differentia inter quantitatem dierum ac noctium, & dies longissimus minor, dies brevissimus major, ita ut loca Æquatori vicina sive in Zona Torrida sita habeant ferè omnes dies aequales noctibus, sicut ipsius Æquatoris loca, & longissimi diei excessus supra aquinoctialem sit unius circiter horæ.

Sumantur in globo duo loca, quorum unus ab Æquatore sit remotior, alter eidem propior. Et sumatur quicumque anni dies (exceptis æquinoctiorum, x x i Martii & Septemb.) Ostendendum est, quod in loco remotiori dies magis discrepet à noctis quantitate quam in loco viciniore Æquatoris.

Locus Solis in Ecliptica ad assumptum diem inveniatur atque in Ecliptica globi notetur. Dein elevetur polus pro unius loci assumpti Telluris latitudine, & inveniatur longitudo diei & noctis (sive mora Solis supra & infra Horizontem) in illo loco ad assumptum diem, per propof. v i hujus. Dein elevetur polus pro alterius loci latitudine, & inveniatur longitudo diei ac noctis sive mora Solis supra & infra Horizontem ad eundem assumptum diem. Conferatur hæc inventa longitudo cum priori, & manifesta erit Propositionis veritas.

Itaque locus remotior habet omnes dies unius semissis anni majores, quam locus vicinior: contra omnes dies alterius semissis habet minores.

Quod vero de locis Zonæ Torridæ dictum est, ostenditur ita. Inveniatur quantitas longissimi diei in locis Tropicorum, hoc est, quæ Torridam Zonam terminant, per propof. v i hujus, & conspicua erit veritas Propositionis. Sed commodior & multo facilius erit Demonstratio, si ipsi arcus paralleli notentur, qui supra Horizontes extant, & deinde hi arcus conferantur.

COROLLARIUM. Quod itaque de omnibus anni diebus (exceptis æquinoctiis) ostensum est, idem etiam in diei longissimi & brevissimi quantitate valet. Atque in hisce potissimum spectatur & attenditur, quia hic maxima est inter noctis & diei

diei longitudinem discrepantia, non tanta in aliis anni diebus. Duorum itaque locorum is qui ab Aequatore est remotior vel polo propior, habet longissimum diem majorem quam locus Aequatori vicinior: & diem brevissimum minorem.

PROPOSITIO VIII.

Omnia loca Telluris, quae in uno eodemque parallelo sita sunt, habent omnes anni dies aequales & ideo eandem longissimi diei quantitatem.

Facilis est demonstratio hujus Propositionis per globum. Assumatur quilibet parallelus in globo, & loca in eo quotvis. Elevetur polus pro latitudine istius paralleli, & assumatur quilibet Solis parallelus pro aliquo anni die, ex. gr. assumatur Tropicus Cancrī pro die longissimo. Constituantur unus ex assumtis locis sub Meridiano ut ita verticem Horizontis occupet, sive ut Horizon ligneus sit Horizon illius loci: Notetur tunc arcus Tropici existens supra Horizontem, sive duo puncta ejus existentia in Horizonte. His enim arcus denotat Solis moram supra Horizontem illius loci. Deinde adducatur secundus locus ad meridianum seu verticem, ut Horizon ligneus fiat illius Horizon, & notetur iterum arcus Tropici existens supra Horizontem, qui si cum priori conferatur, deprehendemus quod aequales sint. Potest etiam ostensio fieri per horas in cyclo horario.

Sol itaque aequali tempore supra Horizontes eorum locorum commoratur, & ideo dies erunt aequales, ut etiam noctes.

Definitiones.

Ex hisce origo Divisionis Telluris in Climatâ facilis est intellectu.

CLIMA enim dicitur una pars Telluris, ex illis partibus, in quas superficies inter Aequatorem & polum sita ita secatur ductis parallelis, ut longissimus dies in parallelo remotiori ab Aequatore excedat longissimum diem paralleli vicinoris Aequatori certâ ac definitâ hora parte vel horarum numero, nimirum semissè horæ in locis usque ad Arcticum fere circulum sitis, deinde in reliquis integra hora vel aliquot horis & diebus.

Principium Climatis dicitur parallelus, cum quo Clima incipit, propiorque est Aequatori. Finis Climatis dicitur parallelus terminans Clima.

Medium Climatis dicitur parallelus per medium circiter Climatis superficiem ductus ita ut in illo longissimus dies excedat longissimum diem principii climatis per quadrantem horæ vel per dimidiam differentiam, qua longissimus dies finis climatis excedit longissimum diem principii climatis.

Parallelum spatium dicitur, quod parallelus climatis medius cum principio vel fine Climatis comprehendit. Sed inutilis hæc est vocabuli usurpatio & homonymiæ introductio.

PROPOSITIO IX.

Si sumantur in Tellure plurima loca ab Aequatore versus polum, quorum distantia ab Aequatore aequaliter accrescat, ex. gr. decem graduum, viginti, triginta, quadraginta, &c. longissimi dies in his locis non erunt aequaliter majores sive non aequaliter

liter accrescunt, sed magis accrescunt in locis remotioribus & quo propior est locus polo.

Ad ostendendam hujus Propositionis veritatem per globum, sumantur loca ab Æquatore versus polum remota æquali incremento distantiae, nempe propter commoditatem, paralleli 10 gr, 20 gr, 30 gr, 40 gr, 50 gr, 60 gr, &c. latitudinis. Hi enim paralleli in globis existunt. Elevetur polus ad latitud. 10 gr, & adducto primo gradu Cancrī ad Horizontem Orientalem, & notatō eō, notetur etiam Tropici punctum quod in Occidentali Horizonte tunc existit. Arcus enim Tropici supra Horizontem existens ostendit moram Solis supra Horizontem loci 10 gr. latitudinis. Horæ istius moræ possunt etiam per Indicem & cyclum horarum cognosci.

Deinde polus elevetur juxta secundi loci latitudinem 20 gr. & adductō iterum primo gradu Cancrī & Orientalem Horizontem, notetur Tropici punctum in Occidentali. Arcus enim supra Horizontem existens denotabit iterum moram quæ etiam per Indicem & cyclum in horis cognosci potest.

Eodem modo agatur cum locis, quorum latitudo 30 gr, 40 gr, 50 gr, 60 gr, 70 gr, &c. Quibus factis conferantur arcus Tropici vel horæ diurnæ Solis moræ supra Horizontes, & manifestum erit, quod multo magis accrescat quantitas longissimi diei in locis remotioribus quam in propioribus Æquatori, adeoque incrementum longissimi diei magis accrescere quam incrementum distantiae locorum ab Æquatore.

NOTA. Quod de longissimo die dictum est & ostensum, id de omnibus unius semissis anni diebus, verum est & eodem modo demonstratur, si pro

pro Tropico Cancris assumatur parallelus istius loci. Etsi itaque generalia generaliter tradenda sint, tamen quia doctrina de Climatibus requirit præcipuè explicationem longissimi diei incrementi, ideo non solemus in hac doctrina stricte observare illam legem *καθόλου δεχόμενοι*.

PROPOSITIO X.

Si inter Equatorem Telluris & polum plurima loca vel plurimi paralleli sumti sint ita, ut longissimus dies unius loci excedat longissimum diem vicini loci, (qui Equatori propior sit) æquali ubiq; excessu, sive ut longissimi dies æqualiter accrescant, isti paralleli non æqualiter à se invicem, nempe bini quique vicini distabunt, sed qui ab Equatore sunt remotiores, minorem distantiam habebunt, quam illi, qui Equatori sunt viciniore.

Hujus Propositionis veritas ex præcedenti ostenditur. Etenim si paralleli hi æqualiter distarent à se invicem, bini nempe quique vicini, non accresceret quantitas longissimi in istis parallelis æquali incremento, ut in præcedenti ostensum est. Atqui ponitur jam æqualiter accrescere sive loca & paralleli ita sumti sunt, ut æqualiter in illis accrescat longissimus dies. Quare non æqualiter bini quique vicini distabunt à se invicem, sed sumtis multis parallelis ab Equatore versus polum hac conditione ut æqualiter accrescat longissimus dies, isti paralleli non æqualiter distabunt à se invicem, verum minor erit distantia tertii à secundo quam secundi à primo, minor adhuc quarti à tertio, adhuc minor quinti à quarto, dein sexti à quinto, septimi à sexto & sic porro.

COROLLARIUM. Quoniam itaque Climata pleraque ita sumuntur, ut longissimus dies in finali parallelo Climatis superet longissimum diem principii Climatis per horam semissem, sequitur ex hac Propositione, quod Climata ab Aequatore remotiora sint minus lata vel magis angusta, quam vicina Aequatori, atque adeo Climatuum latitudinem & magnitudinem versus polum decrescere. Hinc factum est, cum Climata tandem admodum angusta fierent versus polum si idem excessus, semissu nempe horae, servaretur, ut Geographi Climatuum Septentrionalium terminos non semisse horae, sed primo horis integris, deinde integris diebus definiant.

PROPOSITIO XI.

Data quantitate vel numero horarum diei longissimi in aliquo loco seu parallelo Telluris, invenire latitudinem loci seu Elevationem poli istius paralleli, & ipsum parallelum in globo exhibere, sive, exhibere illa loca, ubi tantus sit longissimus dies.

Adducatur locus Solis longissimi diei, qui est 1 gr. Cancrī in omnibus locis Septentrionalibus, ad meridianum, Index ad horam x 11 cycli horarii: Volvatur globus, donec Index monstret horam illam cycli, à qua numerus datus longissimi diei denominatur (nempe in cyclo ad horam x 11 mediae noctis adjungendae erunt reliquae horae continua numeratione) & tunc notetur punctum Tropici existens in Meridiano. Deinde adducatur 1 gr. Cancrī ad Orientalem Horizontem, & meridianus in crena ita moveatur polo elevato vel depresso, donec alterum Tropici punctum notatum existat in Occidentali Horizonte, ita ut 1 gr. Cancrī

Cancrī sit adhuc in Oriente. Quo factō, numeretur gradus elevationis poli. Ea enim est quæsitā elevatio vel latitudo paralleli, quem in ipso globo invenies, si totidem gradus numeres in meridiano ab Æquatore versus polum, & cretā applicatā ad terminum numerationis globum circumrotes. Descriptus enim parallelus est is, qui quæritur. Probatio methodi facilis est.

NOTA. Hæc etiam Propositio multo generatius potest proponi ita: Datā longitudine cujusvis diei anni in aliquo loco, invenire loci seu paralleli istius latitudinem, & ipsum parallelum seu loca in Tellure exhibere. Vel: Dato numero horarum, invenire loca Telluris, ubi ad datum aliquem anni diem tantus sit diurnarum horarum numerus.

Solutio fiteodem modo, quo in Propositionis solutione diximus, modo pro Tropico Cancrī, qui est parallelus Solis in longissimo die assumatur parallelus alius, illē nempe qui dato diei anni convenit. Ex die enim invenitur locus Solis in Ecliptica, qui quando habetur facile est parallelum diei describere, ut in præcedentibus aliquoties id jam docuimus.

COROLLARIUM. Facile itaque est, invenire latitudinem singulorum parallelorum in singulis Climatibus, quum datur longissimus dies Climatum, nempe in termino primi Climatis est $12\frac{1}{2}$ hor. in termino secundi 13 hor. in tertii termino, $13\frac{1}{2}$ & sic porro. In parallelis vero mediis Climatum dies longissimi sunt $12\frac{1}{4}$ hor. $12\frac{3}{4}$, $13\frac{1}{4}$, &c.

PROPOSITIO XII.

Dato numero dierum aliquot, invenire latitudinem locorum sive paralleli atque ipsa Frigida Zona loca in Tellure exhibere, ubi Sol tot diebus non occidat, totidemque diebus non oriatur.

Numerus dierum bifecetur sive dimidietur. Et numerentur tot gradus in Ecliptica à primo Cancrì, quantus est dimidijs ille numerus, sive quot unitates hic habet, (potest ab utraque parte istius initii numeratio fieri) terminus notetur cretâ. Si dies plures sint, quam triginta, debet numerus graduum unitate minor sumi. Deinde adducatur hoc notatum punctum ad meridianum & numerentur gradus inter illud & polum intercepti. Hi enim sunt quæsitæ elevatio poli seu latitudo locorum, ubi tot diebus, quot dati sunt, Sol non occidet, & totidem diebus non oriatur. Ipsa loca & parallelum in globo invenies si numeres inventam latitudinem ab Æquatore versus polum in meridiano, atque ad terminum applicatâ cretâ designes parallelum. Hic enim est is qui quæritur, & continet omnia loca quæsitæ.

Ad Demonstrationem solutionis hujus elevetur polus pro inventorum locorum latitudine, & manifestum erit, quod gradus Eclipticæ notati circa 1 gr. Cancrì non occidant infra Horizontem, sed supra eum maneat. Sol itaque ista puncta Eclipticæ perambulans non occidet: perambulat autem ista puncta tot diebus, quot dati sunt, ut ex constructione patet. Eodem modo ostendemus veritatem solutionis de diebus, quibus Sol non oriatur omnino locis inventis, sive invento parallelo.

COROLLARIUM. Facile itaque est, illorum quoque Climates Elevationem poli invenire, quæ in Zonis frigidis jacent, ubi dies longissimus accrescit non horis sed integrorum dierum numero.

PROPOSITIO XIII.

Tabulam Climates construere.

Tabula Climates vocatur, in qua ad singulorum Climates initium, medium & finem reperitur annotata elevatio poli seu latitudo paralleli, & ipsa longissimi diei quantitas, ut etiam Climates intervallum sive parallelorum distantia.

Constructio facilis est. Etenim ex ipsa Climates consecutione & ordine quantitas longissimi diei pro initio, medio, fine, cujusvis Climates invenitur, addendo $\frac{1}{4}$ horæ ad horas duodecim continua successione.

Deinde ex quantitate longissimi diei singulorum parallelorum, invenitur singulorum elevatio poli seu latitudo, juxta Propos. x i. Denique intervallum climates sive latitudo habetur, si latitudinem paralleli inchoantis auferas à latitudine paralleli finientis. Hisce omnibus in Tabula cancellatim divisâ annotatis habemus Tabulam Climates, quam hic subjungo.

TABVLA CLIMATVM ET
PARALLELORVM.

CLIMA- TA.	PARAL- LELI.	Dies lon- gissim.	Elevatio poli.	Inter- vallum.	
		hor. min.	gr. min.		
Pri- mum	Principium	12	0	0	
	Medium	12	15	4	15
	Finis & Secundi	12	30	8	25
	Principium				
Secun- dum	Medium	12	45	12	30
	Finis.	13	0	16	25
Ter- tium	Medium	13	15	20	15
	Finis.	13	30	23	50
Quar- tum	Medium	13	45	27	40
	Finis.	14	0	30	20
Quin- tum	Medium	14	15	33	40
	Finis.	14	30	36	28
Sextum	Medium	14	45	39	2
	Finis.	15	0	41	22
Septi- mum	Medium	15	15	43	32
	Finis.	15	30	45	29
Octa- vum	Medium	15	45	47	20
	Finis.	16	0	49	13
No- num	Medium	16	15	50	33
	Finis.	16	30	51	58
Deci- mum	Medium	16	45	53	17
	Finis.	17	0	54	27
Vndeci- mum	Medium	17	15	55	34
	Finis.	17	30	56	37
Duode- cimum	Medium	17	45	57	32
	Finis.	18	0	58	29
Decimū tertium	Medium	18	15	59	14
	Finis.	18	30	59	58

CLI- MATA.	PARAL- LELI.	Dies lon- gissimus.	Elevatio poli.	Inter- vallum.
---------------	-----------------	------------------------	-------------------	-------------------

		hor. min. gr. min.			
Decimū	<i>Medium</i>	18	45	60	40
quartū	<i>Finis.</i>	19	0	61	18
Decimū	<i>Medium</i>	19	15	61	55
quintū	<i>Finis.</i>	19	30	62	25
Decimū	<i>Medium</i>	19	45	62	54
sextum	<i>Finis.</i>	20	0	63	22
Decimū	<i>Medium</i>	20	15	63	40
septimū	<i>Finis.</i>	20	30	64	6
Decimū	<i>Medium</i>	20	45	64	30
octavū	<i>Finis.</i>	21	0	64	49
Decimū	<i>Medium</i>	21	15	65	6
nonum	<i>Finis.</i>	21	30	65	21
Vicesi- mum	<i>Medium</i>	21	45	65	35
	<i>Finis.</i>	22	0	65	47
XXI.	<i>Medium</i>	22	15	65	57
	<i>Finis.</i>	22	30	66	6
XXII.	<i>Medium</i>	22	45	66	14
	<i>Finis.</i>	23	0	66	20
XXIII.	<i>Medium</i>	23	15	66	25
	<i>Finis.</i>	23	30	66	28
XXIV.	<i>Medium</i>	23	45	66	30
	<i>Finis.</i>	24		66	31

Uterius non solent extendi climata, quia in sequentibus locis accrescit longissimus dies non horis sed integris diebus sive revolutionibus diurnis, & inutilis est opera in illorum supputatione: sequens tamen canonion ostendet elevationem poli sive latitudinem locorum, ubi integris mensibus accrescunt longissimi dies.

Menses.	1.	2.	3.	4.	5.	6.
latitudo						
locorum	67 gr.30	69.30	73.20	78.20	84 gr.	90 gr.

PROPOSITIO XIV.

Aliorum Geographorum methodum in enumerandis Climatibus & construenda Tabula Climatuum explicare.

Veteres Geographi, inprimis Græci, cum parvam Telluris portionem habitari existimarent propterea quod tam loca Septentrionalia quam Torridæ Zonæ habitari posse negarent, ideo eam tantum Telluris portionem, quam cognitam habebant, diviserunt in Climata, & tantum septem numerarunt Climata ab Æquatore versus Arcticum polum, eaque denominarunt à loco aliquo insigniori, per quem medius parallelus Climatuum transiret, nimirum hæc:

PRIMUM Clima appellarunt CLIMA PER MEROEN
(Est insula & urbs Africa Nilo circumdata.)

SECUNDUM PER SYENEN. Est urbs
Aegypti.

TERTIUM PER ALEXANDRIAM Æ-
GYPTI. Maritima est urbs.

QUARTUM PER RHODUM. Insula in
Mari Mediterraneo est.

QUINTUM PER HELLESPONTUM.
Alii per Romam.

SEXTUM PER BORYSTENEM. Fluvius insignis est Sarmatiæ Europææ.
SEPTIMUM PER RIPHAEOS MONTES SARMATIAE.

Climata autem ab altera Aequatoris parte versus Austrum non numerabant Antiqui, quia omnia hujus loca illis erant incognita, & multi putabant, Oceanum omnem hanc Telluris superficiem occupare. Quod cum quibusdam posterioribus minus verisimile videretur, numerarunt hi quoque Climata ab altera Aequatoris parte, denominarunt autem illa non ab insignibus locis (nulla enim cognita habebant) sed eisdem appellationibus, quibus Septentrionalia Climata, præponentes tantum Præpositionem ἀπὸ, ut Clima ἀπὸ τῆς μέσης quasi dicas Clima oppositum Clima per Meroen, per Syenen, &c.

Deinde cum progressu temporis plures partes Telluris versus Arcticum polum jacentes cognoscerentur habitari, plura Climata numerata & constituta sunt. Quidam octavum Clima denominarunt à palude Mæotide, Nonum à mari Balthico, Decimum, Undecimum & sequentia ab aliis locis. Quæ denominationes etsi non sint necessariae ad Tabulæ Constructionem, possunt tamen etiam nostræ Tabulæ addi in illis areis, ubi numerum Climatorum posuimus: sic enim & memoriæ firmiter hærebunt Climata, & loca in quovis Climate sita, meliorque comparatio de frigoris atque caloris differentia institui. Hoc autem lectorum & studiosorum industriæ maluimus relinquere, quam ipsimet adjicere, ut ita majorem ansam illis præberemus contemplandi terrestris globi: Et multo facilius hoc modo memoriæ mandabunt.

Sciendum quoque est, Veteres non incepisse

Climatum numerationem ab ipso *Æquatore*, sicut nostra Tabula facit, sed à loco sive parallelo, ubi longissimus dies est $12\frac{3}{4}$ horarum, ideoque illorum primum Clima est secundum in nostra Tabula, illorum secundum nobis tertium, &c. Estimant enim illa loca, quæ nos primo Clima assignamus nempe ad 9 gr. latitudinis nullâ ratione habitari posse ab hominibus propter ingentem Solis æstum, & propterea censebant, illa loca non debere numerari. Sed cum experientia contrarium ostenderit, non potuimus illorum Clima denominandi & constituendi modum observare. Ptolomæus primum Clima incipit à parallelo, ubi longissimus dies est $12\frac{1}{4}$ horarum, sive ubi latitudo seu distantia ab *Æquatore* est 4 gr. 15 min.

Res est non magni momenti: præstat tamen ab ipso incipere *Æquatore*, ut omnia loca in aliquo Climate jaceant.

PROPOSITIO XV.

Usus Tabulæ Climatum monstrare.

1. Data loci alicujus latitudine vel poli elevatione, cognoscere quantitatem diei longissimi in illo loco & Clima in quo jacet.

Quæritur elevatio poli data in Tabula, & è regione inveniemus & quantitatem diei longissimi & Clima atque parallelum. Si ipsa elevatio data non inveniatur in Tabula, sumenda est proxime minor & proximè major, quæ in Tabula reperitur.

2. Datâ longitudine diei longissimi alicujus loci, quam aliquis observavit vel narrando accepit, cognoscere ex eo latitudinem illius loci & parallelum atque Clima in quo ille locus jacet.

Ingre-

Ingredere cum data longitudine Tabulam & videbis è regione tam latitudinem loci quæsitam quam Clima & parallelum.

3. Dato Climate determinare longitudinem diei longissimi & elevationem poli. Facile hoc est ipso Tabulæ aspectu.

C A P V T XXVI.

De luce, calore, frigore, & pluviis in diversis Telluris partibus seu Zonis, atque aliis Zonarum proprietatibus.

P R O P O S I T I O I.

AD lucem, calorem, frigus, pluvias atque alia meteora generanda & procreanda in Telluris locis atque aëre vicino causæ hæc efficaces sunt.

1. *Radiatorum Solis ad locum quemque venientium & emissorum obliquitas major vel minor vel nulla.* Radii enim perpendiculariter in locum incidentes maximum efficiunt calorem, & reliqui radii obliquè allabentes eo minorem calefaciendi potentiam habent, quo obliquitas eorum major, hoc est quo à perpendiculari radio magis declinant.

2. *Mora Solis supra Horizontem loci diuturna.* Etenim idem calidum magis calefacit & mutat aërem longiori tempore, quam breviori.

3. *Depressio Solis infra Horizontem major vel minor tempore noctis.* Etenim hæc differentia depressionis facit, ut major vel minor lux in aëre sentiat, major quoque vel minor tepor, pluviae, densæ nebulae, &c. Huc pertinet lux Crepusculi.

4. *Luna major vel minor elevatio supra Horizontem, ejusdem major vel minor depressio infra Horizontem, ejusdem diuturna mora vel minus diuturna supra Horizontem.* Causæ eadem sunt, quas in tribus præcedentibus paragraphis adduximus.

5. *Eadem de stellis fixis præsertim insignioribus & quinque reliquis planetis, Saturno, Iove, Marte, Venere & Mercurio dici possunt.* Namque & lucem aliquam in aëre generant & calorem, exiguum licet, & aërem variis modis mutant, vapores excitant, si Astrologis credimus.

6. *Terra cujusvis loci proprietas sive species.* Etenim ubi saxea & petrosa est terra, ibi plerumque frigidior est aër, quam ubi sulphurea, pinguis, hic quoque major fertilitas. Vbi multa arena, nulli fluvii, ibi magnus calor, siccitasque.

7. *Adjacentes lacus vel mare.* Etenim & halitus inde procreantur in aëre humidiores atque frequentiores & radii minus potenter reflectuntur à mari quam à terra.

8. *Situs locorum.* Aliter enim in montes & montana agit Sol, aliter in valles atque planitiem. Præterea montes prohibent radiorum Solis ad subiecta loca liberum accessum, ad illos vapores aëris trahuntur quodammodo, ut capite xx diximus. Vnde montes mutant vicinorum locorum tempestates, calorem pluvias, &c. nempe aliter hæc forent in subiectis locis si montes abfuissent.

9. *Venti, præsertim generalis & statii.* Sic Etesiae temperant canicularium æstus, generalis ventus in Zona Torrida præsertim Subsolani in Brasilia temperatum reddunt calorem, quando in Africa Occidentali vehementissimus est æstus, quia ventum generalem non ita sentiunt ista loca. Venti

Septen-

Septentrionales frigidi & sicci, Australes tepidi & humidi in nostris locis.

10. *Nubes, pluvia, nebula tollunt vel immittunt calorem, lucemque.* Plures causas non arbitror esse varietatis, quæ in luce, calore, &c. observatur in Telluris diversis locis vel etiam eisdem, sed diverso tempore.

PROPOSITIO II.

Quomodo tempestates anni, Ver, Æstas, Autumnus & Hyems definienda sunt?

Et si in scientiis de Definitionibus non sit litigandum vel disputandum, tamen quia hic occurrunt quædam homonymiæ, sine quarum explicatione magna in sequenti doctrina existeret confusio, id eo quæstionem hanc ita proponere volui, ut adolescentes eò cautius homonymiam hanc vitent vel ab ea ne decipiantur & intricentur, sibi caveant.

Quæstio duas complectitur difficultates. 1. An definiendæ sint illæ tempestates ex ingressu Solis & mora ejus in certis Eclipticæ seu Zodiaci signis? Ita enim communiter faciunt Astronomi & Astrologi, dicentes, Ver esse dum Sol à primo Arietis movetur ad primum usque Cancræ: Æstatem, dum Sol à primo Cancræ ad primum Libræ movetur: Autumnum, dum à primo Libræ ad primum Capricorni. Hyemem, dum à primo Capricorni ad primum Arietis. Hæcæ autem Definitiones non esse generales & omnibus locis competentes, manifestum est, quia tantum in locis Septentrionalibus (ab Æquatore versus Arcticum polum sitis) non in Australibus valent. Pro hisce enim ipsimet alias Definitiones prioribus contrarias proferunt, dicentes in hisce locis Ver esse So-

le à primo Libræ ad primum Capricorni eunte, Æstatem à primo Capricorni ad primum Arietis, Autumnum à primo Arietis ad primum Cancræ, Hyemem à primo Cancræ ad primum Libræ.

Sed ex eo sequeretur, tempestates illas non posse generaliter definiri, quod falsum est, & debent generalia generaliter definiri. Secundo, ne ita quidem factæ Definitiones locum habere possunt in locis Zonæ Torridæ. Etenim quando Sol per verticem locorum transit, tunc nemo non fatetur ibi debere esse Æstatem (nisi alia causa impediatur) respectu cælestis causæ, & ita locis in Æquatore sitis non debet esse Ver vel Autumnus Sole in primum Arietis vel Libræ ingressò, sed Æstas, quoniam tunc transit per illorum locorum verticem, & maximum calorem creat, nisi causa alia impediatur, neque illa Æstas ad primum Cancræ vel Capricorni potest transferri. Idem valet de locis inter Æquatorem & Tropicos sitis, quia Sol illorum verticem transit, antequam ad primum Cancræ vel Capricorni accedit, & ideo prius Æstatem efficit. Sciendum enim est, etsi Definitiones liberæ sint, tamen cum omnium populorum communes notiones Æstatem calore, Hyemem frigore vel saltem minore calore definiant, ita debere fieri definitiones ut ab istis notionibus quam minimum recedant, & ne pugnent cum illis. Eadem difficultas est de Vere & Autumno locorum Zonæ Torridæ, imo non videntur hic locum habere, præsertim in locis quæ in Æquatore jacent.

Secunda difficultas, ob quam proposita est quæstio occurrit hæc: Vtrum ab ipso caloris & frigoris gradu definiendæ sint Tempestates, Ver, Æstas, Autumnus, Hyems, an à solis accessu & recessu? Etenim hominum Europæorum commu-

nis notio, quam de illis tempestatibus formant
sive quibus illas concipiunt, utrunque complecti-
tur, etsi magis ad calorem & frigus respiciant:
Astronomi autem magis ad Solis accessum & re-
cessum vel ingressum Solis in certa Zodiaci signa,
ut antea dictum, attendunt. Præterea in locis Zo-
næ Torridæ non paucis observatum est, quod tem-
pestates illæ non respondeant Solis accessui vel re-
cessui, sed quod contra cælestem Solis motum &
causam, hyemem experiantur (non quidem fri-
gore sed pluviis sævientem & procellis) cum æsta-
tem agere deberent propter Solis viciniam, &
contra, æstatem cum remoto Sole, ubi hyemem
debebant sentire (cujus rei mirabilis sane exempla
infra adducemus) atque ideo illi populi Æstatem,
Hyememque non definiunt Solis accessum vel in cer-
ta signa ingressum, sed serenitate Æstatem, pluviis
& frigidiusculo aëre Hyemem. Atque ita impossi-
bile est, Definitiones Veris, Æstatis, Autumni, Hye-
mis facere, quæ generales sint & omnibus hisce
locis competant juxta populorum notiones.

Ego consideratis hisce difficultatibus, ita cen-
seo. 1. Primò, cum in multis locis Zonæ Torri-
dæ, (ut in secunda difficultate dictum) atque et-
iam in quibusdam locis Zonarum Temperatarum
Calor atque frigus contra cælestem rationem sive
Solis motum accidunt, neque tamen calore & fri-
gore possint definitiones illæ fieri accuratæ, ideo
distinguenda esse vocabula hæc tempestatum tan-
quam homonymica, ut tempestates aliæ esse di-
cantur cælestes, aliæ terrestres. Fateor vocabula
hæc minus apta esse, sed meliorum defectus co-
egit ea usurpare. Ita Æstas terrestris loci alicujus
dicetur tempus anni quò in illo loco maximus fit
à Sole æstus singulis annis. Æstas verò cælestis
dicetur

dicetur illud anni tempus, quo maximus æstus esse debebat in loco illo propter Solis viciniam. Ita Hyems cælestis loci alicujus dicetur illud anni tempus, quo proximum debebat in loco illo esse frigus propter maximam Solis distantiam. At Hyems terrestris loci alicujus dicetur tempus anni, quo maximum est frigus in illo loco singulis annis. Et licet in plurimis locis Hyems cælestis & terrestris in unum tempus anni incidant, ut etiam Æstas cælestis & terrestris, tamen quædam loca Zone Torridæ sunt, ubi diversa tempora anni observant, ut in sequentibus dicemus. Ita de Vere terrestris atque cælesti & similiter de Autumno dicendum erit.

2. Secundò, cum pauca ea loca sint, ubi terrestris Æstas atque Hyems à cælesti discrepat in anni tempore, sed in plurimis locis in idem anni tempus incidant, ideo cælestem Æstatem posse absolute dici Æstatem, ita quoque Hyemem, Ver, Autumnum, atque ubi de terrestri sermo faciendus est, addendum esse vocabulum terrestris, ubi vero simpliciter dicitur Æstas, Hyems, Ver, Autumnus, intelligendas esse cælestes tempestates cum terrestribus convenientes.

Sed quomodo distinctas & accuratas faciemus definitiones Æstatis (cælestis nempe) Hyemis, Veris, Autumni, ut generales sint omnibus locis atque in Torrida quoque Zona locum habeant? Mihi sane non alius occurrit modus, quo definitiones illæ fieri possint tales, nisi hic:

1. *Æstas (cælestis) loci alicujus, dicitur anni tempus, cujus initium est dies ille, in cujus meridie Sol minimam habet à vertice loci illius distantiam, (idque prima vice, si duabus vicibus Sol ei loco fiat, verticali) finis vero ille dies, in cujus meridie (si-*

ve minorem, quam in omnibus aliis diebus anni.) Sol mediocrem à vertice loci illius primò recipit distantiam.

2. Hyems loci alicujus dicitur illud anni tempus, cujus initium est dies ille in cujus meridie Sol maximam à vertice loci illius adipiscitur distantiam, finis vero ille dies, in cujus meridie Sol mediocrem à vertice loci illius acquirit distantiam.

3. Ver loci alicujus dicitur anni tempus, inter finem Hyemis & initium Aestatis cadens, siue cujus initium est dies ille, in cujus meridie Sol mediocrem acquisivit à vertice distantiam veniens à maxima distantia, finis vero ille dies, in cujus meridie Sol minimam primò acquisivit à vertice loci illius distantiam.

4. Autumnus loci alicujus dicitur anni tempus inter finem Aestatis & initium Hyemis cadens, siue cujus initium est dies ille, in cujus meridie Sol mediocrem recepit à vertice loci illius distantiam veniens à minima, finis vero ille dies, in cujus meridie Sol maximam à vertice loci illius distantiam adeptus est.

Juxta has definitiones omnibus Telluris locis attribui possunt Ver, Aestas, Autumnus & Hyems, neque facile inveniatur alius modus eas definiendi; ita ut omnibus locis conveniant. Hisce itaque positis Definitionibus ad ipsam rem accedemus.

PROPOSITIO III.

Aestas (caelestis) locorum Telluris, qua inter Tropicum Cancræ & polum Arcticum jacent, incipit cum Solis ingressu in primum gradum Cancræ (xxi Junii) & desinit cum Solis ingressu in primum Libra (xxi Septemb.) & quidem simul in omnibus illis

illis locis. Ita Autumnus illis locis est, Sole à primo Libræ ad primum Capricorni eunte: Hyems, dum Sol à primo Capricorni ad primum Arietis movetur. Ver, dum idem Sol à primo gradu Arietis ad primum Cancri movetur.

Veritas Propositionis per antecedentes definitiones facile ostenditur & in globo monstrari potest, ut etiam in Mappis Universalibus. Etenim Sol in primum gradum Cancri perveniens habet minimam, quam habere potest, à verticibus singulorum locorum Zonæ Septentrionalis Temperatæ & Frigidæ distantiam in meridie. Æstas itaque illorum locorum, juxta cælestem legem tunc incipiet. Eodem modo Sol in 1 gr. Libræ mediocrem habet distantiam à verticibus illis: In 1 gr. Capricorni maximam: in 1 gr. Arietis iterum mediocrem & ascendit versus majorem, quæ tum ex declinatione Solis tum ex globo & mappis perspicua. Infertur itaque per definitiones antea positas, quod Autumnus, Hyems, Ver illorum locorum incipiant & desinant illis diebus quibus dictum est.

Locorum Telluris, quæ inter Tropicum Capricorni & polum Antarcticum jacent, sive Zona Australis Temperata & Frigida Æstas incipit cum Solis ingressu in primum Capricorni (xxi Decemb.) & desinit cum Solis ingressu in 1 gr. Arietis (xxi Martii.) Autumnus illorum locorum incipit cum Solis ingressu in 1 gr. Arietis & desinit cum Solis ingressu in 1 gr. Cancri (xxi Junii.) Cum hoc incipit Hyems illorum locorum, quæ desinit cum Solis ingressu in 1 gr. Libræ (xxi Septemb.) Cum hoc incipit illorum Ver, & desinit cum Solis ingressu in 1 gr. Capricorni (xxi Decemb.) ubi rursus Æstas incipit.

Hæc ostenduntur eodem modo per traditas Definitiones & per globum vel Mappas, quo priora ostendimus. Quia in 1 gr. Capricorni minimam Sol habet distantiam à verticibus illorum locorum: in 1 Arietis mediocrem & descendit ad minimam: in 1 gr. Cancrī maximam: in 1 gr. Libræ mediocrem & ascendit ad maximam.

Locorum autem Telluris, qua in Zona Torrida sive inter Tropicum Cancrī & Capricorni jacent, Æstas, Ver, Autumnus & Hyems (cælestes) non incipiunt uno & eodem anni die, sed diebus diversis in singulis Zona hujus locis diversorum parallelorum, sive diversa latitudinis. Sunt autem Loca Zonæ Torridæ triplicia, nempe Loca Æquatoris, Loca Zonæ Torridæ Septentrionalia, & Loca Zonæ Torridæ Australia.

1. Loca in Æquatore jacentia hoc peculiare habent, quod duas sentiant Æstates, duas Hyemes, duo Verna tempora, duos Autumnos, idque singulis annis, ita ut in semisse anni nempe sex mensibus, ab xx1 Martii ad xx1 Septemb. quatuor illa tempora, Æstatem, Autumnum, Hyemem, Ver, juxta nostras definitiones & cælestem legem experiantur vel experiri debebant: easdem quatuor tempestates denuo ab xx1 Sept. ad xx1 Martii sentiunt: nimirum

*Æstas una est, dum Sol movetur à 1 gr. Arietis ad 2 gr. Tauri (ab xx1 Martii ad 22 Aprilis)
Autumnus, dum Sol movetur à 2 gr. Tauri ad 1 gr. Cancrī (à xx1 Aprilis ad xx1 Junii)
Hyems, dum Sol movetur à 1 gr. Cancrī ad 2 gr. Leonis (ab xx1 Junii ad 19 Augusti)
Ver, dum Sol movetur ab 2 gr. Leonis ad 1 gr. Libræ (à 19 Augusti ad xx1 Sept.)*

Æstas

Æstas altera est, dum Sol movetur à 1 gr. Libræ ad 2 gr. Scorpii (ab xx1 Septem. ad xx11 Octob.) Autumnus alter est, dum Sol movetur à 2 gr. Scorp. ad 1 gr. Capricorni (à xx11 Octob. ad xx1 Decem.) Hyems altera est, dum Sol movetur à 1 gr. Capric. ad 28 gr. Aquarii (ab xx1 Decem. ad xix Febru.) Ver alterum est, dum Sol movetur à 28 gr. Aquarii ad 1 gr. Arietis (à x 1x Febr. ad xx 1 Martii.)

Demonstrantur hæc omnia facillime ex traditis Definitionibus, quia Sol in 1 gr. Arietis & in 1 gr. Libræ minimam habet distantiam in meridie à verticibus locorum jacentium in Æquatore, nullam enim habet, quia verticalis eis fit: itaque tunc æstates incipient. Deinde in 2 gr. Tauri & 2 gr. Scorpii (ubi Solis declinatio est 11 gr. 45 min.) mediocrem acquirit distantiam discedens ad maximam, itaque tunc incipient Autumni: Porro in 1 gr. Cancri & 1 gr. Capricorni existens maximam habet distantiam ab Æquatoris locis, itaque tunc hyemes incipient. Denique in 28 gr. Leonis & 28 gr. Aquarii, mediocrem recipit distantiam à locis Æquatoris. (10 gr. 45 min. ascendens versus minimam, itaque tunc verna tempora incipient. Magis perspicue ex globo hæc intelliguntur. Etsi itaque ita distinguantur hic tempestates juxta cælestem legem, tamen terrestres tempestates in plurimis Æquatoris locis aliter observantur, ut in sequentibus dicemus.

2. *Loca Telluris omnia in Zona Torrida Septentrionali jacentia habent quidem Autumni finem & initium Hyemis simul eodem tempore, nempe xx 1 Decembris; sed Æstatis, & Veris initium atque finem, ut etiam Autumni initium non habent simul, sed diversa loca diversis diebus.*

Etenim Autumni finis Hyemisque initium in locis

locis fit, ubi Sol maximam, quam potest, à vertice locorum illorum distantiam adipiscitur, ut in Definitionibus suppositum fuit. Atqui de omnibus locis *Zonæ Torridæ Septentrionalis* verum est, quod Sol in 1 gr. *Capricorni* ingrediens maximam in meridie distantiam acquirat à verticibus illorum locorum, quia reliquis diebus omnibus vicinior illis locis est. Itaque Sole in 1 gr. *Capricorni* ingresso omnibus illis locis *Zonæ Torridæ Septentrionalis* fit *Hyemis initium* & *Autumni finis*, quod est primum Propositionis hujus membrum.

Alterum membrum quoque facili negotio probatur. Si enim loca illa diversæ sunt latitudinis, hoc est diversam ab *Æquatore* distantiam habeant, non eisdem sed diversis diebus Sol verticalis fiet in meridie illis locis. Est autem tunc æstatis cujusvis loci *Zonæ* hujus *Torridæ* initium, quando Sol ascendendo à 1 gr. *Capricorni* pervenit ad eum gradum *Eclipticæ Septentrionalis* ut verticalis sit loco illi. Itaque diversis diebus fiet *Æstatis initium* in diversis illis locis: in omnibus tamen locis illis cadet initium hoc inter *xxi Martii* & *xxi Junii*. Diversis quoque diebus finietur *Æstas*, & *Autumnus* incipiet, quia Sol diversis diebus ad mediocrem distantiam (sive ad puncta *Eclipticæ*, quæ mediocrem à locis illis distantiam habent) perveniet, quia puncta hæc inter 1 gr. *Libræ* & 1 gr. *Capricorni* sita diversa sunt: cadet tamen initium hoc inter *xxi Sept.* & *xxi Decemb.* Eodem modo diversis diebus finietur *Hyems* & *Ver* incipiet, quia rursus puncta *Eclipticæ* mediocris distantiae à verticibus illorum sunt diversa. Illa autem attingens Sol facit *Veris initium*: quod tamen in omnibus cadet inter *xxi Decem.* & *xxi Martii*.

3. Denique Loca Telluris omnia in Zona Torrida Australi sita habent etiam Autumni finem & initium Hyemis simul eodem tempore, nempe xx 1 Iunii: sed Æstatis & Veris initium atque finem, ut etiam Autumni initium non habent simul, sed diversa loca diversis diebus, ita tamen ut Æstatis omnium horum locorum initium cadat inter xx 1 Septembr. & xx 1 Capricorni: Autumni initium, finisque Æstatis inter xx 1 Martii & xx 1 Iunii: Veris initium, & Hyemis finis inter xx 1 Iunii & xx 1 Septembris.

Probantur membra hujus Propositionis eodem modo, quo in præcedenti id factum est.

Etenim die xx 1 Junii Sol existit in 1 gr. Cancr. atque ideo à locis Australis Zonæ Torridæ habet maximam, quam potest, distantiam. Erit itaque tunc omnibus illis initium Hyemis. Æstatis vero, Veris atque Autumni initia diversis diebus fient, quia Sol in diversis punctis Eclipticæ sit verticalis diversis locis, & distantiam quoque mediocrem ab illis locis diversis diebus acquirit.

4. Peculiare aliquid habent illa loca Telluris, in Zona Torrida, quæ inter Equatorem & octavum gradum latitudinis tam versus Septentrionem, quam versus Austrum jacent. Sol enim motu suo proprio, vel accessu & recessu facit illis duas Æstates, duo Verna tempora, unum tamen modo Autumnum, unamque Hyemem, idque perturbato quodam ordine, nempe hoc: Ver, Æstas, Ver, Æstas, Autumnus Hyems.

Causa hujus paradoxii est, quoniam Sol recedens à verticibus horum locorum, quæ inter Equatorem & 8 gr. latitudin. Borealis jacent (ubi initium primæ æstatis fecit) versusque Cancr. initium progrediens mediocrem hic acquirit distantiam.

stantiam, à verticibus regrediatur versus illos vertices, non Autumnum, faciet post Æstatem illam primam sed aliud Ver, cum primum fecisset, antequam primam Æstatem inciperet, ubi mediocrem distantiam inter 1 gr. Capricorni & 1 gr. Arietis adipiscitur. Ex gr. sumamus locum, qui quatuor gradibus distat ab Æquatore. Quoniam itaque etiam Sol in 10 gr. Arietis declinat sive distat ab Æquatore gradibus quatuor, itaque in 10 gr. Arietis existens faciet loco illi initium Æstatis. Porro maxima distantia, quam Sol habere potest à vertice hujus loci in meridie, est 27 gr. 30 min. (nempe in 1 gr. Capricorni, ubi declinatio ejus ab Æquatore est 23 gr. 30 min. quibus loci ab Æquatore distantia Borealis additur 4 gr.) cum itaque minima distantia sit 0 gr. 0 gr. erit mediocris distantia sive media, 13 gr. 45. m. Quare cum Sol fuerit in punctis Eclipticæ quæ ab assumpto loco vel loci parallelo distant gradibus 13, & 45 min. tunc Sol faciet Ver vel Autumnum illi loco, Ver quidem si Sol à punctis illis moveatur versus loci verticem, Autumnum verò, si Sol ad remotam distantiam tendat à puncto illo. Puncta autem Eclipticæ, quæ ab assumpto loco distent 13 gr. & 45 min. reperiuntur quatuor, nempe 25 gr. Lioræ, 3 gr. Geminorum, 27 gr. Cancræ, 5 gr. Piscium, quod probatur ex Declinatione horum punctorum. Quoniam itaque Sol à 1 gr. Capricorni ad 5 gr. Piscium accedens acquirit hic mediam distantiam à vertice loci assumpti, & tendit versus locum, faciet tunc nempe in 5 gr. Piscium existens, Veris initium in loco illo, quod Ver durabit donec Sol accedat ad 10 gr. Arietis, ubi loco fiet verticalis, eritque æstatis initium. Cum jam motu suo Sol ad 3 gr. Geminorum recesserit à loco,

co, habebit iterum mediocrem distantiam à vertice illius loci in meridie, nempe 13 gr. 45 min: itaque tunc Æstatis illius finis erit, & initium Veris, non Autumni, quia Sol à 3 gr. Geminorum non tendit ad maximam distantiam à vertice, sed redit ad minimam, nempe dum per Cancrum motus & Leonem pervenit ad 20 gr. Virginis. Tunc enim iterum loco assumpto fit verticalis, facitque novæ Æstatis initium, quæ durat eo usque, donec Sol ad 25 gr. Libræ pervenerit. Tunc enim iterum adipiscitur mediam distantiam & tendit versus punctum maximæ distantie (1 gr. Capricorni:) itaque tunc initium Autumni faciet: & in 1 gr. Capricorni Hyemis initium. Sic itaque monstravimus, quomodo locus talis, qui inter Æquatorem & 8 gr. latitudinis Borealis in Zona Torrida jaceat, habeat duas Æstates, duo Verna tempora, unum Autumnum & unam Hyemem. Quod eodem modo ostenditur de locis ab Æquatoris altera parte inter 8 gr. latitudinis jacentibus.

In locis vero ultra 8 gr. sitis versus Tropicos non habet hoc locum, quia puncta illa 1 gr. Cancrivel 1 gr. Capricorni non habent ab illis mediam distantiam sed minorem mediâ. Etenim à loco 9 gr. latitudinis maxima Solis distantia, quæ fieri potest, est 32 gr. 30 min. media itaque est 16 gr. 45 min. Si itaque locus sit in 9 gr. latitud. Borealis, Sol in 1 gr. Cancrivel existens habebit minorem ab eo distantiam, quam media est: est enim illa tantum 14 gr. 30 min, hæc verò 16 gr. Itaque in illo loco Æstas, quæ incepit cum primo Solis accessu ad verticem, (in 24 Ariet. 15 April.) non finietur ante Tropicum Cancrivel, sed continuabitur toto Solis itinere per Taurum, Geminos, Cancrum, Leonem, Virginem, Libram, in cu-

us gradu 24, nempe 15 Octobris circiter, definit.

Videntur quidem hic novæ quædam rursus existere difficultates, nempe duæ: 1. Quod hi menses non sint ascribendi æstati, quia Sol non directo itinere à vertice recedat, sed prius ad aliam atque aliam distantiam, dum versus Tropicum Cancræ recedit à loci vertice, & deinde rursus accedit, æstatem vero definiendam solo recessûs tempore. Sed ad hoc respondeo, definiri æstatem recessû, sed non recessû ad quamvis distantiam, verum recessû ad mediocrem vel mediam distantiam, neque hoc ipso excludi accessum mixtum recessui, modo recessûs non fuerit major mediâ distantia.

2. De locis inter Æquatorem & 8 gr. latitudinis jacentibus, cum ante 1 gr. Cancræ (vel si latitudo sit australis, ante 1 gr. Capricorni) Sol mediocrem à locis illis acquirit distantiam, ubi diximus finem fieri primæ æstatis, non videtur ponendum initium veris, quia Sol ab illo puncto non directe movetur rursus versus locum, sed prius magis recedit, nempe ad 1 gr. Cancræ & ab hoc ad locum redit. Verum sciendum est, illum recessum adeo parvum esse, ut nulla ejus debeat haberi ratio, quia vix unum vel alterum gradum facit, atque illud majoris recessûs tempus non potest alteri ascribi tempestati, nisi quintam aliquam novam & sextam velimus effingere.

Aliter etiam de locis hisce videri posset alicui, nimirum non esse ponendum intermedium aliquod Ver inter duas Æstates, sed unam & continuam æstatem, atque illud intermedii veris tempus huic æstati attribuendum non habitâ ratione ejus, quod Sol ad mediam distantiam removeatur à loco, quandoquidem adeò propinquus maneat lo-

co & tam parum recedat ultra mediā distan-
tiam, ut vix calorem aëris minuere sed potius
propter continuitatem augere possit illo tempore.
De hoc cum nemine certavero: puto tamen com-
modius fore, si explicatæ methodo insistamus. Sed
nimis multa de hoc negotio.

PROPOSITIO IV.

*Dato loco in Zona Torrida invenire dies anni,
quibus Æstas, Autumnus, Ver atque Hyems inci-
piant & desinant in illo loco.*

1. Si locus in ipso Æquatore situs sit, diximus
in præced. propos. theoremate 3. quibus diebus
incipiant & desinant hæc anni tempora, quæ ibi
duplicita sunt.

2. Si locus sit extra Æquatorem & ultra 8 gr.
latitudinis vel distantia ab eo remotus, adduca-
tur is ad meridianum, & punctum meridiani im-
minens notetur cretâ. Deinde volvatur globus
donec punctum aliquod Eclipticæ inter 1 gr. Arie-
tis & 1 gr. Cancrī situm ad idem meridiani pun-
ctum perveniat (si locus datus sit in Septentriona-
li Torrida, sed si in Australi Torrida, tunc pun-
ctum inter 1 gr. Libræ & 1 gr. Capricorni debet
transire.) Hoc erit punctum, quod Sol ingrediens
faciet æstatis initium in proposito loco. Deinde
gradus intercepti inter notatum meridiani pun-
ctum & Tropicum Capricorni, (Cancrī, si locus
Australis sit datus) secentur in æquales duas partes
atque medium punctum in meridiano notetur,
& moveatur globus donec punctum Eclipticæ si-
tum inter 1 gr. Capricorni, atque 1 gr. Arietis,
(inter 1 gr. Cancrī & 1 gr. Libræ, si locus austra-
lis) transeat per notatum punctum ultimum meri-
diani, item rursus moveatur, donec aliud pun-
ctum

Autum inter 1 gr. Capricorni & 1 gr. Libræ (1 gr. Canceri & 1 gr. Arietis, si locus Australis) transeat idem meridiani punctum. Prius punctum denotabit diem pro initio Veris, posterius pro initio Autumni. Hyemis verò initium est in 1 gr. Capricorni, si locus datus Septentrionalis sit; verum in 1 gr. Canceri, si Australis datus.

Idem quoque per Mappas solvi potest: sed accuratissime ex Tabulis declinationum nimirum cum data latitudine loci ingredi Tabulam Declinationis solaris: in qua eam latitudinem quære, cui videbis appositos quatuor anni dies. Ex hisce sume eum, qui inter xx 1 Martii & xx 1 Junii cadit, siquidem datus locus sive data ejus latitudo sit Septentrionalis: sed si australis, sume eum diem, qui inter xx 1 Septemb. & xx 1 Decembr. cadit. Hic dies erit æstatis initium.

Deinde datæ loci latitudinis dimidium aufer ab 11 gr. 45 min. atque residuum numerum quære in Tabula Declinationis. Videbis iterum è regione quatuor anni dies, in quorum duobus Sol mediâ distantiam à dato loco obtinebit. Si itaque datus locus fuerit Septentrionalis, sume ex quatuor diebus illos duos, quorum unus inter xx 1 Decembr. & xx 1 Martii cadit: (Hic erit veris initium) alter inter xx 1 Septemb. & xx 1 Decembris; Hic erit Autumni initium. Sed si locus datus fuerit Australis, sumendus erit ex quatuor illis diebus, dies inter xx 1 Junii & xx 1 Septembris cadens pro initio veris, & pro initio Autumni is, qui inter xx 1 Martii & xx 1 Junii cadit. Hyemis initium erit xx 1 Junii, si locus australis, sed xx 1 Decembr. si locus Septentrionalis.

3. Si locus datus situs sit inter Æquatorem & 8 gr. latitudinis, habebit is duas æstates & duo

verna tempora præter Autumnum & Hyemem, nisi forte velimus Ver illud secundum inter duas æstates intermedium, ut in fine præcedentis Propositionis dictum, rejicere, & continuam æstatem illi tempori tribuere. Quod si placeat facere, non aliter cum dato loco agimus ac in priori modo. Sed si duas Æstates & duo Verna tempora illi tribuere velimus, ut accuratè observatæ definitiones Æstatis atque Veris postulant, agemus primò eodem modo, ac in prioribus, nempe initium Æstatis Hyemisque inveniemus, atque mediocris distantiae dies inventos in Tabula quatuor excerpemus. Ex illis quatuor duo illi, quos in priori modo jussi sumere pro initio Veris atque Autumni, hic iterum sumemus eisdem conditionibus: sed reliquorum duorum dierum ille tantum qui æstatis diei propinquior est, sumendus erit.

Hic enim primæ Æstatis finem & secundi Veris initium denotabit. Pro die autem secundæ æstatis, sumendus erit in area ea, ex qua primæ æstatis initium sumtum est, etiam alter dies ex tribus residuis: is nempe qui æquali dierum numero à XXI Junii distat, ac (XXI Capricorni si locus Australis) dies primæ æstatis. Ita inventi erunt dies, quibus æstas, Ver, Autumnum atque Hyems incipiunt & desinunt in locis Zonæ Torridæ.

PROPOSITIO V.

In locis Zonarum temperatarum atque frigidarum quatuor anni tempora, Æstas, Autumnum, Hyems atque Ver equalia sunt ferè, sive equali dierum numero constant. In locis vero Zonæ Torridæ inequalia sunt. Neque tantum ipsa tempora diversarum tempestatum inequalia, sed etiam ejusdem tempestatu tempus in diversis Zonæ locis inequale est.

1. De locis Zonarum Temperatarum atque frigidarum quod dicitur, facilem habet Demonstrationem. Etenim cum Sol singulis ex quatuor illis anni temporibus percurrat tria signa, ideo ipsa Tempora Veris, Æstatis, Autumni, Hyemis sunt æqualia sive æqualium dierum, exceptis aliquot diebus, quinque nimirum, quibus Æstas & quatuor quibus Ver locorum Septentrionalium excedit Autumnum & Hyemem: in locis vero Australibus contra, Autumnum & Hyems excedunt Ver atque Æstatem, quod à Solis Eccentricitate provenire in superioribus monuimus.

2. In locis jacentibus in ipso Æquatore duæ quidem sunt æstates, (sicut & reliquæ tempestates) sed ambæ breves, sicut & ambo verna tempora breviora sunt, nimirum unaquæque æstas & unumquodque Ver habet tantum dies triginta duos, ita ut ambæ æstates, sicut & ambo verna tempora habeant dies 64, hoc est duos tantum menses & duos vel quatuor dies. Sed Autumnum & Hyems sunt longiores, nempe quinquaginta quinque dierum, ita ut ambo Autumni sicut & ambæ Hyemes sint dierum centum & decem, hoc est fere quatuor mensium. Hæc manifesta sunt ex assignatis diebus pro initio Æstatum, Autumnorum, Hyemum, & temporum vernorum.

3. In locis Zonæ Torridæ, quo minus remota sunt ab Æquatore, eò majorem habent Æstatem, minorem Hyemem, magis vel minus mediocrem Autumnum atque Ver: nempe in locis non ultra decimum gradum ab Æquatore remotis durat æstas ultra sex menses. Quanta autem sit Æstas, Autumnum, Hyems atque Ver cognoscitur per propositionem præcedentem.

Quæ hæcenus dicta sunt, de tempestatibus ex-

lectibus, hoc est à cælesti causa sive solari accessu & recessu dependentibus tantum intelligenda: ab hoc autem solo non provenire lucem, calorem, frigus, &c. jam aliquoties monuimus: itaque reliquas causas in sequentibus considerabimus.

PROPOSITIO VI.

In locis Zona Torrida sicut Sol de die vertici admodum vicinus fit, ita de nocte contrà profunde infra Horizontem demergitur & à vertice locorum illorum quam maximè removetur, ita ut loca hæc de nocte in media fere umbra Telluris jaceant, neque aer illorum, ullis radiis Solis per frequentem reflexionem aliquo modo illustrari vel calefieri possit.

In locis Zona frigida sicut Sol de die non admodum vicinus fit illorum vertici, ita de nocte non profunde infra Horizontem manet, sed maximà noctis parte ita rotatur infra Horizontem, ut multi radii ab eo in aërem illorum locorum per reflexionem penetrent.

In locis Zonarum Temperatarum sicut Sol de die mediocri viciniâ accedit ad verticem illorum locorum, ita de nocte mediocri distantia infra Horizontem deprimitur, ita ut aliqui saltem radii in aërem illorum à Sole per reflexionem repetitam deriventur.

Ad hæc ostendenda per globum, elevetur primò polus pro loco aliquo in Zona Torrida sito, vel potius, poli in ipso Horizonte constituatur, ut loca Æquatoris sint in vertice Horizontis, sive ut Horizon ligneus fiat Horizon locorum Æquatoris. Consideretur deinde parallelorum, quos Sol circumrotatione suâ describit, depressio infra Horizontem, & conspicua erit veritas primi membri Propositionis.

Deinde

Deinde elevetur polus pro locis Zonæ Frigidæ five polus constituatur in verticem Horizontis: Et consideratis parallelis Solis infra Horizontem existentibus à 1 gr. Libræ ad 1 gr. Arietis, iterum manifestum erit, quod parum infra Horizontem deprimantur, atque ita secundum membrum Propositionis ostensum est.

Denique elevetur polus pro loci alicujus in Zona Temperata siti, & iterum consideratâ parallelorum depreffione infra Horizontem probabitur tertium Propositionis membrum.

PROPOSITIO VII.

Dato loco in globo & die anni invenire longitudinem crepusculi in dato loco ad datum diem.

Crepusculi autem longitudo dicitur tempus, quô ante ortum Solis vel post occasum ejus, lux aliqua in aëre animadvertitur.

Ad inveniendam temporis hujus quantitatem supponendum nobis est id quod ab Astronomis est observatum, (ut capite XIX diximus) crepusculum matutinum incipere plerunque, si aër sit serenus, Sole accedente ad 18 gradum depreffionis infra Horizontem, & vespertinum desinere, ubi Sol ad eum depreffionis gradum accesserit.

Elevetur itaque polus pro dati loci latitudine, & locus Solis in Ecliptica, ex die anni inventus quæratur in globi Ecliptica, ejusque punctum oppositum notetur. Deinde quadrans applicetur vertici, & notatum punctum adducatur ad Horizontem, Index ad horam XII cycli. Volvatur tunc globus donec notatum punctum elevatum fuerit octodecim gradibus supra Horizontem, quod ope quadrantis cognoscetur. Sic enim locus Solis totidem gradibus infra Horizontem depreffus

sus erit. Et index in cyclo monstrabit, quot horis vel horæ partibus crepusculum illo die in dato loco duret, posita æris serenitate. Adolescentes tribus exemplis hujus Problematis usum discere commodum est, uno Zonæ Torridæ, altero Temperatæ, tertio Frigidæ locum eligentes.

PROPOSITIO VIII.

In locis Zonæ Torridæ crepuscula sunt minima, in Zonis Frigidis longissima, in locis Temperatarum Zonarum mediocria.

Etenim in locis Æquatoris & vicinis crepusculum juxta hypothesin in priori propositione positam est unius circiter horæ, quod tamen dimidiæ tantum horæ vel paulo amplius esse experientia testatur, nimirum quia ær crassior non est ibi tam altus quam requiritur, ut ad 18 gr. depressionis creperam lucem faciat; tunc etiam quia hypothesi de 18 gradibus accipienda est de valde exigua luce, cum qua incipiat crepusculum, qualis à vulgo nondum habetur pro crepusculo.

In Zonis frigidis crepuscula durant per multos dies, quando ipse Sol infra Horizontem illorum manet.

In Zonis Temperatis durant crepuscula horis 3, 4, 5, 6 & per totam noctem alicubi & in diebus æstatis, prout loca vicina sunt frigidæ Zonæ magis aut minus.

Hæc omnia probantur per modum in præcedente Propositione positum.

PROPOSITIO IX.

Dato loco in Zona Temperata vel Frigida, & alio loco in Zona Torrida, datoque præterea die anni, inveniri horam loci Zona Torrida, in qua hora Sol eam

eam altitudinem habeat supra Horizontem illius loci (atque ideo radiis æque elevatis illum locum feriat) *quantam habet in loco Zona Temperata in ipso meridie.*

Elevetur polus pro latitudine loci Zonæ Temperatæ vel Frigidæ: Et locus Solis ex dato die inventus adducatur ad Meridianum, atque altitudo ejus numeretur. Hæc enim est altitudo radiorum, locum illum calefacientium & illuminantium in meridie.

Deinde polus elevetur pro alterius loci in Zona Torrida dati latitudine: Quadrans applicetur vertici, & notetur in eo gradus altitudinis antea inventæ: locus Solis ad meridianum adducatur, Index ad horam XII cycli. Moveatur deinde tam globus quam quadrans, donec locus solis conveniat cum notato quadrantis gradu. Ita enim Sol habebit supra Horizontem hujus loci altitudinem, quanta est in meridie prioris loci. Index monstrabit in cyclo horam quæsitam. Hac itaque hora cum radii solis illustrantes & calefacientes locum atque aërem Zonæ Torridæ sint æque elevati supra Horizontem ejus ac radii in meridie prioris loci, sequitur inde, quod ad inventam horam idem calor futurus sit in loco Zonæ Torridæ, quantus in loco Zonæ Temperatæ in meridie, nisi aliæ causæ accederent, nimirum 1. quod Sol præcedentibus diebus calidam aliquam constitutionem induxerit loco atque aëri Zonæ Torridæ, non autem talem vel tantam in locis Zonæ Temperatæ vel Frigidæ. 2. quod Sol supra Horizontem locorum Zonæ Torridæ rectè ascendens versus Meridianum radios omnes ad locum mittit quasi in uno plano & ad unam plagam atque ideo majorem calorem efficit, quam in Zona Temperatæ

vel frigida, ubi Sol oblique ab Horizonte ad Meridianum movetur & radios versus loca mittit ex alia atque alia plaga & in alio atque alio plano: itaque radii non in locum ita angustum contrahuntur vel continue calefaciunt.

Exempli causa, Quæramus quotâ horâ diei in locis jacentibus in ipso Æquatore, die æquinoctiorum Soleam sit habiturus altitudinem, quantam Amstelodami habet in meridie ejusdem diei?

PROPOSITIO X.

Quomodo lucis, caloris atque tempestatum causa, quas Propositione prima hujus capituli enumeravimus, in Zona Torrida locis se habeant, exponere.

1. Sol singulis anni diebus rectè ascendit supra Horizontem illorum locorum (præsertim Æquatoris) versus Meridianum & verticem illorum, atque ideo horâ nonâ circiter antemeridianâ radios quadraginta circiter gradibus à perpendicularibus declinantes incipit ejaculare ad illa loca, quæ radiorum restitudo sive radiorum perpendicularum accrescit ad meridiem & decrescens rursus durat usque ad quartam horam post meridiem, ubi Sol versus Occidentalem Horizontem discedens radios magis obliquos incipit emittere ad illa loca. Præcipuus itaque æstus in illis locis esse debet à nona circiter hora ante meridiem usque ad tertiam vel quartam post meridiem, si hæc causa sola spectetur. Quoniam tamen Sol à singulorum locorum vertice modo recedit, modo propius accedit, ideo Hyems singulorum locorum erit, ubi Sol à punctis Eclipticæ maximè remotis ab illis locis, hoc est, à 1 gr. Cancrî vel 1 gr. Capricornî graditur versus puncta mediam distantiam habentia à loco aliquo assumpto: Ver, ubi à puncto

mediocris distantiae graditur versus ipsum loci verticem, sive ad punctum Eclipticae, quod loco vel parallelo loci verticale est: Aestas, ubi à puncto verticali graditur Sol ad punctum aliud mediae distantiae. Autumnus illo tempore, quo Sol à puncto hoc altero mediae distantiae graditur ad punctum maximae distantiae, hoc est ad 1 gr. Capricorni vel 1 gr. Cancri.

2. In locis ipsius Aequatoris Sol nullo anni die commoratur supra Horizontem pluribus vel paucioribus horis quam duodecim, & totidem infra. In aliis Zonae Torridae locis, unâ vel sesquialterâ ad summum hora (nempe in locis extremis Zonae hujus circa Tropicū Cancri & Capricorni) cum dies est longissimus, Sol commoratur supra Horizontem ultra illas duodecim horas, & in die brevissimo tanto minori tempore, nempe undecim circiter horis, & intermediis diebus non multum à duodecim horis discrepat tempus morae solis supra & infra Horizontem. Hæc itaque causa faciet, ut noctes non sine frigore sint, & æstus diei non diu duret circa vespertina tempora.

3. Nocturno tempore, profundè Sol deprimitur infra Horizontem ita ut aërem loci cujusvis nullis radiis ne reflexis quidem illustret. Hæc causa faciet, ut & densissimæ tenebræ noctis ibi sint, & frigus noctis augeatur, aër condensetur & se contrahat atque frigidus versus terram descendat suâ gravitate. Præterea exiguo admodum tempore (semisse horæ circiter) ante Solis Ortum & post ejus Occasum crepusculi lucem & calorem experiuntur illa loca.

4. Luna eodem modo fere ac Sol recte ascendit ab Horizonte versus Meridianum illorum locorum, aliquantum tamen obliquius, quoniam ab

Æliptica atque adeo extra Zonam Torridam recedat quinque circiter gradibus. Commoratur quoque eodem modo ac Sol parum ultra XII horas supra Horizontem; deprimitur infra eum totidem fere horis, & quidem profunde, sicut de Sole diximus. Itaque radiis suis rectis sive perpendiculari vicinis, præsertim cum loco alicui verticalis sit, teporem noctis augebit, in recessu minuet, sed propter parvam moram supra Horizontem vix illius effectus erit sensibilis in loco aliquo, nisi cum verticalis est illi.

5. Omnes stellæ oriuntur, omnes occidunt in locis Æquatori vicinis (quæ polo vicinæ sunt admodum stellæ in locis remotioribus ab Æquatore non quidem oriuntur, sed paucissimæ ex sunt) atque ideo nocte teporem vel lucem exiguam & insensibilem in aëre procreare possunt.

6. In multis Zonæ Torridæ locis, ut in insulis Indicis, atque India ipsa, in procurrense seu lingua Africæ, in Guinea Africæ, in Mexicana Hispania terra est sulphurea, quæ halitus calidiores emittit, unde aëri teporem aliquem & peculiarem proprietatem communicat. In quibusdam locis est arenosa, ut in parte Africæ Septentrionali in Torrida jacente, nempe in parte Lybiæ, Nigritarum regione, &c. ita in Arabiæ multis locis, in Peruviano regno, in locis inter Peruviam & Brasiliam. Vnde in his locis ingens æstus à Sole exciatur, quia grana arenæ diutissime retinent acceptum à Sole calorem & vicino aëri continue communicant. In aliis locis plures sunt fluvii, in arenosis illis pauci. Plures sunt in Abassia, in Guinea, in Congo, in India, in Brasilia. Vnde humidi vapores excitantur, qui admodum retundunt vires radiorum Solis, atque calorem magis tolerabilem reddunt.

7. Pleraque loca *Zonæ Torridæ* vicinum habent mare, ut *India*, *Insulæ Indicæ*, *lingua Africæ*, *Guinea*, *Brasilia*, *Peruvia*, *Mexicana Hispania*; pauca loca *Zonæ Torridæ* sunt mediterranea, ut *Africa interior*, regiones inter *Peruviam* & *Brasiliam*. Vnde fit, ut in hisce locis major æstus & siccitas: in illorum vero plerisque aer humidior & minus fervens à Sole fieri possit, nisi aliæ causæ accederent.

8. Pleraque regiones *Zonæ Torridæ*, cum à mari fere undique cingantur singulæ, habent in mediis locis juga montium magis vel minus excellens, ut *India*, *insulæ indicæ*, *lingua Africæ*, *Peruvia*. Hæc juga montium admodum variant lucem, calorem, pluvias illorum locorum. Alicubi enim impediunt *Orientales Solis radios*, alibi *Occidentales*: præterea *humidi vapores* in aëre condensati ad illorum vertices moventur, ut explicavimus cap. xx. Proposit. Vnde pluviae, nubes, &c. quibus calor atque lumen Solis admodum impeditur, & tempestatum ratio cælestis turbatur. Pauca loca sunt *Zonæ Torridæ*, quæ illis jugis carent, ut *interior Africa*, *Mexicana Hispania*, & si quæ alia sunt.

9. Ventorum varii & insignes sunt effectus in locis *Zonæ Torridæ*. Etenim ventus Generalis ab Oriente vel Orientis lateribus plagis spirans continue versus Occidentem refrigerat loca maritima, quæ Orientem spectant, ut *Brasiliam*, *Orientale littus Africæ* non ita illa, quæ Occidentem spectant, ut *Guinææ* & *Congi*, *Angolæ*, *Peruviæ littora*, &c. Alii venti hi sunt proprii, ut australis in *Peruvia*, qui venti vapores pellunt versus eam plagam in quam ipsi spirant. Alii statim ventis: de quibus omnibus sufficienter egimus cap. xxr.

Hi itaque venti admodum turbant cælestem rationem tempestatum, quandoquidem illi æque ferè constantes sunt atque ordinem observant quam ipsius cæli motus. Diducunt aëra, compellunt versus montium juga vapores, atque aliis modis variant tempestates.

10. Nubes, pluvixque anniversariæ sunt in multis Zonæ Torridæ locis, atque ita cælestem rationem tollunt, cum æque constantes sint ac ipse Solaris motus. Errant enim illi, qui sublunarem hunc nostrum orbem omnia inconstantia & sine certo ordine, sola cælestia constantem motum servare opinantur.

Cæterum cum causæ hætenus enarratæ tam variæ sint, quæ calorem atque alias tempestatum proprietates efficere possunt, atque in uno loco quædam ex illis causis, in alio aliæ vigeant vel diversis anni temporibus concurrant vel se mutuo impendant, inde cognoscimus causam, cur adeo varia sit in locis Zonæ Torridæ tempestatum ratio & conditio.

PROPOSITIO XI.

Quando Ver, Æstas, Autumnus & Hyems (terrestres) se habeant & quibus anni mensibus fiant in locis diversis Zonæ Torridæ, enarrare.

Monuimus in superioribus, Propositione imprimis secunda, quod tempestates in locis Zonæ Torridæ multis fiant contra Solaris motus vel vicinix rationem, nempe æstatem fieri ibi, cum Sol maxime recedit, Hyemem cum omnium maxime vicinus imò verticalis est vertici. Ideo distinguimus tempestates in cælestes & terrestres. Diximus hætenus, & quidem Propositione Tertia & Quarta, quomodo dato loco quovis Zonæ Torridæ

et inveniendi sint menses anni, quibus locus ille
Æstatem, Ver, Autumnum atque Hyemem habe-
re debeat, si solus accessus & recessus Solis specta-
tur, hoc est cælestium tempestatum tempora desi-
gnare docuimus. Verum enim vero cum in locis
plurimis hujus Zonæ non fiant dictæ tempestates
illis mensibus, sed aliis, idque in diversis locis di-
verso tempore, ideo tempora terrestrium tempe-
statum non ex cælo vel certâ methodo, sed ab
ipsa experientia in locis illis factâ sunt desumen-
da, & quantum id fieri potest, causæ singulorum,
cur ita repugnent cælesti causæ, explicandæ sunt,
nempe ex illis decem causis, quas Propositione
prima posuimus. Id primo sciendum est, hyemem
in Zona Torrida non gelu vel frigore sævire sed
pluviis potius & minori æstu definiri, quam sit
tempore æstatis. Deinde in plurimis Zonæ Tor-
ridæ locis non quatuor, sed duas tantum numera-
ri anni tempestates, nempe Æstatem & Hyemem
atque hæc non calore & frigore distingui, sed
siccitate & humiditate potissimum. Etenim hye-
me sæpe major calor quam in æstate illorum, cum
respirationis angustia, quæ pluvix & nubes deor-
sum premunt calidum aërem. Ver vero & Autu-
mnum non ita manifestis indiciis vel differentiis
reperi.

*Incipiemus autem enarrationem ab Africa parte,
quæ in Zona Torrida jacet, & versus Orientem
progredientes, cum Brasilia, in Occidente sitam
à nobis, dimensi ita totam Torridam Zonam fi-
niemus.*

Occidentalis littoris Africæ regiones à Tropi-
co Cancris usque ad Promontorium Viride (hoc
quatuordecim gradibus ab Æquatore versus Bo-
ream distat) omnes sunt fertiles tam frumenti
quam

quam variorum pomorum, armenta quoque ac greges magna copiâ ibi reperiuntur: incolæ insigni robore. Calor aëris paulo excedit mediocritatem, ita ut incolæ nudi incedant, exceptis nobilibus & divitibus qui panno se vestiunt. Fertilitatis hujus & temperati aëris contra Zonæ Torridæ consuetudinem causa est 1. Multi fluvii, quorum præcipui Senega & Gambea, antequam in mare se exonerent vicinum, regiones illas irrigant humidumque ac frigidiorē aërem reddunt. 2. Vicinum mare, quod humidos vapores, frigidiusculos ventos præbet. Quomodo autem anni tempestates hic se habeant, & quibus anni mensibus *Æstas* Hyemsque incidant & vigeant, non inveni annotatum apud Scriptores, quæ ipsorum est socordia & negligentia. In uno tamén Itinerario legi, quod in una insularum, quæ jacent non procul à Viridi Promontorio (nomine Salinæ vel Hesperides) in una, inquam, illarum dicta S. Vincentii (latitudo est 16 gr.) menses pluviales, hoc est hyemis, sint Augustus, September, October, November, December, Januarius usque ad Februarium. Hocce tempus cum cælesti lege fere convenit. Etenim mensibus Majo, Junio, Julio, quia Sol admodum vicinus vel etiam verticalis illi loco fit, ideo æstatem cælestem facit, & hic terrestris convenit cum ea: namque tunc æstus majorem experiuntur & siccum aërem sine ullis pluviis. Mensibus Februario, Martio, Aprili Ver est ipsis, quia Sol à mediocri distantia ad minimam movetur, ideoque sine pluviis tunc sunt & mediocrem æstus experiuntur. Menses Augustus, September, October Autumno ascribendi propter pluvias, etsi serius debebat incipere, quia Sol in Augusto nondum à minima distantia ad mediam rediit.

rediit. Menses denique November, December, Januarius sunt hyemis, quia Sol tunc maximam habet à vertice illorum distantiam, & tunc plures magisque continuas pluvias cum aliquo frigore experiuntur: Addit tamen Scriptor ille, non singulis annis hæc ita observari, sed plerisque tantum. Quomodo autem in continenti Africæ vicinæ tempestates se habeant, non meminit, nisi quod de littore Sierra Leona subjungit contrarium ut jam dicemus.

2. Succedunt jam regiones littoris Africani, quod Austrum respicit, atque à promontorio viridi ad curvaturam Africæ, hoc est ab Occidente in Orientem se extendit. Hæ regiones dicuntur uno nomine Guinea, etsi alii vocabulum hoc unitantum parti tribuant: jacent autem in Torrida Septentrionali, duobus, tribus, quatuor & pluribus gradibus ab Æquatore. In hisce regionibus continuus quidem est sine frigore intercurrente calor æris, nihilominus quosdam menses æstati, quosdam hyemi attribuunt, (idem de priori Occidentali littore puto intelligendum esse.) Etenim in littoris, quod Sierra Leona dicitur atque novem circiter gradibus ab Æquatore versus boream renovetur, regionibus, ut etiam in plurimis Guinæ tractibus menses Martium, Aprilem, Majum, Junium, Julium ascribunt hyemi, inprimis tres illos Aprilem, Majum, Junium, propterea quod hisce mensibus frequentes & ferè continuæ cadant pluvie, calidæ vel tepidæ, tonitrua & fulgura crebra inguant, atque tantæ procellæ cum subitaneo creffere, ecnephia, typhone sæviant quanta vix quisquam concipere queat, qui non expertus est. Procellas hæc à Lusitanis vocari Travados & quomodo sæviant, diximus cap. xxi. Hisce quoque mensi-

mensibus agri inanes sine segete jacent. Sed postquam procellosi hi menses cessarunt tum demum terram siccam (utcunque enim magnas pluvias præteritorum mensium absorbet) fodiunt & carbones contusos admiscunt (loco stercorationis) ita per decem dies sinunt terram aliquantum putreficere : tunc semina injiciunt. Est autem hic tantus aëris calor junctus humiditati propter vicinum mare , ut pisces capti fæteant si dimidio die asserventur incocti. Hisce itaque locis hyems erit mense Aprili, Majo, Junio, ubi procellæ & pluvix sæviunt. Ver, Julio, Augusto, Septembri. Æstas Octobri, Novembri Decembri. Autumnus, Januarius, Februarius, Martius, ubi pluvix incipiunt & procellæ.

Hæc autem tempora tempestatum in illis locis sunt contra cælestem legem sive Solis motum. Etenim mensibus, Majo, Junio, Julio debebat ibi æstas esse ingens, quia Sol verticalis vel vertici vicinus tunc est, quod etiam pluvix calor vel tepor testatur : contra mensibus Octobri, Novembri, Decembri debebat esse hyems, quia tunc Sol circa principium & Tropicum Capricorni existens remotissimus est ab illorum locorum vertice. Hic itaque terrestrium tempestatum tempus à tempore cælestium discrepat admodum. Causa autem istarum pluviarum & procellarum atque tonitruum eo tempore cum Sol adeo vicinus est locis illis, non facilis est explicatu. Mihi videtur id fieri, quod Sol de die multos vapores ex mari & halitus sulphureos ex terra Guinæ (est enim Sulphurea & metallifera) eliciat, qui vapores noctis frigore condensati pluvias efficiant, præsertim cum in hisce locis non spiret continuus aliquis ventus, qui vapores discutere possit, sed plerunque

runque malacia hic sit exceptis procellis. Et pluviarum isti menses, quos hyemi attribuunt non sunt frigidi sed calidi quoniam nullus ventus spirat & Sol est verticalis: imo calor est suffocativus, qui hominibus angustæ sit respirationis causa.

Et si vero ager frumento sit, vacuus pluviis hisce mensibus; nihilominus tamen arbores & frutices toto anno virent & fructus ferunt.

Dies hic nostri per totum annum ferè æqualis est, Sole Oriente ad sextam matutinam & Occidente ad sextam vespertinam: sed rarissime Sol Oriens vel Occidens conspicuus ibi est, quoniam plerumque oritur reclusus nubibus ad semissem horæ, & semissem horæ antequam occidat, rursus involvit se nubibus.

Illud quoque considerationem hic meretur, cur mensibus Julio & Augusto non eadem pluvix & procellæ ibi sæviant, cum tunc Sol æquè vicinus sit illis locis ac in mense Majo & Junio. Præterea cur in insulis Hesperidum, quæ à Sierra Leona & Guinea non ita multum removentur, contrariis mensibus hyems accidat. Sed hic cælestis ratio causa est.

3. Quomodo tempora tempestatum se habeant in parte Africæ interiore vel mediterranea, quæ includitur Tropici Cancræ arcu, regionibus littoris Occidentalis & Guineæ, (dicitur autem Nigritarum terra) de eo nihil adhuc repperi annotatum: nisi quod omnia ea loca fere sterilia sint exceptis iis, quæ Nigro fluvio adjacent. Hic enim singulis annis mense Junio, Julio & Augusto exundat atque ingentem fecunditatem communicat istis agris, præterea multos lacus efficit. Reliqua loca Lybiæ confinia magno urgentur æstu, cum arenosa

noſa ſint maxima ex parte. Pluvii meſes hic non videntur obtinere eo modo quo diximus in Guinea vigere.

4. Sequuntur regiones littoris linguæ Africæ, quod à Septentrione verſus Auſtrum porrigitur atque Occidentem reſpicit: eæ regiones ſunt Manicongo, Angola, &c. à 2 gr. latitudinis borealis uſque ad Tropicum Auſtralem Capricorni ultra Equatorem. Congi autem regnum incipit à 2 gr. Auſtralis latitudinis. Hyems in his locis eſt ſimilis verni temporis conſtitutioni in Romano agro Italiæ, calor temperatus, ita ut nullâ anni parte veſtes mutant, neque vertices montium vicinorum urgentur frigore. Incipit autem hic hyems pluvioſa ferè cum noſtro vere, nempe xv Martii, duratque Aprili, Majo, Junio, Julio, Auguſto uſque ad xv Septembris. Cum hoc incipit æſtas, quæ reliquos meſes uſque ad xv Martii occupat. Æſtate hac pluviæ nullæ, vel ſaltem rariſſimæ, continua ſerenitas: ſed menſibus pluviis ſive hyeme vix dies aliquis conſpiciendum præbet Solem: adeò continuæ nubes & pluviæ aërem poſſident: Travados quoque frequentes. Pluit autem non integris diebus, ſed plerunque duabus horis ante & duabus poſt meridiem, guttæ grandes cadunt, quæ tamen ſtatim à terra ſitiente abſorbentur. Eſi itaque duas tantum in partes annum incolæ harum regionum dividant, nempe in Æſtatem & Hyemem, poſſunt tamen in quatuor diſtribui (noſtrum quoque vulgus communiter annum dividunt in Æſtatem & Hyemem, quia Ver complectuntur Æſtate, Autumnum Hyeme) nimirum Æſtati tribuimus meſes à xv Decembris, Ianuarium, Februarium uſque ad xv Martii. Veri tribuimus tempus à xv Septembris ad xv Decembris.

bris. Autumno , à xv Junii ad xv Septembris.
Hyemi à xv Martii ad xv Junii.

Hæc tempora terrestrium tempestatum cum cælesti ratione in hisce locis ferè conveniunt. Et enim à xv Martii, Aprili, Junio, Julio, Augusto ad xv Septembris Sol recedit à locis illis versùs Tropicum Cancrì, ubi remotissimus est ab illis xxv Junii , & reliquo tempore iterum accedit ita ut xxx Septembris illis fiat verticalis , & ad mediocrem distantiam versùs Tropicum Capricorni eat atque ab illo redeat mensibus Octobri, Novembri, Decembri, Januario, Febuario, ita ut in Martio iterum verticalis fiat. Itaque hosce menses æstatem experiuntur propter Solis viciniam , cujus effectus non impeditur hic à terrestri causa : & deinde reliquis mensibus à xv Martii ad xv Septembris hyemem, quia Sol tunc magis remove-
tur. Sed tempora Veris, Autumni, Æstatis, Hyemis, quæ nos assignavimus , non ita bene conveniunt cum cælesti ratione , & dubito egomet , an ita æstas & Hyems in Ver atque Autumnum distinguantur in illis locis.

Facilior itaque causa hic redditur , Cur mensibus illis à xv Martii ad xv Septembris pluvias quotidianas & aliqualem hyemem sentiant, nimirum quia Sol recedit ab illorum vertice versùs maximæ distantie locum. Sed hæc causa sola non sufficit , quia sola non potest talem effectum producere : itaque alia adjungenda est, Nimirum juga montium , quæ non procul ab hisce maritimis regionibus versùs Ortum jacent , mensibus illis pluviis continue nubibus tecti conspiciuntur , cujus causa est ventus status , qui istis mensibus ibi spirat Zephyroboreas. Sol itaque vapores elevat e mari multos: illos ventus hicce status compellit
vel

vel cogit versus juga montium (ab altera vel opposita plaga resistit ventus Euroauster Generalis) ubi condensantur & deinde in pluvias abeunt: signum quod in montibus hisce continuæ ferè pluvix & imbres (unde Nili inundatio existit aliorumque Africæ fluviorum) sæviunt præter illas nubes quas diximus conspici in illis.

Præterea sciendum pluviis istis mensibus fluvios Congi exundare in vicinos agros atque inde magnam fertilitatem illis conciliare, magnam quoque copiam aquæ in mare evomere: Fertilitate cum ipso Ægypto certat hoc regnum, atque omnia hic crescunt & adolescunt opimè & egregiè.

5. In provincia maritima Lovvango, quæ non procul à Congi distat, est enim in 4 gr. latitudinis Australis, observantur etiam pluvii menses hyemales & alii sereni æstatis: sed, quod mirandum est, menses non sunt eidem cum illis, quibus in vicino regno diximus pluvias vigere. Etenim in Lovvango vehementes & continuæ pluvix vigent mensibus Januario, Februario, Martio, Aprili; cum tamen Januario & Februario in Congi regno æstas sit, aërque serenus. Hic itaque terrestris tempestas repugnat cælesti, quia Januario & Februario non est Sol remotissimus ab illis locis, adeoque non pluvias sed siccitatem potius experiri debebant. Causa est sine dubio alius montium situs, alius ventus status, &c.

6. Insulæ S. Thomæ (in ipso Æquatore) & Annobon ($1\frac{1}{2}$ gradu ab Æquatore) sunt fertilissimæ, sacchari, frumenti, pomorum, inprimis citriorum, aurantium ingens copia.

7. Quomodo in reliqui Africani litoris Occidentalis regionibus à Lovvango ad Tropicum Capri-

Capricorni tempestatēs se habeant, nondum annotatum inveni.

8. Relicto itaque illo littore, & promontorio Bonæ spei circumnavigato redimus ad Tropicum Capricorni, ubi littus Orientale linguæ Africæ spectatur, in quo jacent Zofala, Mosambique, Quiloa usque ad Æquatorem quæ ab Oriente Sole illustrantur. In hisce locis hyems est mensibus Septembri, Octobri, Novembri, Decembri, Januario, reliquis æstas & siccitas quod tempus contrarium est illi, quo in Congo regno hyemem plurimam sentiri diximus, & tamen hæ regiones ab eadem jacent Æquatoris parte. Sed juga montium, quæ procurrentem hanc linguam Africæ bifecant in terram Orientalem & Occidentalem, sine dubio causa sunt hujus diversitatis. Terra harum regionum mediocris tantum est fertilitatis, multis locis arenosa & sterilis, insignique calore duritur, sed fluvii & adjacens mare, ventusque generalis Orientalis temperant æstum.

9. Reliquæ regiones Africani Orientalis littoris ab Æquatore versus boream jacentes ad fauces Arabici sinus & hinc ad littus ipsius sinus usque ad Tropicum Cancræ, hæ inquam regiones, quales, tempestatēs & quibus anni temporibus experiantur, nondum annotatum inveni, nisi quod arenosum & sterilem hunc tractum esse quidam scribant atque ingenti ideo æstu premi (nota est Arabia Troglodyticæ sterilitas & æstus). Accedit, quod nullis ferè fluviis irrigatur: sed expecto accuratiores annotationes.

10. Sed qualis tempestas in mediterranea Africæ parte, quæ Abassinorum est? Hæc enim media ere ab Æquatore secatur, ita ut aliquas provincias

cias in Torrida Australi, aliquas easque plurimas in Torrida Septentrionali habeat.

11. *Relictam Africa*, ingredimur Asiæ regiones in Zona Torrida jacentes, ubi primò se offerunt Arabiæ regiones mari rubro adjacentes à Mecca ad Aden (12 gr. ab Aequatore versus Boream) quæ Occidentem respiciunt, ab Oriente habent Arabiæ montana. Hæ maximo urgentur aestu tum in Martio & Aprili mense & sequentibus magis, dum Sol ad illorum verticem accedit & circa illum mense Majo, Junio, Julio & Augusto commoratur. Aestus tantus, ut incolæ ditiores in primis frigidam continuè de die corpori suo instillare vel affundere curent, vel etiam in vasibus aquâ plenis jaceant. Mercatores in Aden nocte conveniunt & Mercaturam exercent, quæ tamen hic satis calida est. Causam esse puto defectum vaporum aqueorum, quia à parte Orientali petrosa est regio, fluvii paucissimi & exigui, ventus autem Orientalis, qui generalis est, etsi ibi non ita sentiatur, repellit vapores ex mari rubro assurgentes. Adde copiosam arenam, quæ colorem conceptum nocte retinet & aëri communicat.

Convenit itaque hic Aestatis Hyemisque tempus cum cælesti ratione.

12. Eadem est ratio totius Arabiæ & Orientalis ejus littoris.

13. In Cambaja Indiæ quæ in ipso Tropico Canceri jacer, ut etiam in Malabarici littoris seu Orientalis Indiæ regionibus, quæ Occidentem spectant atque à Septentrione versus Austrum à 8 gr. latitud. Septentrionalis se extendunt, in hieme, inquam, regionibus, hyems sive pluvialis tempestas occupat menses Junium, Julium, Augustum, Septembrem, sed in primis à medio Junii

ad medium Septembrem. Neque vero in omnibus hisce locis æquali tempore pluit, sed magis continue in Goana & Cocinenſi provincia, minus continue in Cambaja (ubi tantum tribus mensibus pluit). In reliquis octo mensibus rarissime pluit in Cambaja, in Goa vero mense Aprili & Maio pluviae sed minus vehementes incipiunt cum tonitru & procellis: ita ut Autumno hic possint ascribi mensis Martii semissis, Aprilis & Majus ad xv Junii: deinde à xv Junii & Julius atque Augustus usque ad xv Septembris Hyemi: deinde à xv Septembris ad Decembrem Ver, reliqui à xv Decembris ad xv Martii æstati. Etenim hisce mensibus magna est siccitas, quia aqua pluviarum priorum à Sole tunc extracta est à terra. Incolæ tamen non numerant quatuor tempestates sed tantum duas; æstatem & Hyemem, vel potius siccam & pluvialem tempestatem. Nam hyems juxta nostram notionem frigoris non convenit illis locis, sed propriè tamen, quia hyems à pluviis dicitur.

Præter pluvias hæc, frequentes in littore sunt procellæ, tonitrua illis pluvialibus mensibus ita ut mare tunc clausum censeatur, fluvii quoque multi exundant illo tempore. Septembri mense mare aperitur, & tunc naves à Malabarico littore solvere solent in varias mundi partes. Neque pluvia hisce locis sæva est (exceptis procellis) in agris, sed quia multis diei horis cessat, ideo incolis concedit tempus ferendi & plantandi. Hisce enim pluvialibus mensibus incolæ agris semina injiciunt, contra quam in Guinea fieri supra diximus. Aër quoque eo tempore moderati teporis, quia Sol nubibus tegitur, ita ut incolæ remotiores à littore exspatientur animi causa in colles & agros (ubi exundatio non est). Magna & incredibilis

à pluvia illa fertilitas terræ conciliatur. Si quando pluvix hæc in anno aliquo non cadant (quod rarissime accidit, ut anno 1630) omnis sementi & messis spes sublata est: inde annonæ caritas, aër æstuosus, febres ardentes, pestilentes, & myriadum hominum interitus. Anno 1630 & sequenti, caro humana publicè divendita fuit in quorundam urbium Cambajæ macellis. Interdum vero adeo sæviunt imbres ut domus (quæ leviter ædificatæ sunt) corruant, fluvii exundatione nimia alias tollant.

Sementum faciunt Majo & Junii initio, mensem Novembri & Decembri. Aliter in Guinea.

Æstas hæc atque Hyems horum locorum est contra cælestem legem sive Solis motum. Etenim mense Julio & Augusto Sol illis locis verticalis est vel admodum vicinus vertici, ideoque æstum ingentem & siccitatem aëris debebant experiri. Magna est hæc illorum locorum felicitas: quippe si pluvix hæc non caderent, nubesque Solem obtegerent, ingens ille Solis æstus arenosum redderet solum atque sterile sicut Arabiam, Lybiamque ubi hæc pluvix non adsunt Sole vertici vicino existente. Contra, mense Decembri, Januario, Februario Hyemem debebant agere vel pluvias minoremque calorem sentire, quia tunc Sol maxime removeretur ab illis: atqui tunc Æstatem experiuntur. Noctu tamen aër satis frigidus est: præterea ventus continuus à xii diei ad xii ferè noctis spirat è mari, qui admodum gratus est.

14. In Orientali Indiæ littore quod Coromandelium vocant, tempestates etiam à cælo dissentiant. Etenim mense Martio, Aprili, Majo & Junio ingentes ibi æstus Sol excitat, pluvix nullæ. Distribuant autem incolæ, qui Saraceni sunt magna

igna ex parte, annum in tres tempestates, nempe in Fervidam, Pluvialem & Frigidam. Ferrida sive æstas viget, ut dixi, mensibus Martio, Aprili, Majo Junio. Præcipuus & intolerabilis æstus à medio Majo ad medium Junium, ventus à Septentrione spirat, ad quem si faciem convertas, tantum aëris fervorem senties, ac si candenti camino appropinques. Sol enim in illa pſaga tunc versatur in meridie. Ligna quoque & lapides constantem arque magnum concipiunt fervorem: aqua tamen puteorum frigidissima est, ut multi præ magno æstu illam bibentes moriantur.

Maximus dici calor inter horam nonam ante meridiem usque ad tertiam post meridiem: hisce intermediis horis ab itinere quiescendum est; reliquis horis nempe ante nonam matutinam & post tertiam pomeridianam aër temperatus saltem tolerabilis, serenus & gratissimus existit, iter jucundum, cælum lætum.

Pluvialis tempestas quatuor menses occupat, Julium, Augustum, Septembrem & Octobrem. Frigida Novembrem, Decembrem, Januarium atque Februarium: in Decembri & Januario frigus, præsertim noctis, sensibile satis est.

Multa hic sunt, quæ causarum investigationem merentur. Etenim mensibus Martio, Aprili, Majo, Junio Sol accedit ad illa loca Coromandelii littoris atque verticalis illis fit, ideo nil mirum si æstum experiuntur maximum: sed cur non eundem æstum experiuntur Julio & Augusto, cum hisce mensibus æquè vicinus illis sit & propter priorem æstum jam major esse debeat. Præterea cur ita dissentiunt horum locorum littoris Coromandelii tempestates à Mabarici littoris tempestatibus, cum in eodem Climate jaceant & eisdem

diebus Solem verticalem, eisdem remotum habeant? Et, quod magis mireris, intercedit inter hasce regiones alicubi tantum septuaginta, alicubi viginti tantum milliarium intervallum: ita ut ex loco sereni & fervidi aëris pervenire possis in regionem, ubi pluvialis hyems sæviat, unius diei itinere. Maffeus ita loquitur de hisce locis: In iis regionibus cum alia multa admiranda, tum illud inprimis omnium Physicorum ingenium superat, quod in eadem cæli plaga, pari solis accessu recessuque, iisdem anni mensibus ab ortu trans Gatis juga, (quæ recto ad Cori promontorium excursu totam Malabaris longitudinem interfecant) æstas ac siccitas, ab occasu cis Gatem hyems & assiduæ pluvix sunt: ut in tanta locorum propinquitate, quod ad rationem tempestatum attinet, iidem pene populi sibi mutuo Antipodes videantur esse. Hæc Maffeus. Sed non in solis hisce locis, verum in aliis quoque hanc diversitatem inveniri jam antea docuimus, & in sequentibus dicemus. Causa autem est situs jugi montium, quod Coromandeliam terram à Malabarica determinat, progrediens à Septentrione versus Austrum. Huic causæ adjungendi sunt statim & diversi venti. Etenim in Coromandelio littore ventus generalis Orientalis magis sentitur (exceptis mensibus Æstatis Majo, Junio) qui vapores versus juga montium pellit, unde in Malabaricam terram pluvix. Juga hæc mensibus pluvialibus continuè nubibus tecta conspiciuntur, in illis quoque vehementiores imbres, ubi in Malabarico pluvix: sed cum in Coromandelia regione pluvix sunt, tunc in jugis montium sicut in ipsa Malabarica terra serenitas (exceptis mensibus, Julio, Augusto). Hisce enim in utraque terra pluvix existunt.

15. In regionibus Gangetici maris, quæ oppo-
nuntur Coromandelio littori & ibidem in Septen-
trionali Torrida jacent, ut Siam, Begu, Chersone-
sus Malaccensis, pluviales menses, quibus etiam
fluvii exundant, sunt September, October, No-
vember. Verum in Malaccensi agro pluit singulis
anni hebdomadibus bis vel ter, exceptis mensibus
Januario Februario & Martio, quibus continua
siccitas. Hæc omnia contra cælestem rationem
sunt, & causa eorum in montibus, ventis statis,
adjacenti mari atque aliis quærenda est: quia ta-
men nondum accuratas habemus de illis regioni-
bus observationes, nolumus hic ea excutere. Fer-
tilitatis autem harum regionum causa est præci-
pua, Exundatio fluviorum, æstum temperant va-
pores vicini maris & fluviorum, venti statim: un-
de jucundissimæ hic habitationes, uberrimus om-
nium fructuum proventus. In regno Patanæ &
vicinis Æstas incipit cum Februario, & ad finem
Octobris durat, quo tempore continuus calor,
quia continuo Orientali vento temperatur. Aër
salubris. Novembri, Decembri & Januario con-
tinuæ pluviae, quæ tamen non impediunt, quo-
minus singulis mensibus novo gaudeant fructu.
Idem de Cambaja intelligendum est. Hæc autem
Hyems cum cælesti ratione convenit.

16. Relictâ Asia, transnavigato Mari Pacifico
ingredimur Americæ partem in Zona Torrida ja-
centem, quæ duplex est Australis & Septentrio-
nalis. Australis iterum duplex Peruviana & Bra-
silia. Peruvianæ partes etsi vicinæ sint, contrarii
tamen tempestatibus eodem tempore fruuntur.
Etenim Peruviana regio dividitur in tres partes,
Littoralem seu Maritimam, Montanam, & pla-
nam post montanam, quæ in eodem Climate ja-
cent.

cent. In montanis locis hyemem pluvialem experiuntur à mense Octobri usque ad Martii finem, cum æstatem deberent sentire ex Solis vicina. Æstatem autem habent ab Aprili ad Octobrem, quibus mensibus nullæ cadunt ibi pluvix: in hyemalibus vero mensibus continuæ. Terrestris itaque tempestates à cælestibus hic discrepant. In littorali sive maritima Peruvia hyems fere nulla toto anno. Etenim nunquam in hisce locis pluit toto anno: sed à mense Aprili ad Octobrem censetur hyemis tempus (quod cum cælesti causa congruit, quia tunc Sol ab illis removetur ad Tropicum Cancræ atque inde redit) propterea quod hisce mensibus non quidem pluat, sed singulis fere diebus aër sit nebulosus & Solem tegat, densæque nubes ita conspiciantur ac si mox pluvia affutura esset, quæ tamen non sequitur, sed ros tantum vel psecas (*Stoff-regen*) idque inprimis tribus mensibus Junio, Julio & Augusto, singulis diebus ante meridiem: non tamen nebula insalubris est, sed in rorem densata & decedens irrigat valles. In montanis hocce tempore non pluit, sed serena est tempestas. Peruvia hæc littoralis distinguitur in valles & arenosa, loca. Valles sunt fertilissimæ, arenosa, quæ inter singulas valles intercedunt, sterilia. In adjacentibus quoque insulis nunquam pluit, sed ros tantum decedit.

In insula vero Gorgon, quæ tribus gradibus ab Æquatore versus Austrum removetur, pluit octo mensibus continuè fere cum tanto tonitru & procellis, ut cælum terræ misceri dicas. Majo, Junio, Julio, Augusto Æstas est & siccitas, contra cælestem rationem.

In quibusdam hujus partis Torridæ Zonæ locis frigus insigne est. Etenim in provincia Pastoa Popajanæ

pajanæ regionis in valle Atrifina tam æstate quam hyeme frigida valde est tempestas ut ideo fruges non crescant. In Cusco urbis agro, qui medius fere est inter Tropicum Capricorni & Aequatorem, gelu non debile & nives quoque deprehenduntur.

Ex quibus colligitur, Peruviam nullo insigni æstu torreri, sed potius temperato aëre per totum annum frui, exceptis arenosis ejus locis & collibus. Valles verò fertilissimæ & jucundissimæ arborum atque frugum proventu conspiciuntur. Aquam accipiunt hyeme ex rore quem dixi decidere singulis diebus. In æstate vero à torrentibus qui à montanis locis devolvuntur, & ruunt, quoniam in montanis tunc hyems & continui imbres sunt. Atque ex torrentibus hisce incolæ per certos ductus aquam deducunt ad valles suas. Namque nulli fontes ibi reperiuntur. Quædam tamen valles solo rore sunt contentæ & optimè producunt fructus.

Causa hujus diversitatis inter Peruviæ planæ & montanæ tempestates, & cur in plana Peruvia nunquam pluat, difficilem habet explicationem. Etenim montana hæc vicina sunt adeo planæ maritimæ Peruviæ, ut mane descendens aliquis ex illis pluviis & imbribus sævientibus, vesperi in planam Peruviam pervenire possit, ubi nulla unquam pluvia. Sed aër serenus est. Causa duplex esse videtur. 1. Juga illa montium. 2. Ventus Austro-Zephyrus, qui proprius & perpetuus est Peruviæ. Hic enim ventus compellit vapores versus montana, ubi condensantur vel saltem discutiendo prohibet, ne in plana Peruvia possint nubes in guttas densari atque decidere. In montana vero loca attrahuntur eo modo, quo explicavimus capite de Montibus.

Habet itaque hoc Peruvia cum Ægypto & aliis nonnullis locis commune, quod venti Austrini non sunt pluviosi & tepidi, sed potius serenantes aërem, etsi in omnibus Austrum versus ab Æquatore jacentibus locis idem locum habere videatur.

17. Americæ Australis pars, quæ Brasilia dicitur atque Orientem respicit, à 2 gr. latitudinis Australis ad 24 gr. extenditur, jucunda atque salubri adeo temperie aëris excellit, ut nulli regioni Telluris cedat. De hujus tempestatibus ita refert Piso in suo de Medicina Brasiliensi libro: Habitata ejus (Brasiliæ) frons blandum & benignum subsolanum ab auris matutinis natum continenter recipit (*imò ventus ille generalis esse videtur, non status subsolanus*) qui homines cæteraque animantia demulcet, & ab intolerabili solis verticalis æstu vindicat. Qui, si mare accedat, summo quidem mane, si recedit, adultiori aurora persentiscitur. Nec languescit circa vesperam, sicut solet multis Indiarum locis, sed intenditur adeo à comitante Sole, ut ultra medias noctis horas non raro vigeat, condensatioque aëris nocturna nequeat dilatationem & motum illum naturalem Aëris facile hebetare aut vincere.

Alterum verò latus (quod à Peruano regno celssissima montium juga & immensa disterminant spacia) Zephyrus licet insaluber, mediterraneusque ventus, propter infinitos quos perflat paludosos lacus, serâ nocte infestet, tamen à montibus mari vicinis perpetuo coërcetur, adeoque ab aura matutina pellitur, ut ad littora usque vix queat penetrare.

Quemadmodum jucundissimis ac constantissimis his anni tempestatibus haud magnæ mutationes, ita diurnis & nocturnis evidentiores contingunt,

gunt, quod dies & noctes non magis pares sint spatiiis, quam differentes calore & frigore. Nam Sol altius ascendens, postquam terrarum & hominum poros aperuit, profundius & pari intervallo se occultit, unde condensatio aëris major extremam partem noctis magis rorifluum efficit. Hinc rigidum & penetrans frigus à tertia hora nocturna circa gallicinium ad exortum usque Solis corpora ferit, ita ut hanc terram recens ingressis molestum, summeque noxium esse soleat: quod qui non evitat, haud facile vitam beatam in hisce vel aliis Indiarum oris exordietur. Cujus rei non ignari Brasiliiani focum perennem in tuguriis juxta lectos pensiles alunt; ejusque beneficio nocturnum frigus tolerare & venenata insecta arcere queunt.

Porro rectus ascensus Solis & descensus brevissima facit crepuscula noctesque adeo diebus pares, ut ne quidem unius, horæ discrimen agnoscant.

Noctibus æstivis frigus intensius: hybernis, quod mireris, mitius sæpe persentiscitur, aëre scilicet tranquillo & nubibus undiquaque pressio pluvias moliente.

Pluvialis temporis initium fit mense Martio vel Aprili, Augusto finitur, quo Sol redux ex Cancro materiam pluviae ex parte dissolvit in ventos. Unde procellae & turbines subinde nascuntur, quas mox vernum tempus excipit, easque blandissime componit. Nullam circa anni tempestates mutationem bis accedente & retrocedente Sole, ut multi existimarunt, Tropicorum incolae agnoscunt (atqui nos in praecedentibus contrarium probavimus exemplis, imo ipsius Brasiliae tempora repugnant) sed solummodo abeun-

te ab *Æquatore* ad *Tropicum Cancrī* vel *Capricorni*.

Duo tantum dantur anni tempora, quorum unum calidum & siccum, æstas dicitur: alterum calidum & humidum æstati Europææ simile Brumæ vicem supplet, (atqui ipse autor verni temporis modo jam meminit in præcedentibus verbis) idque in omnibus Indiis intra utrunque Tropicum verissimum deprehenditur. Licet enim hyberni & æstivi temporis finis & initium, ob particularia incidentia loci, tum & *Æquatoris* majorem vel minorem vicinitatem non in idem incidunt, plerunque tamen Annus sex circiter mensibus ad humidum & toridem ad siccum vergentibus absolvitur. Et quidem ea ratione, ut in multis Africæ ac Asiæ, ejusdem nobiscum latitudinis oris, maxima exinde intensio & remissio æstus, hic nulla vel saltem exigua percipitur, sole licet Brasiliensium Zenith mense Octobri & Februario transeunte, radiisque secundum angulos acutissimos reflexis terram feriente.

Quæ diversitas istarum regionum incolis ob crebras malacias, noxiosque tepores interitum, hisce ob dominatricem auram, salutem promittit perpetuam.

Unde facile est colligere, Anni tempestates non tam immediatè à Sole, ejusque motu, quam ipsa ventorum specie, astrorum aspectus diversitate, regionisque qualitate & situ peculiari discerni debere.

Quin in locis hisce mediterraneis paulo versus Occidentem noctes sunt frigidiores quam in maritimis, usque adeo ut aliquando pruina capillos quibusdam riguisse constet.

Eisdem anni mensibus ab Ortū circa Oceanum æstas

æstas & siccitas, ab Occasu trans juga montium & paludes Brasiliæ, hyems nebulæ & pluvix. (Littori verò Brasiliæ nullæ objacent insulæ).

Cælum sæpe quidem nubibus ex Oriente versus Occidentem latis obductum videas, sed rarissimis & tenuissimis, ex captis diebus pluviis. Sol oriens & occidens immotis oculis aspici potest. Mira enim undique serenitas est, præsertim circa vesperam, quæ nullos unquam succedenti Lunæ tradit vapores vel nebulas, sed noctes reddit adeo claras, ut vetus & novilunium uno eodemque die conspiciantur, litteræque ad quadrantem Lunæ commodè legi possint.

Æther pro diversitate adspæctuum Planetarum, accedentibus causis inferioribus suas recipit intemperies. Crebris fulguribus absque tonitru cælum sub vesperam coruscat, tempestate vel maxime serena, sed sicca.

Pluviarum guttæ admodum sunt magnæ, grævique decidunt impetu, quas suffocativus aliquando tepor præcedere vel sequi solet.

Ros hic Europæo tum pinguior, & nitro multo imprægnatus sæcundior, tum multo penetrantior & tenuior, præcipuè æstate existit: quod patet in omni metallo & ferro imprimis (ut materias minus solidas præteream) quas absque ullo nubium adminiculo faciliè exedit.

Prata & aprici campi minus æstate, sed mensibus potissimum pluviis (licet solum tunc habitantibus tristius videatur) latissime virescunt, locaque messëm negantia pabulis vigent. Hæc ex Pione desumpta sunt, quibus ad judicium rectius formandum adjungo ea, quæ ex aliis autoribus desumpti: Solum omne Brasiliæ assurgit in colles mediocres & amanos: montes insigni aliqua altitudi-

dine nulli sunt in littoralibus, in solitudinibus tamen hinc inde nonnulli è longinquo conspiciuntur. Inter colles aridos, non ubique tamen, sed aliquot milliarium intervallo valles interjacent, singulae exiguis aliquibus fluviolis irriguae, atque ob id non pluviis tantum mensibus, sed & æstivis ipsis fertiles. Colles ipsis æstivis mensibus ob ardorem Solis sunt infrugiferi & penitus arescunt, ut non gramentantum, sed & arbores interdum emoriantur. Raro per totum diem & noctem pluit, rarissimè per aliquot dies continuos sine intermissione. Menses pluviales aliquantum variant. Anno 1640 (ut observavit Marcgravius) menses pluvii fuerunt Septem, Februarius, Martius, Aprilis, Majus, Junius, Julius, Augustus, maximè autem & pene continuo Majus & Julius. Anno 1641 menses iidem septem pluvii, sed maximè & pene continuo, Aprilis, Majus & Julius. Anno 1642 menses maximè pluvii sex fuere, Martius, Aprilis, Majus, Junius, Julius & Augustus. Reliquorum annorum non multum dissimilis fuit ratio. Hæ autem observationes tantum de uno loco, (non de omnibus Brasiliæ locis) accipienda sunt, nempe Pernambucca Præfectura, quæ octo circiter gradibus ab Æquatore distant. Namque non omnibus locis eidem menses æquè pluvii, neq; omnibus idem initium vel finis idem.

Ex hisce patet, Hyemem atque Æstatem Brasiliæ aliquomodo cælesti legi respondere, cum in maxima Solis distantia pluvias experiantur, in minimâ & mediocri versus Austrum fervorem, occurrunt tamen non pauca irregularia, quorum causa ex terræ situ ventorumque ratione petenda est.

18. Satis de America Australi: in Septentrionali aliter se habet. Etenim in Nicaragua provin-

cia ampla, cujus medium decem gradibus remouetur ab *Æquatore* versus *Septentrionem*, pluit integris sex mensibus, Majo, Junio, Julio, Augusto, Septembri, Octobri: reliquis mensibus æstus & siccitas, ut nocte iter facere debeant. Hæc autem contra cælestem legem, quippe, Majo, Junio, &c. Sol hisce locis verticalis vel vertici vicinus existit, itaque tunc æstum debebant & siccitatem non pluvias experiri: in Novembri Decembri maxime distat: itaque tunc hyems pluviis debebat favere.

Montes ad S. Martham (undecim gradibus ab *Æquatore* versus *Septentrionem* distat) nive plerunque teguntur.

Sic itaque totius *Zonæ Torridæ* præcipuorum locorum tempestates enarravimus, ex quibus inter se invicem collatis hæc colligimus. 1. In quibusdam locis vix sensile frigus aliquâ anni parte sentiri, adeoque Hyemem pluviis potius, quam frigore in illis locis definiri. 2. In quibusdam locis frigus satis sensile vigere. 3. Nocturno tempore, præcipue ultima vigilia aërem gelidum sentiri propter Solis infra Horizontem depressionem. 4. Non minimam causam tolerabilis æstus & quod habitabiles sint regiones illæ, esse hanc, quod dies nulli ibi longi sunt, sed omnes fere noctibus æquales. Erenim si dies ibi tam longi essent Sole supra Horizontem commorante ac in Temperatarum & Frigidarum Zonarum locis, tum demum procul dubio inhabitabiles vel difficulter habitabiles forent. 5. Ventos multum imminuere æstum Solis. 6. Loca diversis temporibus experiri Æstatem atque Hyemem, etsi in eodem Climate jaceant, imò sibi invicem valde vicina sint. 7. Loca illa, quæ contra Solaris accessus vel

recessus rationem experiuntur siccitatem atque humiditatem, sive Æstatem & Hyemem, ita sita esse ut ab Oriente juga montium habeant, & ipsa Occidentem respiciant. Peruvia hic excipitur. 8. Nullam certam regulam tempestates in Zonæ Torridæ diversis locis observare. 9. Etsi plerique incolæ Torridæ Zonæ duas tantum in tempestates annum dividant, & plurimi Scriptores idem observent, nempe siccam & pluvialem, posse tamen non incommodè in quatuor dividi, ut non tantum Æstas & Hyems, sed etiam Ver & Autumnus constituantur. Sicut enim in nostris locis Ver accedit ad Æstatis naturam, Autumnus ad Hyemis, ita quoque sicca tempestas locorum Zonæ Torridæ dividi potest. 10. In quibusdam locis continuum esse messëm, in quibusdam duabus tantum anni partibus, in aliis unâ tantum anni parte.

PROPOSITIO XII.

Quomodo tempestates, Ver, Æstas, Autumnus & Hyems in locis Zonarum Temperatarum fiant & se habeant, explicare.

1. In hisce locis Causa illa, quam primo loco posuimus inter causas tempestatum Propositione prima hujus capituli, (Solis nempe accessus & recessus versus loca.) ita potens est respectu reliquarum causarum, ut ipsa sola fere constituat & moderetur illas. Nimirum in Zonæ Temperatæ Septentrionalis regionibus Ver & Æstas est Sol ab Ariete per Cancrum gradiente ad Libram, quia tunc propior illis est: deinde Sole à Libra per Capricornum redeunte ad Arietem Autumnus atque Hyems. In Temperata Australi contrariò modo se res habet. Neque causæ illæ reliquæ, primæ istius vires omnino tollere & contrariam inducere tempestates.

pestatum rationem vel tempora transponere valent, ut in Torrida Zona.

2. Variant tamen ea diverforum locorum tempestates, ita ut in uno loco sit major calor, vel frigus vel pluvia quam in alio loco, etsi in eodem Climate loca jaceant. (Sed non efficiunt ut Hyems in Æstatem & Æstas in Hyemis tempus transeat) nempe terra petrosa, paludosa, maritima alium aliquantò gradum caloris vel frigoris experitur, quam valles, argillacea terra, mediterranea, &c.

3. Loca Tropicis vicina pleraque in Æstate ingentem æstum sentiunt, quædam pluvialem tempestatem, ita ut ad locorum Torridæ Zonæ naturam fere accedant. Sic in regni Guzaratensis parte extra Tropicum jacente eidem fere pluvii menses & sicci observantur, qui in parte ultra Tropicum jacente, atque æstas mutatur in pluviam tempestatem. Nihilominus major tunc calor est (ut Solis vicinia postulat) quam in sicca parte anni, ubi mediocri frigore sentiunt: & vero in Temperatarum Zonarum locis Æstatem & Hyemem non ex siccitate vel pluviis sed calore & frigore judicamus.

In littoribus verò Persiæ & Ormus tantus æstus sine pluviis in æstate propter Solis viciniam, ut nocte in vannis aquâ plenâ somnum capiant tam viri quam uxores. Non minor calor in Arabia.

Per totam fere Barbariam (regiones Africæ ad mare mediterraneum ita appellantur) medio Octobri transacto occipiunt imbres atque frigus intrudescere, ut refert Leo Africanus: Decembri autem atque Januario (quod ubique fere accidit) frigus intentius aliquantulum percipitur: verum hoc mane duntaxat, idque adeo remisse, ut nemo ignem magnopere curet. Februarius Hyemi bonam

nam frigoris partem adimit, sed inconstans adeo, ut quinque interdum aut sexies uno die incidat auræ mutatio. Martio mense, summo impetu flant Boreas atque Zephyri, efficiuntque ut totæ arbores floribus vestiantur. Aprilis omnibus propemodum fructibus dat formam, ita ut Maji initium ac Aprilis exitus natura soleat dare cerasa. Medio Majo ficus ex arbore colligunt, medioque Junio uvas quibusdam locis maturas invenire licet. Autumni ficus, Augusto maturi decerpuntur, nulla tamen major ficuum atque malorum persicorum copia, quam in Septembri.

Nulla illis tanta anni intemperies, quin tres illos Veris menses semper temperatos habeant: Veris autem initium (*non caeleste sed terrestre hoc est*) ad decimum quintum Februarii diem constituunt, finem verò decimo octavo Maji annumerant, quo toto tempore aura illis perpetuo gratissima. Quod si à vigesimo quinto Aprilis usque ad quintum Maji nulla iis obtingat pluvia, sinistri quippiam ominis exinde colligere volunt. Æstatem computant ad decimum sextum usque Augusti, quo tempore cælo utuntur calidissimo atque serenissimo. Autumnum à decima septima Augusti usque in decimum sextum Novembris diem collocant, habentque duobus illis mensibus, Augusto videlicet atque Septembri non tam ingentem. Id tamen tempus, quod inter xv Augusti ac xv Septembris includitur, ab antiquis totius anni furnum appellari consuevit, eò quod ficus mala coronæ atque id generis fructus ad maturitatem perducere solet. A decimo quinto Novembris die principium hyemis numerant, quam in decimum quartum Februarii diem protrahi volunt. Ad hujus initium eam arare terram incipiunt, quæ in planicie

planicie est: in montibus verò Octobri mense agriculturam exercent. Certissimùm sibi Africani persuasum habent, annum quadraginta dies habere calidissimos, quos à duodecimo Junii initium sumere volunt, contraque totidem frigidissimos, quos à duodecimo Decembris die inchoare dicunt. Equinoctia ad decimum sextum Martii & xvi Septembris, Solstitia verò ad xvi Junii & xvi Decembris diem constituunt. Autumni finis, tota Hyems, bonaque Veris pars impetuosis plena ventis, quin & grandinibus, fulguribus, fulminibusque horridis discruciantur: neque deest multis Barbariæ locis nix copiosa. Maxime infestantur segetes à nive, idque præsertim, si nix interdum cadere incipiat, cum seges floribus ornatur.

In Atlante monte (distat septem gradibus à Tropico Cancrì) dividunt annum tantum in duas partes. Nam ab Octobri usque ad Aprilem continua illis Hyems est, & ab Aprili rursus in Octobrem Æstatem id tempus nominant (sicut nostrum vulgus) nullus verò datur dies, quo non montium summitates multa nive niteant.

In Numidia velocissime fluunt anni partes. Major enim mense frumentum colligunt, Octobri datylos: à medio autem Septembri frigus ingens in Januarium usque durat.

Octobri à pluviis abstinente, omnis agricolæ ferendi spes adimitur: idem evenit, si Aprilis pluvialem secum non adferat aquam. Multos nivosos montes commemorat Leo in Africa esse non procul à Tropico Cancrì.

Borealis pars Chinæ etsi non sit remotior ab Æquatore, quam Italia (namque à 30 gr. latitudinis ad 42 gr. se extendit) tamen frigus haud paulo acrius videtur, inquit Trigautius. Nam & flumina

flumina permagna, lacusque gelu concresecunt, cujus causa nondum satis explorata, nisi eam in Tartariæ nivales montes non remotos referamus: ad quæ frigora propulsanda, non infimis vulpium & Scythicarum mustelarum pellibus abundant.

Nova Albion etsi in 42 gr. latitudinis Borealis jaceat, adeoque non remotior sit ab Æquatore, quam Italia, tamen mense Junio adeo frigido urgebatur aëre, cum Draco Anglus istuc appelleret, ut hic versus Austrum remeare coactus sit, montes adhuc tum nive tecti erant. Causa est frigida terræ constitutio, petrosa nempe.

In Ægypto, quæ Tropico Cancrī terminatur, (ut Prosper Alpinus narrat l. i. de Medic Ægypt.) Ver atque anni tempus temperatum observatur Januario atque Februario. Æstas incipit cum Martio & Aprili duratque Junio, Julio usque ad Augusti finem: Autumnus Septembrem & Octobrem tenet. Hyems Novembri & Decembri absolvitur. Sub Aprilis initium segetes succidunt, succisas confestim triturant, post vicesimum Maji nulla arista amplius in agris, nullus fructus in arboribus. Idibus Junii incipit inundatio Nili.

In freto Magellanico & adjacentibus regionibus, etsi non magis ab Æquatore distent quam nostra loca (sub 5 gr. 52 gr. latitud. australis) tamen æstatem non admodum calidam experiuntur, ita ut Belgæ mense Januario (qui ibi esse debebat ferventissimæ æstatis) glaciæ frustum in sinu quodam freti invenerint, in montibus adjacentis litoris totâ æstate nives conspiciuntur. Et in omnibus fere Zonæ Temperatæ Australis regionibus observatum est, quod longe intensius hyeme frigus & pluviarum impetum, æstate autem minorem calorem sentiant, quam Zonæ nostræ Temperatæ Septen-

Septentrionalis provinciæ. An hujus rei causa sit, quod Sol in Septentrionalis Zodiaci semicirculo diutius hæreat & tardius progrediatur, quam in Australi, dubito.

In vicinia urbis Peruvix, quam vocant la valla Imperial in Provincia Potosi frigus magnum adeo apprehenditur, ut ad quatuor milliarium circuitum nihil ibi crescat.

In regno Chili, quod à 30 gr. latitudinis Australis ad 50 gr. se extendit, Ver sumit exordium à mense Augusto (citius, quam cælestis ratio patitur) & desinit in medium Novembrem: & à medietate Novembris æstas incipit usque ad medium Februarii, à quo Autumnus ducitur usque ad medium Majum, quem incipit hyems, quæ admodum nimbofa est & spoliat arbores foliis, & cum vehementi gelu spargit altam nivem, quæ tamen à Sole dissolvitur, nisi quod raro, Sole non comparente, ad aliquot dies durat. Rarò autem nives accidunt vallibus. Nam licet copiosissimæ sint, & in tantum aggerentur, ut ad cacumina montium ascendant, & cum iis exæquentur, & in aperturis montium veluti in puteis coacerventur, & pene toto anno durent, ibidem dissolutæ influant fluvios & torrentes, qui per valles cum magno impetu decurrunt usque in mare, & terras mirum in modum faciunt. Verum licet hic non ningat, nisi rarò in planicie, frigus facit tamen tam excessivum, ut in multis Europæ partibus vix tantum sentiatur, quod accidit partim ab altitudine poli, partim à vicinitate montium, è quibus descendunt venti subtiles & penetrantes, qui nonnunquam sunt insupportabiles. Vnde fit ut loca maritima sint magis temperata.

Alias tempestatum differentias regionum in eodem

dem Climate vel vicinis Climatibus istarum studiosus harum rerum ipse colligit è Scriptoribus, ex.gr. quod in Anglia aër minus frigidus est quam in Belgio & Germania, ita ut armenta hyeme non includantur stabulis. Inter Siberiam & Tartariam loco non procul à Zona Frigida sito in fine Temperatæ nostræ Zonæ ager latus & amœna pascua esse dicuntur, frigus nullum fere, cum hyemem vix sentiant, ubi ædificata est iussu Mosci urbs dicta Toorn, quæ hodie ita accrevit, ut Tartarorum insultus repellere valeat.

In Japonia (quæ à 31 gr. ad 39 latitud. Septentrionalis extenditur) Hyems frigida, nivosa, pluviosa, cum tamen aliæ regiones Europæ & Asiæ in eodem Climate jacentes minorem longè hyemis inclementiam sentiant. Causa est, quoniam Japonia ex multis insulis parvo Euripo disjunctis constat & in medio Oceano jacet.

In Armenia & vicinis locis ingens Aestate calor, quoniam inter montes hinc inde agris immistos jacet: unde ditiores alicubi æstate se conferunt in montium fastigia, atque aliquot menses ibi manent, minus opulenti die quidem in eisdem montibus se defendunt ab æstu, circa vespæram tamen descendunt.

PROPOSITIO XIII.

Quomodo in locis Zonarum Frigidarum, quatuor anni tempestates, Ver, Aestas, Autumnus & Hyems cum ipsa luce se habeant, explicare.

Causæ tempestatum illarum & luminis propositæ in initio hujus Capituli ita se habent in Zona Frigida.

1. Solis centrum aliquot diebus vel mensibus, (prout locus polo propior vel ab eo remotior) non

non oritur supra Horizontem, & totidem diebus non occidit.

2. Illis diebus, quando supra Horizontem est, radiis tantum obliquis loca illa illustrat, quia non admodum elevatur supra Horizontem, sed circa circum illum rotatur, quoniam loca illa à via Solaris sunt nimis remota.

3. Sol non alte deprimitur infra Horizontem. Imò in locis circulo polari sive Arctico vicinis, et si Solis centrum non oriatur, tamen pars limbi Solaris aliquot diebus oritur & conspicitur supra Horizontem antequam ipsum centrum oriatur: quoniam dimidius Sol occupat quindecim minur. in celo. Ex.gr. sumamus loca, quorum ab Æquatore distantia sit 67 grad. prope Arcticum circum. Elevetur polus juxta hanc latitudinem, & in meridionali crena Horizontis videbis, quod non orientur gradus Eclipticæ à 19 gr. Sagittarii ad 11 gr. Capricorni, hoc est Solis centrum in arcu illo existens non orietur viginti tribus diebus, nimirum à die x Decembris ad initium Januarii: & tamen pars limbi Solaris toto eo tempore erit supra Horizontem, nempe die xxi Decembris limbus stringet Horizontem: sed die x Decembris, ut etiam die 1 Januarii Sol dimidius erit supra Horizontem, dimidius infra eum, quia centrum tunc est in Horizonte. Totus autem Sol supra Horizontem elevabitur ubi Solis centrum tenebit xiv gradum Capricorni, hoc est die quarto Januarii circiter: item totus postremò apparebit, ubi centrum ejus occupabit 16 gr. Sagittarii, hoc est die septimo circiter Decembris.

Sed in locis, ubi elevatio poli est 70 gr. 75 gr. &c. ibi hæc differentia inter Orientem limbum & oriens

oriens centrum perexigua est, ita ut limbus vix uno vel sesquialtero die anticipet Solis centri ortum, nimirum declinatio Solis in illis punctis Eclipticæ, cum quibus Sol oritur in illo Horizonte, celerissime accrescit.

Ex eadem depressionis parvitate sequitur etiam, quod crepusculi luce ante ortum & post occasum Solis multis horis fruuntur, & licet integris diebus Sol non oriatur, tamen vel omnibus diei horis vel multis lucem in aëre habeant.

Accedit alia causa, quæ facit ut Sol prius videatur, quam supra Horizontem elevetur, nimirum refractionis radiorum ejus in atmosphæra, de qua diximus capite XIX.

Inde enim fit, ut non tantum ipse Sol prius conspiciatur, quam supra Horizontem sit elevatus & prius quam radius directe ab eo ad oculum possit pervenire, sed etiam ut crepusculi lumen citius illustret aërem, quam si absque refractione hac esset. Exemplum apparentiæ Solis ex refractione ortæ afferemus in sequentibus.

4. Luna plena & plenæ vicina multis diebus supra Horizontem manet, quando Sol infra eum depressus tenetur, nempe eò pluribus diebus, quo locus polo propior. Non tamen ita altè elevatur supra Horizontem, ut aliquam calefaciendi facultatem obtineat. Luna autem plena iis mensibus, quibus Sol infra Horizontem commemoratur, est supra Horizontem multis diebus: iis vero mensibus, quibus Sol supra Horizontem manet integra revolutione, Luna plena nunquam supra Horizontem est.

5. Stellaras fixas semper easdem fere habent supra Horizontem, planetas non item. Saturnus enim quindecim annos commoratur supra Horizontem

Horizontem locorum polo vicinorum, quindecim annis infra eum : Jupiter sex annis infra, sex supra eundem Horizontem : Mars uno anno : Venus & Mercurius semisse anni circiter . Ex hac causa magnam diversitatem motuum aëris & tempestatum in diversis annis fieri verisimile est.

6. Terra in *Zonæ frigidaë* plerisque locis est aspera, petrosa & lapidis instar dura, in paucis locis bituminosa, argillacea, & sulphurea atque pinis. In hisce locis mediocris fecunditas, in illis sterilitas.

7. *Regiones illæ* mari cinguntur, de mediterraneis nondum liquido constat.

8. Quædam ex regionibus *Zonæ Frigidaë* habent mediocris altitudinis montes, pleræque vero montibus carent, & planâ exporriguntur superficie in vasta spatia.

9. Venti à polari plaga frigidi frequentissimè spirant, raro Euri, rariùs Zephyri, In *Arctica frigida* furiant Septentrionales : in *Antarctica australis*.

10. Nebula & pluvia frequentissimè vexant regiones hasce.

Ex hisce jam non est difficile colligere qualis tempestatum conditio in hisce regionibus sit. Et enim tempore hyemis, cum Sol integris diebus non oriatur, fieri aliter nequit, quin densæ nebulae plerunque, frigus verò & gelu continuum inhabitabiles reddat terras. Luce quidem non destituentur omnino continuo eo tempore : quippe & una supra Horizontem existens multo tempore præbebit lumen & crepusculum à Sole Horizonti vicino quotidie concedetur. Sed utranque causam nives, nubes, pluviaeque impedire valent. Crassæ nebulae circa terram hærent cum Solis calore non discu-

discutiantur, adeoque remotarum rerum aspectum prohibent. Fertilitas nulla, omnia ferè inculta & aspera. Quod enim quidam opinantur, quo propior regio aliqua sit polo, eò minorem frigoris intensiorem sentiri, atque magis fertiles agros & campos repertum iri, id mihi verisimile non fit, cum neque in Nova Zembla (quæ gradibus 16 distat à polo, neque in Spitzberga, quæ gradibus duntaxat octo, talis terræ constitutio reperta sit, sed asperitas atque durities, & mediâ ferè æstate nives vel certe imbres ventique frigidissimi. Neque juvat illorum opinionem unicui exemplum à nautis observatum in regione quadam novem gradibus distante à polo, quam Groenlandiæ partem esse arbitrantur plerique. In hac enim herbam virentem repertam esse & aërem multo tepidiorem quam in Nova Zembla, certum est, animalia vero non alia, præter Rhencervos, quæ species Septentrionalibus regionibus propria existit. Hi cervi unius mensis spatio ita pingues redduntur pastu herbæ illius, ut sapidissimam præbeant carnem.

Verumenimvero cum nondum hætenus plures hujus conditionis regiones repertæ sint in Zona frigida, non licet ex illo singulari exemplo generalem conjecturam facere, præsertim cum causâ peculiaris illius constitutionis manifesta sit. Terra enim ea paludosa & uliginosa est, & herba illa, qua pasti cervi impinguantur non est graminis terrestris species, sed ulva & alga. Aliæ verò herbæ nullæ ibi repertæ neque arbores. Ex quibus colligere licet, terram illam pinguem aliquam atque sulphuream substantiam continere, quæ aquâ marinâ mixtâ vel etiam fluviorum aquâ talem oleosam & impinguantem algam proferat. Simi-

lem

dem verò terram reperiri in aliis Frigidæ Zonæ locis, nondum est observatum, sed contrarium potius.

Hyeme itaque in hisce locis parum lucis, sed frigoris, nivis, imbrium & ventorum polarium magna & incredibilis sævitia, atque ea incipiet in Boreali Frigida Sole primum Capricorni ingresso, tunc Autumnus quoque Sole à 1 gr. Libræ ad 1 gr. Capricorni eunte ab hyemis sævitia parum absit. Vere minor quidem est inclementia aëris, non tamen sine nivibus, imbribus, & polaribus frigidis ventis: incrementum tamen caloris de die vel potius frigoris decrementum sentitur eo tempore, nempe Sole à 1 gr. Arietis ad 1 gr. Cancræ eunte. Atque in hoc tempore verno vel ejus posterioribus diebus Sol integris circumvolutionibus commorabitur supra Horizontem, atque ideo tunc calor mediocris sentietur, qui tamen non ejus est vigoris, ut nives omnium locorum liquefaciat & resolvat in aquam, multò minus glaciem unde nautæ perhibent, nives hic atque glaciem reperiri æternæ ætatis: æstas deinde erit Sole à 1 gr. Cancræ ad 1 gr. Libræ tendente, in cujus prioris parte Sol adhuc integris diebus supra Horizontem manet & calorem aliquā accessione auget, ita ut Junius Julius & Augustus menses sint elementis & tolerabilis aëris, in quibusdam locis inter montes Solis calor intensus. Sed hanc Solis benignitatem sæpissime impediunt imbres & nebulæ, ventique Septentrionales durissimi, quibus interdum nix adjungitur, ita ut nullæ hic fruges neque frumentum ad maturitatem possint pervenire, exceptis quibusdam locis Arctico circulo vicinis.

Vt de hisce lectores rectius judicare queant,

commodum fuerit ea hic recensere, quæ Belgæ in Zona frigida aliquando commorantes observarunt, cum ad fretum VVaigatz & Novam Zemblam navigassent. Adolescentes quoque hic reperient, quibus globi usum magis sibi familiarem reddant.

Die xxiii Junii, Anno 1594 (Calendarii novi) sex milliaribus circiter à Nova Zembla cum Sol non occideret illi loco, dimensi sunt minimam ejus altitudinem, nempe cum in Meridiano mediæ noctis esset, atque ex ea invenerunt latitudinem loci, ubi erant, 73 gr. 25 min.

Die xiiii Junii in latitudine 77 gr. 20 min. occurrerunt copiosæ glaciei, quæ totum mare videbatur opplere, quantum ex specula mali cognosci poterat.

Die xxi Augusti fretum VVaigatz nondum transire navis poterat propter glaciei copiam, quæ ex Oceano Tartarico in illud ferebatur, atque hoc impedimentum totâ æstate senserunt, ita ut rebus infectis coacti sint in Hollandiam redire.

Ex alia navigatione. Die v Junii Solis altitudo meridiana minima, quia non occidebat illi loco, ubi erant, deprehensa fuit 1 gr. Ex quo collegerunt latitudinem illius loci esse 74 gr. mare glacie rectum conspiciebatur.

Die xix Junii deprehenderunt ex Solis altitudine, latitudinem loci, ubi tunc erant, 80 gr. 11 m. circa Groenlandiam vel Spitzbergam, Angli littora lustraverunt usque ad 82 gr. latitudinis, sed mare media æstate glacie ita constrictum invenerunt, ut terræ pars vel illi adhærere videretur. Densa præterea nebula & crassus vapor supra aquam ferebatur, ut vix prospectum concederet.

Die xi Augusti anno 1596 in latitudine 76 gr. circa

circa Novam Zemblam invenerunt glaciem ad
undum usque maris continuam : die xxvii navis
glacie ita cincta fuit , ut in Nova Zembla com-
morari coacti sint per hyemem Sole carentem.

Die xxvii Septembris frigus adeo sævum , ut
vix tolerarent : nives continuæ : terra gelu constri-
cta nullam fossionem neque adhibito igne regela-
tionem concedebat.

Die primo Novembris Sol parum admodum su-
pra Horizontem elevabatur in australi plaga : Lu-
na vero pleno orbe elevabatur in plaga Septen-
tionali & integra ferè circumvolutione commo-
batur supra Horizontem.

Die secundo Novembris Solem Orientem con-
spiciebant in plaga, quæ tertia numeratur ab Au-
stro (*ZuydZuydOst*) sed non totus Solis orbis
videbatur , verum in Horizonte ferebatur , quasi
secundum telluris longitudinem procederet.

Die tertio Novembris Solem oriri conspicie-
bant in plaga secunda ab Austro (*Zuydten Oosten*)
non quidem ipsum Solem , sed limbum spectare
videbantur etsi è mali specula illum contemplaren-
tur , reliquum corpus infra Horizontem delite-
bat.

Die quarto Novembris , etsi aër quietus esset,
nil tamen amplius de Sole conspiciebant , quia
infra Horizontem manebat. Luna contra integris
orbibus erat supra Horizontem. Erat enim plena.
Frigus hisce & sequentibus diebus vehementissi-
mum, vix igni cedens: nives & venti continui.

Die ix, x, xi Decembris aër serenus , sed adeo
rigidus, ut cum eo nostræ hyemis frigus vix com-
parari mereatur. Stellarum circumrotatio jucun-
dam præbebat spectaculum.

Toto hoc tempore Sol quidem non orieba-

tur, luce tamen circa meridiem inprimis ex crepusculo fruebantur. In his enim locis hyeme crepusculum facit meridiem.

Die xiii Januarii aër fuit serenus. Atque ex hoc tempore senserunt insigne crepusculi lucis accrementum, frigoris remissionem aliquam & levem in meridie calorem.

Die xxiv Januarii aër serenus. Hoc die primum viderunt in Australi Horizonte Solis limbum, & sequentibus diebus totum Solem elevatum supra Horizontem.

Die Secundo Maji ventus impetuosus glaciem ex aliquibus Oceani partibus removebat. Calor quibusdam diebus parvus, plerisque venti frigidi, nives & imbres, &c.

In hisce observationibus illud inprimis consideratione dignum videtur: Cur Sol desierit apparere die secundo Novembris, cum tamen propter refractionem (quæ deinde effecit, ut novendecim diebus Sol citius apparuerit, quam depressio ejus infra Horizontem admittebat) tardius multò debuisset non apparere? Diversitas atmosphæræ seu aëris aliquid in hoc negotio efficere posse videtur, quoniam Sol accedens ad Horizontem post trium mensium absentiam, invenit hic aërem crassiorem & densiorem, quam is aër erat, cum priori anno post longam moram infra Horizontem occultaretur: Verum ut tot dierum differentiam hæc aëris diversitas procreare possit dubito. Atque aliter observatum est ab illis, qui anno 1634 in Spitzberga hyemem egerunt. Hisce enim Sol desinit apparere die xx Octobris, & rursus post longam absentiam apparere incepit die xxiv Februarii anno 1635, qui dies æqualiter fere absunt à die Brumæ xxi Decembris: nimirum à xx Octo-

bris

bris ad *xxi* Decembris sunt dies *Lxi*, & à *xxi* Decembris ad *xxiv* Februarii sunt dies *Lxv*. Et verò in posteriori annotatione facile aliquot diebus errarunt. Namque lecto decumbentes non animadvertunt Solem die *xx*, *xxi*, *xxii* Februarii Orientem: potest etiam esse ut in meridie forte dormierint, vel ut pluvix & nubes aspectum Solis impederint.

C A P V T X X V I I .

De Umbris, quas corpora in Tellure erecta & à Sole illuminata spargunt, atque de Divisione Telluris inde orta.

Cum in diversis Telluris locis umbræ, quas corpora à Sole illuminata spargunt, admodum diversas in plagas ferantur & in sensum incurrentes varietates experiantur, inde factum est, ut homines hanc diversitatem, cujus causam ignorabant, admirati sint, atque respectu umbrarum Telluris incolas in tres quasi species distribuerint (quæ tamen divisio ipsis Telluris locis sive superficiæ applicanda est) ut quosdam appellaverint Amphiscios, alios Heteroscios, reliquos Periscios. Quorum explicatio cum exiguum contineat doctrinam, nos quædam alia de Umbris adjiciemus, quæ etsi ad Geographiam non pertineant, tamen propter affinitatem materiæ adolescentibus hoc capite proponi possunt.

Umbræ accipiunt denominationes suas à plagis mundi, in quas sparguntur, ut umbra Orientalis, quæ in Orientem tendit Sole in Occidente constituto: contrà, umbra Occidentalis, quæ in Occidentalem plagam abit. Sed præcipue hîc con-

fideratur Umbra Meridiana, quæ in plano Meridiani sita est, sive quæ projicitur à corporibus perpendiculariter erectis vel in Meridiani plano sitis, Sole Meridianum obtinente: estque duplex, Septentrionalis & Australis.

Heteroscii dicuntur incolæ illius partis Telluris, ubi corporum erectorum umbræ meridianæ omnibus anni diebus alterutrum in polum constanter feruntur.

Periscii dicuntur incolæ illius partis Telluris, ubi corporum erectorum umbræ uno eodemque die in omnes Horizontis plagas circumferuntur, sive ubi umbræ meridianæ uno die utranque Meridiani ad plagam sparguntur.

Amphiscii dicuntur incolæ illius partis Telluris, ubi corporum erectorum umbræ meridianæ quibusdam anni diebus ad Septentrionem, aliis ad Austrum sparguntur.

Sed ne loca Tropicorum excludantur, rectius pro tertia hac specie substituuntur *Ascii*, quorum umbra meridiana aliquo anni die nulla est. Et hi subdividentur in duas species, *Amphiscios* nempe & *Heteroscios*: *Ascii Amphiscii* dicuntur, quorum umbra meridiana quibusdam anni diebus, duobus nimirum, nulla est, quibusdam in Septentrionem, quibusdam in Austrum fertur. *Ascii heteroscii* dicuntur, quorum umbra meridiana uno anni die nulla est, reliquis in alterutram meridiani plagam constanter projicitur.

PROPOSITIO I.

Umbra corporum erectorum supra Horizontale planum cadunt in plagam oppositam illi, in qua Sol existit.

Optici

Optici & Gnomonici dicere solent, umbram, opacum & luminosum esse in uno plano: terminus autem umbræ, extremitas opaci & Sol sunt in una recta linea.

Quoniam enim opacum, umbra & linea ab extremitate opaci ad extremitatem umbræ concepta faciunt Triangulum, omne verò Triangulum in uno est plano, ideo tres illæ lineæ in uno erunt plano: Est autem Sol in linea extremitatem opaci & umbræ conjungens. Itaque Sol etiam in eo plano erit. Porro erectum corpus est rectum ad planum Horizontale. Quare planum per illud ductum, nempe Trianguli dicti est etiam rectum ad illud Horizontale planum, & ideo in verticali plano situm. Et quoniam corpus erectum tanquam vertex inter Solem & umbram situm est, ideo umbra & Sol erunt in plagis oppositis.

Umbræ hujus, quam stylus erectus à Sole illuminatus spargit, tres partes constituuntur, nempe umbra densa, centralis & penumbra. Densa umbra dicenda est, quam terminat radius è superiori Solis limbo veniens. Umbra centralis dicitur, quæ inter radium superioris limbi & centralem radium intercipitur. Penumbra dicitur, quæ inter centralem radium & inferioris limbi radium intercipitur.

PROPOSITIO II.

Incola locorum Telluris, quæ in Tropico Cancræ & Capricorni jacent, sunt ascii heteroscii.

Quando enim Sol in primo gradu Cancræ versatur, eo die corpora erecta in aliquo Tropici Cancræ puncto umbram absorbent Sole meridianum eorum occupante, quia Sol tunc perpendiculariter è vertice imminet Horizonti, atque ideo omnia

ejus loca illuminat, neque ullus radius ab erecto opaco impeditur quam iste qui perpendiculariter in Horizontis planum decidit atque ideo in ipsum opacum impetit.

Aliis vero anni diebus, quoniam Sol à vertice locorum Tropici declinat versus Austrum, ideo umbra spargetur in meridie versus Septentrionem, nunquam versus Austrum. Contra in locis Tropici Capricorni omnibus diebus spargetur versus Austrum (excepto uno die, quo nulla umbra erit) nunquam versus Septentrionem.

PROPOSITIO III.

Incola Zona Torrida sunt ascii amphiscii.

Assumatur in globo locus aliquis Zonæ Torridæ, & adducatur ad Meridianum, atque cretâ applicatâ describatur parallelus latitudinis, qui Eclipticam secabit in duobus punctis. Quando itaque Sol in hisce Eclipticæ punctis erit, describet circumvolutione suâ diurnâ parallelum qui directè imminebit descripto parallelo: Atque ideo duobus diebus, quibus puncta illa Eclipticæ obtinebit, in assumto loco & omnibus in descripto parallelo sitis, verticalis erit in meridie, & omnia Horizontis loca illustrabit: ideoque nulla umbra, hisce duobus diebus spargetur: & incolæ erunt ascii. Reliquis vero anni diebus non erunt ascii, sed umbra meridiana spargetur vel ad Septentrionem vel ad Austrum: ad Septentrionem quidem, dum Sol movetur in ea Eclipticæ parte, quæ à duobus illis punctis antea signatis versus Austrum jacent: contra, ad Austrum, dum Sol movetur in ea Eclipticæ parte, quæ à duobus illis punctis versus Septentrionem sita sunt.

PROPOSITIO IV.

Incolæ Zonarum Temperatarum sunt Heteroscii.

Quoniam enim Sol omnibus anni diebus in meridie versus eandem plagam, Austrum nempe, removetur à Temperatæ Borealis Zonæ locis, & contra versus Septentrionem à locis Temperatæ Australis Zonæ, sequitur ex Propos. prima hujus, quod umbra meridiana locorum Zonæ Temperatæ, Borealis in eandem plagam, Septentrionalem nempe, tendant omnibus anni diebus, contra in Australem in locis Zonæ Temperatæ Australis.

PROPOSITIO V.

Incolæ Zonarum Frigidarum sunt Periscii.

Quoniam enim hisce locis Sol aliquot anni diebus non occidit, sed supra Horizontem circumvolvitur, necessarium quoque est ut umbra in omnes plagas circumferatur, atque Sole in superiori meridiani semicirculo existente umbra spargetur versus Septentrionem, deinde verò, ubi Sol in inferiori meridiani semicirculo extiterit, umbra feretur versus Australem plagam.

PROPOSITIO VI.

Dato loco Zonæ Torridæ, invenire dies anni, quibus ascii erunt incolæ illius loci, & quibus diebus umbra in Septentrionem, quibus in Austrum ferentur.

Inveniantur dies anni, quibus Sol verticalis fit dato loco, illi erunt dies, quibus ascii erunt incolæ dati loci, nimirum agendum est juxta modum in Propositione III hujus monstratum.

PROPOSITIO VII.

Dato die anni, invenire illa Telluris loca in globo, cujus incolæ ascii sunt eo die.

Inveniantur loca, quibus Sol verticalis fit dato die anni, juxta Propos. ix. cap. xxiv. Illa loca erunt ea, quæ quærentur.

PROPOSITIO VIII.

Dato Zonæ Frigidæ loco, invenire dies anni, quibus incolæ illius periscii sunt.

Inveniantur dies anni, quibus Sol non occidit in dato loco, juxta Proposit. x. cap. xxiv. Illi dies sunt quæsit.

PROPOSITIO IX.

Dato die anni, invenire loca Zonæ Frigidæ, quorum incolæ periscii fiant eo die, ita ut hic dies primus sit.

Inveniantur ea loca Zonæ Frigidæ, quibus Sol dato die primum non occidere incipit. Illa erunt quæsit.

PROPOSITIO X.

Locus in Æquatore sitis umbra meridiana semisse anni cadit versus Septentrionem, altera semisse versus Austrum. Diebus autem æquinotiorum sunt incolæ ascii.

Quoniam enim Sol unâ semisse anni ab Æquatore recedit versus Austrum, altero versus Septentrionem, umbræ autem feruntur in plagam oppositam plagæ Solis, inde fit, ut semisse anni unâ umbræ meridianæ ferantur in Septentrionem, alterâ in Austrum.

PROPOSITIO XI.

Supraplanum Horizontale nostri loci constitutur planum aliquod, in quo erecti styli perpendiculares sint ascii quibusdam anni diebus, quibusdam anni diebus umbra meridianæ ferantur versus Septentrionem, aliis versus Austrum, hoc est, in quo umbra meridianæ ita projiciantur, sicut in loco aliquo Zonæ Torridæ dato.

Latitudo loci Zonæ Torridæ dati auferatur à latitudine nostri loci, si latitudines fuerint cognomines, sed si diversæ speciei, addantur ambæ latitudines, & residui gradus asserventur. Deinde in plano Horizontali inventâ lineâ meridianâ & lineâ Equatoris, quæ ad meridianam est perpendicularis, erigatur supra hanc Equatoris lineam planum aliquod ita ut inclinetur supra Horizontem tot gradibus quot antea asservati sunt, nimirum ut angulus inter hoc planum & Horizontis nostri eam partem, cui polus vicinior est, sit tot graduum, quot asservati fuerint. In hoc plano erecti styli projicient tales umbras, ac si in loco dato Zonæ Torridæ essent erecti.

PROPOSITIO XII.

In locis sitis in Equatore umbra styli perpendiculariter erecti diebus æquinoctiorum integris in unam manet recta linea, sive ante meridiem projicitur in unam continue plagam Occidentis, post meridiem in plagam Orientis. Diebus autem anni reliquis in semicirculum umbra quotidie circumfertur.

In locis extra Equatorem in Zona Torrida sitis, dum Sol movetur in parte Eclipticæ, quæ inter verticem loci alicujus & vicinum Tropicum interjacet, umbra minorem semicirculo partem

subiectæ superficiæ pererrant. In locis Zonarum Temperatarum, dum Sol movetur in remotiori ab illis semicirculo Zodiaci, umbræ minorem semicirculo superficiem perreptant, majorem verò, dum Sol viciniorem Zodiaci semicirculum percurrit. Diebus æquinoctiorum, umbra erecti styli in omnibus Telluris locis (excepto æquatore & polo) in semicirculi circumfertur.

Hæc omnia partim ex inspectione globi, partim ex declinatione Diagrammatum nota & perspicua fient.

PROPOSITIO XIII.

In locis Zonæ Torridæ, dum Sol versatur in arcu Eclipticæ inter Tropicum vicinum & loci parallelum intercepto, illis diebus umbra styli erecti bis regreditur & relictas lineas repetit, semel nempe ante meridiem, semel post meridiem. Ipse quoque Sol hisce diebus cursum suum inflectere videbitur.

Sumatur in globo locus aliquis Zonæ Torridæ, & polus elevetur juxta ejus latitudinem, atque describatur parallelus loci, qui Eclipticam secabit duobus punctis. Dico, quod dum Sol moveretur in arcu Eclipticæ intercepto inter hunc parallelum & vicinum Tropicum, illis diebus Sol bis videbitur regredi, umbra quoque styli perpendicularis bis regredietur & relictas lineas repetet. Assumatur quodlibet ex illius arcus punctis, & describatur parallelus Solis, quem nimirum Sol in illo puncto existens describit per diurnam circumvolutionem, ex. gr. sumatur 1 gr. Cancrî vel Capricorni & ipsorum Tropicorum alter, sic non opus erit paralleli descriptione. Deinde applicetur quadrans vertici. Et applicetur ad paralleli aliquot puncta, donec ad punctum perveniatur, in quo qua-

quadrans tangit parallelum. In hoc enim situ vel in hac plaga Sol existens inflectere videbitur cursum suum versus verticem loci & umbra incipiet regredi à linea Æquatoris versus Meridianam. Eodem modo si Occidentali parti paralleli applices quadrantem, videbis in illo puncto, in quo quadrans tangit parallelum, Solem relictas plagas repetere & occidere in plaga illa, in qua ante aliquot horas jam fuerat.

Diagrammate, quod amplum satis sit, magis perspicua fiet propositionis veritas. Locus aliquis in Zona septentrionali Torrida sit L, in quo stylus erectus esse concipiatur. Ponamus Solem in initio Cancris versantem & parallelum A B C D E F describentem oriri in plaga LA, erit umbra La. Deinde umbra progredietur versus L o c, donec perveniat ex. gr. in L c, (namque in ipsam L o cadere nequit.) Ubi Sol erit in plaga ea, quæ tangit ipsius parallelum, nempe in L C. Hic incipiet regredi Sol. versus plagam LA, nempe in arcu C G H, & ideo umbra ex L C regredietur versus La & sic perveniet demum in Meridianam lineam L m. Ita post meridiem, postquam Sol à plagis LF, LE pervenit ad plagam LD, quæ tangit parallelum in D, redibit ad ptiores plagas LE, LF, ubi occidet. Interim umbra eodem modo regredietur, nempe ubi ab L m pervenit ad L d, remeabit versus L m usque in L f, ubi Sole Occidente in LF umbra cessabit.

COROLLARIUM. Non itaque præter naturam est, umbram in horologiis sciathericis regredi: sed tum demum miraculum est, si id subito fiat insigni spatio, item si lineas horarias repetat, nempe si stylus non sit perpendicularis sed axi mundano parallelus: imò etsi sit perpendicularis,

non tamen lineæ ipsius umbræ indicant horas sed lineæ umbrarum axis mundi, cujus pars mente concipitur in horologiis, si absit.

PROPOSITIO XIV.

Dato loco in Zona Torrida, & die uno ex illis, quibus Sol cursum suum inflectere & umbra styli perpendicularis regredi videtur, invenire plagam in qua Sol tunc erit, & horam quando id fiet.

Elevetur polus pro dati loci latitudine, & locus Solis ad datum diem inveniatur & in Ecliptica notetur, describaturque cætâ parallelus, quem Sol in eo puncto existens describit. Quadrans applicetur vertici & ita circumducatur, donec descriptum parallelum tangat: ita extremitas quadrantis in Horizonte monstrabit plagam quæsitam. Ut autem hora inveniatur, noetur id paralleli punctum, in quo contactus fit, Index ad horam x i i cycli collocetur, & volvatur notatum paralleli punctum ad meridianum. Index monstrabit, quot horis ante & post meridiem regressus incipiat.

PROPOSITIO XV.

Umbrarum longitudo decrescit, accrescente Solis altitudine, & contra, decresciente Solis altitudine, Umbra accrescit, nimirum ab ortu ad meridiem decrescunt, & à meridie ad occasum iterum accrescunt umbrae.

Sol enim eò propior fit styli vertici, quo magis elevatur supra Horizontem: igitur radius Solis umbram terminans etiam fit propior stylo, & propterea umbra brevior evadit. Porro in meridie Sol maximam habet altitudinem: umbræ itaque longitudo tunc minima erit. In ortu verò & occasu

casu altitudo Solis nulla: itaque umbrae longitudo infinita tunc erit.

PROPOSITIO XVI.

Datâ longitudine styli & umbra invenire Solis altitudinem supra Horizontem, atque inde horam diei, si præterea nota sit latitudo loci & dies anni.

Longitudo styli, umbrae, & radius terminans umbram faciunt Triangulum rectangulum. Itaque instituitur proportio juxta Propos. xv capit. secundi. Ut longitudo umbrae ad longitudinem styli, ita sinus totus ad tangentem anguli, qui indicat altitudinem Solis.

Deinde ex altitudine hac & latitudine loci atque die anni invenietur hora diei Propos. III capit. xxix.

PROPOSITIO XVII.

Datâ semidiametro Solis & Telluris, atque Solis à Tellure distantia, investigare umbra, quam tota Tellus spargit in celum, longitudinem.

Umbra Telluris Conica est, ut optici demonstrant, & facile ostenditur per Diagramma. Itaque verticis hujus Coni, qui Lunæ Eclipsin facit, distantia à Tellure quæritur: Ea invenitur per hanc proportionem: Ut differentia semidiametrorum Solis atque Telluris ad distantiam datam: ita semidiameter Telluris ad longitudinem umbrae Telluris sive ad axem Coni umbrosi.

PROPOSITIO XVIII.

Datâ Luna à Tellure distantia & umbra Telluris longitudine, invenire quanta Luna pars obscuranda sit, sive quanta Eclipsis futura sit, si, Luna in ipsa Ecliptica hæreat.

In-

Instituatur regula trium juxta hanc proportionem: & longitudo umbræ ad excessum hujus longitudinis supra Lunæ distantiam ita semidiameter Telluris ad Semidiametrum coni umbrosi Telluris eâ parte, ubi Luna eum ingreditur.

Deinde: Ut distantia Lunæ ad Semidiametrum umbræ inventam: ita sinus totus Canonis ad tangentem anguli visionis, quem dimidia illa umbræ diameter in oculo nostro subtendit: quæ si duplicetur, habetur angulus visionis pro integra diametro umbræ illius. Cum hoc angulo conferatur angulus visionis sive semidiameter apparens Lunæ, qui in oppositione Solis sive tempore Eclipsis.

Ex hac comparatione innotescet quantitas obscurationis, quam si in digitis habere cupis (quâ mensurâ exprimere solent Astronomi Eclipsis magnitudinem, & ipsam Lunæ semidiametrum apparentem, quia hæc est duodecim circiter digitorum latitudinis) institues regulam proportionis hoc modo: Ut Diameter Lunæ ad 12 digitos, ita diameter apparens umbræ sive angulus visionis ad digitos Eclipticos.

PROPOSITIO XIX.

Quò loca Telluris ab Aequatore vel à parallelo Solis, quovis die, sunt remotiora, eò tam umbra meridiana, quam reliquarum horarum umbra sunt longiores.

Quoniam enim Sol à vertice eorum locorum est remotior, ideo radius quoque Solis umbram terminans à stylo est remotior, ac proinde umbra eò longius protenditur.

PROPOSITIO XX.

Si supra planum aliquod constitutur stylus tali ratio-

ratione, ut sit pars axis mundi, sive ut axi illi parallelus sit, umbra ejus styli ad aliquam horam cadet in eam plani istius lineam, in qua planum hoc secatur à circulo maximo horario sive declinationis sive à Meridiano, in quo Sol ad eam horam existit.

Etenim umbra axis mundi sive styli ita constituti cadit in circuli horarii vel meridiani (in quo Sol existit ad aliquod temporis momentum) planum, neque enim extra hoc planum cadere potest, cum Sol, opacum & umbra in uno sunt plano, ut Propos. primadictum. Atqui eadem umbra styli cadit in planum, supra quod constitutus est stylus. Quare cum umbra hæc sit in hoc plano, & sit quoque in plano meridiani, quem Sol ad horæ aliquod momentum vel initium tenet, inde sequitur, quod umbra ista cadat in communem sectionem plani hujus & plani Meridiani vel circuli horarii. Si enim linea aliqua sit in duobus vel pluribus planis, erit in communi horum planorum sectione.

PROPOSITIO XXI.

Horologium sciathericum æquinoctiale describere.

Debet planum aliquod ex ligno, charta, ære vel aliâ materia confectum erigi super Horizontem tot gradibus, quot gradibus Æquator elevatur supra Horizontem illum, sive quot gradus sunt in complemento latitudinis loci.

Antequam aurem erigatur, commodius est Sciatherici lineas ducere. Assumatur itaque in eo plano punctum pro libitu, atque ex eo tanquam centro describatur peripheria circuli: ducatur per idem centrum linea Horizonti parallela, sive communi sectioni Æquatoris & Horizontis, quæ erit linea umbræ horæ sextæ vespertinæ & sextæ matutinæ.

tutinæ. Huic ex centro perpendicularis ducatur, quæ erit horæ xii umbra. Deinde dividatur uterque quadrans in tres partes, & singulæ harum trium in duas, ita ut sex arcus in unoquoque habeantur, quorum singuli erunt quindecim graduum, atque ex centro ducantur ad arcuum terminos lineæ rectæ, hæ erunt lineæ umbrarum pro reliquarum horarum initiis, quæ inter xii & vi cadunt, quarum numerus & ordo ascribendus est extremitatibus ductarum linearum: eidem arcus quindecim graduum infra Horizontalem lineam in descripta peripheria sunt sumendi, pro horis ante vi matutinam & post vi vespertinam & lineæ umbrarum ducendæ. Ex centro erigendus est stylus perpendicularis.

Deinde in plano Horizontali (si Sciatherici planum, nondum sit erectum) invenienda est linea meridiana, & linea ortus atque occasus æquinoctialis, atque supra hanc planum sciatherici collocandum, ut linea Horizontalis sciatherici sit parallela lineæ isti ortus atque occasus. Ita umbra styli monstrabit horarum initia ad quemlibet anni diem.

Sed quia Sol hujus plani superficiem unam semisse anni tantum illustrat, & alteram alterâ semisse, ideo in utraque superficie sciathericum dicto modo construendum, ut in una facie tempore Veris & Æstatis, in altera tempore Autumni & Hyemis umbrarum beneficio horæ innotescant.

Facili quoque opera in sciatherico hoc æquinoctiali delineantur circuli qui locum Solis in Ecliptica vel ingressum Solis in duodecim Zodiaci signa indicent, atque parallelos repræsentent, quos Sol in cœlo circumvolutione sua describit. Assumatur enim certa styli magnitudo, atque ea
accu-

accuratè dividatur in decem partes, & harum decem una in alias decem, ut tota linea in 100 particulas secta esse concipiatur. Deinde ex Tabula Declinationum Solis excerpantur declinationes 5 gr. Arietis, 10 gr. 15 gr. 20 gr. 25 gr. 30 gr. five 1 gr. Tauri, 15 gr. Tauri 1 gr. Geminorum, 15 gr. Geminorum, 1 gr. Cancrì. Harum declinationum complementa ad 90 gr. sumantur & ex Canone Mathematico Tangentes complementorum illorum.

Porro ex centro horologii intervallo Tangentis complementi 5 gr. Arietis describatur peripheria circuli; hæc denotabit Solis ingressum in 5 gr. Arietis & 25 gr. Virginis, & parallelum Solis pro eo die, nimirum cum umbræ extremitas diurna circumrotatione in descriptam hanc peripheriam incidet, indicium erit, Solem in 5 gr. Arietis existere vel 25 Virginis. Eodem modo describantur peripheriæ intervallo complementorum 10 gr. Arietis, 20 gr. Arietis, 1 gr. Tauri, 15 gr. Tauri, 1 gr. Geminorum, 15 gr. Geminorum, 1 gr. Cancrì. Hæ denotabunt parallelos Solis existentis in illis punctis, & simul in punctis 20 gr. Virginis, 10 gr. Virginis, 1 gr. Virginis, 15 gr. Leonis, 1 gr. Leonis, 15 Cancrì.

Eodem modo in altera facie sciatherici describentur peripheriæ pro parallelis Solis, in 5 gr. Libræ & 25 gr. Piscium, in 10 gr. Libræ & 20 gr. Piscium, in 15 gr. Libræ & 15 gr. Piscium, in 1 gr. Scorpìi & 1 gr. Piscium, in 15 gr. Scorpìi & 15 gr. Aquarii, in 1 gr. Sagittarii & 1 gr. Aquarii.

Singulis hisce peripheriis characteres signorum Zodiaci ascribendi sunt.

PROPOSITIO XXII.

Sciathericum Horizontale sive in plano Horizontali describere.

Per Globum. Elevetur polus pro loci latitudine, & Meridianus, qui præ reliquis in ipsius globi superficie conspicuus est colore & magnitudine, adducatur sub æneum Meridianum, Index ad horam XII constituitur. Volvatur globus, donec Index monstret horam I vel XI, sive donec quindecim Æquatoris gradus transeant æneum Meridianum. In hoc situ globi numerentur in Horizonte ligneo gradus intercepti inter æneum & globi Meridianum, & numerus hic annotetur pro hora I post meridiem & XI antimeridiana.

Deinde iterum volvatur globus, donec Index monstret horam II vel X, & gradus in Horizonte intercepti inter Meridianos illos duos æneum & assumtum annotentur pro hora X & II. Eodem modo fiat pro horis IX & III, pro VIII & IV, pro VII & V, pro VI & VI (hac non indigemus) pro V & VII, pro IV & VIII, pro III & IX. Gradibus hisce ita annotatis pro singulis ascriptis horis, inveniantur in plano Horizontali linea meridiana, atque ex hujus lineæ puncto quolibet, tanquam centro describatur peripheria circuli, & ex centro ducatur ad eandem perpendicularis ab utraque parte. Hæc erit linea umbræ ad horam VI antemeridianam & VI pomeridianam. Linea meridiana est umbræ horæ XII linea. In descripta peripheria abscindantur arcus antea notati incipiendo à linea meridiana versus lineam horæ VI antemeridianæ & pomeridianæ, nempe primò arcus notatus pro hora XI & I, deinde pro hora X & II, pro IX & III, pro VIII & IV, &c. Arcubus ita abscissis ducantur

tur ex centro lineæ ad terminos illos, hæ erunt lineæ umbrarum in reliquarum horarum initiis & fine : Atque horarum numerus extremitati linearum erit ascribendus.

Stylus autem ex centro Horologii supra lineam meridianam ita elevandus est, ut angulus, quem cum ea facit, sit æqualis latitudini loci vel elevationi poli : Sed commodius est Triangulum aliquod fabricare, cujus angulus ad basin sit æqualis latitudini loci. Si in charta sit facta delineatio, ducatur ex centro linea, quæ à peripheria auferat arcum æqualem latitudini loci (à meridiana linea factâ numeratione) atque Triangulum exscindatur supra meridianam lineam constituendum. Ita umbra horas monstrabit. Facilis quoque est hujus sciatherici constructio sine globo, quam adolescentes felicius ex ostensione & præviâ Præceptoris operatione discent, quam ex verbis factâ descriptione.

PROPOSITIO XXIII.

Sciathericum in plano Verticali describere, quod directè Ortum & Occasum æquinoctialem respicit.

Hujus constructio eodem perficitur modo, quo in Horizontali usi sumus, si modo polus eleveur non juxta loci latitudinem, sed juxta complementum ejus, & deinde stylus quoque juxta hoc complementum eleveur supra meridianam lineam : sed melius hæc ex ostensione & manu ductione quam longis præceptis percipiuntur.

PROPOSITIO XXIV.

Sciathericum in nostro Horizontali vel alioplatano construere, quod indicet horas aliorum locorum à nostro utcumque remotorum.

Potest

Potest hoc in eodem sciatherico fieri, quod pro indicandis horis nostri loci conficitur. Primò consideretur, an locus datus versus Ortum vel Occasum à nostro jaceat, si versus Ortum, prius numerabitur in illo hora duodecima, quam in nostro loco: si versus Occasum, serius. Adducatur deinde noster locus ad meridianum, Index ad horam XII, & volvatur globus, donec alter locus ad meridianum perveniat, Index monstrabit, quota hora sit in hoc loco, cum in nostro est XII. Ex hoc facile est colligere horas illius loci, quæ cum nostri loci I, II, III, IV item XI, X, IX, VIII, &c. convenient, quæ proinde illis ascribi debent. Sed elegantius hæc sine globo possunt absolvi juxta modum, quo Horizontalia conficiuntur.

PROPOSITIO XXV.

Planum elevare supra Horizontem nostri loci, atque in eo plano sciathericum construere, in quo umbra horarum regredi videantur, sicut in locis Zone Torridæ.

Quoniam plani elevatio nostro arbitrio relinquitur, ideo eligemus talem, quæ proposito nostro sit commoda: ex. gr. planum ita constituemus supra nostrum Horizontem (sive supra lineam ortus & occasus æquinoctialis) ut axis mundi sive polus elevatus sit supra illud gradibus decem. Ita umbra regredi incipiet Sole in 26 gr. Arietis ingressu, & singulis diebus id faciet, donec ad 4 gr. Virginis Sol pervenerit.

Sit itaque in loco latitudinis 52 gr. planum ita constituendum & horologium construendum. Erig planum elevandum gradibus 42, ita polus erit supra illud elevatus gradibus decem. In hoc plano construatur sciathericum Horizontale pro eleva-

elevatione poli decem graduum , eo modo quo diximus Propof. xxii. Ubi jam lineæ umbrarum ex centro horologii ductæ sunt , & fatis productæ deleantur , earum partes circa centrum existentes & ipsum centrum , atque stylus perpendicularis erigatur in aliquo lineæ meridianæ puncto ejus altitudinis , qualem Triangulum Gnomonicum exhibebit. Ita hujus styli extremitas umbrâ suâ in lineas umbrarum incidente indicabit horas , & simul umbra apparebit regredi dictis diebus.

Posiunt etiam beneficio globi terrestris describi sciotherica meridionalia , polaria , inclinantia atque omnis generis : sed quia ad aliam disciplinam hæc materia pertinet , nempe ad Gnomonice , ideo inconueniens fore existimo illa omnia hic pertractare.

CAPUT XXVIII.

*De Comparatione affectionum caelestium
in diversis Telluris locis.*

EX consideratione convenientiæ & discrepan-
tiæ apparentiarum caelestium in diversis Tel-
luris locis orta est denominatio incolarum , (quam
quidam malè acceperunt pro Divisione) qua qui-
dam dicuntur Antœci , alii Pericœci , alii Antipodes.

Antœci dicuntur incolæ duorum locorum ,
quæ in eodem quidem ejusdem Meridiani Semi-
circulo jacent sed à diversa Æquatoris plaga , unus
nempe versus Septentrionem , alter versus Au-
strum , ita tamen ut ab Æquatore æqualiter di-
stant.

Pericœci dicuntur incolæ duorum locorum , quæ
in eodem parallelo jacent & in ejusdem meridia-
ni

ni diversis semicirculis. Interdum accipitur pro omnibus incolis alicujus paralleli : sed ad vitandam confusionem abstinemus hac usurpatione.

Antipodes dicuntur incolæ duorum locorum, quæ è diametro sibi mutuo opponuntur.

NOTA. Vocabula hæc tria ita plerunque usurpantur, ut amborum locorum, quæ comparantur, incolas denotent, sicut nos definivimus illa : interdum tamen, quando certus aliquis locus illis adjungitur, denotant tantum alterum locum, ut cum dicimus, *pericæci*, *antipodes illius* vel *hujus loci*.

PROPOSITIO I.

Qui in eodem ejusdem Meridiani semicirculo habitant, illi & meridiem sive horam duodecimam simul habent, & reliquas omnes horas simul numerant.

Etenim meridies sive hora diei duodecima definitur per Solis existentiam vel appulsam ad meridianum. Quoniam itaque illa loca Telluris, quæ in eodem Meridiano Telluris habitant, eundem quoque cæli meridianum habent, inde manifestum est, quod Sol eodem momento temporis omnibus in eodem meridiano habitantibus meridiem faciat & horam duodecimam. Porro hora definitur, quod sit vigesima quarta pars temporis illius, quod inter duas vicinas merides vel inter duos appulsus Solis ad eundem ejusdem meridiani semicirculum intercedit. Quoniam itaque idem est tempus quod inter duas merides locorum ejusdem meridiani intercedit, erit quoque vigesima quarta ejus pars in omnibus eadem & æqualis, ac proinde simul numerabunt omnes horas à meridie.

PRO-

PROPOSITIO II.

Qui in diversis Telluris hemisphæriis, quæ Equator facit sive distinguit, vel qui à diversis Equatoris plagis habitant, illi tempestates anni contrarias habent eodem tempore, easdem autem diverso anni tempore, ita ut altero hemisphærio sit Hyems cum in altero est Æstas, & cum in illo Ver, in hoc Autumnus.

Æstas enim incipit in quovis loco juxta cælestem rationem, Solis nimirum motum, cum Sol minimam distantiam à vertice ejus loci adipiscitur: Hyems, cum maximam. Quoniam autem Sol movetur ab uno hemisphærio in alterum, inde fit, ut, quando locis unius hemisphærii appropinquat, ab alterius hemisphærii locis magis magisque recedat, atque adeo Æstas unius hemisphærii cum Hyeme alterius hemisphærii in tempore conveniat, & unius Ver cum alterius Autumno.

In locis Zonæ Torridæ tempestatum vicissitudo habet aliquid peculiare, de quo abunde diximus capite xxvi.

PROPOSITIO III.

Qui in hemisphærio Telluris Septentrionali habitant, illis faciem ad Equatorem convertentibus Oriens est à sinistra, Occidens à dextra, Auster in antico, Septentrio à postico. Qui autem in hemisphærio Telluris Australi habitant, illis faciem Equatori obvertentibus stella oriuntur à dextra, occidunt ad sinistram.

Qui in ipso Equatore habitant, illis si ad polum Septentrionalem convertant faciem, oriens est à dextra, occidens à sinistra, contra, si ad polum australem convertant faciem.

Qui in hemisphærio Septentrionali habitant, illis facie ad Aequatorem conversâ Sol in Zodiaci semicirculo boreali ambulans videbitur oriri & occidere in postico : Sed alterum semicirculum perambulans in antico. Contrarium evenit in hemisphærio Australi. Contrarium quoque observabitur, si facies ad polos convertatur.

Hæc manifesta sunt ex consideratione ipsius circumvolutionis : possunt ostensione in globo factâ illustrari. Solent autem id mirari nautæ & alii motuum cælestium imperiti, quando ex nostro hemisphærio navigatione perveniunt in Australe hemisphærium.

PROPOSITIO IV.

Antæcorum affectiones cælestes comparata inter se, ita se habent.

1. Simul agunt meridiem, mediam noctem, atque omnes horas simul numerant, ut patet ex prima Propos. hujus cap.

2. Tempestates anni contrarias habent eodem tempore, nempe cum unus locus Ver agit, alter experitur Autumnum, cum ille Æstatem, hic Hyemem, ut patet ex secunda hujus.

3. Dies unius loci sunt æquales alterius noctibus ; Et hujus dies prioris noctibus.

4. Cum unius loci dies accrescunt in longissimum usque diem, interea alterius loci dies decrescunt usque ad brevissimum. Habent enim dies Calendariis oppositos æquales. Ex. gr. Dies unius loci ad xx Aprilis æquatur diei xx Octobris in altero loco.

5. Diebus æquinoctiorum Sol illis simul oritur & occidit, aliis autem diebus uni citius, quam alteri. Duobus quoque illis diebus eandem habet Sol

Sol altitudinem supra Horizontes Antæcorum ad singula temporis momenta: aliis diebus diversam.

6. Faciem illis sibi mutuo obvertentibus vel ad Æquatorem respicientibus, uni Sol à dextra videbitur oriri, ad sinistram occidere, alteri contra, à sinistra oriri, ad dextram occidere. Eodem modo omnes stellæ uni à dextra, altera à sinistra orientur.

7. Cum uni Sol in postico oritur & occidit, alteri in antico oritur & occidit, contra huic in postico, cum illi in antico.

8. Polos diversos elevatos habent æquali elevatione.

9. Stellæ uni loco perpetuò apparentes, sive non occidentes, alteri loco nunquam oriuntur sed semper infra Horizontem depressæ manent: Contra, quæ huic loco nunquam occidunt, illi nunquam oriuntur.

Hæc omnia ex globo manifesta fient.

PROPOSITIO V.

Qui in Æquatore habitant, non habent Antæcos. Periæci autem illorum sunt iidem cum Antipodibus eorum. Poli Telluris non habent Periæcos, ipsi vero sibi mutuo sunt simul Antæci & Antipodes.

Propositionis hujus veritas ex Definitionibus Antæcorum, Periæcorum & Antipodum perspicua est, ideo non indiget probatione.

PROPOSITIO VI.

Dato loco in globo exhibere ejus Antæcorum, Periæcorum & Antipodum locum.

Adducatur datus locus ad æneum Meridianum, & quot gradus inter hunc & Æquatorem

intercepti sunt , totidem numerentur ab altera Aequatoris parte : Terminus numerationis erit Antæcorum locus

Deinde Index applicetur ad horam XII cycli, noteturque punctum meridiani , quod dato loco imminet, item illud, quod loco Antæcorum. Hisce factis , volvatur globus donec Index in cyclo horario monstret alteram duodecimam. Ita punctum globi , quod subjicitur notato Meridiani puncto loci dati, erit locus Pericæcorum, & punctum globi , quod subjicitur alteri notato puncto meridiani erit locus Antipodum.

PROPOSITIO VII.

Qui in eodem Telluris parallelo habitant, illi & singulos anni dies noctesque aequales habent : singula quoque stella aequali tempore commorantur supra illorum Horizontes : eadem stella nunquam occidunt, eadem nunquam oriuntur : Sol singulis diebus & omnes quoque stella in eadem illis plaga oriuntur & occidunt , eisdem quoque horis stella aequè sunt elevata supra Horizontem vel infra eum depressa : eundem polum habent aequè elevatum : facie ad Aequatorem vel eundem polum conversâ, stella illis ab eodem oriuntur latere , ab eodem occidunt : tempestates anni, Ver, Aestatem, Autumnum, Hyemem simul & eodem tempore experiuntur, exceptis quorundam locorum singularibus proprietatibus.

Hæc ex ipsa motus stellarum consideratione, situque locorum Telluris , manifesta sunt : in globo, si eligatur unus aliquis parallelus, & juxta ejus latitudinem sive ab Aequatore distantiam , polus elevetur, erit Horizon ligneus omnium locorum illius paralleli Horizon , si nempe singula loca ad meri-

meridianum adducatur , atque tunc perspicua erunt ea, quæ Propositio hæc continet.

PROPOSITIO VIII.

Periæcorum affectiones caelestes ad se invicem comparata ita se habent.

1. Primò omnia illa , quæ in præcedenti propositione de incolis unius & ejusdem paralleli commemoravimus, habent communia.

2. Horas diei contrarias numerant reipsa, nomine easdem, nimirum cum in uno loco est meridies & XII hora meridiana, tunc in altero est media nox & XII mediæ noctis. Itaque hujus incolæ numerant I, II, III, &c. à media nocte , dum illi numerant I, II, III, &c. à meridie.

3. Diebus æquinoctiorum Sol occidit uni loco, dum alteri oritur , atque adeo tempus diei unius loci est nox alterius. Aliis verò anni diebus, nempe semissè anni, qua Sol vicinum locis illis Zodiaci semicirculum percurrit , hoc est Vere & Æstate prius oritur uni loco , quam alteri occidat, atque adeo quibusdam hōris vel horarum partibus simul diem habent Solemque conspicuum, nempe dum uni loco Sol versus occasum tendit, alteri jam supra Horizontem emersus ascendere versus meridianum incipit. Altera verò anni semissè , Autumno & Hyeme qua Sol remotiorem Zodiaci semicirculum decurrit , prius occidit uni loco , quam alteri (Periæcis) oriatur, atque adeo nullam diei sed aliquam noctis partem communem habent , & Solem aliquibus horis vel horarum partibus depressum infra Horizontem, ita tamen ut uni loco sit finis noctis, alteri initium.

4. Eodem modo stellas illas, quæ ab Æquatore declinant versus polum Periæcis elevatum, quibusdam

busdam horis vel horarum partibus simul videre possunt, nimirum antequam uni occidant, alteri jam ortæ sunt, & contra, antequam isti oriantur, huic nondum occiderunt, atque hoc eò majori tempore, quo stella ab Æquatore remotior est versus polum elevatum. Contra, illas stellas, quæ ab Æquatore declinant versus polum depressum Pericæcis, nunquam simul videntur, sed illæ prius occidunt uni loco, quam alteri oriantur, atque adeo quodam tempore sive quibusdam diei horis vel horarum partibus neutri Pericæcorum sunt conspicuæ, idque eò majori tempore, quo stella vicinior est polo, atque illæ stellæ, quæ Antæcis perpetuo supra Horizontem manent, perpetuo Pericæcis occultantur.

5. Quem locum Telluris Pericæcorum alter in occasu æquinoctiali vel etiam ad occasum habet, eundem alter Pericæcorum monstraturus in orientalem plagam digitum dirigit (quarum pars una Antæcis, reliqua Pericæcis communis est).

PROPOSITIO IX.

Antipodum affectiones caelestes ad se invicem comparata, ita se habent.

1. Omnibus anni diebus Sol atque stellæ uni loco oriuntur, dum alteri occidunt: Habent enim eundem Horizontem, etsi diversam ejus faciem.

2. Unius dies alterius nox est.

3. Dies anni oppositos æquales habent, sicut etiam noctes, ita ut unius loci dies longissimus, sit alterius brevissimus.

4. Tempestates anni contrarias eodem tempore, easdem opposito tempore experiuntur, nempe uni Ver, dum alteri Autumnus, uni Æstas, dum alteri Hyems. Et contra.

5. Polos

5. Polos diversos habent elevatos æquali elevatione: ab *Æquatore* æqualiter distant, sed à diversis ejus plagis: in eodem Meridiano siti sunt, sed diversis ejus semicirculis.

6. Horas diei contrarias revera, nomine eadem numerant, nimirum uni loco meridies est, dum alteri media nox.

7. Quæ stellæ uni loco perpetuo apparent sive supra Horizontem commorantur, illæ perpetuo infra alterius loci Horizontem manent. Item, quæ stellæ diu manent supra Horizontem unius loci, illæ parvo tempore commorantur supra alterius loci Horizontem.

8. Unius loci incolis Sol & stellæ à dextris, alterius à sinistris oriri videntur, si ambo ad *Æquatorem* converterint faciem, item si uni ab antico, alteri à postico per semissim annis factâ permutatione.

PROPOSITIO X.

Unius loci Pericæci sunt Antæcorum illius loci Antipodes, & Antipodum illius loci Antæci.

Ita unius loci Antipodes sunt Antæcorum illius loci Pericæci, & Pericæcorum Antæci.

Hæc ex Definitionibus clara satis sunt, neque indigent probatione.

PROPOSITIO XI.

Dato loco in globo invenire ea loca, quæ omnes horas & meridiem simul cum dato loco agunt, item illa loca, quæ contrarias horas numerant, & mediam noctem, cum dato loco meridies est.

Adducatur datus locus ad æneum meridianum: sic omnia loca, quæ eidem meridiano hujus semicirculo subjacent, sunt illa, quæ omnes horas

simuleasdem numerant : deinde Index ad horam xii cycli collocetur, & volvatur globus donec Index monstret alteram horam xii, sic loca quæ eidem semicirculo ænei meridiani subjacent, sunt illa quæ contrarias horas loci dati horis numerant.

PROPOSITIO XII.

Dato loco in globo invenire illa loca, apud quod dies omnes anni æquales sunt noctibus prioris loci.

Datus locus adducatur ad meridianum, & inveniaturs ejus Antæcorum parallelus. Omnia loca in hoc parallelo sita satisfaciunt quæsito.

Sed si quæraturs locus, cujus dies æquales sunt dati loci noctibus & omnes horæ eadem, tunc solus Antæcorum locus est is qui quæriturs.

Si autem omnes horæ contrariæ esse debeant, solus Antipodum locus quæsito satisfacit.

PROPOSITIO XIII.

Dato loco in globo & die anni, invenire horas, quibus incole illius loci & Antæci ejus simul Solem videre possint, sive quibus horis Sol supra utriusque loci Horizontem existet, item horas, quibus in uno loco citius vel prius videtur, quam in altero loco.

Inveniaturs longitudo sive tempus moræ Solis supra Horizontem dati loci ad datum diem, juxta Proposit. iv. capit. xxv. Horæ, quibus hoc tempus à vigintiquatuor horis deficit, sunt horæ diei in loco Antæcorum. Tot autem horis simul Solem habent elevatum duo hæc loca, quot horarum vel ipsius dati loci dies est vel Antæcorum, nimirum, illius, qui non major quam duodecim horarum, quantus est in diebus æquinoctiorum, aliis

aliis vero diebus minor. Vel ut clarius dicam, si dati loci dies est minor quam duodecim horarum, tunc Antœci eisdem horis Solem videbunt, sed pluribus, nempe ante illud tempus & post illud. Si verò dati loci dies sit major, quam duodecim horarum, sumendus erit numerus horarum noctis. Tot enim horis Antœci simul Solem videbunt, neque pluribus horis. Et hæ horæ circa meridiem utriusque loci numerandæ sunt, nempe dimidius numerus ante meridiem, dimidius post meridiem, quoniam simul agunt meridiem.

Deinde differentię dierum (sive differentię inter diem & noctem ejusdem loci) semissis exhibebit horas, quibus Sol citius supra unius loci Horizontem oritur atque etiam tardius vel serius occidit, quam alteri loco Antœco.

PROPOSITIO XIV.

Dato loco in globo & die anni, invenire horas, quibus incolæ illius loci Solem simul vident cum Pericæcis suis, & quibus horis non simul eum cernunt.

Inveniatur tempus moræ Solis supra dati loci Horizontem ad datum diem, & tempus moræ infra Horizontem, hoc est quantitas diei ac noctis inveniatur. Differentię inter diei & noctis quantitatem semissis indicabit horas, vel horæ partes quibus uni loco Sol prius oritur quam alteri occidat, & eidem loco serius quoque occidat, quam huic oriatur.

CAPUT XXIX.

*De Comparatione Temporis in diversis
Telluris locis.*

PROPOSITIO I.

Datâ horâ unius loci in globo datâ, invenire horam alterius loci datâ.

Locus, cujus hora datur, adducatur ad Meridianum æneum, Index ad horam eam cycli horarii, qualis datur. Volvatur globus, donec alter datus locus sub Meridianum veniat, Index in eo globi situ monstrabit horam quæsitam hujus alterius loci.

PROPOSITIO II.

Datâ horâ nostri loci (vel alterius loci in globo datâ) exhibere in globo omnia illa loca, in quibus ad eam horam sit meridies, item illa, in quibus media nox, item illa, in quibus sit hora, quamcunque volumus. De ipsa Tellure proponendum esset & solvendum Problema, si scientificè ageremus. Est enim Telluris affectio. Idem intellige de plurimis sequentibus Problematibus.

Datus locus adducatur ad Meridianum, Index ad datam horam cycli horarii. Volvatur globus, donec Index monstret horam XII meridiei. Ita loca, quæ meridiani semicirculo superiori (à polo elevato ad polum depressum) subiecta conspiciuntur, sunt ea, quæ meridiem ad datum tempus agent. Si vero globus volvatur, ut Index monstret XII cycli inferiorem, loca, quæ eidem meridiani semicirculo subiecta conspiciuntur, sunt illa, in quibus media nox tunc erit.

Quod

Quod si loca cupiamus, in quibus sit alia aliqua hora, volvatur globus donec Index monstrat eam horam. Sic loca meridiani semicirculo subiecta sunt ea, quæ quærentur.

PROPOSITIO III.

Datâ Solis altitudine, die anni, & latitudine loci, invenire horam ad tempus illius altitudinis.

Elevetur polus pro data loci latitudine: ex dato die inveniatur locus Solis in Ecliptica atque is in Ecliptica globi notetur & ad meridianum adducatur. Deinde quadrans applicetur vertici, & in eo notetur gradus datæ altitudinis, Indexque ad horam XII cyclo horarii collocetur.

Tunc moveatur globus & quadrans, donec notatus locus Solis cum notato quadrantis puncto conveniat. In eo situ Index monstrabit horam quæsitam.

PROPOSITIO IV.

Datâ plagâ in qua Sol conspicitur aliquo tempore diei data, & datâ latitudine loci, invenire horam diei.

Fiant omnia, ut in præced. proposit. ut quadrans vertici applicatus sit. Ejus extremitas adducatur ad eam plagam Horizontis, quæ observata fuit. Et volvatur globus, donec notatus locus Solis ad quadrantem perveniat. In hoc situ Index monstrabit in cyclo horam diei. Plagam autem Solis, nautæ observant in pyxide sua.

PROPOSITIO V.

Lucente Sole, beneficio globi cognoscere horam loci dati, sive cujus latitudo data est.

Elevetur polus pro data loci latitudine, & con-

stituatur globus ad quatuor mundi cardines. Deinde acicula infigatur loco Solis in Ecliptica perpendiculariter, vel quod melius Gnomon sphaericus applicetur Eclipticæ, ita ut apex gnomonis loco Solis incumbat, atque ita ad meridianum adducatur, & Index ad horam xii. Volvatur globus, donec acicula nullam umbram faciat in globo. In hoc situ Index monstrabit horam quæsitam.

PROPOSITIO VI.

Datâ horâ nostræ numerationis invenire quota sit hora ab ortu Solis, hoc est horam Babylonicam sive Norimbergensem.

Olim Babylonii, hodie Norimbergenses & quidam alii populi numerant horas viginti quatuor ab uno ortu Solis ad sequentis diei ortum.

Elevetur polus pro dati loci latitudine, & locus Solis ex dato die inventus adducatur ad meridianum, Index ad horam xii cycli horarii. Volvatur globus, donec Index monstrer datam horam. Tunc globo immoto manente Index reducatur ad xii. Quo factò volvatur globus ab occasu versus ortum donec locus Solis in Orientali Horizonte appareat: Et in cyclo horario numerentur horæ à xii versus ortum usque ad Indicem. Hæ enim sunt horæ quæsitæ sive Babylonicæ vel Norimbergenses.

PROPOSITIO VII.

Contra, Datâ horâ ab ortu sive Babylonica, invenire horam nostræ numerationis, quæ à media nocte vel meridie sit.

Elevetur polus pro dati loci latitudine, locus Solis in Ecliptica notetur & ad Orientalem Horizontem adducatur, Index ad horam xii. Volvatur

vatur globus versus occasum, donec Index mon-
fret in cyclo datam horam ab Ortū.

Quo facto, Index reducatur ad horam xii, &
dein moveatur globus donec locus Solis reductus
sit ad meridiani semicirculum, quem proximè
transiit, & numerentur horæ à xii ad Indicem
in eam plagam, in quam motus globi factus est.
Ita horam nostræ numerationis à meridie vel me-
dia nocte reperiēs.

PROPOSITIO VIII.

*Datâ horâ nostræ numerationis, invenire quota
hora sit ab occasu Solis præcedente, hoc est horas
Italicas.*

Hodie in multis Italiæ locis, olim in Græcia nu-
merant viginti quatuor horas ab uno occasu Solis
ad sequentem sive vicinum, ad quas inveniendas
ex horis nostræ numerationis ita agimus.

Elevetur polus pro dati loci latitudine: locus
Solis in Ecliptica notetur, & ad meridianum ad-
ducatur, Index ad horam xii meridianam cycli
collocetur. Volvatur globus; donec Index mon-
fret horam datam. Tunc immoto globo reduca-
tur Index ad horam xii, & hoc factò volvatur
globus versus ortum, donec locus Solis in Occi-
dentali Horizonte conspiciatur.

Numerentur deinde horæ à xii usque ad in-
dicem, juxta plagam motus. Hæ enim erunt ho-
ræ Italicæ numerationis.

PROPOSITIO IX.

*Datâ horâ ab occasu Solis sive Italica numera-
tionis, invenire quota ea sit hora nostræ numeratio-
nis à meridie vel media nocte.*

Elevetur polus pro dati loci latitudine, Solis lo-
cus

cus in Ecliptica notetur atque ad meridianum adducatur, Index ad horam xii collocetur. Volvatur globus versus occasum, donec Index monstret datam horam Italicam. Tunc immoto globo reducatur Index ad xii. Hoc facto, locus Solis revolvatur ad eum meridiani semicirculum, quem proximè transit. Sic horæ inter xii & indicem interceptæ (numerando à xii versus ortum) sunt horæ à meridie vel media nocte juxta nostram numerationem.

PROPOSITIO X.

Datâ horâ nostra numerationis in dato die invenire quota sit ea hora juxta antiquam Iudeorum aliarumque gentium numerationem.

Vetustis temporibus Judæi (ut patet ex sermone Christi de patrefamilias, qui operarios ad vineam colendam conducebat) atque aliæ gentes, nondum excultâ Astronomiâ, singulos dies ab ortu Solis ad occasum diviserunt in duodecim horas, & noctem in totidem, quæ horæ ideo dicuntur Judaicæ, planetariæ, (ob aliam causam) sed rectius horæ in æquales. Etenim cum neque noctes neque dies inter se æquales sint, sive æqualis longitudinis, sed semissè anni accrescant, altera decrescant (exceptis locis Æquatoris) inde fit, ut horæ illæ modo majores modo minores sint, nimirum accrescunt cum accrescente dierum longitudine, decrescunt hac decrescente. Verum in locis Æquatori vicinis non magnum est hoc incrementum, ut capite xxv ostendimus, sed dies omnes totius anni fere æquales, atque inde factum est ut populi ab Æquatore remotiores ut Europæi nunquam usi sint hisce horis, sed tantum illi, qui
non

non admodum longe à Torrida Zona remouentur
vel in ipsa Torrida habitant.

Problema itaque clarius ita proponetur: *Data
horâ aequali in dato die, inuenire horam inæqua-
lem.* Hora æqualis dicitur duodecima pars cujus-
vis diei vel noctis: sive temporis quo Sol supra Ho-
rizontem vel infra eum commoratur.

Horâ inæqualis dicitur vigesima quarta pars
temporis, quo Sol à meridiani semicirculo mo-
uetur donec ad eundem semicirculum redeat,
quod tempus dicitur dies Astronomicus.

Ad Problematis itaque solutionem ita agimus:

Elevetur polus pro dati loci latitudine: locus
Solis in Ecliptica notetur atque ad Orientem ad-
ducatur, Index ad horam XII cycli. Volvatur
globus donec locus Solis notatus ad Occidentem
perueniat. Index monstrabit horas pro longitudi-
ne istius diei sive mora Solis supra Horizontem,
quæ annotentur. Deinde inueniatur quota sit
data hora abortu (vel occasu, si hora aliqua post
Solis occasum data sit) juxta propof. VI vel VIII.
Et instituaturs proportio hunc in modum: 6 horæ
annotatæ longitudinis totius diei; (vel noctis) ad
duodecim horas ita horæ ab Ortus inventa (vel
ab occasu, si noctis hora data sit) ad nummum
horarum Judaicarum.

PROPOSITIO XI.

*Data horâ Judaicâ, in dato die inuenire quota
sit hora juxta nostram numerationem. Sive, Da-
tam horam inæqualem reducere ad horam æqualem.*

Elevetur polus pro dati loci latitudine, locus
Solis in Ecliptica ex dato die inventus adducatur
ad Orientem, Index ad horam XII: & volvatur
globus ad Occidentem, ut in cylo horario longi-
tudo

tudo diei istius in horis æqualibus innotescat, quæ notetur. Deinde locus Solis adducatur ad meridianum, Index ad horam x i i & volvatur locus Solis ad Orientalem Horizontem, Index monstrabit horam ortus.

Deinde fiat, ut 12 ad datæ horæ Judaicæ numerum ita inventa longitudo totius diei ad alium numerum, qui si addatur ad horam ortus, habebimus horam à media nocte juxta nostram numérationem: si numerus harum horarum sit major duodenario, rejiciantur 12 & residuus numerus monstrabit horam à meridie.

Quæ in sermone Christi commemorantur horæ Judaicæ, et non possunt accuratè reduci ad nostræ numérationis horas, quoniam dies anni non additur itaque hora illius tertia potest esse nona nostra etiam decima, etiam octava. Ita undecima hœa ejus sermonis potest esse nostra septima, potest etiam esse sexta, vel quinta, nimirum prout vel circa solstitium æstivum vel hybernium vel circa æquinoctia dies ille sumatur. Quia autem de æstu diei sit mentio, verisimile est diem intelli circa solstitium æstivum.

PROPOSITIO XII.

Qui à loco aliquo Telluris progrediuntur vel navigant versus Ortum, totoque Telluris ambitu everso redeunt ad locum, unde abierunt, illi interea temporis una vice sapius Solem Orientem, Occidentem, meridiem, mediamque noctem habuerunt, quam incolæ loci, à quo profecti sunt, & ideo quando redeunt, numerant unum diem anni amplius, quam in isto loco, ita ut si in loco hoc sit dies 1 Januarii, illi numerent diem secundum Januarii, si illi diem Saturni, hi diem Solis, &c.

Et si bis, ter, quaterve Tellurem circumnavigaverint, totidem quoque dies amplius numerabunt.

Qui verò instituto cursu versus Occidentem circumnavigant totam Tellurem, illi interea temporis una vice rariùs Solem occidentem, orientem, meridiem, mediam noctem habuerunt, id eoque quando redeunt, numerant unum diem minus quam in loco isto, nempe 3 1 Decembris, si in loco fuerit 1 Januarii, & diem Saturni vel ultimam feriam hebdomadis agitent, si in loco hoc fuerit dies Solis vel feria prima novæ hebdomadis. Et si bis, ter, quaterve Tellurem circumnavigaverint, totidem quoque dies minus numerabunt.

Magnæ admirationis hæc res olim fuit ante aliquot secula nautis atque aliis, cum in Occidentem institutò cursu ubi in Orientales insulas pervenissent, ad alios Europæos die uno numerationes Calendariorum discrepare cernerent, adeoque alter alterum vel negligentia vel somnolentia insimularent. Sed frequentia hujus experientia minuit deinde admirationem atque causæ cognoscendæ occasionem Mathematicis suppeditavit.

Neque difficilem habet explicationem, modo Solis motus & meridiani locorum Telluris bene concipiatur atque certum diei initium ponatur. Dependet enim à circumvolutione diurna Solis, (non à motu ejus proprio, ut quidam existimaverunt) quam incipere possumus à quovis circulo, sed ad faciliorem intelligentiam commodius est à meridie eam incipere, ut dies sit ab uno meridie tempus ad sequentem meridiem, sive dum Sol à meridiani alicujus semicirculo ad eundem semicirculum redit.

Quoniam itaque qui versus ortum navigant,
per-

perveniunt ad loca, ubi Sol prius oritur & meridiem agit, quam in loco unde abeunt, inde fit, ut Sole in meridiano ejus loco ad quem pervenerunt, existente, incipiant novum diem numerare, ex. gr. 2 Januarii ubi in loco profectiois adhuc priorem diem numerant, nempe 1 Januarii (si in hoc solverint) eritque differentia unius vel alterius horæ. Hæc anticipatio quotidie accrescit, dum versus ortum proficiscuntur ita ut dimidiæ diei horas faciat, quando ad oppositum meridiani semicirculum pervenerunt. Hic enim illi meridiem novæ diei agent, quando in loco profectiois media adhuc nox præcedentis diei erit. Ubi deinde pervenerint ad Meridianum quindecim gradibus remotiorem, in illo constituti tredecim horis prius habebunt meridiem, quam in loco profectiois: Et ubi iterum ad quindecim gradibus remotiorem meridianum pervenerint, ibi quatuordecim horis prius habebunt meridiem, quam in loco profectiois, atque ita porro prout ad meridianos vel loca quindenis gradibus remotiora perveniunt, horis quindecim, sedecim, septendecim, &c. prius agent meridiem & novum diem numerare incipient quam in loco profectiois, ita ut tandem ubi ad ipsum locum redierint, tunc viginti quatuor horis prius meridiem novæ diei numerabunt, ubi in loco quidem etiam meridies est, sed quæ adhuc respondeat in numero illi meridiei, quam nautæ prioridie egerunt.

Contrario modo se res habet cum illis, qui versus occasum instituto cursu Tellurem circumnavigantes redeunt ad locum profectiois. Quo enim magis recedunt à loco hoc, eò serius Solem in meridie habebunt, quia sunt in remotiori meridiano, atque ideo serius incipient novæ diei numerationem

rationem quam in loco, unde profecti sunt. Ita ut tandem hæc postpositio, ut ita dicam, siue tardior appulsus in reditu integrum diem auferat.

COROLLARIUM I. Si duo ad idem tempus ex aliquo loco Telluris proficiscantur, unus versus ortum, alter versus occasum, atque tota tellure circumnavigatâ redierint simul ad locum illum, ille qui versus ortum instituit iter, duos dies amplius numerabit quam ille, qui versus occasum profectus est: & si bis Tellurem circumnavigaverint, quatuor dies amplius numerabit, si ter, sex dies, si quater, octo dies, & ita porro: Et tamen unum & idem est amborum tempus. Sed horum dies sunt longiores, illorum breviores.

COROLL. II. Idem eveniet si in quocunque loco Telluris obviam sibi mutuo fiant. Atque ex hoc primum & deinde sæpius deprehensa est hæc apparentia. Etenim cum Ferdinandus Magellanes directo in Occidentem cursu, inventoque freto penetrasset in Indiam, deprehensum est à nautis, qui ibi congregiebantur cum aliis Europæis ordinario itinere versus ortum istuc delatis, quod Calendaria siue numeratio dierum, integro die discreparet. Idem deinde ab omnibus, qui Tellurem circumnavigarunt ubi in Indiam pervenerant, observatum fuit.

COROLL. III. Hæc causa quoque est, quod in duobus locis vicinis diversæ diei numeratio observetur, nempe in Insulis Philippinis & Macao urbe maritima Chinæ, quam Lusitani tenent: Philippinas autem Hispani Castilienses, ut loquuntur. Etenim etsi sub eodem Meridiano jaceant, tamen in Macao numerant dies Calendarii prius quam in Philippinis, & quidem anticipatione unius diei, ita ut in Macao sit dies Solis, ubi in Philippi-

nis

nis est dies Saturni, atque dum in illo loco agunt Pascha, & carne licite atque avidè vescuntur, tum in Philippinis est dies Cinerum & abstinencia à carne, Pascha autem sequenti die celebratur. Causa hujus diversitatis est, quod Lusitani in Macao urbe agentes ex Europa versus ortum instituto cursu nempe ex India istuc pervenerunt. Hispani autem in Philippinis agentes, ex Europa versus occasum instituto itinere nempe ex America istuc pervenerunt. Itaque ex præcedenti Corollario inferitur, quoniam hic in Macao & Philippinis congregiuntur fere vel in eundem Meridianum perveniunt, quod illi uno die debeant superare dies posteriorum.

CAPUT XXX.

*De Diverso ortu, occasu; altitudine Solis
atque aliis apparentiis in diversis
Telluris partibus.*

PROPOSITIO I.

Globum terrestrem ita suspendere vel constituere, ut lucente Sole partes eæ globi illuminentur, quas Sol in ipsa Tellure quovis tempore illuminat, & simul appareat, quibus populis Sol oriatur ad singula temporis momenta, quibus occidat, quibus meridiem agat, quibus omnino occultatus sit: cui loco verticalis sit: ipsum quoque locum Solis in Ecliptica & diem anni: item horam loci.

Locus, in quo globus ita collocandus est, non retur in ipso globo & ad meridianum adducatur, fiatque in puncto meridiani imminente signum cretæ. Si itaque globus è fune suspendendus est, alligandus est funis huic meridiani puncto, si au-

rem

tem in loco aliquo firmiter collocari debet, trajiciendus erit stylus ferreus ex hoc loco per centrum globi usque ad oppositum punctum, atque hic ferreus stylus Horizontali plano arctè infigendus, ut immobilis sit.

Deinde globus juxta quatuor mundi cardines disponendus, nempe ut Septentrio globi Septentrionem Telluris vel cæli respiciat, quod inventâ lineâ meridianâ vel per pyxidem nauticam vel arcum magneticam facile est. Globo ita constituto, ad singula momenta diei, Sole lucente, licet in illo globo contemplari partem Telluris illuminatam, partem non illuminatam. Illa vero loca, quæ in medio semicirculo partis illuminatæ jacent, sunt illa, quæ meridiem habebunt ad illud temporis momentum. Illis, quæ in semicirculo Orientali discernente partem illuminatam à non illuminata sita sunt, Sol occidit: illis autem quæ in semicirculo Occidentali, discernente partem illuminatam à non illuminata, jacent, Sol oritur.

Ad locum Solis in Eclipticâ inveniendum, circa medium partis illuminatæ acicula vel gnomon sphericus hinc inde perpendiculariter moveatur, donec nullam umbram faciat, punctumque in globo notetur. Hoc enim ad meridianum adductum indicabit hic declinationem puncti Eclipticæ, in quo Sol est tempore observationis, unde pro conditione temporis, Verni nempe vel Æstatis, Autumni vel Hyemis ipse locus Solis cognoscetur, & inde anni dies.

Ipe quoque locus in globo, cui acicula infixâ nullam dedit umbram, est is, cui Sol verticalis est ad illud momentum temporis, & parallelus per hunc locum transiens exhibet omnia loca, quibus Sol fiet verticalis ad illum diem.

Porro

Porro ad inveniendam horam loci, in quo globus ita collocatus est vel suspensus, adducatur is locus, cui Sol verticalis est, ad Meridianum, Index ad horam $x\ 11$ cycli horarii, & volvatur globus, donec locus noster, sive, in quo globus situs est, ad meridianum perveniat. Index monstrabit horam.

Sed quoniam globi circumvolutio fieri non potest, quando is per stylum ferreum Horizontali plano affixus est, ideo commodum erit, si quadrans polo fuerit alligatus vel pars circulo peripheriæ $113\frac{1}{2}$. Hic enim arcus ad aciculæ locum adductus monstrabit declinationem Solis ab Æquatore, unde ipse Solis locus & dies anni invenietur. Idem arcus in Æquatore gradum ostendet, à quo si numerentur gradus usque ad æneum meridianum, & hi gradus in horas & horarum partes mutantur (quindecim gradus unam horam faciunt) habebitur hora nostri loci, siquidem Sol inter Occidentem & meridianum æneum, hoc est nostri loci consistat; sed si inter Orientem & meridianum, horæ inventæ auferendæ erunt à $x\ 11$, residuus numerus indicabit horas à media nocte.

Si globi polo adjunctus sit talis arcus æneus, qualem dixi, 113 gr. 30 min. poterit is ab extremitate usque ad 47 gr. hoc est ad Solis ab Æquatore recessum perforari atque trusatilis lamina ei inferi, quæ perpendicularem stylum gerat. Sic neque aciculâ neque gnomone sphærico opus erit, minusque errori obnoxia operatio.

PROPOSITIO II.

Globus terrestris ita collocatus, ut in priori propositione diximus, ostendit quoque Lunâ lucente quibus populis ad momentum quod vis temporis, quæ
supra

supra nostrum Horizontem commoratur, conspicua, quibus oriatur, quibus occidat, quibus verticalis sit.

Hæc omnia manifesta sunt ex præcedenti propositione.

PROPOSITIO III.

Quo loca Telluris à parallelo Solis ad aliquem diem sunt remotiora, eò minorem ad altitudinem eiusdem horis Sol elevatur supra illorum Horizontem.

Assumantur in globo loca ejusdem meridiani: hæc enim omnes horas easdem & simul numerant. Deinde describatur parallelus Solis pro quovis assumpto die. Et manifestum erit, quod quovis hujus paralleli punctum à locis remotioribus à parallelo meridiani longius distet, quam à locis propioribus.

Sol itaque existens supra paralleli istius puncta longius distabit à vertice locorum remotiorum meridiani, quam à vertice vicinorum, atque ideo minus erit elevatus supra illorum locorum quam eorum Horizontem.

PROPOSITIO IV.

Quò loca Telluris ab Equatore sunt remotiora, eò polo magis vicina, eò magis distant partes Horizontis, in quibus Sol die solstitii & die brumæ oriatur, ut etiam illa, in quibus occidit. Idem de Luna atque omnibus planetis verum est.

Assumantur loca quotvis diversæ distantiae ab Equatore, & polus elevetur pro singulorum latitudine, notenturque in Horizonte puncta, in quibus Tropicus Cancræ & Capricorni illum secant. Instituta comparatione perspicua erit veritas Propositionis. Eodem modo ostenditur hoc: Quo loca

loca ab Aequatore sunt remotiora, eo magis ab ortu æquinoctiali Sol distat in Oriente singulis anni diebus. Vocant autem Astronomi amplitudinem ortivam.

PROPOSITIO V.

Stella sita inter parallelum alicujus loci (extra Aequatorem jacentis) & polum, minus elevatur supra Horizontem locorum inter parallelum hunc & alterum polum sitorum, quam supra Horizontem locorum inter parallelum hunc & polum vicinum sitorum.

Potest in globo terrestri designari parallelus alicujus stellæ, vel tantum punctum notari pro stellâ, & assumpto aliquo loco remotiori à polo, quam stellâ, parallelus loci designari. Deinde assumpto alio loco versus alterum polum sito, inveniatur mora stellæ supra utriusque loci Horizontem. E manifesta fiet veritas Propositionis.

PROPOSITIO VI.

Loci in Aequatore sitis atque vicinis, Sol & stellæ rectè ascendunt supra Horizontem usque ad Meridianum atque iterum descendunt: sed locis extra Aequatorem sitis oblique ascendunt & descendunt, & quidem eò magis oblique, quo locus ab Aequatore remotior.

Describatur in globo aliquis parallelus Soli quales in globo quidam jam delineati sunt, nempe ipse Aequator, Tropicus Cancrî atque Capricorni, & quidam intermedii. Deinde poli constituantur in ipso Horizonte, ut Horizon sit locorum Aequatoris, & conspicuum erit, quod parallelorum puncta rectè ascendant ab Horizonte ad Meridianum. Deinde elevetur polus pro aliorum

qu

quorum vis locorum latitudine, & conspicuum erit, quod eo magis obliqui sint paralleli ad Horizontem, quo polus magis elevatur, hoc est quo lineus Horizon fit Horizon locorum magis ab Equatore remotorum vel polo vicinorum.

PROPOSITIO VII.

Quo locus ab Equatore est remotior eò majus tempus signa Zodiaci & reliquæ constellationes requirunt ad ortum suum, ut etiam ad occasum. Meridianos autem omnium locorum equali tempore transeunt.

Sumantur in globo duo loca inæqualiter ab Equatore distantia, atque pro singulis seorsim elevetur polus, atque observetur, quantum temporis signum aliquod Zodiaci requirat ad emersionem supra Horizontem, nimirum adducto initio signi ad Orientalem Horizontem Index collocetur ad horam XII, & volvatur globus, donec integrum signum ortum sit. Index monstrabit horas elapsas interea dum signum ortum fuit. Ex comparatione temporis perspicua erit veritas Propositionis.

PROPOSITIO VIII.

Dato die anni invenire vel exhibere in globo ea loca, quibus Sol oritur in plaga aliqua data.

De ipsa Tellure proponi & solvi debebat Problema hoc & sequentia, si scientificè ageremus. Ejus enim sunt affectiones. Sed de globo proponuntur, quia hic Tellurem repræsentat: etsi alia methodo in ipsa Tellure utendum esset, vel aliâ constructione, quæ mente tantum etsi comprehendi possit, sufficit, utut in praxi propter obstacula impediatur.

Idem hoc est cum eo Problemate: Dato die & plagâ,

plagâ, in qua Solis ortus observatus fuit, invenire latitudinem loci illius, five parallelum, in cuius aliquo puncto nos constitutos esse certum sit. Cuius solutionem tradidimus capite XXI. Propos. XI.

PROPOSITIO IX.

Dato die & horâ vel hora parte exhibere in globo eum locum, cui Sol verticalis tunc est.

Primò locus Solis ex dato die inventus notetur in globi Ecliptica, atque eò ad meridianum adductò fiat signum cretâ in superimminente puncto.

Deinde, invenientur ea loca, in quorum meridiano Sol existit ad datum temporis momentum, atque ea ad æneum meridianum adducantur.

Hiscæ factis locus ille, qui notato meridiani puncto subjacet, est quæsitus nimirum cui Sol verticalis est ad datum temporis momentum.

PROPOSITIO X.

Dato die & horâ exhibere in globo omnia loca, à quorum vertice ad illam horam Sol distet gradibus datis. Oportet autem datos gradus non esse plures quam centum & octuaginta.

Vel: Dato die & horâ exhibere in globo ea loca, supra quorum Horizontem Sol habeat datam altitudinem vel infra eum datam depressionem. Oportet autem altitudinem datam vel depressionem non esse maiorem nonaginta gradibus.

Inveniatur in globo locus, cui Sol ad datam horam verticalis est, atque hic ad meridianum adducatur, & quadrans affigatur puncto imminenti meridiani. Notetur in quadrante gradus distantia à vertice datus. Et circumductò quadrante, globo autem immoto manente, omnia loca Telluris, per quæ transit notatus quadrantis gradus,

sunt

sunt ea, à quorum vertice Sol datam distantiam vel supra quorum Horizontem datam altitudinem habet.

PROPOSITIO XI.

Ad datam datæ diei horam exhibere in globo omnia loca, quibus Sol tunc oriatur, quibus occidat, quibus in meridiano hæreat, & omnia quæ illuminantur, & quæ non illuminantur.

Inveniatur locus in globo, cui Sol ad datum tempus verticalis est: atque is locus ad Meridianum adducatur & polus elevetur pro illius loci latitudine, sive constituatur ille locus in vertice Horizontis. Sic omnia loca illa, quæ sub meridiani semicirculo existente supra Horizontem conspiciuntur, habebunt meridiem: illa vero loca, quæ in Horizontis semicirculo Orientali conspiciuntur, sunt ea quibus Sol tunc occidit: illis autem, quæ in Occidentali Horizontis semicirculo jacent, oritur Sol ad datum tempus. Atque omnia loca supra Horizontem existentia illuminantur à Sole, contra, omnia infra eum sita, carent tunc Solis præsentia.

NOTA. Problema intelligendum est de ipso centri Solaris corporis ortu atque occasu. Nam corpus ipsum solare illustrat partem Telluris aliquanto majorem hemisphærio, quæ quanta sit, sequenti Propositione investigabimus.

COROLLARIUM. Licet itaque exhibere loca, quibus Sol oritur, vel occidit, cum nobis est meridies vel media nox. Et contra, illa quibus occidat, cum nobis oritur, quibus tunc media nox, & quibus meridies. In hisce adolescentes se ipsos exerceant.

PROPOSITIO XII.

Datâ semidiametro Solis, Telluris, atque distantia Solis à Tellure cognita, investigare partem Telluris, quam Sol illuminat.

Sit Telluris semidiameter AB, AC. A centrum. ABCDE circulus Telluris maximus: S centrum Solis. SL, SO semidiameter Solis, Radii tangentes globum Solis & Telluris sint LB, OC. Hi enim partem illuminatam à non illuminatâ distinguunt: itaque arcus BDC repræsentat partem superficiæ Telluris illuminatam, & arcus BEC partem non illuminatam. Tangentes LB, OC producantur donec concurrant in R: & BN parallela AS. In Triangulo itaque BNL dantur NL, excessus SL supra AB, & BN æqualis distantia AS: angulus BLN est rectus, quia BL tangit circulum. Quare in Triangulo BLN invenietur angulus NBL, juxta proportionem hanc: Vt BN ad NL ita sinus totus ad Tangentem anguli NBL. Porro duo anguli LNB, NBL simul æquantur uni recto sive 90 gr. & BNL est æqualis angulo ASL, sive BAR.

Itaque arcus anguli NBL est æqualis arcui BM, quo PB major est quam 90 gr. sive quam PM. Ita quoque arcus PC.

Si semidiametrum Solis Ptolemaicam assumamus $5\frac{1}{2}$ semidiametrorum Telluris: distantiam verò AS 1168 Semidiametrorum, hisce inquam positis, invenietur arcus MB 13 minutorum, quot Sol illustrat de ambitu Telluris ultra semissim MPQ.

COROLLARIUM. Quando itaque Solis centrum oritur aliquibus locis, tunc limbus ejus oritur populis, qui habitant in parallelo Horizontis
tredecim

tredecim minutis infra Horizontem sito. Eodem modo illis, quibus occidit. Et quando centrum occidit, tunc limbus adhuc manet conspicuus, donec centrum occidat populis, qui tredecim minutis remoti sunt à nostro Horizonte.

PROPOSITIO XIII.

Datâ montis altitudine, investigare, quanto citius in vertice ejus Sol videatur oriri, quam ad pedem vel radicem montis, & quanto tardius occidere.

Ex data altitudine inveniatur per Proposit. v. cap. ix. intervallum vel arcus ex quo vertex montis conspici potest, sive in cujus termino linea à vertice montis ita ducta ut tangens sit Telluris, eam stringit: Hæc enim linea indicat radium primum, qui à Sole ad verticem montis pervenire potest directo itinere.

Porro punctum illud Telluris, in quo à linea hæc tangitur, est is locus, cui Sol oritur, quando in vertice montis conspici incipit. Et arcus, inter illud punctum & radicem montis interceptus est æqualis illi, quo Sol deprimitur adhuc infra Horizontem radice montis, quando in vertice conspicuus fit.

Problema itaque huc reductum est: Datâ depressione Solis infra Horizontem invenire tempus, quod consumitur dum Sol ab illa depressione ad Horizontem movetur. Ex quo simul manifestum est, diversis anni diebus tempus hoc esse diversum. Notetur itaque in globo locus radice montis, & polus elevetur pro ejus latitudine, quadrans affigatur vertici. Locus Solis ex assumpto aliquo die inventus in Ecliptica notetur, punctum quoque Eclipticæ oppositum loco Solis. Deinde hoc oppositum punctum adducatur ad Occidentalem

talem Horizontem, & Index ad horam XII collo-
cetur. His factis in quadrante notetur gradus de-
pressionis antea inventus & volvatur punctum
oppositum supra Horizontem donec habeat alti-
tudinem æqualem arcui depressionis (quod ex ap-
plicatione Quadrantis cognoscetur.) Ita locus
Solis infra Orientalem Horizontem habebit de-
pressionem eam. Et index in cyclo horario osten-
det tempus interceptum inter hanc depressionem
ejus & emerfionem supra Horizontem.

Sed quia in hoc negotio ferè minutis tantum
agitur, ideo præstat calculo, quam globi admini-
culo hæc investigare. Invenietur autem, si altitu-
do montis ponatur trium stadiorum sive $\frac{3}{4}$ millia-
ris Germanici, quod arcus depressionis sit trium
circiter graduum, & si latitudo radices montis sit
38 gr. locus autem Solis in medio circiter Leone,
tempus, quo in vertice prius Sol conspicietur,
quam ad radicem montis, esse tantum tredecim
minutorum horæ. Unde patet, minus verisimile
esse, quod Aristoteles de summis Caucafi partibus
refert, & Plinius de Casii montis fastigiis, nimi-
rum illa mane ante ortum Solis & vesperi post
occasum ad tertiam usque noctis partem illustrari
radiis solaribus. Quanta autem altitudo requira-
tur ad hoc, docebimus sequenti Propositione in-
venire.

PROPOSITIO XIV.

*Dato tempore, quo in vertice montis Sol prius
conspicitur, quam ad montis radicem, invenire
montis altitudinem.*

Elevetur in globo polus pro latitudine radices
montis & notato puncto quod loco Solis in Eccli-
ptica opponitur inveniatur arcus depressionis So-
lis

lis infra Horizontem pro dato tempore. Deinde ex arcu hoc tanquam intervallo, ex quo vertex montis videtur, investiganda est montis altitudo per probl. iv. capit. ix.

PROPOSITIO XV.

Dato loco Luna in Zodiaco, una cum latitudine ejus, invenire vel exhibere in globo omnia illa loca, quibus Luna verticalis fit in ejus diei circumrotatione.

Locus Lunæ ex ephemeridibus excerptus in Ecliptica notetur. Deinde quadrantis una extremitas applicetur polo Eclipticæ, altera puncto in Ecliptica notato sive loco Lunæ, & numerentur in quadrante gradus latitudinis Lunæ, fiatque ad numerationis terminum in globo signum. Deinde hoc ad meridianum adducto atque cretâ applicatâ describatur parallelus, quem Luna eo die circumvolutione sua describet. Et omnia loca in hoc parallelo sita sunt ea quæ quærentur.

Eodem modo cum reliquis planetis agimus si detur eorum longitudo & latitudo.

PROPOSITIO XVI.

Dato loco Luna in Zodiaco & latitudine, & die anni invenire horam, qua in loco aliquo dato oriatur, quâ occidet, in qua meridiem aget.

Elevetur polus pro dati loci Telluris latitudine. Locus Solis ex die anni inventus notetur in Ecliptica. Deinde signetur etiam in globo punctum pro loco Lunæ, ut in Propos. præced. monstravimus. Hisce factis, adducatur locus Solis ad meridianum, Index ad horam xxi cycli. Et volvatur globus donec locus Lunæ oriatur, vel in meridia-

no sit, vel occidat. Index enim in cyclo monstrabit horam ortus, meridiei atque occasus.

Eodem modo agimus cum aliis Planetis, Saturno, Jove, &c.

PROPOSITIO XVII.

Exhibere in globo omnia illa loca, quibus Luna oriatur ad datam horam, & quibus in meridiano sit, & quibus occidat, si Lunæ longitudo & latitudo nota sit.

Notetur in Ecliptica locus Solis & locus Lunæ, ut in præcedentibus monuimus: & adducto loco Solis ad meridianum, atque Indice ad horam XII cycli, volvatur globus donec locus Lunæ ad meridianum perveniat, & in cyclo observentur horæ, quæ annotentur, vel in ipso cyclo fiat signum: Indicant enim, quanto tardius Luna ad meridianum quemlibet perveniat quam Sol. Porro locum Lunæ constituto in meridiano, notetur in hoc punctum imminens: vel describatur parallelus Lunæ. Hisce factis adducatur locus Solis ad meridianum & Index ad horam XII, volvatur globus donec inveniat hora, in qua Luna attinget meridianum hujus loci quemlibet perveniat: Notetur etiam meridiani punctum, quod imminet loco Lunæ. Porro locus is, cujus hora datur, adducatur ad meridianum, Index ad horam datam: Volvatur globus donec Index monstrat XII meridiei. Sic loca meridiani semicirculo subiecta sunt illa, quibus Sol meridiem agit ad datam horam: Index reducatur ad XII, atque iterum volvatur globus donec Index perveniat ad notatam antea in cyclo horam. In hoc globi situ, locus qui notato meridiani puncto subjacet, est ille, cui Luna verticalis tunc est.

Hic

Hic itaque locus constituatur in vertice Horizontis, omnia loca meridiani semicirculo superiori subiecta sunt illa, quibus Luna tunc in meridiano est: illa vero loca, quæ in Orientali Horizontis semicirculo conspiciuntur, sunt quibus Luna tunc occidit: denique illis locis, quæ in Occidentali Horizontis semicirculo spectantur, Luna oritur ad datum temporis momentum.

Eodem modo agimus cum reliquis Planetis, Saturno, Jove, &c. si eorum longitudo & latitudo nota sit.

PROPOSITIO XVII.

Dato die & hora, qua Eclipsis Luna futura est vel fuit, exhibere in globo omnia loca, qua illam videre poterunt, atque in specie illa, quibus Luna tunc in meridiano erit, quibus eclipsata orietur, quibus eclipsata occidet.

Hoc problema à præcedente parum differt: at multò faciliorem solutionem habet.

Ex dato die inveniatur locus Solis, nisi is jam cognitus sit, atque in Ecliptica globi notetur punctum illi oppositum. Hoc enim est locus Lunæ.

Inveniatur locus in globo, cui Sol ad datam horam verticalis est: & hujus loci antipodes inveniuntur juxta Propos. vi. cap. xxviii. Hic enim locus erit cui Luna Eclipsata verticalis est. Constituat hie in vertice Horizontis polo elevato vel depressò pro illius loci latitudine. Sic loca omnia globi, quæ supra Horizontem sunt, poterunt videre Eclipsin illam: Et quæ sub meridiano æneo jacent, videbunt illam in meridiano quæ in Orientali Horizontis semicirculo jacent, vide-

bunt eam in occasu five cum Eclipsi occidentem : quæ verò in Occidentali Horizontis semicirculo jacent, videbunt eam in Ortu, five Lunam eclipsatam oriri.

Verum cum Eclipsis non in uno horæ momento fiat, sed aliquot horas duret, ideo solet dividi in initium, medium & finem, & horum momenta annotari : itaque de mediæ Eclipsis tempore potissima consideratio suscipienda est.

Præterea cum Luna sit minor quam Tellus, illustrabit partem minorem quam est hemisphærium, à minoris quoque partis incolis simul videtur, ita ut iis qui in Orientali Horizontis semicirculo jacent, non sit amplius conspicua : illis vero qui in Occidentali, nondum appareat : sed concipiendus est quidam circulus Horizonti parallelus, qui partem illustratam terminet. Quantum autem differat hæc pars ab hemisphærio, five quanta sit ea superficiæ Telluris portio, investigabimus sequenti Propositione.

PROPOSITIO XIX.

Data semidiametro Lunæ atque Telluris & distantia earum, invenire quanta portio Telluris à Luna illustretur in plenilunio.

Absolvitur Problema hoc eodem modo, quo in Propositione XI. usi sumus. Sit enim Telluris centrum S, circulus maximus, qui superficiem representet, O F L H. Lunæ centrum A, circulus maximus C P B Q. Ducantur tangentes L B, O C. Hæ enim sunt ultimi radii, qui à Luna ad Tellurem pervenire possunt, atque ideo arcus O H L denotabit partem superficiæ Telluris eam, quæ à Luna illustratur, & cujus incolæ Lunam simul videre possunt, quæ quanto minor sit quam hemisphæ-

misphærium, id cognoscemus si angulum HSL
sive arcum HL invenerimus. Ducatur BN ex
B parallela ipsi AS, erit BA æqualis SN, & NL
excessus semidiametri Telluris SL supra semi-
diametrum Lunæ AB, & BN æqualis est distan-
tiæ AS; angulus verò NLB rectus sive 90 gr.
Itaque in Triangulo rectangulo NBL invenie-
mus angulum NBL hac proportionem. Ut NB
ad NL ita sinus totus ad sinum anguli LBN,
cujus arcus est is, quo HL differt ab arcu 90 sive
quadrante peripheriæ Telluris. Et tanto inter-
vallo distat à circulo maximo peripheria partem
Telluris à Luna illuminatam terminans. Pona-
mus semidiametrum Lunæ continere partes 4
qualium semidiameter Telluris continet 15 sive
 $\frac{4}{15}$ semidiametri Telluris: Distantia verò maxima
Lunæ à Tellure in plenilunio est 64 semidiamete-
trorum Telluris: Itaque NL erit $\frac{15}{4}$ eritque insti-
tuenda proportio hæc: ut 64 ad $\frac{15}{4}$ ita 10000000
ad 114583, qui est sinus 39 min. Itaque arcus HL
minor est quam 90 gr. minutis 39, ac proinde
89 gr. 21 min.

Loco itaque, cui Luna verticalis est, in vertice
Horizontis constituto, populi quibus tunc Luna
oritur & occidit, non erunt illi, qui in ipso Hori-
zonte conspiciuntur, sed qui in parallelo Hori-
zontis, minutis triginta novem ab eo distante.

PROPOSITIO XX.

*Data stella cujusvis declinatione, exhibere in
globo terrestri omnia loca, quibus ea stella vertica-
lis sit in circumvolutione diurna.*

Numerentur in æneo meridiano gradus datæ
declinationis ab Equatore, & in termino nume-

rationis fiat signum cretâ, vel applicatâ cretâ, & globo circumrotato designetur parallelus in globo. Omnia loca in hoc parallelo sita, vel notatum meridiani punctum transeuntia sunt illa, quorum verticem stella illa singulis circumvolutionibus diurnis aliquo temporis momento occupabit.

PROPOSITIO XXI.

Datâ stellæ alicujus ascensione rectâ & datâ horâ data diei, exhibere in globo terrestri omnia loca, in quorum meridiano stella ea existit ad datam horam.

Numerentur in Æquatore dati gradus ascensionis rectæ stellæ, & fiat signum cretâ. Locus quoque Solis ex dato die inventus adducatur ad meridianum, & notetur gradus Æquatoris in meridiano existens. Arcus Æquatoris inter duo hæc notata puncta interceptus annotetur. Vel quod idem est in horas & horarum scrupula mutetur: indicant enim tempus, quod intercedit inter Solis & stellæ illius appulsus ad quemlibet meridianum.

Hiscæ factis inveniantur loca, in quorum Meridiano Sol existit ad datam horam vel horæ momentum, atque Indice ad XII collocato, volvatur globus donec index monstret horam antea notatam vel donec annotati gradus Æquatoris transierint meridianum. In hoc situ globi omnia illa loca quæ meridiano subjecta conspiciuntur, sunt illa quæ quærentur, nimirum in quorum meridiano stella illa erit ad datum tempus.

PROPOSITIO XXII.

Datâ stellæ declinatione & ascensione rectâ, & dato quovis diei tempore exhibere in globo. 1. illum locum

locum cui stella tunc verticalis est. 2. omnia illa loca, supra quorum Horizontes stella illa tunc erit, & illa, quorum infra Horizontes tunc erit: item illa, in quorum meridiano meridiei erit, & in quorum meridiano media noctis: item omnia illa loca, quibus stella tunc orietur, & omnia illa, quibus tunc occidet.

Primo, ex ascensione recta inveniantur loca, in quorum meridiano stella existit ad datum tempus, atque ea meridiano æneo subiecta maneant. Deinde ab Equatore versus polum numerentur gradus datæ declinationis, atque punctum globi, quod subjicitur termino numerationis, notetur. Hoc enim est locus, cui stella verticalis erit illo tempore. Constituatur illud in vertice Horizontis, polô elevato pro illius latitudine. Sic illa loca, quæ meridiani semicirculo superiori subiecta sunt habebunt eam stellam dato tempore in meridiano meridiei: Sed quæ loca in meridiani semicirculo inferiori conspiciuntur, habebunt eam in meridiano mediæ noctis: Atque illa loca, quæ in Orientali Horizontis semicirculo conspiciuntur, sunt ea quibus stella ad id tempus simul occidit: illis verò, quæ in Occidentali Horizontis semicirculo jacent, stella ea tunc simul orietur.

PROPOSITIO XXIII.

Exhibere in globo terrestri omnia loca, quibus Sol, Luna, atque omnes stella tanto tempore infra Horizontem occultantur, quanto nobis vel alteri dato loco supra Horizontem commorantur.

Noster locus vel aliûs datus locus adducatur ad meridianum, & inveniatur parallelus Antæcorum. Omnia loca in hoc parallelo sita sunt ea, quæ quærentur, ut in globo monstrari potest,

si polus eleuetur pro dati loci & deprimatur pro huius paralleli inventi latitudine.

PROPOSITIO XXIV.

Causam ostendere, cur dies celerius augeantur & minuantur circa æquinoctia, tardius circa solstitia, ubi multis diebus nullum videtur esse incrementum vel decrementum, idque excepto Æquatore, in omnibus Telluris locis, eo tamen magis, quo ab Æquatore sunt remotiora.

Ex. gr. Assumamus triginta dies ante æquinoctium vernum, (ab xx Februarii ad xxi Martii) & triginta dies post Solstitium hybernum sive Solstitium Capricorni (à xxi Decembr. ad xxi Januarii) Ostendenda est causa, cur excessus diei xxi Martii (sive mora Solis supra Horizontem) supra longitudinem diei xx Februarii sit multo maior, quam excessus diei xx i Januarii supra diem xxi Decembris.

Locus Solis pro singulis illis quatuor diebus notetur in globi Ecliptica, nempe 1 gr. piscium, Arietis, Capricorni & Aquarii, atque describantur paralleli Solis, quorum duo jam existunt in globo, nempe Æquator ipse & Tropicus Capricorni. Conspicuum itaque erit, quod Æquator sive parallelus, Solis in 1 gr. Arietis multò longiori intervallo absit à parallelo Solis in 1 gr. Piscium, quam parallelus Solis in 1 gr. Aquarii à parallelo ejusdem in 1 gr. Capricorni existentis. Inde fit, ut non multò major portio paralleli 1 gr. Aquarii exstet supra Horizontem, quam paralleli 1 gr. Capricorni sive ipsius Tropici Capricorni, istæ autem portiones denotant moram Solis supra Horizontem illis diebus. At multò major portio Æquatoris sive paralleli 1 gr. Arietis extat
supra

supra Horizontem quam paralleli 1 gr. Piscium. Quoniam itaque arcus hi extantes supra Horizontem denotant moram Solis supra Horizontem, hæc autem est ipsa dierum longitudo, inde colligimus magnum vel parvum incrementum declinationis Solis ab Æquatore (sive punctorum Eclipticæ) esse causam istius inæqualis incrementi dierum. Verum in locis ipsius Æquatoris omnes dies æquales sunt, adeoque nullum hic est incrementum vel decrementum: etsi sol circa dies Solstitiorum stare, hoc est altitudinem meridianam parum mutare videatur.

Majorem autem reperiri inæqualitatem decrementi istius & incrementi dierum, quo loca ab Æquatore sunt remotione, manifestum fiet, si polus elevetur pro diversorum locorum ab Æquatore distantia, & in utroque situ considerentur arcus parallelorum elevati supra Horizontem.

PROPOSITIO XXV.

Locis Zona Torrida in ipso Æquatore sive medio Zona Torrida sitis Sol multo celerius à vertice recedit, quam locis quæ vicina sunt Tropico Cancræ vel Capricorni.

Notetur in meridiano æneo globi gradus aliquis ex. gr. quintus ab Æquatore. Et assumpto alio loco in Zona Torrida, ex. gr. cujus latitudo sit 18 gr. adducatur hic ad meridianum, fiat signum cretâ in hoc & numerentur ab eo versus Tropicum gradus quinque in meridiano æneo, atque iterum hic fiat, signum creta. Ostendendum est, quod Sol paucioribus diebus removeatur à locorum Æquatoris vertice gradibus quinque in meridie, quam à vertice alterius loci totidem gradibus.

Volva-

Volvatur globus donec aliquod Eclipticæ punctum veniat sub notato meridiani puncto *Æquatori* vicino, & numerentur gradus Eclipticæ inter 1 gr. *Arietis* vel *Libræ* & inter illud punctum, atque arcus hic annotetur: Deinde volvatur globus iterum, donec transeat aliquod Eclipticæ punctum per notam in meridiano factam pro loco, atque hoc Eclipticæ punctum notetur: rursus volvatur donec per punctum quinque gradibus remotum & notatum aliud Eclipticæ punctum transeat, quod iterum notetur: atque arcus inter duo postrema Eclipticæ puncta numeretur qui multo major deprehenderetur, quam ille qui prius annotatus fuit, & proinde Sol plures dies in hoc arcu hærebit quam in isto arcu, adeoque tardius à vertice loci secundi recedet, quam à vertice loci in *Æquatore* assumti.



GENERALIS GEOGRAPHIÆ

LIBER TERTIVS,

nempe


COMPARATIVA PARS

De Affectionibus ex comparatione locorum.

CAPVT XXXI.

De Longitudine loci.

DEFINITIONES.

- I.  *Irculus longitudinis loci alicujus in Tellure* dicitur circulus transiens per locum illum & ambos Telluris polos. Dicitur etiam *Meridianus*, quia loci meridianus & circulus longitudinis loci sunt unus idemque circulus, sed ratione distinguuntur, quoniam Meridianus respicit ad motus stellarum, circulus longitudinis ipsam Telluris extensionem, nullâ habitâ cælestium motuum ratione. Verum frequentata magis & commodior est usurpatio Meridiani, ideoque nos etiam hac voce utemur. In Globis & Mappis conspicui sunt, per denarios quosque Æquatoris gradus transeuntes.
2. *Longitudo loci* dicitur distantia Meridiani ejus loci à certo aliquo Meridiano, sive dicitur arcus Æquatoris aut paralleli interceptus inter Meridianum illius loci & certum aliquem Meridianum. Hic Meridianus, à quo reliquorum locorum Meridiani numerantur, ab occasu versus Orientem

tum dicitur *Meridianus primus*. *Longitudo* autem *ipsius Telluris* dicitur ejus extensio ab Occidente in Orientem concepta secundum lineam *Æquatoris*. *Meridianus primus* in Mappis & Globis magnitudine & colore præ reliquis insignis est atque in oculos incurrit.

3. *Distantia* unius loci ab altero dicitur linea brevissima inter duo illa loca in Telluris superficie intercepta.

4. Punctum quodvis in Globo & Mappis locum aliquem Telluris verè repræsentare & exhibere dicitur, si ad reliqua Mappæ puncta eum habeat situm & distantiam, qualem locus Telluris, quem repræsentare debet, ad alia Telluris loca, quæ à reliquis Mappæ punctis repræsentantur.

PROPOSITIO I.

Dimensionis Telluris sive extensionis ab Occidente in Orientem vel secundum Æquatorem, Natura nullum posuit initium vel terminum, sed omnia loca & singula possunt assumi pro initio, atque primus Meridianus in eis constitui.

Ad hæc rectius intelligenda, res paulo altius repetenda est, quoniam quidam mysteria nescio quæ hic latere existimant. Omnis superficies tam plana quam curva duabus dimensionibus vel extensionibus (sicut linea unâ & corpus tribus) mensuratur & determinatur, ut notum est ex Geometria & communi vita, quarum extensionum una dicitur longitudo superficiei vel figuræ illius, altera dicitur latitudo, atque altera ad alteram perpendicularis concipitur. Neque hæ extensiones naturâ suâ differunt, sed eam quam pro longitudine assumimus, licet assumere pro latitudine, & contra: plerunque tamen si duæ hæ extensiones sine inæqua-

inæquales, longissimam assumimus pro longitudine, brevissimam pro latitudine.

In figuris autem ordinatis, ut Triangulo æquilatelo, Quadrato, &c. duæ illæ extensiones omnino æquales sunt neque ulla differentia est inter longitudinem & latitudinem. Est autem figura superficiei Telluris Sphærica, & latitudo à longitudine non differt revera, sed tantum juxta nostros conceptus, quales nos in ea concipimus distinctioris cognitionis ergo. Duæ verò illæ extensiones in Sphærica superficie concipiuntur commodissimè ita (ut in aliis curvis superficiebus) si primò in ea assumatur peripheria semicirculi ducta ab uno puncto ad oppositum, atque hæc linea constituatur una extensio superficiei illius, deinde pro altera extensione assumenda erit peripheria priorem peripheriam in medio secans ad angulos rectos (ita enim in omnibus figuris sumuntur longitudo & latitudo) atque hæc circa totam superficiem extendi donec in seipsam redeat concipitur, ut ita superficies curva in planum extensa cogitetur. Quoniam itaque primò assumpta peripheria sive extensio est tantum semicirculi, erit illa latitudo globi: posterior autem sive altera extensio erit longitudo globi, quoniam longior est, quam prior extensio, quippe quæ in seipsam redit & integri circuli peripheria est. Alii appellationis aliam afferunt causam, nimirum quod minor pars Telluris à polo ad polum cognita esset antiquis, major vero ab Occidente in Orientem.

Porro in globorum superficiebus licet quamvis semiperipheriam assumere pro latitudinis extensione, atque ejus perpendicularem pro longitudinis extensione, & proinde in Telluris quoque superficie idem facere liceret: verum quia commodius

dius est ad memoriam, si assumantur peripheriæ, quarum termini vel ipsæ etiam peripheriæ præ reliquis peripheriis in superficie ista aliquid peculiare & insignem proprietatem habent, ideo in Telluris superficie pro latitudinis extensione assumpta est meritò peripheria aliqua inter polos Telluris ducta, & quoniam huic peripheriæ nulla alia est perpendicularis, quæ simul per ejus medium transeat, præterquam Æquatoris linea, ideo pro longitudinis Telluris extensione assumendus fuit ipse Æquator.

Sic itaque, ut puto, clarè satis explicatum, propter quam causam latitudo Telluris inter polos, pro longitudine ipsa Æquatoris lineâ fuerit assumpta.

Hæc latitudo & Longitudo Telluris non est confundenda cum latitudine & longitudine locorum, sive punctorum in Tellure, ideo autem eisdem vocabulis exprimuntur, quia latitudo locorum sive punctorum sumitur in peripheria latitudinis Telluris ipsius, atque ejus pars est: longitudine verò locorum sive punctorum sumitur in peripheria longitudinis Telluris, nempe in ipso Æquatore atque ejus parallelis.

Impropria tamen est hæc usurpatio, quia latitudo & longitudine proprie, ut dictum est, figuris & superficiæ tantum conveniunt: punctum verò nec longitudinem nec latitudinem habet. Atque istam homonymiam sive diversam usurpationem vocabulorum. Latitudinis & Longitudinis adolescentes observare debent, quia frequenter in lectione Geographorum occurrunt, nimirum *alia est usurpatio & significatio, cum dicimus Longitudo & Latitudo Hispaniæ, Galliæ, &c.* quia tunc in propria significatione sumuntur hæc vocabula: Est enim

Hispa-

Hispania figura, sicut etiam Gallia & aliæ provinciae, ac proinde longitudo tunc denotat Hispaniæ longissimam extensionem, latitudo verò brevissimam, quæ usurpatio convenit cum ea, quâ tot Telluris superficiei latitudinem & longitudinem assignari antea diximus. *Alia verò est significatio*, cum dicimus, latitudo loci istius vel longitudo, si per locum intelligamus punctum aliquod vel urbem aut insignem locum, quia tunc latitudo denotat distantiam loci ab Æquatore, longitudo verò distantiam à certo meridiano. Et meo quidem iudicio, confusionis vitandæ ergo præstaret hac usurpatione vocabulorum latitudinis & longitudinis abstinere, & pro illis adhibere hæc, Distantia ab Æquatore, Distantia à primo Meridiano: verum cum tot jam seculis hæc homonymia recepta sit, ideo vix abolere eam poterimus. Et ideo nos quoque in sequentibus vocabula hæc, latitudo & longitudo loci, usurpabimus pro distantia loci ab Æquatore, distantia Meridiani loci à Meridiano primo.

Porrò latitudo loci, sicut latitudo totius Telluris, habet insignia Telluris puncta pro initio numerationis, nempe polos & Æquatorem: at longitudo Telluris quia circa totam Tellurem extenditur atque in seipsam recurrit, nullum habet certum initium & finem, sed ubique est initium, ubique finis, quoniam peripheria infinitæ lineæ similis est. Quare quodlibet Æquatoris punctum potest assumi pro initio longitudinis Telluris, & Meridianus per illud punctum transiens pro primo Meridiano, à quo Meridiani omnium Telluris punctorum numerentur vel longitudo eorum supputetur.

Cur autem in singulis Telluris punctis duas illas

las distantias, nempe unam ab Æquatore, alteram à certo Meridiano, inquiramus, illud Propositione III dicemus.

PROPOSITIO II.

Primum Meridianum & initium numerationis pro longitudine locorum constituere & determinare in globo Telluris.

Diximus in præcedenti Propositione, quod singula Æquatoris puncta possint assumi pro initio extensionis Telluris secundum longitudinem, atque ab ejus meridiano numerari locorum longitudes. Sed quoniam non simul omnia assumi possunt, sed præstat unum figere principium sive eligere certum aliquod punctum, (id autem arbitrio hominum relinquitur) ideo Geographi certum in Telluris superficie locum sumserunt per quem ductus Meridianus primus esset, atque in Æquatore, ubi hunc secat, initium numerationis longitudinis locorum indicaret. Verum non eundem omnes locum sumserunt sive eundem pro primo meridiano sed diversos. Ptolemæus elegit vicinum Fortunatis Insulis, quas uno tantum gradu removeret à primo, & hinc versus Orientalem plagam per Africam atque Asiam numerat Meridianos reliquos & longitudinem locorum. Cum enim liberum esset eligendi initii arbitrium maluerunt Veteres simul habere rationem portionis Terræ, quam habitari ab hominibus sciebant, quæ portio non in seipsam recurrit, sicut ipsius Telluris superficies, atque adeo in ea portione potest assignari initium longitudinis atque finis in alio puncto. Quoniam itaque Ptolemæi seculo insulæ Fortunatæ erant ultimæ in Occidentali plaga ex omnibus Terris, quas tunc cognitæ habebant,

bebant, ideo ab eo termino Ptolemæus incepit numerare longitudinem Terræ & ad Orientales regiones progressus finem numerationis Meridianorum fecit in ultimo Asiæ littore Sinensi.

Sed cum ante aliquot secula diu post Ptolemæi ævum inventæ essent plurimæ regiones Terræ habitatæ versus Occidentem atque ingens illa America detecta, tunc Geographi nonnulli promoverunt initium numerationi longitudinis versus Occidentem. Quidam enim meridianum Insulæ S. Nicolai, quæ una est ex adjacentibus promontorio Viridi Africæ, primum fecerunt; Hondius vero insulam S. Jacobi in Mappis suis elegit.

Alii Meridianum insulæ unius ex Flandricis sive Azoribus, quæ del Corvo dicitur, pro primo assumerunt, propterea quod in hac insula & vicino mari acus Magnetica nullam declinationem à linea meridiana habere deprehensum sit, & ipsam Septentrionalem atque Australem Cardinem monstrare. Hoc initium Mercator in suis Tabulis observat.

Sed cum neque alia loca desint in Tellure, ubi acus Magnetica id faciat, neque in omnibus Meridiani hujus loci id faciat, ideo alii Geographi existimarunt, illam causam non esse sufficientem, & quidam in littore procurrente Brasiliæ primum Meridianum defixerunt, recentiores, imprimis Belgæ, ad Fortunatas seu Canarias Insulas regressi elegerunt in una illarum dicta Teneriffa montem, qui altissimus censetur totius Telluris, appellatum el pico de Teneriffa, atque ab hujus Meridiano instituendam esse censent longitudinis locorum numerationem, propterea quod insigne & multis seculis durabilem locum ad istud negotium existiment eligendum esse, de quo sequenti.

quentibus seculis non facile dubitatio apud posteros existat, & præterea non sine gravi ratione Ptolemaicam & tot seculis observatam assignationem deferendam esse. Galli hodie ab anno 1634 primum Meridianum observant eum, qui per Occidentalem partem insulæ Ferri (de Ferro) una è Canariis transit, quod initium ipse Rex Galliarum Ludovicus XIII jussit suos nautas & Geographos observare.

Astronomi quoque diversa loca pro primo Meridiano assumunt. Tychonici enim ad Urburgum situm in insula Freti Danici eum solent designare atque ad illum locum cælestes motus supputare, atque inde ad alia loca accommodare. Alii alia initia tenent, prout alium atque alium Ephemeridum scriptorem sequuntur. Scriptores enim Ephemeridum, ut etiam Tabularum Planetariorum supputatores ad sui loci quisque meridianum solent supputare motus Planetarum & apparentias, ut Origanus ad Francofurtensem, Maginus ad Venetum (quia Patavina Academia Venetorum est) Eicstadius ad Stetinensem. Lansbergius in suis Tabulis ponit Goesam Zeelandiæ. Røinholdus in Prutenicis Regionem montem Borussiarum.

Verum enim vero ut libere, quod sentio, dicam, omnis hæc autorum discordia sine ulla sufficienti ratione enata est, ita ut illi qui primi Ptolemaicum initium loco moverunt, culpandi sint. Perinde enim est, quodcumque hujus numerationis initium assumatur in Tellure, sive locus sit insignis sive ultimus ad Occidentem sive ad Orientem, modo reliquorum locorum situs & distantia ad eum accuratè cognoscatur, & illa varietas initii meridianorum multis Confusionibus & difficultatibus Geographicorum scriptorum lectio-

nem

nem gravat. Quoniam tamen Magnetis declinationis à linea meridiana cognitio magnæ est utilitatis & dignitatis, atque ea declinatio crescit ad certum usque meridianum & deinde rursus decrescit, non existimo incommodum esse ad observationes declinationis Magneticæ & faciliorem comparisonem augmenti & decrementi illius, si assumatur primus meridianus ille, in quo acus Magnetica nullam vel exiguam facit declinationem, modo talis aliquis meridianus daretur, in cuius nempe omnibus locis vel saltem plurimis acus magnetica id faceret.

Cæterum cum Belgæ hoc tempore observent montem Teneriffæ pro initio longitudinis atque hodie in omnes Telluris partes navigent, ideo conveniens videtur idem initium cum illis agnoscere ad faciliorem intelligentiam diariorum, quæ edere solent.

In lectione autem autorum id sibi observandum sciant adolescentes, ubi mentio fit longitudinis loci vel meridiani certi numerati, quod tunc considerare debeant, quodnam autor ille initium longitudinis statuerit, vel per quem locum duxerit primum meridianum. Ad eum enim aliorum locorum longitudinem exquirere debent.

PROPOSITIO III.

*Datâ loci alicujus latitudine & longitudine, si-
ve datâ loci distantia ab Equatore & certo aliquo
meridiano, qui in Mappis vel Globo reperitur, ipsius
loci situm & punctum in Mappis & Globo exhibere.
Vel ita: Si in aliquo Telluris loco terra vel mari
versetur, qui nobis incognitus sit, sive cujus situm
ad alia Telluris loca ignoramus, nota autem fiat no-
bis hujus loci latitudo & longitudo, inde investigare*

D d

hujus

hujus loci situm in Tellure atque ab aliis locis distantiam.

Hoc est problema illud , propter quod adeo anxie & magna industria methodus quaeritur , quâ longitudo loci quovis tempore , quo in eo versamur , possit inveniri. Atque ideo , etsi prius de longitudinis hujus inventionem fuisset agendum , tamen mihi magis consultum visum fuit , ipsum problema , propter quod illa longitudo quaeritur , præmittere , idque eam ob causam , cum de longitudine hac prolixè agendum sit , ne adolescentes fastidio corripiantur ignorantes , quem ob finem tanti laboris opera suscipiatur & tam variae viae tentandæ sint.

Etenim nautæ (nam terrestria itinera non ita indigent hac cognitione) à littoribus longe progressi & in Oceano versantes , quia viam itineris confecti propter varia impedimenta non possunt accuratè scire , atque in Mappis suis notare , sæpissime ignorant , in quo loco Telluris versentur , qualem hic locus situm habeat ad illa loca , quæ petunt vel petenda sunt si salvi & incolumes evadere velint atque ideo etiam ignorant , in quam plagam dirigenda sit navis. Ad illius vero cognitionem nulla promptior methodus est , quam si loci illius latitudinem & longitudinem , hoc est distantiam ab Aequatore & certo aliquo meridiano Telluris habeant perspectum vel investigent. Et loci quidem latitudinem variis modis noctu per stellas , die per Solem investigare haud difficili opera docuerunt illos Mathematici , quales modos tradidimus in prioribus (qui enim existimant , solius acûs magneticæ beneficio id cognosci , suam imperitiam in hac disciplina produnt.) Ex qua latitudine inventa cognoscunt , in quonam parallelo Tellu-

Telluris versentur, quod quidem non levis est quæsitæ pars: sed cum infinita sint illius paralleli puncta, nondum ex illa latitudinis cognitione sciunt, in quonam paralleli puncto hæreant. Hoc autem cognoscerent, si scirent, in quonam meridiano constituti sunt, sive quor gradibus hic meridianus ab aliorum locorum aliquo meridiano distet. Etenim ubi hic meridianus parallelum antea inventum secat, istud punctum est locus in quo sunt. Ita enim in omnibus disciplinis Mathematicis observatur, ut quando de puncti alicujus loco quæritur, is plerumque non aliter inveniatur quam per duarum linearum sectionem.

Sit itaque cognita loci alicujus sive puncti in superficie Telluris latitudo & longitudo. Invenietur ejus puncti situs sive locus in globo ita:

Numerentur in meridiano æneo ab Æquatore gradus latitudinis, atque ad terminum numerationis applicatâ cretâ describatur parallelus loci sive circulus latitudinis. In hujus itaque aliquo puncto constitutos nos esse, sive hujus aliquod punctum esse id quod quæritur, certum est ex inventa latitudine. At ipsum hoc punctum porro ex inventa longitudine cognoscitur. Adducatur enim is meridianus sive locus, à quo illa longitudo numeratur, sub æneum meridianum, (si per initium hujus numerationis transeat meridianus, vel si meridianus primus globi sit ipsum illud initium, tunc non opus est ad æneum meridianum adducere) atque in Æquatore ab eo puncto, quod in meridiano est, numerentur gradus cognitæ longitudinis versus occasum vel Ortum, prout data fuerit. Terminus numerationis adducatur ad meridianum æneum, (nisi per illum transeat aliquis meridianus.) Ita meridianus hic repræsentabit

meridianum, in quo punctum quæsitum sive locus incognitus necessario situs est. Atqui antea inventus est parallelus, in quo idem quæsitum punctum situm esse ostensum fuit. Quare quæsitus locus est punctum illud, ubi meridianus inventus & inventus antea parallelus se mutuo secant, nempe illud paralleli punctum, quod sub meridiano æneo conspicitur. Paulo prolixius explicavi negotium, ut Lectores simul causam & demonstrationem perspicerent: Sed facillima praxis est hoc modo:

Numerentur gradus datæ longitudinis in æquatore ab illo puncto, quod initium est datæ longitudinis: terminus numerationis adducatur ad æneum meridianum, atque ab æquatore in meridiano numerentur gradus latitudinis datæ, Terminus hujus numerationis est locus quæsitus, sive puncti, in quo locus incognitus jacet.

In Mappis rectilineis, ut sunt omnes nauticæ, fit ita: Gradus latitudinis numerantur in lineis descendentibus seu lateralibus, atque applicatâ regulâ ducitur parallelus loci, in quo certum est locum ignotum jacere. Deinde in transversis lineis, summa & ima, numeratur longitudo, & applicatâ regulâ ducitur linea meridiana; ubi hæc secat priorem, is est loci quæsitum punctum.

Expeditiùs ita: Applicatâ regulâ ad gradus longitudinis datæ in transversis lineis, sumitur deinde circini intervallo in linea laterali alterutra pars ea, quæ inter datum latitudinis gradum & punctum summum vel imum interjacet, atque circini hoc intervallo ad regulam accommodato statim habetur quæsitum puncti locus in Mappa.

Hujus itaque situs simul ad omnia loca perspicitur, unde facile est colligere, in quam plagam
navis

navis dirigenda sit, si ad hunc vel istum locum velint pervenire.

In Curvilineis Mappis eodem modo agimus, nisi quod lineis rectis curvas ducere necesse habemus.

Hic est *primus usus* & insignis utilitas inventæ longitudinis in arte Nautica.

Secundus usus multo maximus est ipsa Constructio Globi & Mapparum, quia eo modo, quo indicavimus, per latitudinem & longitudinem cognitam omnia loca in globis & mappis consignantur, ut in sequentibus dicetur, neque possibile fuisset globum terrestrem construere, nisi locorum longitudes notæ & investigatæ fuissent. Atque inde fit, ut globi & mappæ plurima loca falso exhibeant loco, quia longitudo eorum vera non fuit cognita.

Tertius usus cognitæ longitudinis locorum est etiam insignis, nimirum quod ex illa cognoscimus facillime, temporis diversitatem in diversis locis & qua hora horæ parte singula phænomena cælestia in diversis regionibus accidunt vel conspiciantur, de quo in sequenti Propositione dicetur.

Quartus usus, quod ex differentia longitudinis duorum locorum & latitudinis invenitur distantia locorum. Jam satis explicatâ utilitate cognitæ longitudinis accedimus ad ipsius inventionis methodum.

PROPOSITIO IV.

Sol, omnes stellæ atque omnia in cælo concepta puncta (ut Equatoris & parallelorum puncta) singulis horis à cujusvis loci Meridiano remouentur vel recedunt gradibus quindecim, in uno hora scrupulo

pulo $\frac{1}{80}$ remouentur quindecim minutis & proinde in quatuor horæ scrupulis recedunt uno gradu, nempe in cuiusvis stellæ parallelo sumtâ distantî à.

Etenim hora nihil aliud est, nisi vigesima quarta pars temporis, quò Sol à loci cuiusvis meridiano ad occidentem delatus per imum cælum atque Orientalem Horizontem redit ad meridianum eum, hoc est per integram peripheriam circumvoluitur. Censetur autem peripheria gradibus 360. Et si 360 divides inter 24, reperies quindecim gradus respondere uni horæ. Itaque Sol in una horâ remouetur gradibus quindecim à cuiusvis loci meridiano. Eodem quoque tempore cum Sole omnes stellæ circumrotari per integram peripheriam ad meridianum deprehenduntur. Quare & illæ singulis horis recedunt à quouis meridiano gradibus quindecim, & in quatuor horæ scrupulis uno gradu.

Potest hoc etiã in globo monstrari vel illustrari. Assûmatur enim & notetur quodvis Æquatoris punctum, eoque adductò ad meridianum Index collocetur ad horam XII cycli. Volvatur deinde globus, donec Index monstret primam horam, atque deprehendes punctum Æquatoris notatum recessissè quindecim gradibus à meridiano, sive, ut vulgo loquimur, quindecim Æquatoris gradus transissè meridianum: si deinde iterum volvas globum, donec Index monstret horam II, III, IV, &c. deprehendes singulis horis punctum notatum recessissè quindecim gradibus longius à meridiano. Eodem modo idem deprehendemus in quouis parallelo, quem Sol atque stellæ extra Æquatorem motu diurno describunt.

COROLLARIUM. Quæ itaque loca sita sunt in meridianis quindecim gradibus à se invicem

cem remotis , eorum ille qui orientalis est , numerat omnes horas prius , quam alter locus , unâ horâ , Ex. gr. 8, 9, 10, 11, 12, 1. cum alter 7, 8, 9, 10, 11, 12, &c. Si triginta gradibus distent meridiani , orientalis numerabit 8, 9, 10, 11, 12, 1, cum alter 6, 7, 8, 9, 10, 11. atque ita porro si quadraginta quinque gradibus se jungantur, tribus horis anticipabit orientalis locus numerationem loci occidentalis , si sexaginta gradibus, horis quatuor , &c. Et proinde eandem cælestem apparentiam planetarum ut Eclipses, conjunctiones, &c. quam occidentalis loci incolæ vident hora 8 , vel 9, 10, 11, &c. eandem orientalis meridiani loci videbunt hora 9, 10, 11, 12, siquidem quindecim gradibus sit orientalis, sed si gradibus 30, vel 45 , vel 60 sit orientalis iste Meridianus , duabus , tribus vel quatuor horis citius vidisse eam loca illius meridiani existimabuntur, cum tamen eodem tempore & simul viderint, sed tempore diversimodè denominato, hoc est nomine diverso, reverà eodem.

Contra, si duorum locorum unus numeret horam 8, 9, 10, 11, 12, &c. dum alter locus numerat 9, 10, 11, 12, 1, vel si iis horis eandem Eclipsin videant incolæ , erit meridianus illius loci à meridiano hujus loci remotus vel orientalis gradibus quindecim , si duas horas in numerando anticipet, gradibus triginta ; si tres horas, gradibus 45 ; si quatuor horas , gradibus 60, atque ita porro. Ex quo patet , si detur ad idem temporis momentum hora in diversis locis , haberi quoque longitudinem unius loci ab altero.

N O T A. Quod diximus de Sole & Luna , nimirum quindecim gradibus renoveri ea sydera à quovis meridiano in una hora, non minus ac aliæ

stellæ & cœli puncta, & quod omnes stellæ æquali tempore circumvolvuntur ad meridianum cum Sole, hoc, inquam, si accurate loqui velimus, non est omnino verum. Etenim Sol serius redit ad meridianum quam stellæ fixæ & punctum quodvis Æquatoris, propterea quod Sol non manet fixus in uno Eclipticæ loco, sed versus Orientem in Ecliptica continuò movetur interea dum versus Occidentem circumrotatur, & proinde quando stella, vel punctum Æquatoris, quod cum Sole simul recedit à meridiano aliquo altero die redit ad eum meridianum, tunc Sol nondum pervenit ad eum sed aliquantum remotus est, ita ut post tria vel quatuor horæ scrupula demum ad eum perveniat. Atque inde fit, ut stellæ quibus unâ anni parte Sol vicinus est, ita ut cum eis oriatur & occidat, quoniam Sole recedente rursus ab illis singulis diebus citius ad meridianum perveniat aliquot minutis quæ progressû multorum dierum ita accrescunt, ut stella tandem duabus, tribus, quatuor, quinque & horis ante Solem perveniat ad meridianum. Proinde in una horâ Solis, plures particulæ de Æquatore & parallelis transeunt Æquatorem, quam quindecim gradus. Sed cum adeo exigua sit hæc differentia à motu Solis proprio profecta, ut vix decem secunda minuta addat in una hora arcui Æquatoris quindecim graduum, ideo in meridianorum comparatione negligitur, & quæ loca horâ unâ discrepant in numeratione ad idem tempus, eorum meridiani quindecim gradibus Æquatores ponuntur distare à se invicem, quæ duabus horis, ea triginta gradibus, quæ tribus horis, ea quadraginta quinque gradibus, &c.

PROPOSITIO V.

Datis ad unum idemque tempus, sive Ad unam eandemque apparentiam caelestem datis horis atque minutis horariis nostri loci atque alterius alicujus loci, invenire quot gradibus nostri loci meridianus ab alterius loci meridiano remotus sit, hoc est invenire longitudinem nostri loci ab illo.

Hujus solutio ex modò dictis jam facilis est, quia ostensum est, si locus aliquis unâ horâ anticipet numerationem horarum alterius loci, illius meridianum ab hujus esse magis Orientalem gradibus quindecim, si duabus horis, triginta gradibus, si tribus horis, quadraginta quinque gradibus, &c.

Datarum itaque horarum differentia commutetur in gradus & minuta Aequatoris, nimirum pro singulis horis numerando gradus quindecim; pro $\frac{1}{4}$ horæ, gradus tres & minuta quadraginta quinque; pro horæ scrupulo unum gradum. Inveniti gradus & minuta indicabunt meridianorum distantiam, nimirum si horæ nostri loci fuerint plures quam alterius loci, erit noster meridianus ab altero versus Orientem situs, si pauciores, versus Occidentem.

PROPOSITIO VI.

Datis iterum horis atque scrupulis horariis diversorum locorum ad unum idemque tempus sive ad unius ejusdemque apparentia caelestis tempus, & dato uno loco vel unius loci Meridiano in Mappis & Globo, exhibere etiam alterius loci meridianum vel longitudinem in Mappis & Globo.

Differentia horarum atque scrupulorum horariorum commutetur in gradus Aequatoris & mi-

Dd 5 nuta.

nuta. Deinde consideretur, utrum horæ ejus loci, cujus meridianus in Globo & Mappis datur, sint pauciores vel plures quam alterius loci, cujus meridianus quæritur. Si pauciores, alter hic meridianus versus ortum situs erit à dato meridiano, si plures, versus occasum. Adducatur itaque datus locus ad meridianum æneum (nisi per eum transeat aliquis meridianus) & ab Æquatoris puncto simul existente in meridiano numerentur gradus atque minuta ex horarum differentia inventa, idque versus occasum vel ortum, prout collegimus alterius loci situm (facilius per Indicem horarium ad x i i applicatum & voluto globo, donec Index monstret differentiam horarum). Terminus numerationis notetur cretâ, atque sub æneum meridianum adducatur: ita hic æneus meridianus erit quæsitus meridianus & punctum Æquatoris indicabit ejus longitudinem.

In Mappis eidem gradus atque minuta à dato meridiano numerentur in transversis lineis summa atque ima, & applicatâ regulâ ducatur linea (nam in Rectilineis ut sunt nauticæ, præcipuus problematis usus) Hæc erit meridianus quæsitus.

PROPOSITIO VII.

Invenire longitudinem loci, in quo versamur, incogniti, sive, invenire meridiani in quo versamur, distantiam ab aliquo meridiano noto sive cujus situs in Mappis & Globo exprimitur vel exprimi potest.

Hoc est illud problema, cujus solutionem tantopere nautæ à Mathematicis exoptant, quod artem Nauticam ferè perfectam & nulli ferè errori obnoxiam redderet, quod duobus hisce seculis, (quibus incredibili antiquis conatu & successu
per

per totum terrarum orbem atque omnia vassi Oceani loca Europæi navigarunt) tantorum viro-
rum ingenia exercuit & torfit, in quod deniq; Angli, Galli & Belgæ ad quinquaginta millia floren-
singuli fere constituerunt præmium & mercedem Inventori vel solutionem exhibituro. Cæte-
rum nemini hætenus palmam in medio positam rapere licuit, etsi varias vias & methodos tenta-
verint & proposuerint, atque quidam suarum inven-
tionum amore capti rem à se confectam existi-
mantes præmia illa ab Anglis, Gallis, & Belgis postulaverint: verum re examinatâ deprehensum est, illorum solutiones magno laborare defectu, neque sufficientes esse, ut mox videbimus. Nautæ Belgæ atque Germani interdum juxta latinam phrasin problema exponunt, *Die senge von ein orth zu finden*: sed plerunque alia phrasi utuntur, dicentes, *West und Ost finden/oder suchen*/ quasi dicas Orientalem & Occidentalem plagam quærere, quæ equidem phrasis & modus loquendi admodum ab ipsa re alienus est, ut vel hinc manifestum sit, quantam licentiam & potestatem vulgus obtineat in novis terminis atque phrasibus etsi ineptis formandis & introducendis.

Istâ enim phrasi effectum est, ut homines artis Nauticæ & Geographiæ imperiti ignorent, quid nautæ sibi velint, cum de inveniando Oriente & Occidente loquuntur: existimant enim plerique illos hoc quærere, quod verba dicunt, nempe Orientalem & Occidentalem plagam, quod tamen falsum est & quæstione indignum.

Etenim hæc plagas in quovis loco maris constituti sciunt ejusdem acus magneticæ quæ Septentrionem & Austrum indicat, beneficio, quia in pyxide plagæ omnes notantur, atque etiam sine

pyxide cognitâ plagâ Septentrionis & Austrî facillimum est ostendere plagam Orientis & Occidentis; quippe facie ad Septentrionem conversâ Oriens est à dextra, Occidens ad sinistram: Contra, facie ad Austrum conversâ, Oriens est à sinistram, Occidens ad dextram. Hoc itaque non est id quod quæritur, sed loci longitudo, hoc est, quanto arcu Æquatoris meridianus loci istius removeatur versus occasum vel ortum à certo aliquo meridiano. Cur itaque nautæ, dicat aliquis, tant alienam phrasin assumerunt? Causa est, quod vulgus ferè omnia confuse atque superficie tenus tantum concipit & levi ex similitudine cum aliis rebus vocabula & phrasés imponit, ut patet ex appellatione Americæ, quam vulgo vocant Indiam Occidentalem (quia aliquot annis post detectam Indiam proprie dictam ipsa quoque reperiata fuit) & appellatione Convolvuli Hispanici, herbæ, quæ cum nostro Convolvulo exiguum habet similitudinem, & pluribus exemplis hoc ostendere facile est. Ita etiam se res habet cum phrasi hac, Orientem & Occidentem quærere. Etenim cum problema hoc, Septentrionem & Austrum invenire, beneficio acus Magneticæ solvatur, & verò problema de inveniendâ loci longitudine maximi quoque sit momenti, cuperentque nautæ æque facilem modum habere, quò illam cognoscere possent, atque loci latitudinem, & præterea illa longitudo numeretur ab Occidente, in Orientem in Æquatore, ideo propter levem hanc similitudinem & rationem usurparunt phrasin hanc, Orientem & Occidentem invenire, cum hic non plaga aliqua quæreretur, sed distantia meridianorum. Hæc propterea explicanda putavi, quia plurimos sciebam phrasi istâ nauticâ in errorem

rorem & falsos conceptus abduci vel saltem ignorare, quid illâ significetur.

Hiscæ jam missis ad ipsam Problematis solutionem accedamus. Varii modi à variis excogitati sunt, ut dictum est, quibus ad solutionem perveniri posse opinati sunt. In eo omnes consentiunt, absque cœlo id fieri non posse, hoc est sine apparentiis & motu planetarum, sicut ipsa loci latitudo non potest invenire absque Solis vel stellarum aspectu. (de Terrellâ enim Magnetica nimis dubia & errori obnoxia res est). Sine tamen Planetarum apparentiis id fieri posse certum est, si horologium automaton nulli errori, & defectui obnoxium possimus fabricari.

Ostendimus in propositione præcedente, si ad unius ejusdemque apparentiæ cælestis tempus nota sit hora cum scrupulis horariis, quâ in duobus diversis locis eâ apparet & conspicitur vel observatur, ostendimus, inquam, facile esse tunc ex horarum differentia invenire longitudinem unius loci ab altero. Quoniam itaque in Calendariis & Ephemeridibus, (ingenti sane Astronomiæ liberalitate & beneficio) habemus consignata ad singulos dies & horas loci alicujus phænomena omnia & motus Planetarum, ut sunt Eclipsis initium, medium, finis, item Lunæ conjunctio cum Planetis aliis, ingressus in Eclipticam, &c. ideo in incognitæ longitudinis loco versantes si inquiramus horam (& scrupula horæ) quâ idem phænomenon conspiciamus in hoc loco, inde inveniemus differentiam nostræ horæ ab hora illius loci, à quem Tabulæ supputatæ sunt & hinc porro meridiani, quo versamur, distantiam à meridiano, item sive ejus horas Tabulæ indicant, atque ita habemus loci quæsitam longitudinem. Neque

consistit difficultas in horæ & scrupulorum horariorum inventione, quoniam illa ex stellæ aut Solis altitudine vel plaga cognoscuntur facili negotio, sed difficultas est in defectu talium apparentiarum cælestium, quæ ita observari possint.

Et si verò alii quoque modi sint, quibus sine horarum cognitione & Planetariorum motuum consideratione loci longitudo inquiratur, illi tamen hic locum non habent, quia non ipsam primò longitudinem, sed ipsum locum exhibent, & alia requirunt, quæ in illis casibus, ubi longitudo queritur, æque ignorantur, quos modos in sequentibus explicabimus. Jam enim tales modos querimus, quibus illa loci longitudo inveniatur, ubi situs loci incognitus est. Qui modi omnes præsupponunt cognitionem & comparisonem temporis, quo apparentia aliqua motûs Planetarii in duobus diversis locis conspicitur. Inepti autem sunt ad hoc negotium illi motus, qui admodum tardi sunt ita ut multis horis nulla vel exigua differentia in loco eorum Planetarum deprehendatur. Ex. gr. Saturnus progreditur in Ecliptica in una hora vix quinque secundis minutis. Et si itaque ex ephemeridibus haberi possit tempus & hora, quæ sit in illo loco quando Saturnus in Ecliptica (hoc est, in puncto orbitæ suæ ubi hæc secatur Eclipticam) erit, tamen quia tardissime movetur, inde fit ut multis horis, si observationes instituantur, in eodem loco hæere videatur, & proinde non possit ipsum horæ momentum cognosci in loco, ubi sumus, quando in ipso illo minuto hærent, & proinde neque horam nostri loci conferre cum hora loci Tabularum.

Ita Sol, singulis horis in Ecliptica promovet $2\frac{1}{2}$ circi-

circiter minuta prima (quia integro die gradum circiter promovet) qui motus nimis tardus est ad hoc negotium , quia utcumque accuratæ observationes instituantur ad initium & finem horæ , idem locus Solis reperietur , adeoque facile error duarum, trium, &c. horarum hic obvenire possit. Sciendum enim est , quod modales esse debeant , ut in investigatione etiam semitricessimæ partis horæ error præcaveri possit, hoc est , ut phænomenon illud cæleste quod ad investigationem adhibendum est , intra duo scrupula horæ sensibilibiter varietur. Si enim ad duo scrupula horæ idem omnino & in eodem statu, quo ad sensum & diligentem observationem maneat , non poterimus certi esse de horæ parte qua id contrigerit in cælo revera ; & si erratum sit in observatione per duo scrupula horæ; tunc in longitudinem irrepet error dimidii gradus ut meridianum nostrum , in quo tunc sumus in Mappis & Globo existimemus esse & notemus eum , qui non est verus sed dimidio gradu $7\frac{1}{2}$ milliaribus Germanis in Æquatore à vero remotus sumenda ; itaque sunt talia phænomena planetarum , quæ intra duo scrupula horæ vel etiam ad unum scrupulum aut si potest fieri ad dimidium scrupulum varientur. Talia autem nulla sunt nisi hæc. 1. Lunæ Eclipsis initium, medium, finis. 2. Lunæ longitudo sive locus in Zodiaco. 3. Lunæ distantia à stellis fixis , vel appulsus ad illa. 4. Lunæ ingressus in Eclipticam sive in puncta Orbitæ suæ, ubi hæc secat Eclipticam. 5. Conjunctio, distantia , & Eclipses Planetarum Jovialium , nimirum quatuor illorum Planetarum , qui circa Jovem nostro hoc demum seculo ope Telescopii reperti sunt circuitum facere, ingenti sane miraculo, unde

Co-

Copernicana hypothesis magnum nata est confirmationis argumentum. .

Modus primus per Luna Eclipsin.

Hic modus optimus est & satis accuratus, si modo singulis noctibus Eclipses fierent. Eo momento temporis, quo conspiciamus adhibito Telescopio Eclipsis Lunaræ initium vel medium, tunc, inquam, observetur stellæ alicujus fixæ altitudo vel plaga, & simul Elevatio poli inventa sit antea, vel simul ex aliqua stella in meridiano consistente investigetur. Ex altitudine stellæ hora cum scrupulis invenitur satis accurate, ut deinde docebimus ex Astronomia, & facilius absque altitudinis inventionem si stella in meridiano versetur. Hæc itaque inventa hora cum scrupulis conferatur cum hora & scrupulis, quâ Ephemerides exhibent ejus Eclipsis initium, vel medium (quæ horæ respiciunt meridianum, ad quem Ephemerides supputatæ sunt). Sic itaque inventa est ad idem tempus vel ad eandem apparentiam cælestem hora duorum locorum; nempe nostri loci & meridiani Ephemeridum: Et meridianus Ephemeridum notus est. Itaque longitudinem nostri loci à meridiano Ephemeridum inveniemus si differentiam horarum utriusque loci convertamus in gradus & minuta Equatoris, sicut Propos. v. diximus. Et quoniam in Mappis datur & Globo meridianus Ephemeridum notus est vel facili negotio signari potest, ideo ab eo numerabimus inventos gradus in lineis transversis Mappæ versus occasum vel ortum prout horæ nostri vel ignoti loci fuerint pauciores vel plures quam horæ meridiani Ephemeridum, & per terminum numerationis ducenda erit linea meridiana. Ea est meridia-

nus nostri loci in quo tum versamur, sive in quo observatio ea Eclipsis instituta fuit.

*Modus secundus per Luna locum
in Zodiaco.*

Et si præcedens modus per Lunæ Eclipsin negotium expediens sit accuratissimus, tamen quoniam Eclipses eæ raræ sunt neque omnes in omnibus locis conspicuæ, ideo modus hic Problema non solvit sufficienter, neque nautas in mari incerto vagantes juvare potest: sed magis commodus est ad constituendas & inveniendas locorum terrestrium, ubi Mathematici agunt vel proficisci possunt, atque omnium ferè locorum longitudes, quas scimus, per istum modum inventæ sunt: namque ex annotatione temporis, quo conspecta sunt Eclipsis initia vel media, comparatione facile est unius loci ab altero longitudinem invenire ut satis superque explicatum esse puto. Verum nautarum usus requirit phænomenon vel apparentiam, quæ sæpius nempe singulis noctibus ad minimum (si diebus non liceat) accidat, quoniam singulis noctibus accidere potest, ut in loco ignoto versentur tempestatibus seducti. Frequentius phænomenon est Lunæ locus in Zodiaco, sed observatio & calculus admodum molestus & perplexus requiritur propter parallaxes duplices ut vix præcaveri possit non dico parvus sed insignis error dimidiæ vel etiam integræ horæ, unde falsus meridianus invenitur à vero remotus multis miliaribus, nempe centum & pluribus.

Minus tamen aberrabitur si expectetur horæ nomen, quo Luna meridianum occupat; *tunc enim satis accurate invenietur longitudo loci quaesita hoc modo: Vbi accurate observatum fuerit,*

rit, Lunam in meridianum venisse loci, ubi sumus, statim capienda est altitudo alicujus stellæ (elevatio poli præsupponitur antea inventa) insignis atque ex hac & elevatione poli licebit inquirere horam: sed præstat per stellam aliquam in meridiano tunc hærentem id facere, ut deinde monebimus. Porro ex cognita hora inveniat, quodnam Eclipticæ sive Zodiaci punctum in Meridiano tunc hæreat, sive medium cæli occupet (ut loquuntur Astronomi) quod etiam facile est, ut in Lemmate secundo docebimus. Sic itaque ad horam nostri sive ignoti loci habebimus cognitum locum Lunæ in Zodiaco. Deinde ex Ephemeridum Tabulis inveniat, quæ in meridiano Ephemeridum sit, ubi Luna in eo Zodiaci loco versatur, quod in Introductione Ephemeridum docetur, neque difficile est. Sic itaque rursus habebimus ad idem tempus horas duorum locorum, nempe loci in quo versamur cujus longitudo ignota est, & loci ejus ad cujus meridianum Ephemerides supputatæ sunt, & cujus situs in Mappis habetur & Globis.

Quare ex differentia temporis invenietur longitudo loci nostri quæsitæ, ut in præcedenti modo satis monstratum est.

Modus tertius, per distantiam Luna à stella fixa est aliqua.

Quoniam Lunam in Meridiano observare plurimis nobis non licet, quando nimirum non multum à Sole remota est post & ante novilunium, atque adeo phænomenon hoc non satis frequens est, ac usus nauticus requirit, propterea aliud quod frequentius sit, à nonnullis phænomenon in Lunæ motu, consideratur, atque ex eo invenien-

veniendæ longitudinis modus traditur, nimirum appropinquati, & recessus Lunæ à stellis fixis. Inde enim locus Lunæ verus investigari potest ad datum observationis momentum. Sed calculus propter parallaxes & obliquorum Triangulorum sphericorum solutionem atque varios casus adeo est difficilis, ut neque nautis inservire possit, neque adolescentes ejus præceptis onerare velim, sed potius omittere. Requirit enim ingenium in calculo hoc versatissimum, quale nulli ferè vel paucissimi adolescentes ad Geographiam discendam asserunt.

Hæc autem modi hujus difficultates, Monachus quidam Galliæ, Duillerius nomine, evitare vel superari posse singulari suâ methodo existimat. Edidit enim ante duos circiter annos libellum, in quo veram & nautis commodam inventionem longitudinis se tradere profitetur (etsi multa alia admiscuerit) eumque librum primo inscripsit Regi Galliæ, deinde (quoniam fortassis nihil impetraverat à Rege) Ordinibus Belgii Fœderati, atque hoc ipso, quo hæc scribebam tempore, promissum præmium postulavit; Cæterum in libro eo duas tradit regulas, quæ tamen parum discrepant, sed prior est magis intricate & obscure proposita, neque nautis commoda, præterea impingit in Geometrica Euclidis theoremata (autor autem affirmat, ex hoc vitio nullum in praxin redundare errorem) ideo in fine ferè libri altera addita est faciliior methodus quæ hæc est: Globum cælestem accuratissimè factum habere oportet, in quo Ecliptica & poli Eclipticæ accurate sint designata. 2. Ephemerides Solis & Lunæ præsto esse debent nullo vitio laborantes (autor è Rudolphinis Tabulis supputatis se adhibuisse affirmat & cælo

cælo congruasprehendiſſe.) 3. Ex iſtis ephimeridibus excerptenda eſt longitudo (vel locus in Ecliptica) & latitudo Lunæ pro iſtius diei, quo obſervatio inſtituenda eſt, meridiæ. Deinde quadrantis ænei craſſi unâ extremitate applicatâ ad polum Globi Eclipticæ, alterâ ad locum lunæ in Ecliptica, numeretur in quadrante latitudo Lunæ, & in Globo fiat punctum ad terminum numerationis: ita hoc punctum repræſentabit Lunam in Globo & ejus ſitum ad meridiem iſtius diei. Eodem modo per ephimerides notetur locus Lunæ in Globo pro meridiæ ſequentis diei. Hiſce factis ſumatur Charta exiguæ latitudinis, & longitudinis, atque hæc applicetur ad Globum ſupra illa duo puncta (in hoc conſiſtit totum autoris artificium, ut ipſe fatetur) & notatis in charta iſdem punctis atque applicatâ regulâ ducatur linea ab uno puncto ad alterum. Hæc linea repræſentabit portionem orbitæ ſeu viæ Lunæ, quam eo die in cælo motu proprio movetur. Hiſce factis obſervetur de cælo diſtantia Lunæ à certa aliqua ſtella, (ad idemque momentum horæ ſcrupula de cælo cognoscenda) & gradus obſervati capiantur circino in circulo aliquo globi maximo, atque uno circini pede deſixo in ſtellam, alter pes moveatur, donec orbitam Lunæ prius in charta notatam ſecet; punctum ſectionis notetur. Deinde quadrans iterum applicetur ad polum Eclipticæ ita ut per notatum punctum tranſeat ad Eclipticam: ita in hac oſtendet locum Lunæ in Ecliptica ad tempus obſervationis. Porro ſupputetur, quota hora in meridiano Ephimeridum ſit quando luna illud Eclipticæ punctum obtinet: hoc enim tempus ſi conferatur cum hora obſervationis noſtræ dabit differentiam temporis, unde facilis eſt inventio longitudinis.

Omitto

Omitto hic alia de æquando tempore & quibusdam aliis præcepta. Ita putat autor evitari parallaxium & refractionum difficultates, & longitudinem satis accurate inveniri. Mihi plurima hujus methodi vitia esse videntur: sed quia eo prius tempore, quo jam priora typis subjecta erant, nactus sum, non potui ad accuratius judicium ferendum regulas ejus excutere.

*Modus quartus per Lunæ ingressum
in Eclipticam.*

Orbita Lunæ secat Eclipticam duobus punctis, in quæ quando motu suo proprio pervenit, versatur in Ecliptica, aliis temporibus extra eam motetur recessu maximo quinque graduum. Observandum itaque exacte est tempus in loco ignotæ longitudinis, quo tempore Luna Eclipticam attingit. Porro ex Ephemeridibus excerpitur hora ad meridianum Ephemeridum, in qua ille ingressus erat. Deinde ex comparatione temporis nostri sive ignoti loci cum tempore meridiani Ephemeridum habetur differentia temporis, unde longitudo loci nostri à meridiano Ephemeridum invenietur. Sed hic modus etiam propter difficilem praxin inutilis censendus est. Difficulus enim observari potest ingressus Lunæ in Eclipticam, calculus perquam intricatus & errori obnoxius.

Modus quintus per Planetas Ioviales.

Hoc phænomenon Lunæ phænomenis in hoc negotio præferendum esse plurimi judicant, propterea quod parallaxibus non sint obnoxii hi Jovis satellites, & præterea in omni Jovis situ supra horizontem præbeat commodam observationem. Quatuor sunt planetæ, magni Galilæi inventum qui

qui circa Jovis tanquam Domini sui centrum moventur adeo exigui, ut libero visu videri nequeant, sed tantum adhibito Teliscopio. Horum motus (proprius, quo circa Jovem moventur, namque diurnum motum cum omnibus stellis, motum in Ecliptica cum Jove & reliquis planetis communem habent) est celer. Qui enim proximus est Jovi, is circuitum suum absolvit die uno cum octodecim horis & semisse horæ. Secundus diebus tribus cum horis tredecim & triente. Tertius diebus septem, horis duabus. Quartus & supremus diebus sedecim cum horis octodecim. Horum motuum progressus ad singulas horas calculandus est & idcirco in communibus Ephemeridibus non reperitur, sed in aliis libris habentur eorum ephemerides. Si itaque horum motuum beneficio investigare cupimus longitudinem loci, perfectissimo Attroscopio instructi esse debemus & nocte, illo ad Jovem (si supra Horizontem loci illius sit) converso observare conjunctionem duorum illorum planetarum vel conjunctionem cum Jove aut similem apparentiam, atque ad id momentum temporis simul horam loci invenire ex alicujus stellæ meridiano situ vel altitudine. Deinde Ephemerides horum satellitum Jovis consulendæ sunt atque inde horæ & horæ scrupula eximenda, quibus talis conjunctio fiat in meridiano, ad quem illæ ephemerides supputatæ sunt. Sic itaque rursus habebimus duorum locorum horam ad unius ejusdemque phaenomeni tempus. Vnde ex differentia horarum, in gradus vertatur, inveniemus longitudinem loci nostri à meridiano Ephemeridum, qui norus est

*Modus sextus per Horologium
Automaton.*

Quoniam modi omnes, quibus per caelestia phaenomena longitudinem locorum invenire docuimus, laborant eo defectu, quod non singulis noctibus appareant (de Luna enim notum est, de Jovis verò satellitibus eodem modo se res habet, quoniam Sole eis & Jovi vicino cum eo occidunt & oriuntur) & præterea insignem difficultatem observandi in navi & maris fluctibus conjunctam habeant, ideo non pauci relictis Lunæ atque satellitum Jovis apparentiis confugiendum censent ad horologium automaton, atque in id omni studio artifices automatarios jubent incumbere, ut automaton parent, quod nulli vitio sit obnoxium, ita ut viginti quatuor horas indicet eodem tempore, quo Sol circumvolvatur & diem sive viginti quatuor horas efficit, neque vel anticipet vel postponat indicium.

Si itaque tale automaton confici possit, aptissimum esset & facillimam inventionem longitudinis præberet nautis. Etenim antequam è loco aliquo abirent, observanda esset accurate hora loci illius ad aliquod tempus (quod non est difficile) & automaton ad illam horam disponendum. Ita deinde singulis sequentibus diebus horas istius loci indicabit, si nulli vitio obnoxium sit. Quando itaque illo loco relicto perventum fuerit ad alium locum cujus longitudinem sive meridiani distantiam à meridiano loci discessus scire cupimus, nihil restat agendum nisi ut observetur in hoc loco de cælo hora (quod die per Solem, nocte per stellas fit non difficili opera, ut in Lemmate dicemus) ejus loci, & simul inspecto automato videamus, quænam

quænam hora tunc sit in loco sive Meridiano, unde discessimus. Sic habebimus horas duorum locorum ad idem temporis momentum. Differentia itaque illarum horarum si commutetur in gradus & minuta, ut sæpius jam dictum est, ostendet longitudinem loci nostri à meridiano loci, unde discessimus, ac proinde gradus illi in Mappis vel Globo numerati ab hoc meridiano, unde profecti sumus, exhibebunt meridianum, in quo sumus.

Verumenimvero utcunque magnam in talis perfectionis automato fabricando industriam habentis posuerint artifices, nemini tamen ea felicitas contigit, ut tale paraverit. Etenim & materiæ conditio, ex qua fiunt automata, impedit talem perfectionem & diversitas aëris tollit perpetuam motus æqualitatem. Namque aëre frigido existente tardius moventur automata, quam aëre calido, adeo quidem ut automaton quod Belgæ in Nova Zembla hyemem agentes in ædibus suis collocaverant, omnino à motu cessaverit, etsi multo majus pondus ei addidissent, quam antea ferre solebat. Ad defectum hunc horologiorum automatorum corrigendum vel supplendum quidam jubent singulis diebus horologium disponendum ad horam illius loci, in quem tunc perventum est (eam autem horam in quovis loco de cælo observari posse diximus.) Sed licet hoc fiat, nihilominus magnus in longitudinis inventionem irrepit error.

Etenim si secundo die perfectionis ex automati horis comparatis cum horis loci ad quem perventum est, inveniatur longitudo hujus loci sive meridianus, & verò horæ automati non omnino accuratè cum horis loci, à quo perfectum est, consentiant, inde fiet, ut vitiosa longitudo assumatur

& falsus meridianus in mappis notetur pro loco navis, ad hunc diem. Sequenti die nempe tertio iterum falsa longitudo invenietur atque ea numerata à falso meridiano præcedentis diei duplicabitur vitium. Quarto die rursus augetur & triplicabitur vitium: quinto die quadruplicabitur atque ita porro. Ex. gr. si horologium spatio viginti quatuor horarum deficiat à cælesti motu & revolutione per decimam quintam horæ partem (quam perfectionem raro superant nostri artifices) erit inventa ex ea longitudo integro gradu major vel minor (nam $\frac{1}{24}$ horæ efficit unum gradum) & proinde in mappis signabitur meridianus pro loco istius diei falsus, qui nempe à vero per gradum sive per quindecim milliaria abest. Tertio die quia iterum automaton peccat decimâ quintâ horæ parte, erit iterum vitium unius gradus in longitudine, cumque prioris diei signatus meridianus etiam uno gradu absit à vero, atque ab eo fiat numeratio pro meridiano tertii diei, erit jam hic meridianus duobus gradibus à vero remotus, hoc est triginta milliariis in Æquatore: quarto die tribus gradibus, quinto quatuor gradibus, hoc est 60 milliariis, ita ut tandem putata longitudo & signatus meridianus longe absit à meridiano in quo tunc navis est. Hæc itaque causa est, cur neque hic modus perfectus sit, & proinde à nautis negligatur. Hoc ipso, quo hæc scribo, tempore fuerunt Hagæ, qui talis automati fabricam Ordinibus hujus Reipublicæ promiserunt & præmia promissa petierunt: sed adhibiti arbitri harum rerum periti insufficientiam ostenderunt.

L E M M A.

Quoniam in singulis præcedentibus modis invenien-

E e

venien-

veniendæ longitudinis investiganda fuit hora de cælo ad tempus observationis, ideo hic ex Astronomia explicabimus modum quo id fiat. (nam de elevatione poli, quæ etiam requiritur diximus capite xxiii) De die Sol adhibendus est, nocte stellæ illustres. Utroque tempore præstat expectare tempus, quo Sol vel stellæ in meridiano sint, atque ad reliqui temporis horas & scrupula horaria cognoscenda exactissimum automaton adhibere. Etenim intra dimidii diei spatium parum aberrabit automaton, si magnâ diligentia factum sit. Et ita non habebimus opus elevatione poli ad hoc negotium, quam tamen scire debemus propter parallelum.

De die, itaque Sole in Meridianum delato sciimus horam in illo loco esse duodecimam, atque adeo ad ipsum hoc momentum temporis automaton disponendum est ad sequentis temporis indicandas horas. Quod si ante meridiem observandum sit phænomenon, disponatur automaton ad ipsum tempus observationis, atque deinde diligenter observetur Solis ad meridianum appulsus, atque tunc inspecto automato cognoscantur horæ à tempore observationis ad meridiem seu xii horam elapsæ, unde ipsius observationis hora cognoscetur.

Verum si extra meridianum constituto Sole, velis de cælo investigare horam, observetur altitudo Solis ad phænomeni tempus. Deinde in Triangulo sphaerico ex datis tribus lateribus quæ sunt elevationis poli complementum, (sive loci à polo distantia), complementum declinationis Solis ad eum diem & complementum observatæ altitudinis Solis, ex tribus inquam hisce lateribus Trianguli Sphaerici invenietur angulus quilibet, in hoc autem

autem inveniendus est ille qui à complementis declinationis & elevationis poli comprehenditur, sive qui complemento altitudinis Solis opponitur: quod quomodo fiat, studiosi ex sphærica Trigonometria petant. Quomodo per globum ex altitudine Solis ad quodvis tempus inveniatur hora, docuimus cap. xxix Propos. iiii, quod quidem Geographiæ studiosis plerisque satisfaciet, cum non ita accuratam horæ partem quærant, sed in arte nautica calculus est adhibendus, etsi per Planisphærium Catholicon quidam solvant, sed metuo nimium vitium in horariis scrupulis. Nocturno tempore stellæ, ut dixi, adhibendæ sunt, & quia plerunque una vel altera in meridiano haberi potest, ideo non opus est aliam extra meridianum existentem adhibere, sed præstat eligere aliquam in meridiano hærentem vel id tempus expectare, quo aliqua vicina meridiano accedat in ipsum. Sumatur deinde ex Tabulis Astronomicis stellæ illius ascensio recta, & simul ascensio recta puncti illius Eclipticæ, in quo Sol ad eum diem versatur: Et si Solis ascensio recta fuerit minor, auferatur ab ascensione stellæ, si major, sumatur ejus complementum ad 360 & hoc addatur stellæ ascensioni. Gradus hoc pacto acceptos commuta in horas & scrupula horæ: hæc erunt quæsitæ ad tempus observationis.

PROPOSITIO VIII.

Alios modos inveniendæ longitudinis exponere, qui proprie & primario non longitudinem, sed locum ipsius puncti, (cujus longitudo sive meridianus tantum quæritur) exhibent: quibus tamen ad locorum terrestrium longitudinem constituendam, vel examinandam uti commodum est.

Ec 2

Primus

Primus Modus.

Data duorum locorum distantia & utriusque latitudine invenire longitudinem unius loci ab altero, in mappis verò nauticis & globo ipsum loci ignotipunctum, si alter locus datus est (est autem semper unus locus cognitus vel datus.)

Si calculo Trigonometrico accuratam longitudinem velis exquirere, inveniendus erit angulus in Triangulo Sphærico cujus omnia latera dantur, nempe distantia in gradus conversa, complementa latitudinis sive locorum à polo distantia: supputatio autem fieri debet anguli comprehensi à lateribus duobus, quæ sunt complementa latitudinum sive quæ sunt arcus inter ambo loca & polum intercepti. Methodus ex Trigonometria sphærica est petenda.

Verum in mappis nauticis & globo ipsius puncti ignotus locus ita invenitur ex datis.

IN MAPPIS nauticis. Data distantia intervallo circini ex appositâ scalâ sumitur, & uno pede in datum locum defixo alter pes circumducitur donec attingat vel secet parallelum alterius latitudinis, quæ est loci ignoti. Punctum contactus vel sectionis est locus quæsitus sive ignotus. Aliæ verò mappæ ad hoc negotium ineptæ sunt, neque ipsæ nauticæ accuratam locorum distantiam exhibent, de quo pluribus loquemur capite sequenti.

IN GLOBO. Data distantia convertatur in gradus & minuta, atque intervallo circini in Aequatore sumantur. Deinde in Meridiano notetur gradus latitudinis ignoti loci, pes verò circini unus collocetur in loco dato, & volvatur globus donec alterius pedis extremitas attingat punctum globi notato meridiano signo subiectum. Id erit quæ-

quæsitus locus. Vel describatur parallelus latitudinis loci ignoti cretâ, & deinde uno pede circini in locum datum defixo alter circumducatur, donec parallelum illum secet, vel tangat. Punctum hoc tactus vel sectionis est locus quæsitus, cujus longitudo tunc in Æquatore numeratur.

Modus secundus.

Datâ plagâ, in qua locus aliquis incognitus (cujus situs incognitus est) jacet à loco noto sive dato, & utriusque loci latitudine datâ, invenire illius loci ignoti longitudinem à loco noto & ipsum locum in mappis nauticis & globo exhibere.

Per datam plagam intelligimus hic angulum interceptum inter meridianum alterutrius loci & lineam ab uno loco ad alterum ductam, quod in globo vel per Diagramma commodius explicatur. Si itaque calculo longitudinem velis investigare loci unius ab altero, solvendum erit Triangulum sphæricum, in quo dantur duo latera, (nempe complementa latitudinis utriusque loci) & angulus alterutri lateri dato adjacens, inquiritur autem angulus comprehensus à duobus datis lateribus. Hic enim quæsitam longitudinem exhibebit.

In Globo vero & Mappis nauticis non opus est longitudinem invenire neque potest primo inveniri, sed ipse locus ignotus ex datis invenitur.

IN GLOBO: Locus datus adducatur ad meridianum, polus elevetur pro ejus latitudine & applicetur ei quadrans verticalis: Describatur etiam cretâ parallelus ad latitudinem alterius incogniti loci. Tunc quadrantis extremitas applicetur datæ Horizontis plagæ, in qua nempe alter ignotus locus à noto loco jacet. Punctum paralleli ubi quadrans eum secat vel tangit, est quæ-

fitus locus, cujus longitudo in Æquatore numerabitur.

IN MAPPIS nauticis. Ducatur parallelus ad latitudinem ignoti loci. Deinde ex dato loco ducatur linea pro data plaga, punctum ubi hæc secat parallelum, est locus quæsitus. Si autem plaga Loxodromica detur, aliter agendum esset, de quo capite xxxix.

Modus tertius.

Data plaga & distantia unius ignoti loci ab altero cujus latitudo data est, invenire longitudinem illius ab hoc: in globo autem & mappis, si hic locus detur, illius quoque situm exhibere.

Si calculo investigationem experiri libet, dantur in Triangulo sphærico duo latera (complementum latitudinis loci noti & distantia ab ignoto in gradus conversa) & angulus comprehensus ex plaga data: inquirendus ex tribus hisce datis est angulus oppositus distantiae. Hic exhibebit alterius loci longitudinem à loco altero sive noto.

In Globo autem & mappis nauticis invenitur ipse locus ita: Elevetur polus pro dati loci latitudine, quadrans applicetur vertici, & altera extremitas applicetur ad datam Horizontis plagam. Deinde distantia data in gradus conversa numeretur in quadrante à vertice. Terminus numerationis erit locus quæsitus in globo. Si vero sine ipsius loci designatione quæraturn tantum longitudo, hoc est, si Triangulum sphæricum per globum placeat solvere, fiet illud simili modo. Exempla dabimus in capite xxxiii quod etiam de sequentibus tenendum est. Ibidem quoque uno exemplo ostendimus, quomodo per planisphærium talia problemata solvantur. De hisce omnibus

bus sicut etiam de methodo logarithmica Præceptores edocere possunt discipulos suos, si capaces nacti fuerint, & studiosos harum rerum. Nautæ vel calculum vel planisphærium adhibent. Globi enim usus in navi minus commodus est.

IN MAPPIS nauticis. Ex dato loco ducatur linea pro data plaga, & intervallo circini capiatur in scala apposita locorum distantia, atque uno pede defixo in locum datum alter pes in linea ducta pro data plaga collocetur. Punctum hoc erit locus quæsitus, sed tamen non accuratus, ut sequenti capite docebimus.

Modus quartus.

Data loci ignoti à duobus notis distantia, exhibere illum & notum facere in globo & mappis, calculo verò inquirere ejus longitudinem.

IN GLOBO. Sumatur circini intervallo distantia una (in gradus conversa) in Æquatore, & pede uno in locum unum ex datis (cujus distantia jam sumta fuit) defixo describatur arcus in superficie globi altero pede, qui cretam in extremitate habeat.

Eodem modo sumtâ distantia ab altero loco describatur ex hoc tanquam centro arcus in superficie: punctum, in quo hic arcus priorem secat, est quæsitus locus.

In mappis nauticis eodem modo agendum est, nisi quod datæ distantia non in gradus mutantur, sed in apposita scala sumuntur. Verum si locus sit à datis aliquantum remotior, nimis magnus error committetur, quia mappæ hæc non præstant accurate.

Inventio autem longitudinis per calculum

quia multum habet difficultatis & diagramma requirit, ideo malui vivæ Præceptoris informationi & ostensioni relinquere, quam hic multis verbis describere.

Modus quintus.

Datis duobus locis in Tellure, & plagis quibus tertius aliquis ignotus locus situs est ad illa, invenire hunc tertium locum in Tellure, mappis, globo, & calculo longitudinem hujus loci inquirere.

IN GLOBO. Duorum datorum locorum unus adducatur ad meridianum & polus elevetur juxta ejus latitudinem, quadrans applicetur vertici atque alterâ extremitate ad plagam Horizontis datam (in qua nempe ad locum huncce notum tertius ignotus jacere ponitur, & ad marginem quadrantis cretâ acuminatâ describatur peripheria subtilis sive exigua crassitie. Deinde alter datus locus adducatur ad meridianum & polus elevetur juxta ejus latitudinem, quadrans affigatur vertici, altera extremitas datæ Horizontis plagæ, in qua nempe tertius locus ignotus ponitur jacere ad huncce notum locum. Punctum, in quo margo quadrantis secat peripheriam antea cretâ delineatam est quæsitus locus tertius.

In Mappis fit ita: Ducatur linea ex uno dato loco pro data plaga tertii loci; eodem modo ex altero dato loco ducatur linea plagæ. Punctum, in quo duæ hæ lineæ se mutuo secant est locus quæsitus.

Eodem modo in ipsa Tellure agendum esset, si scientificè agere vellemus: neque enim in scien-
tia

tia curamus impedimenta & obstacula, modo modum mente comprehendamus.

Calculus, quo longitudo loci ignota invenitur ex datis hisce, relinquamus vivæ Præceptorum voci & delineationi, si aptos & capaces discipulos nacti fuerint.

Sed jam satis superque de longitudinis inventionem dictum est, cujus amplissimum usum explicavimus Propositione II.

Propterea etiam hic subjungo Tabulam Longitudinis & Latitudinis præcipuorum Telluris locorum, ut adolescentes exercitii materiam habeant, cujus quoque insignis est utilitas in tota Geographia. Collegi eam è variis autoribus: attramen incertos esse plerosque numeros non inficior, & propterea unicuique autor sum, ut cognitis magis certis hæc debeat & illa substituat.

TABULA LONGITUDINIS ET
LATITVDINIS LOCORUM.

Nomina locorum.	Latitudo.		Longit.	
	gr.	min.		
Adrianopolis Thraciæ.	43	0	53	
Anipontum.	46	55	35	
Ætna mons Siciliæ.	38	20	39	
Agra in Megoris regno.	34	38	87	7
Alba Græca, sive Belgrado in Hungaria.	47	40	45	
Alexandria Ægypti.	30	58	60	30
Algerium Africæ.	32	30	22	
Amstelodamum.	52	26	26	30
Ancona.	43	40	38	30
Angola Africæ Austr.	9			
Antiochia Syriæ.	37	0	75	15
Antverpia.	51	16	26	
Alepo Syriæ.				
Aquileja Italiæ.	45	12	34	
Aquinum, D. Thomæ.	41	56	38	30
Aquisgranum.	50	48	27	30
Aden Arabiæ.				
Ostium Araxis fl.	46	0	81	0
Arbela.	35	52	89	
Ostia Argentei fluvii.	35			
Argentoratum.	48	44	27	50
Ariminum.	43	50	35	
Armusa, Ormus.	27	24	95	57
Aromata promontor. Africæ, hodie Guardasur.	14	20	88	40
Ascalon.	32	27	67	20
Athenæ.	37	15	53	0
Avenio, Avignon.	43	52	23	0
Augusta Vindelic.	48	21	33	0
Aurasicum, Aurange.	43	30	26	30
			Aurææ	

Nomina locorum.	Latitudo.		Longit.	
	gr.	min.		
Aureæ Chersonesi, Mal- lacca.	2	0	161	
Aurelia.	47	30	22	0
B.				
Babylon Chaldaeorum., hodie Bagdat.	33	50	73	30
Bactra s. Badagfan.	39	26		
Badena Helvetiæ.	48	44	31	
Bamberga.	49	56	31	45
Barcellona Hispan.	41	24	18	30
Basilea Helvetiæ.	47	3	28	30
Belgradum, s. alba Græca.	47	40	45	0
Banda insula.	6		115	55
Beneventum.	42	0	41	
Bengala Indiæ.	23			
Berlinum German.	52	50	36	30
Berna Helvetiæ.	46	25	29	45
Berga Norvvegiæ.	60	30	27	30
Bethlehem.	31	50	65	45
Biturigæ.	46	45	22	40
Bononia Italiæ.	43	54	34	30
Brandenburgum.	52	36	35	30
Brema.	53	10	30	15
Brixia.	44	30	32	30
Brugæ Flandriæ.	51	19	24	45
Brundisium.	40	0	42	30
Brunsviga.	52	30	32	40
Bruxella Brabant.	50	48	26	
Buda, Hungariæ.	47		42	
Burdigala.	44	30	18	
Byzantium, Constantin.	43	5	56	
C.				
Cæsar Augusta, Saragossâ.	41	45	14	15

Nomina locorum.

	Latitud.		Longit.	
	gr.	min.	gr.	min.
Cajeta.	40	50	38	20
Caletum Gallia.	52		16	2
Calecut India.	11	0	104	
Calis Hispania.	17	0	5	10
Campen Frisia.	52	40	27	15
Cameracum.	49	40	25	
Candia in Creta.	35	15	54	10
Cantuaria Anglia.	53	40	21	
Capernaum.	34		70	48
Caput Bonæ spei.	35		38	
Caput Viride.	13			
Chalcedon, Scutari.	43	7	56	26
Coburgum.	50	20	31	30
Colonia Agrippina.	50	56	28	15
Compostella. S. Jacob.	42	30	10	15
Comorinum, India.	7			
Complutum, Hisp.	41	40	10	30
Confluentia, Coblentz.	50	30	27	30
Conimbrica Lusitania.	40	0	10	45
Constantia, Costnitz.	47	30	32	0
Constantinopolis.	43	5	56	
Corduba, Hispan.	37	50	9	40
Cochin, India.	9	30	116	38
Corfinium, Corfu.	38	45	45	10
Corinthus.	36	55	51	15
Corfica medium.	40	50	31	
Cracovia Polonia.	50	0	46	
Cremona.	44		33	
Cuba insula.	22			
Cuzco Peruvia.	15			
D.				
Damascus.	33	20	69	30
Dantiscum.	54		44	

Da-

Nomina locorum.	Latitudo, <i>gr. min.</i>		Longit.	
Daventria.	52	30	28	4
Drepanum promon.	37		37	
Dyrrachium.	41	27	46	0
E.				
Eboracum Angliæ.	57	20	20	
Ecbatana Tauris.	40	52	89	13
Edenburgum Scotiæ.	56	10	19	0
Edeffa.	38		74	47
Eiflebia.	51	46	32	30
Ephesus Ioniæ.	37	40	67	40
Epidaurus.	36	25	51	45
Erfordia.	51	10	34	30
Euphrates fluv.	31	15	84	10
F.				
Famagusta Cypri.	35	10	66	45
Fessa Africæ.	35			
Finis terræ.	44	2	4	23
Florentia.	43	40	34	
Forum Julii.	45	12	32	50
Francofurdia ad Mænum.	50	8	29	30
Francofurdia ad Oderam.	52	20	39	30
Friburgum Brisgoi.	48	1	28	
Misniæ.	50	58	30	39
G.				
Gades.	22	20	6	
Gandavum.	51	8	25	30
Geneva.	45	45	28	0
Genua Italiæ.	43	50	30	0
Goa Indiæ.	18	30	106	
Gorlicium Slesæ.	51	0	35	45
Gossaria.	52	0	32	40
Granata Hispaniæ.	37	50	11	0
Groninga Frisiæ.	53	12	28	0
	Ec	7	Hal-	

Nomina locorum.

Nomina locorum.	Latitudo.		Longit.	
	gr.	min.		
H.				
Halberstadtium.	52	10	32	40
Hamburgum.	53	44	33	0
Haffnia Daniæ.	55	43	36	45
Herbipolis.	49	57	30	10
Heidelberga.	49	22	31	45
Hispalis.	38	5	13	15
Hydrus Italiæ, vulgo O-	41	26	45	20
tront.				
I.				
Java.	10			
Jerosolyma.	31	55	70	30
Ilium.	41	0	55	50
Ingolstadtium.	48	30	34	
Juliacum.	52		27	30
L.				
Lima Peruciæ.	12			
Lipsia.	51	17	34	30
Lisbona.	39	0	11	30
Londinum Angliæ.	51	32	20	30
Lovanium.	50	50	26	30
Lubeca.	54		31	20
Luca.	43	30	33	
Lucerna Helvetiæ.	46	34	26	
Lugdunum Galliæ.	45	0	26	15
Luneburgum.	54		34	50
Lutetia.	48	52	23	15
M.				
Mechlinia.	51	15	26	50
Magdeburgum.	52	20	31	20
Mecha.	23		65	36
Magellanicum fretum.	54			
Moguntia.				

Ma-

Nomina locorum.

	Latitud.		Longit.	
	gr.	min.		
Majorca insula.	39	35	18	25
Malepum S. Thomæ.	14			
Manicongo Africa.	7			
Mantua.	44	30	32	45
Marpurgum.	51		30	10
Massilia.	42	20	26	45
Meaco Japoniæ.	36			
Mediolanum.	44	35	31	0
Melite insula & civitas.	34	40	38	45
Meroë Ægypti.	16	25	61	30
Messana.	38	30	40	30
Metæ. Metz.	49	12	27	30
Minorca insula.	40	10	19	30
Moluciæ insulæ.	0	0		
Monachium.	48		32	50
Monasterium.	52		28	10
Mons regius Borussiæ.	54	20	46	45
Mons Persulanum. five	43	10	22	15
Monspeliū Galliæ.	42	40	25	
Moscovia.	56			
Mozambique Africa.	15			
N.				
Nanæum Lotharing.	49	20	28	25
Narbono.	43	0	21	
Neapolis.	40	50	38	15
Nicea.	41	40	57	0
Negropontus insula, olim	38	15	53	40
Bœotia.				
Nola Campaniæ.	40	45	40	15
Norimberga.	49	24	35	45
Noviomagus.	47	0	18	
O.				
Olmütz Moraviæ.	49	30	41	

Nomina locorum.	Latitud.		Longit.
	gr.	min.	
Oxonium Angliæ.	51	50	19 30
P.			
Panama Americæ.	8		
Palermo Siciliæ.			
Pelusium, Damiatæ.	31		64 30
Pernambucum Brasiliæ.	7		
Philippinæ insulæ.	12		
Praga.	50	6	36 30
Quito in Peru.	20		
R.			
Ragusa.	42	30	44 40
Rhodus insula.	36	0	58 0
Riga Livoniæ.	58	30	46 45
Rupella, Rochelle.	45	15	18 15
Roma.	42	2	36 15
Rostochium.	54	0	34 45
Rhotomagus.	49	15	22 0
S.			
Saguntum.	39	40	14 36
Salmantica.	41	12	13
Samos insula.	41	15	52 40
Sardinia.	38		
Sidon.	34	35	68
Siene.	25	50	62
Soffata Africæ.	20		
Spira.	49	20	27 40
Spoletum.	42	45	36 20
Stetinum.	53	36	36 45
Stockholmia.	58	50	37
Strigonium.	47	20	9 15
T.			
Tanais ostia	52	34	66
Taprobana sive Sumatra.	0		
			Taren-

Nomina locorum.

	Latitud. gr. min.		Longit.	
Tarentum.	40		45	30
Tarragona.	41		16	20
Tauris.	41			
Tigurum Helvetiæ.	47	0	30	30
Trajectum.	53	20	26	30
Treveris.	49	30	26	
Tridentum.	45	20	33	40
Tubinga.	48	24	31	
Tunetum.	32	30	33	0
Tyrus.	34	8	68	0
V. U.				
Varna, Chiechia.	42	48	82	47
Venetia.	45	20	35	0
Vienna.	48	22	39	
Vilna.	53	30	52	
Ulyssipolis Lisbon.	39	38	5	20
Ulma.	48	24	31	45
Uratiflavia.	51	10	39	30
VVittebergia.	51	54	36	
VVormatia.	40	45	28	
Zeilon insula.	7			

Vfus Tabulæ latitudinis maximus satis in præcedentibus explicatus: præclarum quoque longitudinis cognita multorum locorum usum indicavimus in fine Proposit. III. hujus. Ex. gr. Datâ horâ unius loci vel ephimeridum quæ erit, cum Eclipsis Lunæ fiet, vel Sol arietem ingreditur, vel conjunctio Solis & Lunæ, vel appulsus alicujus Planetæ ad Stellam fixam, &c. invenire quotâ horâ futura sit in alio loco, cujus longitudo in Tabulis annotata reperitur vel aliunde scitur. Ad hujus horæ cognitionem nihil aliud facimus, quam

quam ut sumamus differentiam inter longitudines duorum illorum locorum, eamque in horas & horæ minuta convertimus, & horis datis loci unius addimus, si longitudo illius minor, contrà si major sit, auferimus ab illis. Ita cognoscimus quænam hora sit in altero loco, ubi phænomenon illud incidit.

Verum capite sequenti illustrissimus usus hujus Tabulæ apparebit.

Porro; cum admodum necessarius sit in Geographia & arte nautica usus Declinationis & Ascensionis rectæ stellarum fixarum, adjungo hic primæ magnitudinis stellarum Catalogum cum declaratione & Ascensione recta ad annum 1650. Ex Astronomia enim notum est, quod progressu temporis in hisce mutatio fiat propter motum stellarum proprium super polos Eclipticæ. In usu vero ipso Tabulam talem omnium stellarum habere convenit, quia non semper commoditas eisdem stellis utendi. Nos vero hæc tantum pro exercitio adolenscentum ponimus, ut in hisce problemata exerceant. Ad Astronomiam pertinet hoc negotium, sed usus tum in aliis tum in Geographia etiam insignis.

Astronomia vero docet, quomodo ad singulos annos inveniatur declinatio & ascensio recta.

TABULA DECLINATIONIS

Et Ascensionis recta Stellarum, ad annum 1650.

S denotat declinationem Septentrionalem, A Australem.

Nomina stellarum - Declinatio - Asc. recta.

<i>Primæ magnitudinis.</i>	gr.	min.	gy.	min.
Oculus Tauri.	15.	46. S.	64.	0.
Regulus five Cor Leonis.	13.	39. S.	147.	27.
Cauda Leonis.	16.	32. S.	172.	59.
Spica Virginis.	9.	17. A.	196.	44.
Cor Scorpii.	25.	34. A.	242.	4.
Lucida Aquarii.	31.	24. A.	339.	28.
Arcturus Bæotis.	21.	4. S.	209.	59.
Lucida Lyræ.	38.	30. S.	276.	17.
Cauda Cygni.	44.	3. S.	307.	23.
Capella.	45.	35. S.	72.	44.
Pes Orionis sinister.	8.	38. A.	74.	29.
Syrius, Canis major.	16.	13. A.	97.	26.
Humerus dexter orionis.	7.	18. A.	84.	7.
Canis Minor.	6.	6. S.	110.	17.
Canopus in Argonavi.				

CAPUT XXXII.

*De situ Locorum mutuo & compositione
globi terrestris & mapparum.*

PROPOSITIO I.

Dato loco in Tellure, reliquorum locorum situm
ad illum invenire.

Situs autem loci unius ad alterum dicitur pla-
ga in qua hic ad illum jacet, sive angulus positio-
nis, hoc est angulus quem facit meridianus dati
loci cum linea sive peripheria ab hoc loco ad alte-
rum ducta. Ex. gr. Si in urbe Amstelodamo si-
mus, & cupiamus scire, quonam situ ad illam ja-
ceant reliqua loca, nempe Roma, Constantino-
polis, Stockholmi, & Leida, Alcmaria, Haga Co-
mitis, Ultrajectum, &c.

Modus Primus.

Ad quæ loca aspectus ex dato loco conceditur,
illorum situs ad hunc instrumentis accurate ob-
servari potest. Goniometricum enim constitua-
tur in excelsa turri vel loco dati loci ita ut Hori-
zonti parallelum sit, atque inventâ lineâ meridia-
nâ applicetur huic una instrumenti regula, altera
verò dioptras habens dirigatur ad locum conspi-
cuum. Arcus peripheriæ inter duas regulas inter-
ceptus est angulus positionis istius loci observati
ad hunc, & ex eo plaga ejus nota erit.

Ita omnium vicinorum locorum situs sive po-
sitis observanda erit. Deinde in hæc loca conse-
remus nos & ex hisce aliorum locorum situm
rursus eodem modo observabimus, deinde in hæc
atque ita per totam Telluris superficiem agere
posse-

possemus, nisi aliæ viæ notæ essent, quibus facilius ad quæsitum perveniri potest.

Modus secundus.

Si in globo habeantur proposita loca, adducatur locus datus ad meridianum, & polus eleve-
tur pro ejus latitudine, quadrans affigatur vertici, at-
que applicetur uni & aliis locis, quorum situm
scire cupimus ad nostrum. Extremitas quadrantis
in Horizonte monstrabit angulum positionis &
plagam quæsitam. Dicemus itaque Romam, Con-
stantinopolin, &c. jacere ab Amstelodamo versus
hanc vel istam plagam inventam. Quam ut in
ipso mundo concipiamus, nota debet esse meridia-
na linea sive plaga Septentrionis & Austri, item
Orientalis & Occidentalis (nempe æquinoctia-
lis). Ex hisce enim bene conceptis reliquæ inter-
mediæ plagæ facile concipiuntur. Repetenda hic
sunt ea, quæ capite x. de Plagis dicta sunt.

Modus tertius.

E mappis rectilineis, si loca Proposita in eis re-
periantur, facile est situm horum ad illum vel oc-
culis perspicere. Per datum enim locum recta li-
nea meridiana concipitur Septentrionem & Au-
strum monstrans, atque alia linea per eundem
transversa sive parallelum loci denotans, quæ in-
dicat plagam Orientalem & Occidentalem. Ex
hisce plagæ intermediæ, in quibus singula loca
conspiciuntur, facile concipiuntur, vel ductis li-
neis & quadrante peripheriæ accuratius cognos-
centur, si opus sit accuratiore cognitione. Non
tamen accurata est hæc methodus nisi in mappis
particularibus.

In

In curvilineis mappis minus aptè, minus accurate plagæ vel situs locorum ad alium exquiruntur.

Modus quartus.

Datâ duorum locorum latitudine & longitudine, accuratissimè invenitur situs unius ad alterum, calculo Trigonometrico, tam vulgari quàm Logarithmico vel Catholico Planisphærio, vel etiam globo. Habetur enim Triangulum Sphæricum, in quo dantur tria: nempe complementa latitudinis utriusque loci & angulus comprehensus ab hisce, qui notus est ex differentia longitudinis. Quæritur autem angulus oppositus vel adjacens alterutrius datorum laterum. Hic enim indicabit angulum positionis unius loci ad alterum & ipsam plagam. Diagramma & viva Præceptoris informatio facient hæc adolescentibus magis perspicua. Et hic elucet usus Tabulæ latitudinis & longitudinis locorum.

Modus quintus.

Ex data distantia loci à duobus locis, vel etiam ex datâ distantia & latitudine invenitur plagam ejus sive situs ad alium locum per Sphæricorum Triangulorum solutionem, ut ex Diagrammatibus adolescentes informari possunt. Hic enim ea pluribus exponere supervacuum esse puto.

Modus sextus.

Data duorum locorum latitudine, & distantia, invenitur plagam unius ad alterum, triplici methodo, ut dictum est.

Possunt etiam alia data proponi, è quibus investigare possumus plagam.

PROPOSITIO II.

Dato loco in Tellure vel Globo exhibere omnia loca, quæ ad datum locum in una aliqua data plaga vel dato situ jacent.

Ex. gr. Cupimus scire omnia loca, quæ ab Amstelodamo jacent in plaga Euroboreali.

Elevetur polus pro dati loci latitudine, atque locus ad meridianum adducatur, quadrans affigatur vertici, & altera extremitas applicetur datæ plagæ Horizontis. Sic conspiciemus omnium locorum quæstorum dimidiam partem, nempe quæ margini quadrantis adjacent in globo, altera dimidia pars infra Horizontem est ad punctum vertici oppositum.

Pro ipsa Tellure constructio facilior est: nempe per datum locum ducatur peripheria maximi circuli, quæ cum meridiano illius loci faciat angulum positionis datum. Omnia loca in semiperipheria sunt quæsitæ.

PROPOSITIO III.

Dato loco in Tellure vel globo, exhibere omnia illa loca, ad quæ datus locus unum aliquem datum situm seu plagam habet.

Ex. gr. Cupimus scire omnia loca, ad quæ singula Amstelodamum jacet in plaga Zephyroboreali.

Potest etiam Problema majori delectatione proponi ita: Dato loco in Tellure vel globo ut Amstelodamo, exhibere omnia illa loca, à quibus dum proficisci cupimus ad datum locum Amstelodamum, iter instituendum est à singulis locis versus unam eandemque plagam datam.

Præcedens problema erat locale planum, quia
locus

locus quæſitorum punctorum fuit peripheria circuli, quæ in plano exhiberi poteſt & ſemper in uno plano ſita eſt. Sed præſens problema eſt Solidum, vel potius ad ſuperficiem. Quæſitorum enim punctorum locus in ſuperficie globi non eſt peripheria aliqua circuli, (excepto eo caſu, ſi plaga data ſit Septentrionalis vel Australis.) Sed peculiaris aliqua curva linea ſolida, hoc eſt quæ non in plana ſuperficie ſed curva, Sphærica nempe, exiſtere poteſt: neque tamen eſt Loxodromia (de qua capite proprio dicemus) ſed linea curva ſui generis utrinque terminata. Ad eam verò lineam concipiendam vel ipſa loca in globi ſuperficie, datus locus adducatur ad meridianum. Deinde ſi plaga data ſit Orientalis, certum eſt quod quæſita loca ſita ſint in parte globi verſus occaſum à dati loci meridiano remota (contra ſi Occidentalis plaga data ſit) & ſiquidem plaga data ſit una ex illis, quæ ab ortu vel occaſu vergunt verſus Septentrionem, quæſita loca jacebunt inter Auſtrum & dati loci verticalem primarium. Contra, ſi plaga data ſit una ex illis, quæ ab Ortū vel Occaſu verſus Auſtrum vergunt. Si itaque data plaga ſit ortus vel occaſus æquinoctialis, erit locorum quæſitorum locus curva aliqua linea incipiens à dato loco & terminata in polo vicino, ſita à parte Orientali meridiani, ſi data plaga ſit occaſus, ſed ab Occidentali, ſi datus ſit ortus, & concipienda ut iſta linea ita: Sint quærenda vel exhibenda loca, à quibus Amſtelodamum jacet verſus occaſum æquinoctialem. Quoniam omnium locorum plaga ſive verticalis quadrans reſpiciens ortum vel occaſum æquinoctialem incidit in punctum Æquatoris, quod nonaginta gradibus abeſt à meridiano ſingulorum locorum, ideo primò concipiatur

piatur à dato loco ducta plaga ad occasum æquinoctialem sive ad punctum æquatoris in Horizonte situm. Certum itaque est, quod omnia loca quæ sita debeant ita sita esse à parte orientali Meridiani Amstelodamensis ita ut plaga eorum sive verticalis primarius occasum respiciens secet quadrantem Equatoris inter puncta in Occidente & Meridiano sita. A singulis igitur hujus quadrantis punctis concipiantur peripheriæ maximæ per Amstelodamum transeuntes, & ex eisdem punctis tanquam polis meridiani ducti. Puncta, in quibus prius conceptæ peripheriæ secant suos singulæ meridianos, sunt, quæ sita: ea autem faciunt curvam talem qualem dixi, quæ in polum se induit, neque infinita est. Unde patet manifestum discrimen inter hanc curvam lineam & Loxodromiam. Hac enim non oritur in itineribus versus ortum vel occasum æquinoctialem institutis. Hujus autem, de qua jam agimus, omnes species ita se habent, ut inter duorum meridianorum, quorum distantia non superat 90 gradus, quadrantes contineantur & in polum incurrant.

Vbi autem plaga aliqua intermedia inter Cardines datur, ex.gr. quærentur loca, à quibus Amstelodamum jacet Zephyro Austrum, sive in plaga gradibus quadraginta quinque; à singulorum locorum meridianis versus occasum ab Austro remota. Primo itaque concipiatur à parte meridiani Amstelodamensis orientali (in hac enim loca quæ sita sita esse debere manifestum est) alius meridianus, qui cum Amstelodamensi faciat angulum 45 graduum, sive inter quem & Amstelodamensem interceptus arcus Equatoris sit 45 graduum. Hic erit terminus quæsitum locorum, neque ultra eum in aliquo meridiano aliquis locus repe-

riri poterit quæsito satisfaciens. Concipiatur ab Amstelodamo in istum meridianum ducta perpendicularis peripheria. Porro quia plaga data vergit versus Austrum ab occasu, inde certum est, quod loca quæsitæ debeant sita esse in spatio Trianguli, cujus latera sunt 1. ducta modò perpendicularis. 2. pars meridiani istius inter ductam peripheriam & polum vicinum intercepta. 3. pars meridiani Amstelodamensis inter Amstelodamum & polum vicinum.

In hoc spatio linea curva, cujus omnia puncta quæsito satisfaciunt, sita est, quæ ab Amstelodamo ad polum usque curvo itinere prorepet. Ad descriptionem illius, concipiendi vel ducendi sunt multi Meridiani in hoc spatio, & in singulis tale punctum assumendum, ex quo ducta peripheria maxima ad Amstelodamum faciat cum meridiano eo ex quo ducitur, angulum 45 graduum pro nostro exemplo. Ita enim plurima puncta describendæ hujus curvæ inveniuntur.

Pluribus de linea hac curva egimus in libro de Lineis Curvis. Hic autem, quia proprius ejus explicationis quippe ad Geographiam pertinentis, locus erat, non debuit omitti.

PROPOSITIO IV.

Datâ latitudine loci unius, & distantia ab altero loco, atque plaga, in qua alter hic locus ab eo situs est, invenire plagam alterius hujus loci, in qua prior locus ad hunc alterum situs est.

Facilior erit ex exemplo intelligentia, nempe datur plaga, in qua urbs Hamburgum sita est ab Amstelodamo: quærimus plagam, in qua Amstelodamum urbs sita est ab Hamburgo. Vulgaris enim est opinio, quod contraria plaga sit sumenda,

da, quod falsum est. Et in hoc admodum peccant Mappæ nauticæ & omnes rectilineæ, solutio vera per calculum Trigonometricum vel per Globum aut planisphærium est facilis.

PROPOSITIO V.

Globum terrestrem componere.

Ita vulgo de problemate hoc loquuntur confusè admodum. Stylo Mathematico autem ad distinctam intelligentiam ita proponendum est:

Datò in cujusvis Globi superficie puncto aliquo, quod aliquem in Telluris superficie situm locum repræsentare ponitur, (vel data semiperipheria) invenire in ejusdem Globi superficie puncta quotvis & lineas, quæ ad datum punctum & ad se mutuo ita sita sint, ut loca & lineæ in superficie Telluris, quæ debent ab illis repræsentari, sita sunt ad locum primò assumitum, & ad se invicem.

Modus primus.

Optima, facillima & accuratissima methodus est, quâ ex cognitâ locorum latitudine & longitudine in ipsius globi superficie loca & puncta quæsitâ sive Telluris superficie partes repræsentantia consignantur, quam etsi artifices in consi-
ciendis globis terrestribus qui magno numero dividenduntur, non adhibeant (quoniam alio modo id præstari potest, ubi ex copia distractionis vel venditionis sumtus & impensæ refunduntur, qui non quidem majoris est facilitatis & minoris impensæ ad unius globi confectionem, sed ad multorum & innumerorum ejusdem magnitudinis compositionem apertissimus, promtissimus, & minimæ impensæ, de quo tertio loco dicemus) ta-

men fundamentum ejus constructionis ex hac in globo concepta descriptione dependet, & præterea ubi peculiare globi terrestres insigni magnitudine ex ære conficiendi sunt atque in ejus superficie loca Telluris designari, sicut Principes Philo mathematici eos habere solent, & hoc quo scribo, tempore Societas Belgica indiæ Orientalis fieri curavit Directore Blavio æneum globum, cujus diameter erat quinque pedum, terrestrem nempe, sive in cujus superficie depicta & incisa erant pleaque superficiei Telluris loca, qui globus à Societate dicta missus fuit in Indiam ad Regem insulæ cujusdam dono, quia Rex illius societatis Prætorem Indicum rogaverat ut talem Globum in Belgio fabricandum & ad se deferendum curaret, pretium large & liberaliter pollicitus. Præterea hoc ipso tempore Illustrissimus Dux Holsatiæ FRIDERICUS, omnis eruditionis inprimis Mathematicæ & Physicæ non tantum fautor & promotor, sed etiam peritissimus & diligentissimus Cultor, quem ideo honoris causa nomino, fieri curat sibi Globum, cujus cavitatis tanta esse debet (diameter est pedum) ut in ea aliquis sedere possit commode, & in cava superficie omnes stellæ fixæ appingentur colore aureo vel stellulæ factæ locis convenientibus exiguo stylo insigantur, & Sol in Zodiaco mobilis vel trusatilis, atque instrumento addito exiguo circumrotabitur viginti quatuor horis, ita ut spectator intra cavitatem sedens videat stellas in alio atque alio situ nempe oriri, ad meridiem ascendere, occidere non aliter sicut nos in ipso cælo stellas facere videmus; Exterior autem superficies, ut ad nostrum propositum veniam, omnia Telluris loca exhibebit, ita ut globus iste simul cælestis & terrestris futurus sit, quando,

quando, inquam, in magnorum talium globorum superficie loca incidenda vel depingenda sunt, non possunt tunc vulgari suo modouti artifices per Mapparum chartacearum applicationem neque id in tam magnis & spectandis operibus consultum foret: sed debent tunc in illis globis incidi & coloribus illustrari loca, peripheriæ, ductus fluviorum, &c. quæ in Tellure reperiuntur. Id autem ex Tabula longitudinum & latitudinum, (adhibito simul globo alio, vulgari in quo ductus fluviorum, marium, atque Terrarum conspiciantur) fit commodissime ita:

Per datum (vel assumptum pro libitu, si non datum sit) punctum in superficie describatur peripheria maxima globi, quam constituemus pro meridiano istius loci. Deinde sumatur in hac arcus à puncto illo, æqualis latitudini loci, quem punctum illud repræsentare ponitur: & terminus notetur, atque ab eodem puncto ab altera parte in eadem peripheria sumatur arcus æqualis complemento latitudinis sive distantie loci à polo. Hujus arcus terminus erit punctum, quod polum Telluris Arcticum vel Antarcticum repræsentare debet, quia ita situm est ad datum punctum, sicut polus Telluris ad locum, qui à puncto repræsentari ponitur. Vocabimus itaque istud punctum, polus globi. Terminus verò prioris arcus notatus indicat punctum, in quo Æquator Meridianum dati loci secatur.

Itaque ex polo Globi intervallo circini à polo illo ad terminum dictum describatur peripheria maxima in globo (quæ tamen facilius describi potest & ab artificibus describitur) quæ erit linea Æquatoris sive Æquator globi.

Deinde sumatur in meridiano polus priori oppositus, & ab uno ad alterum per globi cavitatem

& centrum trajiciatur axis ferreus , atque in ejus extantibus partibus affigatur meridianus æneus ab artifice diligentissimo paratus & in gradus divisos habens singulos quadrantes. Debent autem axi applicari illa puncta , ubi o , o , est, sive ubi quadrantum divisiones desinunt^r, ita ut primi gradus initia ipsi Æquatoris lineæ exactè immineant. Æquator accurate dividatur in gradus. Porro sive dati loci meridianum sive alterius loci velis assumere pro primo, perinde fuerit, sed præstat illum assumere pro primo, quem Tabulæ longitudinum & latitudinum , quibus utendum est in locorum designatione , agnoscunt pro primo, sive à quo numerant reliquorum locorum longitudinem & latitudinem. Si itaque meridianus loci primò dati non est is , quem Tabulæ agnoscunt , sumatur ex Tabula longitudo loci primò dati, atque in Æquatore totidem gradus numerentur ab eo puncto , ubi meridianus primi loci eum fecat. Terminus numerationis erit punctum pro meridiano primo Tabularum. In quam verò plagam debeat fieri numeratio , notum est nempe versus occasum : at quænam pars Globi pro Occidentali, quænam pro Orientali à primi loci meridiano habenda sit ita cognoscēs. Globum ita pone ut meridiani semicirculus punctum primum continens sit superior , alter inferior, atque aspice Globum , polus autem Arcticus vicinior esse debet, Antarcticus remotior , siquidem datus locus sit polo Arctico vicinus , sed si polo Antarctico, tunc Antarcticus polus vicinior nobis poni debet, ita illud hemisphærium quod à dextra est , pro Occidentalibus locis assumendum , alterum pro Orientalibus.

Cæterum meridiani primi sectione in Æquato-

re notatâ, ascribantur gradibus Æquatoris numeri incipiendo à sectione illa, nempe 10, 20, 30, &c. Deinde pro quovis alio loco in repræsentando ita agendum. Excerptatur ex Tabula loci illius longitudo & in Æquatore numeretur à primo Meridiano. Terminus numerationis constituatur sub meridiano, & in hoc ab Æquatore numerentur gradus latitudinis illius loci, quos ibidem è Tabula excerptimus. Punctum globi, quod subjectum tunc est meridiani puncto, ubi latitudinis numeratio desit, repræsentabit locum illum Telluris. Atque ita cum omnibus locis, ostiis & fontibus fluviorum agendum est & appellationes cælaturâ addi. Ita Problemati satisfactum: Namque singula loca in Globo ita sita erunt, sicut in ipsa Tellure.

In praxi tamen non ita omnino agendum in principio, quia præstat assumere pro puncto primo ipsum polum, sive id, quod polum repræsentet: & in ipsa Globi confectione axis additur, cuius extremitates signant polus. Atque meridianus primus Tabularum statim in Globo signandus atque deinde reliqua loca ut dictum est. Raro autem ex Tabulis tales magni Globi fiunt, sed plerunque ad imitationem alterius minoris Globi, ex quo longitudes & latitudes desumuntur, & fluviorum tractus, &c. Sic ille, quem Blavius pro Societate Indica fieri curavit.

Modus secundus.

Hic modus ad quædam potius loca, nempe unum vel alterum, in globo signanda ex aliis datis aptus est, quam ut ad totius Globi constructionem adhiberi debeat: Utitur autem locorum distantiiis. Ducatur per datum punctum peripheria

maxima vel arcus peripheriæ maximæ, atque in hoc à dato puncto sumatur arcus, quanta est alterius cujuscvis loci à dato primo distantia. Terminus arcus erit locus alter. Deinde si tertium quemcunque locum signare velis, sume intervallo circini distantiam illius tertii à duobus jam signatis, atque ex hisce tanquam centris describantur arcus intervallis istis circini. Punctum, in quo hi arcus se mutuo secant, est tertii loci punctum.

Ut dixi, non commodus est his modus ad integram Globi designationem, sed ubi in Globo jam confecto volumus designare aliquem locum, qui in illo nondum habetur, & id ex Sola distantia, nota illius loci à duobus aliis, quæ in globo reperiuntur, præstare cupimus, quia facile est, neque nobis vacat longitudinem & latitudinem hujus tertii ignoti numeris investigare propter molestiam calculi. Sic enim hoc modo reperiemus facillime situm istius puncti vel loci in Globo & simul longitudinem & latitudinem; nimirum Problema tunc hoc est:

Data loci distantia à duobus locis, quæ in Globo reperiuntur, designare in Globo situm illius loci, cujus distantia datur, de quo sequenti capite.

Modus tertius, vulgaris Artificum.

Tertius modus in dato Globo superficiem & loca Telluris exhibendi & repræsentandi est ille, quo artifices utuntur ad Globos illos omnes, quos videmus (exceptis illis magnis, de quibus dictum est) tam terrestres quam cælestes conficiendos, qui equidem nihil habet compendii vel commendationis à facilitate, si in unius tantum Globi superficie repræsentanda sint loca Telluris, sed si in multorum ejusdem magnitudinis Globorum su-

per-

perficie id faciendum sit, qui magno numero dividenduntur, ingentem habet praxis hæc præ prioribus prærogativam. Etenim modus hic ita se habet: Concipitur superficies Globi & Telluris divisa esse in duodecim partes (vel plures, si majoris formæ Globi sint conficiendi) per meridianos à polo ad polum ductos, ut ita binis quibusque meridianis sit inclusa duodecima pars superficiei à polo ad polum. Deinde in plano delineatur similis figura tali duodecimæ parte duobus arcibus, (qui deinde in Globo faciunt semiperipherias Meridianorum) inclusa, & multis meridianis per singulos Æquatoris gradus ductis atque parallelorum portionibus sive segmentis divisa speciem cancellorum præbet: æquatoris portio in medio est: in polis coeunt omnes meridiani. Deinde sumto uno meridiano pro primo, quem Tabulæ longitudinum agnoscunt, notantur ab eo in Æquatore gradus ascriptis numeris, ut ita in Æquatore gradus longitudinis singulorum locorum numerari possint. Deinde in singulis hisce duodecimam Globi superficiei partem repræsentantibus planis notantur loca pro locis Telluris ad suos quæque gradus longitudinis & latitudinis, quæ excerpuntur è Tabula, & locis ascribitur nomen, fluviorum & sinuum tractus ducuntur, ut etiam terrarum. Hisce ita in charta vel ligno descriptis, fit deinde juxta illud exemplar incisio & cælatura in æris laminas, atque deinde typographico artificio infinita exemplaria in chartam excuduntur. Quæ chartæ postea Globi superficiei applicantur & conjunguntur, ita ut extremitates attingant axem sive polos Globi, in plerisque tamen constructionibus chartæ non attingunt polos, sed tantum fiunt ita, ut attingant circulos Arcticum &

Antarcticum, & pro spatiis polaribus peculiare chartæ sumuntur. Ita applicatio est facilior, præsertim in magnis. Ita in Globi istius superficie exhibita sunt omnia Telluris loca, cui deinde additur meridianus æneus, Horizon cum pedimento, cyclus horarius & Index.

Duo sunt in hac Descriptione, quæ pleniorẽ explicationem requirunt: (reliqua omnia puto clara satis & intelligibilia esse.)

1. Quomodo in plano describantur duodecimæ illæ partes vel etiam viginti quatuor, ad quarum exemplar deinde incisio fit in æs?

2. Quomodo chartæ planæ possint applicari curvæ globi superficiiei?

Primum fit ita satis commode. Sit exempli causa, applicanda Globo duodecima hemisphærii portio à polo ad Æquatorem. Primo, ex cognita Globi diametro inveniatur peripheriæ maximæ quantitas juxta Archimedeam vel aliam proportionem peripheriæ ad diametrum. Sit exempli causa diameter Globi duorum pedum: & pedis longitudo in charta notata dividatur in decem digitos, & digitus in decem grana, ut centum partes sint in pede & ducenti in duobus. Fiat, ut 7 ad 22 ita 200 ad $628\frac{2}{7}$ centesimas, sive $6\frac{28}{200}$ pedes pro peripheria. Hujus quarta pars, hoc est quadrans peripheriæ erit $157\frac{1}{2}$ centesimarum, sive $1\frac{57}{100}$ pedum, & duodecima pars $52\frac{1}{2}$ centesimarum sive $\frac{1}{2}$ ped. & 2 centesimarum & $\frac{19}{21}$ unius centesimæ. Hisce inventis in charta ducatur linea longa $52\frac{1}{2}$ centesimarum (ex ascripta scala); ex hujus lineæ medio erigatur perpendicularis longa $157\frac{1}{2}$ centesimarum, quæ erit quadrans

drans, (ejus extremitas erit polus) & dividatur in gradus (unius gradus longitudo habetur, si $628\frac{1}{2}$ divides per 360.) Deinde ex polo per singulorum graduum vel decimi cujusque initium describatur peripheria, (paralleli erunt) & in hisce peripheriis à ductæ perpendicularis utraque parte circino abscindatur ea portio, quanta est $\frac{1}{24}$ peripheriæ. Quanta autem sit in apposita scala cognoscetur ex proportionem parallelorum ad Æquatorem, quam tradidimus capite iv in fine. Signatis ita, in qualibet peripheria vel arcu punctis, ductenda est per ea linea, & chartæ pars lineis hisce terminata abscindenda. Hæc enim Globo applicata occupabit $\frac{1}{22}$ himisphærii. Applicatio autem fit non difficulter, nempe si parvæ sint portiones, in hisce enim differentia illa inter rectum & curvum parum sensibilis est, Telluris præsertim cum charta prius humectetur: ita promte applicatur. Loca vero in charta illa, antequam applicetur, consignantur ad debitos gradus longitudinis & latitudinis.

PROPOSITIO VI.

Mappas Geographicas componere.

Mathematico stylo ita proponemus problema:
Dato situ plani infiniti sive pro lubitu producendi, representare in illo loca superficiæ Telluris juxta Perspectivæ leges.

Vel adhuc generalius: *Dato in plano aliquo puncto, quod locum aliquem superficiæ Telluris representare ponitur, invenire in eodem plano (infinito) infinita alia puncta & lineas, quæ quam fieri potest commodissime & ad vivum representent superficiæ Telluris loca & lineas, sive horum situm ad*

datum locum & ad seinvicem. Ita, ut puto melius intelligitur sensus Problematis.

Quoniam paucissimi ex Geographiæ studiosis & cultoribus callent leges Perspectivæ, neque tamen ullam distinctam cognitionem vel intelligentiam de Mapparum Geographicarum constructione & natura adipisci possunt vel de earum commoditatibus & vitiis judicare, nisi fundamenta norint, juxta quæ sunt, ideo pauca quædam in hac doctrina necessaria è Perspectiva arte sunt explicanda. Versatur ars illa, ut cuius notum est, in repræsentandis in Tabula aliqua omnibus objectis vel corporibus hujus mundi, quæ videntur vel quæ saltem concipiuntur, nimirum ut picturæ partes ita conformatae sint & sitæ ad se invicem, atque ita etiam visui nostro appareant, oculo in certo loco constituto. Sicut ipsius corporis, quod repræsentat, partes. Hic quidem est finis Perspectivæ: Methodus autem, quâ illum obtinere vel præstare allaborant, atque assequi se existimant, est hæc:

Quando punctum, superficiem, vel corpus aliquod cujuscunque figuræ repræsentare volunt in Tabula (sive illud aspiciant, sive tantum ejus Ideam mente comprehenderint) concipiunt primò, illud conspici ab oculo uno tanquam puncto, & certum oculo locum sive situm, ex quo aspectus fiat, assignant. 2. Deinde concipiunt planum infinitum aliquod, sive fabulam (vitrum vocant, quia melius est ad conceptionem, si planum pellucidum esse intelligatur) inter oculum & objectum repræsentandum interponi in certo aliquo situ. 3. Denique concipiunt à singulis objecti punctis radios sive lineas duci per planum illud ad oculum. Puncta plani hujus per quæ radii ita
pene-

penetrare ad oculum concipiuntur, dicunt esse punctorum ipsius objecti representationem sive umbram, ut loquuntur, & connexis punctis hisce per lineas, figuram, quæ inde oritur, in Tabula censent ipsius objecti corporis vel superficiei representationem esse in tali situ oculi, atque oculum in eo situ manenti non aliter apparere hanc figuram plani sive Tabulæ in situ suo manentis, ac si ipsum objectum aspiceret (quod tamen optica non omnino in omnibus verum esse docet, & facile est intelligere ex diversa plani interjecti positione. Sed quia melior methodus representandorum objectorum nondum inventa est, ideo illâ contenti sumus oportet.) Exempli causa, sit superficies Telluris & omnes ejus peripheriæ atque loca in Tabula representanda. Concipimus itaque primò, oculum tanquam punctum extra Tellurem in aëre hædere vel situm esse in loco quovis. Deinde inter oculum & Tellurem extendi Tabulam aliquam sive planum vitreum: cujus situs etsi pro lubitu assumi potest, tamen ita in praxi ad meliorem & ordinatam atque æquabilis formæ figuram assumitur, ut perpendiculare sit ad lineam, quæ ex oculo ad centrum Telluris ducitur. Denique à singulis superficiei Telluris punctis sive locis & peripheriis, (ut à punctis Æquatoris, Tropicorum, circulorum polarium item meridianorum, sicut etiam ab omnibus urbibus, ostiis fluviorum, fontibus, &c.) concipimus duci lineas vel emitti radios per Tabulam sive vitrum ad oculum. Illi radii perforabunt Tabulam in certis singuli punctis. Hæc puncta itaque sunt umbræ seu representationes locorum superficiei Telluris, & si puncta illa, quæ à radiis ab una aliqua peripheria emissis (ut ab Æquatore, vel à Tropico, uno, vel à polari,

vel ab aliquo Meridiano) facta sunt, conjungantur ductâ lineâ, sive ea recta fiat, sive curva, hæc erit istius peripheriæ repræsentatio sive umbra, atque ita in Tabula omnes Telluris circulos atque omnia loca habebimus repræsentata.

Quia autem Tellus est rotunda, ideo tota Telluris superficies cum omnibus locis non potest in uno plano commodè repræsentari, quia duo Telluris loca unum idemque punctum in plano facerent, & quæ ultra hemisphærium sita sunt, nimis falsâ facie repræsentarentur: propterea dimidia superficies Telluris in Tabula aliqua, & altera in alia repræsentari debet. Atque adeo oculus potest intra ipsam Tellurem assumi, nempe quando unum hemisphærium suscipimus repræsentandum, oculus in altero hemisphærio, concipitur collocatus & Tabula inter illum & hemisphærium repræsentandum. Idem intelligendum est, si tantum pars superficiei, ut Europa, Asia, Hispania debeat in Tabula repræsentari. Tunc enim in ipso centro Telluris possumus oculi locum assumere, si ita placeat.

Ex hisce puto Lectores clarè satis posse intelligere naturam & modum hujus Perspectivæ artis, quâ Telluris loca in plano repræsentantur. Cæterum duo sunt plenius explicanda ex illis, quæ in methodo hac diximus, quia inde dependet varietas & diversitas Tabularum Geographicarum.

Diximus ad repræsentationem assumi punctum pro loco oculi extra objectum repræsentandum, ut extra hemisphærium Telluris, vel extra Hispaniæ, Europæ superficiem. Quoniam itaque circa quodvis objectum infinitum est spatium atque adeo infinita sunt puncta, in quibus oculus Telluris superficiem (vel Europam, Asiam, si particularis

Tabu-

Tabula sit facienda) contemplans poni potest, & verò si ad diversa puncta ab eisdem objecti sive superficiei punctis ducantur radii qui Tabulam eandem penetrent, admodum diverso in loco & situ penetratio radiorum fit, atque adeo admodum diversæ & dissimiles figuræ in Tabula inde oriuntur, inde fit, ut pro vario oculi situ, (quem ei attribuimus extra Tellurem vel extra illam partem, quæ representari debet) varia existat superficiei illius in Tabula representatio.

Sicut enim alia existit frontispicii & parietum domus alicujus representatio, quando oculus eam directè oppositò è situ contemplari ponatur, alia, si obliquo è situ, alia si è loco supèro, alia si ex infero, & alia atque alia pro diverso oculi situ (quod Præceptores discipulis suis aptis Diagrammatibus explicare possunt) ita quoque alia oritur partium Telluris in Tabula representandarum positio, si oculus constituatur vel concipiatur in aëre tali situ ut ipsi Æquatori Telluris immineat, alia si in axe Telluris protenso vel in alterius hemisphærii semiaxe existere fingatur, alia si loco alicui Telluris alteri imminere concipiatur. Inde enim fit ut tam æquator & paralleli, quam meridiani diversas nanciscantur representationes, quoniam radii ab eis in Tellure existentibus ducti ad oculum, in diversis & diverso situ præditis punctis per forant Tabulam, quod quidem Lectores hoc negotium benè animo concipientes facile intelligent, præcipue si accedat viva Præceptoris informatio & ostensio.

Alterum, quod lectoribus ad meliorem intelligentiam considerandum esse in hac methodo existimo, est de causa varietatis in magnitudine Tabularum sive representationum: eandem enim Telluris super-

perficiem sicut & omnia corpora mundi, ut ædes, templum, &c. in magna & parva Tabula exhibere possumus. Causa ejus est duplex. 1. Quo oculus à tellure & quovis objecto longius remotum esse ponitur, eò minorem magnitudinem accipit repræsentatio, nempe manente eodem situ Tabulæ sive vitri. 2. Quo Tabula sive vitrum (in quo debet fieri repræsentatio per radiorum perforationem) propius admoveatur oculo, eò minorem formam accipit repræsentatio sive projectura, quo propius objecto, eò majorem.

Cæterum si oculus utcumque removeatur ab objecto, (manente Tabula,) modò in eadem cum centro Telluris linea removeatur, sive modò in una perpendiculari ad superficiem Telluris lineâ maneat, non ideo ipsa figura projecturæ immutatur, sed magnitudo tantum, similitudo autem manet. Ita quoque si tabula utcumque admoveatur oculo vel versus objectum removeatur, projecturæ omnes diversæ quidem fiunt magnitudinis, sed tamen similes manent inter se invicem & omnia loca simili situ repræsentant, si modo tabula in accessu vel recessu ab oculo situm parallelum observaverit. Sed si Tabula aliam positionem accipiat, item si oculus non tantum moveatur sed etiam à linea illa perpendiculari recedat, tunc non orientur similes projecturæ, neque loca similem situm in Tabulis habebunt, sed præter diversam magnitudinem erit quoque insignis dissimilitudo in situ locorum, unius ad reliqua.

Verum in projecturis omnium corporum, ut etiam in superficiem Telluris projectura ita fieri consuevit, ut Tabulæ sive Vitro tribuamus talem situm ut corpus sive superficiem tangat in eo puncto, ad quod ducta linea ab oculo perpendicularis

est

est ad superficiem corporis, sive quæ ab oculo ad centrum Telluris ducitur: ad minorem vero vel majorem projecturam nanciscendam remove-
mus magis vel minus oculi punctum à Tellu-
re. Sed concipimus tunc Tellurem valde par-
vam esse.

Hicce in genere de projectura Telluris & origi-
ne Mapparum Geographi earum explicatis, ipsam
methodum illud præstandi edocebimus: ubi pri-
mò illud monendum est, an Tabulæ hæ fieri de-
beant juxta Perspectivæ leges & an omnes fiant
juxta eas. Tabularum enim harum finis est, ut
quam fieri potest aptissime & ad vivum expri-
mant situm locorum in superficie Telluris: quæ-
ritur itaque non immerito, An hoc non possit fie-
ri aliâ methodo, quæ Perspectivæ leges non obser-
vet? sive enim fiat juxta Perspectivæ leges, sive
contra eas, modò aptè repræsentet locorum si-
tum, rectè & benè facta esse censebitur Tabula.
Ad illud respondeo, etsi particulares quædam Ta-
bulæ parvæ alicujus provinciæ possint fieri atque
etiam fiant aliâ methodo, nempe per angulos po-
sitionis, vel etiam per distantias, ut ultimo loco
dicemus, tamen in magnæ partis superficiei Tel-
luris non posse id aliâ methodo commodiori fieri,
quam juxta leges Perspectivæ, etsi verus locorum
situs in Tabulis juxta leges hæc factis, non re-
præsentetur.

Sciendum enim est ad triplicem finem respicien-
dum esse & attendendum in confectioe harum
mapparum. 1. Ut omnia loca ad præcipuos Tel-
luris circulos, nempe ad Æquatorem, parallelos,
meridianos habeant talem situm & distantiam
sicut in ipsa Tellure, ut ita ex illis Tabulis loco-
rum singulorum parallelus, distantia ab Æqua-
tore,

toꝛe, à Polo, Zona, Clima, &c. conspici possit, quoniam inde dependent plurimæ proprietates regionum, & apparentiæ cælestes. 2. Vt magnitudines singularum regionum eam proportionem habeant, quam in ipsa Tellure. 3. Vt loca quilibet eum ad se invicem situm, eam quoque distantiam habeant, quam in ipsa Tellure.

Ex hisce tribus requisitis primum accuratè præstare debent Tabulæ & plerunque præstant, quoniam ex Tabula longitudinis & latitudinis locorum conficiuntur, neque Perspectivæ leges illud impediunt. Secundum verò accuratè quidem præstare nequeunt, si Perspectivæ leges observentur, quia superficiiei curvæ, partes ab oculo remotiores faciunt in vitro minorem repræsentationem, quam partes oculo directè subjectæ: ea tamen inæqualitas exigua est & sit insensibilis, si oculus, infinito intervallo à Tellure remotus esse concipiatur. Tertium autem requisitum nullæ tabulæ majores, ut sunt totius Telluris item quatuor Telluris partium, & majorum provinciarum præstare possunt etsi in parvis regionibus utrumque id præstent, & vulgus in magnis quoque Tabulis ea haberi posse opinetur. Verum in ipsa Descriptione hæc plenius explicabimus. Id tantum hic in genere monemus, in omnibus Tabulis, quas habemus & quæ ab artificibus venduntur, universalibus illum locum sumendum esse pro puncto quod oculo directè subjectum fuerit in projectura, illum inquam Telluris locum, qui in medio Tabulæ situs est. Huic itaque oculum imminere concipere debemus. In particularibus quoque ple-risque, non tamen omnibus id locum habet.

Porro ad sequentia faciliùs intelligenda bene fecerint lectores & Præceptores, si varias Tabulas sibi

sibi comparent, ut ita verba nostra exemplis illustrare & clariora reddere possint.

*Modus primus, oculo constituto
in Axe, facilis.*

Primo loco exhibeo illam depingendi hemisphærii Telluris methodum, quæ oculum constituit in aliquo axis Telluris puncto. Exempli gratia, velimus repræsentare hemisphærium Telluris Arcticum, nempe quod inter Aequatorem & polum Arcticum jacet, & loca in eo contenta, hoc est, Mappa Geographica orbis Arctici conficienda sit. Concipiemus itaque oculum constitutum esse extra hoc hemisphærium, ita tamen, ut immineat medio hemisphærii illius puncto, nempe polo Arctico, ut oculus cum Polo Arctico & centro Telluris sit in una recta linea, hoc est, ut oculus sit in axe Telluris. Erit itaque vel in axe à parte Aequatoris versus polum Antarcticum, vel in axe producto à parte poli Arctici. Perinde est, in qua parte ponatur. Pro tabula (sive vitro) in qua repræsentatio fieri debet, assumitur ipsius Aequatoris planum, vel aliquod tangens Tellurem in polo Arctico, si ab hac parte oculus constitui concipiatur. Sed vitandæ confusionis ergo & ut verbis melius exprimere possimus sensum, ponamus oculum in polo Antarcticum constitutum esse, Aequatoris planum est Tabula (Tellurem parvæ magnitudinis concipimus). Porro concipimus ab omnibus locis & peripheriis hemisphærii Arctici emitti radios ad oculum (sive polum Antarcticum sive aliud axis punctum occupet) qui radii propterea penetrabunt planum Aequatoris. Puncta, in quibus sit perforatio, exhibent singula Telluris illius hemi-

hemisphærii loca , & puncta à peripheriarum ex-
gr. Tropici radiis perforantibus facta si conjun-
gantur, exhibent lineas, quæ repræsentant illas
peripherias. Hac ratione siue methodo fit, ut Æ-
quator sit Terminus projecturæ hujus siue repræ-
sentationis : polus Telluris repræsentetur à centro
hujus circuli siue Æquatoris : meridiani faciant
lineas rectas per polum omnes transeuntes usque
ad Æquatorem. Paralleli Æquatoris, siue circuli
latitudinis, Tropicus Cancrī, polaris Arcticus &c.
etiam projectura hac circulos siue peripherias effi-
ciant, quarum centrum idem quod Æquatoris
nempe punctum, quod polum Arcticum repræ-
sentat. Loca vero Telluris repræsentantur in suis
quæque peripheriis latitudinis & linea meridia-
na, nempe ubi meridiana linea loci secat paralle-
lum loci, punctum sectionis est loci repræsentatio.
Reliquæ autem peripheriæ omnes & semi-
peripheriæ, quæ in hemisphærio illo concipi pos-
sunt, non faciunt in projectura lineas rectas ne-
que circulares, sed Ellipses : Ex. gr. si velimus loci
alicujus Horizontem & verticales circulos repræ-
sentare, illi omnes hac in projectura efficient
arcus Ellipticos (sectionem subcontrariam Co-
nicæ doctrinæ gnari excipient).

Ad faciliorem imaginationem projecturæ, quæ
circuli repræsentantur in Tabula, concipiendus
est Conus radiosus : cujus vertex sit oculus, basis
sit circulus Telluris repræsentandus, latera sint
radii à peripheria ad oculum ducti : hunc porro
Conum secari à Tabula, & pro diversa positione
diversam fieri sectionem & lineam, quæ projectu-
ra est assumptæ peripheriæ in Tellure. Ita quoque
ipsa Ecliptica, cujus semissis tantum cum hemi-
sphærio Arctico repræsentatur, facit Ellipsis por-
tionem.

tionem. Propriè tamen loquendo ipsa Ecliptica non repræsentatur, quia in Tellure non potest concipi immutabilis, sed tantum in certo situ, sive ad certum diei momentum: Atque ejus interseccio cum Æquatore potest assumi in quovis Æquatoris puncto, omnibus tamen Mappis assumitur propter commoditatem interseccio meridiani primi cum Æquatore.

Sic itaque originem & methodum primi generis Tabularum, quæ oculum in axe habent, distinctè explicavimus: jam *quomodo in praxi describenda sit talis Tabula ex istis fundamentis docebimus*. In plano quovis vel charta assumatur punctum medium P pro polo, & ex illo tanquam centro describatur peripheria magna vel parva (pro ut Tabulam magnam vel parvam esse cupimus) quam pro Æquatore habebimus. Hæc duo prohibitu assumere licet, reliqua verò puncta & peripheriæ ex illis inveniendæ. Dividatur Æquator in 360 gradus, & ductis lineis rectis per centrum & singulorum graduum inira, erunt hæ meridiani, ex quibus ille, qui ad initium primi gradus ex istis 360 ductus est, pro primo assumendus erit, ita reliquæ lineæ referent reliquos Telluris meridianos & longitudines à primo meridiano. Jam paralleli latitudinum erunt describendi. Quatuor quadrantes Æquatoris sunt, primus 0, 90, secundus 90, 180: tertius, 180, 270: quartus 270, 0, notentur ad faciliorem appellationem literis A B, B C, C D, D A, & assumatur unus ex istis, exempli causa, B C, à cujus singulis gradibus ut etiam à 20 gr. 30 min. & 66 gr. 30 min. ducantur occultæ rectæ lineæ ad punctum D (terminum diametri B D) vel tantum regula applicetur ad D, & circumducatur per singulos gradus quadrantis

tis B C: & 23 gr. 30 min. atque 66 gr. 30. puncta in quibus hæ rectæ vel regula secat semidiametrum P C, notentur, atque ex P tanquam centro & describantur peripheriæ per singula puncta in P C accepta. Hæ peripheriæ erunt paralleli latitudinum, quibus in meridiano primo & opposito, nempe A P & C P possunt ascribi numeri ab Aequatore versus P, nempe 1, 2, 3, 4 usque ad 90, ut ita singulorum latitudo sit conspicua: Sed ad parallelum 23 gr. 30 min. ascribendum erit Tropicus Cancrī, ad 66 gr. 30. Circulus Arcticus. In ipsa praxi neque omnes meridiani neque omnes paralleli colore notandi sunt, sed tantum decimi quique, reliqui occultis sive cæcis lineis representandi, quoniam usus illorum mox erit, impedirent autem deinde locorum appellationis ascriptionem.

Postquam meridiani omnes & paralleli descripti sunt, facile est ex Tabula longitudinis & latitudinis locorum notare ipsa loca superficiei Telluris, nimirum à primo meridiano assumto numeratur in Aequatore longitudo cujusvis loci, ita incidimus in loci meridianum, deinde ex loci latitudine eligimus parallelum ejusdem latitudinis, & punctum, ubi meridianus secat parallelum, est punctum, quod locum assumtum Telluris representat, cujus appellatio illi ascribenda. Ita cum omnium locorum inscriptione sive projectura accipienda agimus, donec Tabula confecta sit.

Si Eclipticæ semicirculus etiam notandus sit in illa, fieri id debet ante locorum designationem. Diximus quod Ellipticam lineam in projectura faciat Ecliptica, ideoque ejus puncta, per quæ ducenda est illa portio Ellipsis, erunt invenienda. Primum punctum sive pro intersectione Eclipticæ

& Aequatoris assumitur id, quo primus Meridianus Aequatorem secat, quod propterea Arietis signo notatur. Ultimum vero punctum hujus dimidia Ellipsis sive altera intersectio Aequatoris & Eclipticae, finis nempe Virginis, erit in opposito

gr.	m.	gr.	m.
15 Arietis & Virginis	5	56	13
1 Tauri & Virginis	11	31	27
15 Tauri & Leonis	16	24	42
1 Geminor. & Leon.	20	13	57
15 Geminor. & Canc.	22	41	73
	166	pro Virginis	15 gr.
	152	pro initio Virg.	
	137	pro 15 Leonis.	
	122	pro initio Leonis.	
	106	pro 15 Cancr.	

Declinat. Alcenio recta.

Aequatoris puncto 180. Intermedium punctum est id, in quo meridianus 90 secat Tropicum Cancr. Ita tria puncta nacti sumus, per quae transit portio Ellipsis describenda, (quae minor est quam dimidia Ellipsis) quae sunt puncta initii 1 gr. Arietis, Cancr. & Librae: pro reliquis punctis, ut 1 gr. Tauri, 15, 1 gr. & 15 gr. Geminorum, 1 gr. Leonis, 1 gr. Virginis interveniendis, sumenda sunt ex Tabula declinationes horum punctorum, & ascensione recta: nempe hic ascriptae

Deinde, ubi meridianus 13 gr. vel 4 gr. secat parallelum 5 gr. vel potius 6 gr. id punctum erit 15 gr. Arietis. Ita ubi meridianus 27 secat parallelum $11\frac{1}{2}$, ibi erit 1 gr.

Tauri, sic ubi meridianus 16 gr. ubi 15 gr. Tauri; atque ubi meridianus 106 secat parallelum 22 gr. 41 min. ibi erit 15 gr. Cancr.: ubi meridianus 122 secat parallelum 20, ibi initium Leonis, & sic reliqui meridiani 137, 152, 166 secant parallelus 16, 11, 5, 10 15 gr. Legionis initio Virginis & 15 Virginis.

Hicce

Hiscæ punctis curva lineâ conjunctis, habebimus portionem Ellipsis pro semicirculis Eclipticæ boreali, cujus puncta & gradus in singulis signis facillè notabuntur, si pro singulis excerpantur ex Tabulis declinationes & ascensiones rectæ, eo modo quo signavimus gradum 15 gr. Tauri, 1 gr. Geminoꝝ. &c.

Hiscæ factis, absoluta est Mappæ hujus Geographicæ compositio, quæ dividiam Telluris superficiem repræsentabit, nempe partem inter Æquatorem & polum Arcticum.

Modum hunc facillimum esse, & jucundum patet ex ipsa Descriptione, & ipsa praxis monstrabit: jam de usu ejus & incommodis dicendum est: Tria requiri in Tabulis, sive propter triplicem finem constructionem fieri, diximus in superioribus. Primum ex illis, nempe singulorum locorum longitudinem & latitudinem satis accuratè monstrat Mappæ hac methodo confectæ, quoniam ex Tabula longitudinum & latitudinum fiunt: indicant simul locorum à via Solis distantiam, sive Zonas. Secundum requisitum, nempe magnitudinis singularum regionum proportionem debitam, Mappæ hujusmodi non omnino præstant, quippe regiones quo Æquatori sunt viciniores, eò majorem accipiunt in projectura hoc locum quam habere debebant proportionem suâ. Verùm exigua est hæc differentia, propter magnam oculi distantiam, & hoc vitium compensatur eâ commoditate, quod melius notari possunt loca, quoniam paucæ regiones circa polum sunt habitatæ, plures autem versus Æquatorem. Tertium autem finem, nempe situm unius loci ad alia & locorum distantiam non possunt hæc Tabulæ præstare, quia lineæ istæ, quæ talia in mappis denotant, longe alium habent

habent situm & proportionem, quam in ipsa Telluris superficie. Si tamen placeat ad unum aliquem locum expendere reliquorum locorum situm & Solis ortum & moram supra illius Horizontem, poterit in Mappa delineari illius loci Horizon formâ Elliptica hoc modo: Numerentur in Æquatore à dati loci meridiano gradus nonaginta ab utraque parte: Terminorum numerationis unus erit punctum ducendi Horizontis unum, nempe Orientale in quo Æquator secat Horizontem. Alter terminus erit itidem punctum Horizontis pro occasu æquinoctiali. Porro in meridiani loci opposito quadrante numerentur à polo versus Æquatorem paralleli tor, quotus est loci parallelus ab Æquatore. Terminus numerationis indicabit tertium Horizontis punctum, nempe cardinem Septentrionalem. (Cardinis Australis punctum docebimus in mox subjungendis invenire, si major quam hemisphærii portio in mappa repræsentetur, namque in solo hemisphærio non reperitur, nisi Horizon ipsius poli, qui est ipse Æquator.) Sic tria vel quatuor præcipua puncta habebimus, per quæ Horizon transire debet. Ad reliqua puncta invenienda non est commodior vel facilior via, quàm globi beneficio: nimirum Elevetur polus pro assumpti loci latitudine. Deinde in singulis parallelis unum punctum eligatur, per quod primus meridianus transit, atque id adducatur ad Horizontem, quo factò annotetur gradus sub meridiano existens, atque ita in singulis parallelis fiat. Hisce annotatis numerentur à dati in mappa loci meridiano in Æquatore utrinque gradus totidem pro singulis parallelis, nempe pro decimo, xx, xxx, &c. atque ubi meridiani secant parallelos convenientes, illa puncta erunt quasi-

ta, nempe per quæ Horizon est ducendus, poteritque ad illum expendi aliquo modo situs reliquorum locorum.

Potest hac methodo integra fere superficies Telluris repræsentari in una Mappa: nimirum si polus alteruter, nempe Antarcticus, assumatur pro oculo, Tabula verò sive vitrum assumatur alicujus paralleli polo vicini planum, ex. gr. planum circuli Antarctici, si partem Telluris inter polum Arcticum & circulum Antarcticum exhibere cupias in uno plano, neque aliud restat agendum vel addendum ad priorem constructionem, nisi ut meridianæ lineæ protrahantur, & ducantur paralleli ab altera Æquatoris parte. Deinde Ecliptica ducatur integra, & si placet, Horizon compleatur. Verum enimverò cum partes (& gradus) ultra Æquatorem versus Antarcticum polum sitæ hoc modo multò majores evadant, quam partes circa Æquatorem & in ipso Æquatore, quod est contra rei veritatem, ideo præstat duobus hemisphæriis projectionem facere, ut unum referat Arcticum Orbem, alterum Antarcticum.

Tabulæ juxta hanc methodum descriptæ paucissimæ sunt. Mappis generalibus rectilineis addi solent duæ parvæ Mappæ hac methodo descriptæ, quarum una regiones circa Arcticum polum, altera circa Antarcticum exhibet, quas ad meliorem eorum, quæ dicta sunt, intelligentiam inspicere possunt lectores. Cæterum hæc facilius ad discuntur ex praxi quam præceptis.

*Modus secundus, oculo constituto in
plano Æquatoris.*

Præcedens methodus describendi mappas Geographicas neque aptè refert magnitudines & situm
loco-

Locorum, neq; commoda est ad describendum hemisphærium inter ambos polos interceptum, atque ut omnia loca in eodem meridiano jacentia repræsentet: præterea conceptui nostro repugnare videtur polum Telluris in ipsum centrum cadere, atque adeo difficiliorem imaginationem Tabula ita descriptæ præbent. Propterea alia methodus inventa fuit, quæ quidem aliquantum difficilior est præcedente, sed magis apte & concinne repræsentat loca Telluris, atque polum ab Æquatore removet.

Ad hanc methodum intelligendam, concipimus superficiem Telluris in duo hemisphæria secari à meridiani primi peripheria integra, atque duabus Tabulis exhibemus illa hemisphæria, nempe in una unum, in altera alterum. Oculus constituitur in puncto Æquatoris, quod nonaginta gradibus à primo meridiano removetur: Tabula vel vitrum, in quo repræsentatio fieri debet, assumitur pianum ipsius primi meridiani, atque hemisphærium, (quod infra illud planum jacet respectu oculi) suscipimus in plano illo repræsentandum. In hac projecturæ forma Æquatoris semicirculus fit linea recta, & is meridianus, qui 90 gradibus à primo abest, cui oculus imminere concipitur, fiet etiam linea recta: reliqui vero meridiani & omnes Æquatoris paralleli fiunt arcus circulorum, quia Coni eorum secantur à plano Tabulæ sectione subcontrariâ, cujus rei explicatio è doctrina Conica est petenda, & melius per ostensionem quam verba adolescentibus explicari potest. Ecliptica autem fit Ellipsis portio ab causam in præcedenti methodo adductam.

Descriptio fit ita: Assumpto in Tabula puncto E pro centro describitur peripheria circuli magna

vel parva, A B C D (prout Tabulam magnam vel parvam habere cupimus) Hæc repræsentat primum meridianum & ejus oppositum, nimirum ductâ diametrô B D oriuntur duæ semiperipheriæ, quarum una B A D est primus meridianus, altera B C D oppositus sive longitudinis 180. Diameter hæc B D repræsentat meridianum 90 gradibus à primo distantem, & ejus punctum B est polus unus, nempe Arcticus, sed punctum D est polus Antarcticus: diameter autem A C ad B D perpendicularis est linea Æquatoris. Dividantur quadrantes A B, B C, C D, D A, singuli in nonaginta gradus. Porro ad meridianorum & parallelorum repræsentationem sive ad inveniendos arcus meridianorum & parallelorum ita agendum est. Primò Æquatoris linea A C dividenda est in gradus suos, nempe 180, (quia dimidium tantum Æquatorem exhibet) sive A E, E C in 90, hoc pacto: A puncto D ducantur ad singulos gradus semiperipheriæ A B C lineæ rectæ vel, quod perinde est, regula applicetur puncto D & singulis gradibus semiperipheriæ A B C: lineæ hæc secabunt lineam Æquatoris in 180 partes, quæ repræsentabunt gradus, qui sunt gradus longitudinum, & proinde numeri ascribendi sunt 1, 2, 3, 4, &c. incipiendo à primo meridiano D A B. Per singula ista puncta 1, 2, 3. & ambos polos B, D describendi sunt arcus circulorum, qui repræsentabunt meridianos. Quomodo autem per tria data puncta, ex. gr. B 1 D, vel B 2 D, &c. sit describenda peripheria, id docet Geometria, nimirum invenienda sunt centra pro singulis describendis periphereis, quæ centra in ipsa Æquatoris linea sunt sita, sicut meridiani D A B centrum est E. Inveniuntur illa puncta juxta Methodum Euclideanam propo.

pos. 1. libr. 3. si lineæ B₁, B₂, B₃, &c. bisecentur lineis perpendicularibus: (facillimum est per normæ applicationem) ubi hæ perpendicularares incidunt in Equatoris lineam E C protractam, si opus est, ibi sunt centra pro describendis arcibus B₁ D₁, B₂ D₂, &c. Sed centra arcuum B₉₁ D₁, B₉₂ D₂, B₉₃ D₃, &c. incidunt in E A, si opus est protractam. Facilior autem in praxi est inventio, si ex B per singulas gradus quadrantium B A, B C duquantur rectæ usque ad A C protensam, quæ in hac faciant puncta a, b, c, d, e, &c. Ita 1 a erit diameter ejus meridiani, qui per 1 debet transire; & 26 ejus, qui per 2, & ita 3 c, 4 d, &c. Si itaque 14, 26, 30, 4 d, &c. bisecentur, habebimus centra describendorum meridianorum.

Minus autem errori obnoxia & facilior erit operatio (præsertim in magnis Mappis) per Canonem Tangentium nam sic nullis opus habebimus linearum ductibus. Etenim ad dividendam E A, E C, E B, E D in gradus, ita agimus: Dividimus E B in apposita scala in 100000 partes. Deinde; Ex Canone excipimus Tangentes $\frac{1}{2}$ gr. $1\frac{1}{2}$, 2, $2\frac{1}{2}$, 3, $3\frac{1}{2}$, 4, &c. atque singulos hosce angentes ex apposita scala sumtos ponimus in E A, E C, E B, E D, ex E, ita bina vicina puncta gradum unum continebunt, est ascriptio facienda, ut prius. Deinde ad centra singulorum meridianorum in E A, E C, invenienda, sumatur numerus inter B C vel E & quemvis gradum interceptus, atque hujus duplum auferatur à 90 gr. vel ipse numerus à complemento suo) residui tangens desumatur ex canone, & ponatur ex E in E C vel E A. Terminus erit centrum describendi meridiani per assumptum gradum. Ita cum omni-

bus meridianis erit agendum. Praxis hæc facilia esse monstrabit. Fundamentum hujus posterioris operationis ad invenienda centra est Theorema Trigonometricum: Differentia tangentium duorum arcuum quadrantem simul adimplentium est dupla ad tangentem differentię arcuum. Sic itaque meridiani repræsentantur.

Ad parallelorum arcus ducendos, meridianus D B eodem modo in gradus 180 est dividendus, sicut Æquatoris quadrantes E A, E C, nempe si ex C ducantur ad singulos gradus peripherię DAB lineę occultę: verum non opus est hac opera, cum ex E A in E B possint transferri eę partes, puncta sive gradus ab E versus B hoc est ab Æquatore versus polum numerandi 1, 2, 3, 4, &c. ita ab E versus alterum polum D.

Deinde per singula hæc puncta & cognominis numeri gradus quadrantum A B, C B describendi sunt arcus circulorum, nempe per gradus primos, deinde per initium tertii, &c. ita quoque ab altera Æquatoris plaga versus D.

Ita omnium graduum parallelos, & Tropicos atque polares nanciscemur cum meridianis prius inventis.

Ad designandam Eclipticam duplex est methodus. Vel enim ponimus eum Eclipticę situm in Tellure vel supra Tellurem ut intersectio ejus cum Æquatore, sive initium Arietis immineat loco E, & in hoc situ, Eclipticę semicirculi nempe à 1 gr. Canceri ad 1 Capricorni projectura in Tabula est linea recta: nempe ab A numerentur 23 gr. 30 m. versus B, & à termino numerationis per E duca-
tur diameter. Hæc repræsentabit Eclipticę semicirculum in eo situ. Quę linea eodem modo in gradus suos dividetur, sicut semięquator A C.

Pun-

Punctum enim in quadrante BC, ubi circulus arcticus incidit, nempe $66\frac{1}{2}$ gr est id, ex quo si ducantur rectæ ad singulos gradus semiperipheriæ FADG, secabunt EF in 90 gradus & eodem modo EG: quibus deinde numeri & signa Arietis, Tauri, Geminor. &c. ascribenda.

Sed si situs Eclipticæ ponatur talis, ut intersectio ejus & Æquatoris immineat loco A in primo meridiano, tunc fiet ejus projectura Ellipsis portio: cujus duo puncta sunt A, C, tertium id, in quo meridianus 90 secat Tropicum Cancri reliqua puncta invenientur eo modo, quo in primo modo explicavimus, nempe si habeantur declinationes & ascensiones rectæ 15 gr. Arietis, 1 gr. Tauri, 15 gr. Tauri, &c. Ubi enim paralleli pro singulis declinationum gradibus secant meridianos pro singulis ascensionibus rectis sumtos, illa sectionum puncta sunt 15 Arietis, 1 Tauri, &c. per illa itaque si ducatur curva linea, habebimus Eclipticæ projecturam. Atque hoc modo plerunque exhibetur in mappis Ecliptica, quoniam ita in hemisphæris ambobus quasi continua manet.

Perro ad inscribenda loca singula hisce Tabulis, excerpendæ sunt ex Tabulis singulorum locorum longitudines & latitudines, atque ubi parallelus latitudinis loci cujusvis secat meridianum longitudinis ejusdem loci, id punctum repræsentat illum locum in Tabula, cujus appellatio ascribenda: atque ita omnia loca designantur.

Potest etiam simili methodo integra Telluris superficies unâ in Tabula repræsentari, nempe si non planum ipsius meridiani primi assumatur pro vitro, sed aliud ei quidem parallelum sed oculo valde vicinum: sic enim & integri paralleli & integri meridiani sive meridiani singuli suis opposi-

ris continui describentur. Sed admodum diversa à vera Telluris superficie inde oriretur apparentia, & propterea omittitur ab artificibus, qui potius duo hemispheria in una Mappa exhibent. Utile tamen fuerit, ut adolescentes in hisce quoque se exerceant. Commodius tunc erit, oculum constituere in ipso primo meridiano A, ut ita B D sit primus; Æquatoris linea erit non A C, sed alia ex puncto rectæ E D ducta ipsi A C parallela, quæ in tot gradus dividetur, quot sunt in arcu ablato, eodem artificio.

Secunda laus est, quod hemisphærium inter polos interceptum aptè exhibet.

Tertia, quod latitudines, longitudines singulorum locorum, distantiam ab Æquatore & polo ita fere exhibet, sicut in ipsa Tellure jacent.

Incommoda siue defectus sunt 1. Quod Æquatoris gradus inæquales habet, nimirum quo propiores sunt primo meridiano D A B vel opposito B C D, eo sunt majores, & propterea regiones Telluris æquales in hisce Tabulis etiam sunt inæquales, sicut in præcedenti modo: (Hic defectus ex parte corrigitur, si oculus removeatur longissime à Tellure.) nempe regiones circa E sunt minores, circa A, C, majores quam ex proportionem debebant esse: eodem modo regiones circa polos B, D, sunt majores, quam debebant. 2. Situs unius loci ad alterum non potest commode expendi, neque distantias locorum inde venari licet.

Modus tertius, quartus & quintus, de rectilineis mappis.

Exponuntur quoque venales ab artificibus mappæ Geographicæ Universales rectilineæ, nimirum in

in quibus tam circuli longitudinis, (meridiani) quam latitudinis (paralleli) designantur per rectas lineas, quod quidem juxta Perspectivæ leges impossibile est, neque potest ullus oculo & vitro assignari situs vel positio, ut ambæ species circulorum, nempe & latitudinis & longitudinis fiant lineæ rectæ, sed alterutra tantum species per rectas representari potest. In prima, quam explicavimus, methodo meridiani vel longitudinis circuli fiunt rectæ lineæ juxta Perspectivam, & circuli latitudinis fiunt circuli, non rectæ: in methodo autem quinta sequenti latitudinis circuli fiunt rectæ lineæ, sed meridiani curvæ ellipses. In aliis Modis, qui juxta Perspectivam instituuntur, ambæ species fiunt curvæ lineæ, excepta una adhuc methodo, juxta quam meridiani fiunt lineæ rectæ, sed circuli latitudinis fiunt Hyperbolæ, nimirum si oculus constituatur in centro Telluris (terrellæ) & aspiciat hemisphærium ab alterutra primi meridiani parte, tabula vero seu vitrum per quod fit aspectus, sit planum parallelum primo meridiano. Ita enim meridiani fiunt lineæ rectæ, & circuli latitudinis fiunt hyperbolæ. Divisio lineæ Aequatoris & meridianorum in gradus juxta hanc methodum est facilis: & illi, qui harum rerum varietate delectantur, hunc quoque modum cum jucunditate exercere poterunt: at propter hyperbolarum descriptionem minus ad praxin aptus est: ideo non dicemus de eo plura. Qui eum tentare volunt, vivâ Præceptoris informatione utantur. Rectilineæ itaque mappæ non fiunt juxta Perspectivæ præcepta, sed potius contra ea, ut dictum est. Duplices vel duorum generum inveniuntur. Quædam tam longitudinis quam latitudinis gradus æquales numerant (Belgæ vocant *getyck*

grade Kaerten) quales olim fiebant: aliæ vero, sicut hoc tempore construuntur, longitudinis gradus sive *Æquatoris* habent æquales (quod est contra *Perspectivam*) sed non gradus latitudinis sive meridianorum. Horum enim magnitudinem versus polos magis magisque adaugent, ita ut ad 80 gradum decuplo major sit gradus quam ad *Æquatorem* & deinde versus polum propriores gradus infinitam fere accipiant magnitudinem, quæ in nulla mappa exprimi possit, quod incrementum *Perspectivæ* repugnat, quæ tantum concedit triplum pro incremento.

Rectilineæ primi modi sunt omnium facillimæ. Assumpta enim *A B* pro longitudine mappæ dividitur in 180 (pro hemisphærio uno) æquales partes quæ erunt gradus: & per singulos gradus ducuntur meridiani, nempe rectæ perpendiculares, & in his sumuntur partes æquales illis, quæ in linea *Æquatoris* sumptæ sunt, & per singulas partes (quæ denotant gradus latitudinis) ducuntur rectæ *Æquatori* parallelæ. Hæ erunt circuli latitudinis. Loca quælibet signabuntur, ut in prioribus modis, nempe ubi ejus loci Meridianus & circulus latitudinis concurrunt.

Secundus autem modus mapparum rectilinearum in divisione *Æquatoris* in æquales gradus seu partes non differt à priori, & propterea assumpta *A B* dividitur in 180 æquales partes (pro alterutro hemisphærio) seu gradus, sicut in priori & per singulos ducuntur rectæ perpendiculares, quæ designant meridianos, seu circulos longitudinis. Sed ad circulos latitudinis seu *Æquatoris* parallelos designandos aliam observant methodum. Non enim meridiani dividuntur in gradus æquales, sed inæquales, sicut antea innuimus, ita ut accrescant

ab *Æquatore* versus polos. Causa autem hujus inventæ constructionis est, quod *Mappæ* aliæ non monstrant veram positionem unius loci ad alterum, vel potius lineam nauticam ab uno loco ad alterum, neque methodum admittant invenienda distantia. Ista autem duo per hujusmodi *Mappas* obtineri posse statuunt. Etenim quia *Meridiani* per gradus lineæ *Æquatoris* ducuntur omnes ad se invicem æquidistantes, inde fit ut loca vel puncta in singulis *Meridianis* sita eò magis supra veram & debitam distantiam removeantur à primo meridiano, quo ab *Æquatore* magis ad polum accedunt: nimirum distantia in chartis à primo meridiano tantum superat debitam & legitimam distantiam, quantum semidiameter sive sinus totus superat sinum complementi arcus, latitudinis cujusvis puncti. Namque ut sinus totus ad sinum complementi latitudinis cujusvis loci ita gradus unus vel plures in *Æquatore* ad gradum unum vel plures in circulo istius latitudinis. Et propterea gradus in circulis hisce debebant minores exhiberi quam in *Æquatore*, & quidem eo magis minores, quo circuli illi sunt polo magis vicini. Sed in *Mappis* rectilineis, quia *meridiani* ducuntur æquidistantes, non sunt minores, sed æquales in omnibus parallelis. Quantum itaque supra debitam magnitudinem augentur gradus in singulis circulis latitudinis, tantundem gradus latitudinis singuli augeri debent in hisce *Mappis* supra magnitudinem gradus unius in *Æquatore*. Illud autem fit hac methodo in cujusvis gradus magnitudine designanda. Ut gradus unius quantitas in singulis parallelis ad gradus unius quantitatem in *Æquatore*, hoc est, ut sinus complementi latitudinis cujusvis paralleli incipientis illum gradum ad si-

num totum, ita magnitudo partis in *Æquatore*, quæ unum gradum designat, ad magnitudinem partis, quæ in meridiano istum gradum denotabit, è cujus principio parallelus ille ducitur. Si autem accuratius velis agere, non sumendus est sinus complementi latitudinis cujusvis paralleli, sed sinus complementi latitudinis, quæ incipit gradum, addendus est ad sinum complementi latitudinis, quæ terminat gradum illum, & hujus aggregati dimidium sumendum pro primo termino in regula proportionis.

E X E M P L U M.

Sit designandus terminus in meridiano primo pro primo gradu latitudinis ab *Æquatore*. sit autem unius gradus *Æquatoris* magnitudo decem particularum in scala apposita sumtarum. Juxta primam proportionem fiet ejus magnitudo æqualis gradui *Æquatoris*: quia *Æquator* est ipse parallelus qui hunc gradum incipit: sed juxta secundam proportionem, sumo sinum complementi 0 gr. latitudinis, qui sinus est 100000 (nam complementum est 90) & addo ad sinum complementi 1 gr. nempe ad sinum 89 gr. qui est 99985, fiunt 199985, dimidium 99992. Itaque ut 99992 ad 100000 ita 10 (magnitudo gradus in *Æquatore* vel gradus æqualis) ad $10 \frac{80000}{100000}$ pro primo gradu, sed quia incrementum supra decem particularas adeo exiguum est, ut in Mappa notari non possit, ideo gradus hic fit etiam decem particularum, nempe æqualis gradui *Æquatoris*. Progressu autem versus polos facto magis magisque accrescunt gradus. Exemplum. Sit designanda magnitudo gradus sexagesimi, nempe qui inter terminum

num 59 gr. & initium 61 gr. interjacet. Juxta primam proportionem. Sinus complementi 59 gr. est 51503. Itaque

Ut 51503 ad 100000 ita 10 ad 19 $\frac{2}{5}$. Quare pro quantitate illius gradus signanda sumi debent ex scala 19 $\frac{2}{5}$ particulæ, quarum gradus in Aequatore continet decem.

Juxta secundam proportionem ita agendum. Sinus complem. 59 gr. est 51503. Sinus complem. 60 gr. est 50000 Aggregati dimidium est 50751. Itaque ut 50751 ad 100000 ita 10 ad 19 $\frac{3}{5}$. Quæ magnitudo parum major quam prior, neque eâ operâ digna. Porro quando inventa est magnitudo secundi gradûs solitarii, illa addenda est ad magnitudinem primi gradus: aggregatum erit accrescens latitudo (*de vergrootende breedte*.) quantâ sumenda est in meridiano ab Aequatore pro termino secundi gradus. Deinde inventa magnitudo tertii gradûs solitarii addenda est ad accrescentem latitudinem duorum graduum prius positam, sic habebimus magnitudinem ab Aequatore sumendam in meridiano pro termino tertii gradus. Atque ita agendum cum reliquis gradibus. Porro ut faciliior esset studiosis labor, appono hic Tabulam pro terminis singulorum graduum sumendis in meridiano. Sumo autem tales particulas, quales gradus unus Aequatoris ponitur habere 100.

Grad.
term.Grad.
term.Grad.
term.

1	100	29	3032	57	6970
2	200	30	3147	58	7157
3	300	31	3263	59	7349
4	400 $\frac{1}{3}$	32	3047	60	7546
5	500 $\frac{2}{3}$	33	3499	61	7749
6	601	34	3619	62	7960
7	702	35	3740	63	8175
8	802	36	3863	64	8399
9	903	37	3988	65	8631
10	1005	38	4114	66	8872
11	1107	39	4241	67	9023
12	1209	40	4371	68	9384
13	1311	41	3502	69	9691
14	1814	42	4636	70	9943
15	1517	43	4772	71	10243
16	1621	44	4909	72	10558
17	1725	45	5053	73	10900
18	1830	46	5193	74	11243
19	1936	47	5338	75	11617
20	2042	48	6486	76	12017
21	2150	49	5637	77	12445
22	2256	50	5791	78	12908
23	2364	51	5981	79	13409
24	2673	52	6109	80	13960
25	2583	53	6274	81	14565
26	2694	54	6441	82	15243
27	2806	55	6611	83	16009
28	2918	56	6790		

Signa-

Signatis ita gradibus latitudinis in meridiano primo, ducuntur per singulos illos lineæ parallelæ cum Æquatore, quæ erunt circuli latitudinis. Et locorum singulorum inscriptio sit in puncto, ubi circulus longitudinis & latitudinis ejus loci concurrunt.

Regiones autem circa polos minus apte & nimis contra naturalem dispositionem exhibentur in hujuscemodi Mappis, ideo partes inter polos & circulos polares sitæ solent duabus peculiaribus Mappellis juxta primum Modum factis adjungi Mappæ universali.

Vfus Mapparum harum talis est. 1. Longitudo & latitudo locorum invenitur ut in præcedentibus. 2. Dató loco A, ex quo navigatur, & loco B ad quem, exhibetur plaga, in quam dirigenda est navis. Etenim si per A ducatur parallelus & recta A B, angulus quem hæ duæ lineæ faciunt, plagam ostendet. Nautæ alio utuntur modo. 3. Distantiam inter duo data loca inveniri volunt, si circino capiatur intervallum illorum locorum & transferatur in meridianum divisum ita ut pedes circini æqualiter absint à parallelo, qui medius est inter duo illa loca. Sed hæc minus accurata esse puto.

Modus sextus & septimus.

Ptolemæus in posteriori parte ultimi capitis libri primi Geographiæ alium proponit modum, atque partem Telluris tunc cognitam eó repræsentare docet: In hac Methodo Æquator, & circuli latitudinis sunt etiam arcus circularum: Meridiani vero sunt arcus Elliptici. Oculis statuitur imminere meridiano, qui medius est inter extremos habitatæ Tetra: & quidem medio loco inter extremos gradus cognitæ latitudinis. Verùm propter

propter incommoda describendarum Ellipsium, & quia magis ad partem Telluris repræsentandam, nempe ad habitatam partem excogitatus à Ptolemæo videtur, ideo ab artificibus non adhibetur. Huic is quoque affinis est modus, qui circulos quidem latitudinis exhibet per lineas rectas: sed meridianos semissibus Ellipsium, qualis projectura existit, si in planum meridiani primi concipias lineas perpendiculares cadere à singulis hemisphærii alterutrius punctis. Oculum autem infinito spatio removeri à Tellure supponendum est, ut ita omnes radii à locis Telluris ad eum ducti possint haberi pro parallelis & perpendicularibus ad planum meridiani primi, sicut Gnomonici dicunt omnes radios à puncto aliquo Solis ad Tellurem emissos adeo parum divergere, ut pro parallelis haberi possint & easdem faciant in umbris apparentias. Est autem non admodum difficilis.

Si itaque hac formâ placeat Telluris hemisphærium repræsentare, assumatur in plano punctum quodvis E, & ex eo tanquam centro describatur peripheria A B C D, quadrantes sint A B, B C, C D, D A; dividantur singuli in 90 gradus ab A C incipiendo versus B & B. B A D erit primus meridianus, B C D oppositus, recta B D medius inter hosce est nonagesimus à primo B A D. Ducantur ipsi A C, quæ Equatoris semiperipheriam refert, parallelæ rectæ per singulos gradus quadrantum: illæ referent parallelos Equatoris, siue circulos Latitudinis, & Tropici atque Polares simul invenientur, Partes, in quas E B, E D dividitur per hasce ductas sunt gradus meridiani B D, qui notentur 1, 2, 3, &c. Eadem partes sumantur in Equatoris quadrante E A, & quadrante

drante *E c*, atque ascribantur numeri 1, 2, 3 usque ad 180, incipiendo à puncto primo sive proximo ipsi meridiano primo *B A D*. Ita partes ipsius *A E C* referent gradus, in quos semiperipheria *Aquatoris* dividitur, qui sunt gradus longitudinis: Per quos & polos *B, D*, sunt ducendæ semiellipses pro meridianis. Quoniam itaque *B D* est axis major singularum describendarum Ellipsium, semissis vero *E B* vel *E D*: axis vero minoris semissis est in diversis diversa nempe pars ipsius *E A*, inter *E* & gradum longitudinis intercepta, idcirco ex datis facile erit apto instrumento describere hasce Ellipses, quod instrumentum hodie satis vulgare est neque difficilem habet constructionem. Possunt tamen puncta singularum Ellipsium facili negotio inveniri, per quæ liberâ manu ducendæ sunt: sed melius est instrumento eas delineare.

Descriptis ita circulis latitudinum & Meridianis, omnia hemisphærii loca in Mappam hanc inscribentur ad puncta, quibus meridianus loci & circulus latitudinis concurrunt: eritque confecta Mappa. Ecliptica vel rectâ lineâ vel Elliptica representabitur ea methodo, quam in secundi modi Mappis explicavimus, negotio minus operoso.

Hujus methodi Mappæ idem præstare valent, quod præcedentium Modorum Tabulæ, præ quibus insuper hanc habent prærogativam, quod circulorum latitudinis decrementum in magnitudine versus polos manifestè referunt.

Si divisio *H G* & *H K* non per linearum ductus fieri possit propter magnam oculi *D* distantiam, facile erit per calculum invenire particulas illas pro singulis gradibus, nimirum juxta hanc proportionem:

Ut

Ut distantia oculi à centro Telluris sumta cum sinu complementi arcûs Æquatoris repræsentandi se habet ad sinum ejusdem arcus, ita distantia oculi à Tabula ad partem lineæ HG vel HK, quæ tantum arcum Æquatoris repræsentabit.

Ex. gr. Ponamus oculum D removeri à centro Telluris E semidiametris illius ducentis: Tabulam verò sive vitrum HK semidiametris centum. Erit itaque DE 200, & DH 100, qualium EB vel EA, EC est 1. Inveniemus primò longitudinem ipsius GHK, quæ semiperipheriam Æquatoris ABC repræsentare debet in hac oculi & vitri distantia. Erit itaque:

Ut DE ad EA ita DH ad HS vel HK
 200 100 1 ad $\frac{1}{2}$ semidiamete-
 rum Telluris.

Ex quo patet, HK vel HG esse debere longitudinis dimidiæ semidiametri Telluris, quæ profecto nimis vasta est, cum tantam talem lineam in nullo plano exhibere possimus. Ideo pro ipsa Tellure concipimus Terrellam sive globum terrestrem minorem, cujus semidiameter si sit duorum pedum, erit HG vel HK unius pedis, nimirum si oculus ducentis pedibus à centro illius Terrellæ ponatur remotus, vitrum verò pedibus centum.

Si tamen scire placet, quantâ distantia remotus esse debeat oculus ab ipsa Tellure, ut semidiameter Æquatoris EA vel EC faciat projecturam HG datæ magnitudinis, ex. gr. unius pedis, (quorum semidiameter ipsius Æquatoris hoc est semissis axis Telluris continet 195 98300) poterit illud investigari hac proportionem, (suppositâ tamen vitri ab oculo distantia, nempe HD 100000

Ut HG ad DH ita EA ad DE
 1 100000 19598300 ad 19598300000000
 pedes

pedes, quorum 18000 faciunt milliare Hollandicum, ingens profecto distantia.

Sed in praxi non assumimus ipsam Tellurem, sed ejus typum sive Terrellam, à qua non necesse est oculum tanto intervallo remotum supponere: verum ipsa projectura propterea non variatur.

Modus octavus, quo quilibet datus in Tellure locus centrum sive medium Mappa locum accipit.

Si placeat habere Mappam, in qua omnium locorum situs ad nostrum locum vel ad aliquem datum, ut etiam illorum distantia à nostro loco commodè queant conspici & inveniri, inventa est methodus, quâ ita Telluris superficies repræsentatur, ut quivis ejus locus datus medium Mappæ locum sive centrum occupet: reliqua loca circa eum tanquam centrum jaceant: quales Mappas amant illi populi, qui vanâ opinione gaudent, suam regionem in medio totius Telluris sitam esse, ut chinenfes & olim Judæi.

Cæterum ad Mappam talem describendam, sumamus Amstelodamum debere centrum Mappæ occupare: Ejus latitudinem sive elevationem possumus esse 52 gr. Oculus constituitur in puncto vertici opposito sive in Nadir loci: Vitrum seu tabula est Horizontis planum, vel ei parallelum aliud, si majorem portionem, quam hemisphærium placeat repræsentare, quod in hac methodo commodius est, nempe ut planum saltem per depressum polum transeat.

Assumatur itaque in plano centrum E pro Amstelodamo, & descripta peripheria A B C D, quæ Horizontem referet, dividatur in quatuor quadrantes:

drantes : hi singuli in 90 gradus : diameter B D sit meridiana : B Septentrionalis cardo : D Aus-
ster. Diameter. Ac linea ortus & occasus æqui-
noctialis refert verticalem primarium. A occi-
dens : C Orientalis cardo sive refert locum , qui
90 gradibus abest in verticali primario. Omnes
verticales repræsentantur lineis rectis per cen-
trum E ad singulos Horizonis gradus ductis , sed
ad vitandam confusionem præstat omittere , at-
que infixio ipsi E paxillo regulam circumductilem
annectere.

Deinde dividatur B D in gradus 180 nempe ut
in prioribus modis , ducendo ab A rectas ad sin-
gulos gradus semiperipheriæ B C D. Illud pun-
ctum in E B , quod refert 52 gr. arcus B C , erit
projectura poli Arctici : notetur literâ P Punctum
in E D , quod repræsentat 52 grad. arcus D C
(à C versus D numerando) erit projectura inter-
sectionis Æquatoris & Meridiani Amstelodamen-
sis. Notetur literâ Q. Et ab illo versus P ascri-
bantur numeri graduum, 1, 2, 3, &c.

Item à Q versus D , & ab B versus P , nempe
52, 53, 54, 55, &c.

Deinde sumtis punctis æqualium graduum à P,
nempe 99 & 99, item 88 & 88, &c. describendæ
sunt circa hæc partes tanquam {diametros peri-
pheriæ circulorum , quæ repræsentabunt paral-
los sive circulos latitudinis , & Tropicos atque
polares cum Æquatore.

Ad Meridianos repræsentandos, primò descri-
batur peripheria per tria puncta A P C : Ea refe-
ret meridianum , qui nonaginta gradibus abest ab
Amstelodamensi. Ejus centrum sit M in B D (pro-
tracta, in N punctum , quod polum Antarcticum
referat) situm. P N diameter , ducatur per M paral-

parallela ipsi A C, quæ sit F H, protracta ab utraque parte in K, L. Porro circulus P H N F dividatur in 360 gradus, & ex puncto P ad singulos gradus rectæ lineæ (vel solâ regulæ applicatione) quæ lineam K F H L secabunt. Per singula sectionis puncta & ambos polos P, N, tanquam per tria data puncta describendi sunt circuli, qui repræsentabunt omnes meridianos: Centra describendorum arcuum in eadem K L sita sunt, nempe eadem quæ per priorem sectionem inveniuntur, sed hac conditione sumenda, ut pro proximo meridiano à B D N versus A eligatur centrum remotissimum ad L, & pro secundo, secundum ab hoc, &c.

Descriptis ita circulis latitudinum & Meridianorum facile est ipsa Telluris loca inscribere Mappæ. Et conspicuus erit omnium illorum situs ad Amstelodamum. Porro in regulam affigendam loco Amstelodami debent inferri eadem partes, in quas E B divisa fuit, & numeri graduum ascribendi (vel milliaria ex commutatione graduum.) Ita enim circumductâ regulâ ad singula loca statim sciemus, & quanto intervallo distent ab Amstelodamo, & in qua plaga jaceant respectu ejus. Quomodo beneficio Globi talis Tabula sit conficienda monstrabimus in Modo quarto Particularium.

Modus primus Tabularum Geographicarum particularium.

Satis de Mapparum Generalium sive Universalium constructione diximus: jam locus postulat, ut etiam particularium sive specialium compositionem doceamus. Partes itaque Telluris, quas in Mappa repræsentare volumus, sunt vel
magnæ

magnæ vel parvæ. Si magnæ, ut Europa, Asia, Africa, America, commodum erit instituere Declinationem juxta modos explicatos pro Mappis Generalibus: in diversis tamen partibus diversi modi sunt commodiores. Africa & America, quoniam per eas transit Æquator non exhibentur commodè per primum Modum, sed aptissimè juxta secundum, oculo constituto in plano Æquatoris supra meridianum medium inter extremos, qui Africam vel Americam claudunt. Propterea in hisce Mappis Æquator est linea recta, paralleli verò & meridiani sunt arcus circulorum. Sed ad Europam & Asiam repræsentandam modus primus & sextus sunt magis commodi. Ad terras polares sive Zonas Frigidæ aptissimum esse Modum primum diximus in illius explicatione.

Primum itaque ducenda est in plano linea recta pro meridiano loci, cui oculum imminere volumus, atque ea in gradus dividenda est juxta methodum explicatam in præcedentibus, & qui gradus erunt latitudinis, quorum numerus ascribendus est. Deinde ex Tabulis excerptenda est latitudo utriusque paralleli, nempe qui regionem illam terminat ab utroque latere quod polos respicit. Harum latitudinum gradus in linea recta sive meridiano oculi sunt notandi, & per illa puncta ducendæ rectæ lineæ perpendiculares, quæ Mappam claudent versùs Septentrionalem & Australem plagam. Deinde paralleli & meridiani ducendi sunt ad singulos gradus: & loca inscribenda sunt, donec Mappa perfecta sit.

Modus secundus describendi Tabulas particulares.

Verùm in regionibus non ita magnis sed tantum

tum mediocribus vel parvis aliâ methodo uti consueverunt artifices. Primò ducitur linea transversa in extremitate Tabulæ pro circulo latitudinis, in quo regionis describendæ fines *Æquatorem* respicientes jacent. In ea sumuntur partes æquales tot, per quot gradus longitudinis regio illa extenditur ab illa parte. Deinde ex medio hujus lineæ ducitur perpendicularis, quæ tot partes habeat quot sunt gradus latitudinis inter regionis terminos versus *Æquatorem* & polum. Hæ autem partes quantæ esse debeant, cognoscitur ex proportionem gradus circuli maximi ad gradum paralleli, qui ab inferiori transversa linea repræsentatur. Per terminum hujus perpendicularis ducitur alia perpendicularis sive inferiori lineæ parallela, in qua totidem gradus longitudinis. Sumendi sunt, quot in linea inferiori, & quidem æquales illis ipsis lineæ inferioris, siquidem latitudines hæ neque ab *Æquatore* neque à se invicem multum distent.

Sed si magna sit ab *Æquatore* distantia, vel si magnus sit excessus ultimæ latitudinis regionis supra illam, quæ *Æquatori* vicina magis est, non erunt partes (gradus) in superiori transversa linea sumendæ æquales partibus lineæ inferioris, verùm minores esse debent juxta proportionem, quam gradus istius paralleli remotioris habent ad gradus paralleli inferioris, quæ proportio cognoscitur è Tabula, quam capite *IV* posuimus.

Postquam ita in linea superiori & inferiori sumptæ sunt partes pro gradibus longitudinis, lineæ rectæ ducendæ sunt per partium ejusdem numeri initium & finem: quæ rectæ repræsentabunt lineas meridianas. Denique per singulos gradus ejus perpendicularis, quam ex inferioris lineæ medio

medio puncto erigere iussimus, ducendæ sunt per singulorum graduum initia parallelæ lineæ ipsi inferiori, quæ indicabunt parallelos latitudinis. Ultimò loca inscribenda sunt ad puncta, in quibus singulorum locorum latitudinis parallelus & longitudinis meridianus concurrunt. Ita perfecta erit Mappa Geographica pro data regione.

*Modus tertius describendi Tabulas
particulares.*

In parvi tractûs provinciis repræsentandis plerumque utimur alia methodo, quàm in prioribus explicavimus, nimirum ut situm unius loci ad alterum & locorum distantiam accuratius exhibeant Tabulæ. Methodus in eo consistit, ut angulos positionis unius loci ad alios per instrumenta Mathematica inveniamus & deinde apte in chartam transferamus. Sint exempli gratia, quinque loca alicujus regionis in Tabula disponenda juxta situm & distantiam suam; appellabimus ea loca A, B, C, D, E. Primò eligemus ex hisce illud, A, ex quo reliqua vel plurima ex illis commode possunt conspici & adhibito instrumento observabimus angulos positionis ad singula loca, nimirum angulos inter lineam meridianam loci, in quo observamus, & inter plagas reliquorum locorum B, C, D, E. Porro in charta vel plano, in quo repræsentare volumus illa loca, sumemus locum A pro libitu, & ex illo descriptam peripheriam secabimus in gradus (quod tamen non est necesse si habeamus divisum semicirculum, vel aliud Geometricum instrumentum huic usui aptum) unam diametrum assumemus pro linea meridianâ loci A, nempe FAG: altera huic perpendicularis HAK monstrabit ortum æquinoctia-

lem

lem extremitate H, occasum K. F est cardo Septentrionalis, G Australis. Sit jam angulus positionis loci B ad A observatus 30 graduum ab Austro versus ortum : numerabimus in quadrante GH tot gradus, & ducemus ex A lineam per illum gradum. Hæc repræsentabit plagam loci B ab A loco. Eodem modo plagæ reliquorum locorum DE in charta sunt notandæ, si observatæ sint. Deinde eligendus est alter locus ex .B, C, D, E, cujus distantia ab A nota sit vel inventa, ex. gr. B locus, & in illo adhibitis instrumentis observandæ plagæ reliquorum trium locorum C, D, E. Hisce factis, in charta nostra apponemus scalam milliarium vel leucarum, quæ magna vel parva assumemus, prout magnam vel parvam Tabulam esse cupimus. Et in linea plagæ loci B ab A sumemus notam distantiam, atque ibi signabimus locum B, & per B ducemus parallelam ipsi FG, quæ repræsentabit meridianum loci B, & descripta peripheria circa B, sicut circa A, ducemus ex B lineas, quæ denotent plagas locorum C, D, E, atque ubi hæ lineæ secant illas, quæ ex A ductæ sunt, puncta intersectionum erunt loca ipsorum C, D, E. Atque eodem modo agendum, si plura fuerint loca.

Modus quartus, qui Globum adhibet.

Possimus beneficio Globi terrestris locorum remotorum à se invicem & diversorum regnorum situm & distantiam exhibere in plano; imo totam Telluris superficiem: ita ut datus quivis locus medium occupare videatur, sicut in modo sexto generali explicavimus. Ita ut hic modus possit accenseri modis pro Generalibus Mappis : sed præstat non extendere repræsentationem ultra hemi-

sphærium. Ex. gr. Propositum sit in charta ante oculos ponere omnium locorum situm ad Amstelodamum & distantiam ab hoc loco. Primo in charta vel plano sumatur punctum medium pro Amstelodamo : notetur litera A. Ex eo describatur peripheria FHGKFG sit linea meridiana sive Septentrionis & Austri linea : HK sit linea ortus atque occasus. F Septentrionem, G Austrum, H ortum, K occasum monstrat. Dividantur singuli quadrantes in gradus nonaginta.

Deinde in Globo adducatur Amstelodamum ad meridianum æneum, & polus eleveur juxta Amstelodami latitudinem, quadrans affigatur vertici, & applicetur ad singula loca, quorum situm ad Amstelodamum in charta repræsentare volumus, ex. gr. ad Gallia initium, medium & finem, ita ad Italia, Hispania, Hungaria, Suecia, & c. terminos, atque annotentur anguli quos quadrans in singulis applicationibus facit cum meridiano, hoc est anguli positionis illorum locorum ad Amstelodamum : præterea gradus quadrantis inter Amstelodamum & singula loca, hoc est distantia singulorum. Hisce factis seponatur globus, in charta vero ducantur ex A lineæ pro plagis singulorum locorum, nimirum quæ cum meridiana linea tales angulos faciant, quales annotati sunt antea, & quidem inter puncta Cardinalia notata. (quomodo hoc labore ducendarum linearum supersedere possimus, monebimus infra.) In hisce plagarum lineis inveniendæ sunt puncta pro ipsis locis, sumendo distantias ab Amstelodamo, quod duplici modo facere possumus. Vel enim parvo intervallo remota sunt loca, quæ notare volumus, vel magno quidem intervallo; at parvam Tabulam conficere placet, vel denique loca magno interval-

callo remouentur & maioris formæ Tabulam formare animus est. In prioribus duobus casibus, sufficit scalam graduum facere, dividendo lineam aliquam in æquales partes, quarum singulæ repræsentent gradum. Ex hac scala sumemus distantias singulorum locorum antea notatas intercallo circini, & in plagæ singulorum locorum lineam inferemus. Terminus erit notandus appellatione loci istius. Atque ita omnia loca in Tabula notabimus circa Amstelodamum.

Sed si Mappa sit maioris formæ conficienda, & regiones remotæ sint notandæ, non sufficit scalam æqualium partium pro gradibus usurpare, sed alio modo dividenda erit linea, nimirum iuxta Perspectivæ leges, quoniam in hoc modo posuimus oculum infra Horizontem Amstelodamensem in loco Antipodum, & pro vitro assumimus ipsum Horizontem, si hemisphærium repræsentare animus est, vel si maiorem vel minorem hemisphærio partem, nunc assumimus planum horizonti parallelum, quod tanto arcu ab eo distet, quanto pars repræsentanda ab hemisphærio. Describatur itaque peripheria circuli in alia charta, *M* centrum, *N O* diameter una, *P Q* altera perpendicularis. Quadrans *P Q* dividatur in gradus 90, & sumantur infra *Q* tot gradus, quot pars ultra Hemisphærium est repræsentanda, & erit terminus *R* ducatur ipsi *Q M* parallela ad *M O*, nempe *R S*.

Porro ex *O* ducantur rectæ ad singulos gradus quadrantis *N Q* vel *N Q R*, (si maior portio quam hemisphærium exhibendum sit) quæ diuisent rectam *M Q* vel *S R* in partes tales, quæ in projectura indicabunt gradus. Dein assumatur linea, quantamcunque volumus esse distantiam

remotissimi loci ab Amstelodamo in Tabula , hoc est quantam volumus esse dimidiam Tabulam . Illa linea ita dividenda erit sicut M Q vel S R divisa fuit : & partes notandæ numeris 1, 2, 3, 4, 5, 6, &c. pro gradibus. Ex hac scala sumtæ distantia pro singulis locis ab Amstelodamo si in lineas plagarum inferantur, exhibebunt puncta pro ipsis locis, & confecta erit Mappa , quam cupiebamus.

In praxi superfedere possumus linearum pro plagis ducendarum labore , quippe scalam graduum in regula designare commodum erit , cujus initium si applicetur Amstelodamo, & regula circumducatur ad gradus peripheriæ pro plagis singulorum locorum poterit statim notari punctum pro quovis loco, numerando distantiam in regula à principio scalæ. Ipsa praxis facilem hanc methodum esse docebit.

Modus quintus. De Mappis nauticis.

Mappæ nauticæ (*Pas-Caerte, Zee-Caerte*) rectilineæ sunt , & habent meridianos omnes parallelis secus ac secundus modus in posteriori membro exhibebat. Duplices sunt , sicut universales duplices esse diximus in Modo quarto & quinto universalium , nempe æqualium graduum latitudinis vel inæqualium quas nautæ Belgæ vocant *gelijck Graden Pas-Caerten*, & *vvassende Graden Pas-Caerten*. Constructio eadem est, quæ illarum universalium, differentia tantum est, quod partem tantum repræsentant , & plures compassos nauticos exhibent. De usu dicemus in arte Nautica. Chartæ æqualium graduum fiunt, si repræsentetur pars terræ parum in latitudine varians , sicut sunt Mappæ pro navigatione maris mediterranei :

In-

Inæqualium graduum fiunt , si magna sit latitudo.

C A P V T X X X I I I .

De distantia locorum.

P R O P O S I T I O I .

D *Atis duobus punctis sive locis in globo, ducere ab uno ad alterum lineam sive arcum, qui sit pars peripheria maxima Globi istius. Sive, In superficie Globi describere peripheriam circuli maximi quæ transeat per duo data puncta.*

Concipiamus ductas rectas lineas ab uno puncto ad alterum , & ab ambobus ad centrum Globi vel Telluris , quæ tres rectæ lineæ facient Triangulum , atque ideo in uno plano sunt. Secet hoc planum protensum superficiem Globi : erit sectio peripheria circuli maximi , & arcus inter loca interceptus erit is qui quæritur. Vel, Sumatur circino intervallum quadrantis peripheriæ maximæ & uno pede defixo in punctum unum ex datis describatur arcus in superficie Globi : Deinde alius arcus pede defixo in alterum datum punctum . Communis sectio horum arcuum erit polus describendæ peripheriæ , sive in quo si designatur pes unus circini, & describatur in superficie Globi peripheria, habebimus arcum quæsitum inter data loca interceptum.

P R O P O S I T I O I I .

Distantia duorum locorum in superficie Telluris brevissima, sive Via brevissima ab uno loco ad alium est tantum una (exceptis antipodum locis) nempe arcus peripheria maxima, quæ intercipitur inter duo illa loca.

Brevissima duorum punctorum distantia, est linea recta ab uno puncto ad alterum ducta, ut constat ex Archimedea definitione & ex aliis definitionibus facile est deducere. Itaque etiam duorum locorum in superficie Telluris existentium distantia brevissima est linea recta, quæ ab uno loco ad alterum ducta esse concipitur. At cum Telluris superficies sit convexa curva, inde fit, ut recta illa linea, quæ verè est duorum locorum brevissima distantia, cadat intra cavitatem istius superficie. Nos vero consideramus illas tantum vias ab uno loco ad alium, quæ in ipsa sunt superficie Telluris & proinde curvæ lineæ: ideo addimus in Propositione, distantiam brevissimam in superficie Telluris. Inter hasce vias sive interceptas lineas una est, quæ omnium est brevissima, nempe arcus peripheriæ maximæ interceptus inter duo quælibet puncta, ita ductus, sicut in præcedenti Propositione diximus. Quod itaque hic arcus sive hæc curva intercepta linea sit brevior, quam omnes aliæ curvæ lineæ interceptæ circulares (quarum infinitæ sunt) patet ex hoc theoremate Geometrico: Si duarum inæqualium peripheriarum arcus sumantur, quorum subtensa sit æqualis vel eadem, erit majoris peripheriæ arcus minor quam minoris peripheriæ. Etenim omnes curvæ lineæ circulares per duo puncta transeuntes sunt minores peripheriæ Telluris excepto illo arcu, qui supponitur maximæ esse peripheriæ. Quod autem hic arcus etiam minor sit, quam aliæ curvæ non circulares (solidæ lineæ, ut helices) quales infinitæ cogitari possunt in superficie Telluris interceptæ inter duo loca, ostensum est ab aliis: pertinet enim hoc Theorema non ad Geographiam sed ad Geometriam, quæ etiam ostendit,

dit, quod tantum unicus arcus peripheriæ maximæ duci possit ab uno loco ad alium, non plures.

PROPOSITIO III.

Distantia locorum non mutantur.

Itineraria quidem locorum distantia modo major, modo minor esse potest: at vera & brevissima distantia Geographica manet eadem, nisi superficiem Telluris divelli vel disrumpi concipias. Loca autem hic intelligimus puncta Telluris immobilia sive immota. Si itaque superficies inter duo loca intercepta, sit facta altior, erit quoque distantia locorum facta major, si depressior, erit minor.

PROPOSITIO IV.

Nulla loca Telluris distant majori intervallo, quam 2700 milliarius Germanicorum; quorum quindecim ponuntur gradum unum facere.

Etenim quoniam Telluris superficies Sphærica est, non potest inter duo ejus puncta cadere arcus brevissimus, qui major sit quam 180 gr. hoc est quam semiperipheria circuli maximæ. Atqui 180 gr. faciunt 2700 milliaria Germanica, si unus gradus ponatur facere quindecim. Quare nulla loca distant pluribus, quam 2700 milliariis Germanicis. Alia verò est conditio itinerariæ distantia.

PROPOSITIO V.

Distantia antipodum est 2700 milliarius Germanicorum, sive 180 graduum.

Distantia inter antipodes brevissima non est una, sed infinita sunt, eæque omnes æquales, etsi

propriè loquendo non possint dici brevissimæ distantiæ, sed, quibus nullæ breviores sunt.

Distantiæ circulares inter antipodes sunt omnes peripheriæ maximæ, nullæ peripheriæ minores, qualium inter alia loca, quæ non è diametro opponuntur, sunt infinitæ.

Peripheria per duo loca transiens; transit etiam per loca antipodum istorum locorum.

Distantiæ loci alicujus à duobus locis, qui antipodum sunt, simul sumptæ faciunt 180 gradus. Itaque cognita distantia loci alicujus ab alio, nota quoque erit distantia loci illius ab antipodum alterius loco.

Quinque hæ propositiones ita manifestæ sunt veritatis, ut cuilibet eas perpendenti facile sit eam perspicere & intelligere.

PROPOSITIO VI.

Dato loco aliquo in superficie Globi, exhibere omnia illa loca, quæ habeant unam & eandem datam distantiam à loco illo dato, oportet autem datam distantiam non esse majorem quam 2700 miliarium Germanicorum.

Datus locus adducatur ad æneuni meridianum, polus elevetur juxta loci latitudinem atque quadrans affigatur verticali puncto. Porro data distantia convertatur in gradus, qui gradus numerentur in quadrante à puncto verticali. Terminus numerationis notetur creta: circumducatur deinde quadrans super superficiem globi: notatum punctum indicabit vel monstrabit omnia loca Telluris, quæ datam distantiam à dato loco habent.

Vel, Sumatur intervallo circini in Æquatore gradus conversæ distantia, & uno pede defixo in
datum

datum locum, circumducatur pes alter. Loca, per quæ transit, sunt quæ sita.

Si vero gradus ex conversa distantia orti, plures sint, quam nonaginta, hoc est quadrante, sumatur eorum complementum ad 180: & antipodum locus adducatur ad superiorem ænei Meridiani semicirculum, polus elevetur pro ejus latitudine, & quadrans verticali puncto affigatur, & numerentur in eo gradus complementi; terminusque numerationis cretâ notetur. Si tunc circumducatur quadrans, notatum ejus punctum omnia quæ sita loca, quæ nimirum à dato loco datam habebunt distantiam. Si circino expedire negotium placet, ages, ut antea diximus in Mappis Chorographicis.

PROPOSITIO VII.

Quanam faciant, ut itineraria distantia sit major, quam vera sive brevissima & Geographica.

1. Sylvæ, quæ inter loca aliqua jacent, inviæ.
2. Montes alti & valles profundæ. 3. Paludes, lacus & aqua in genere, si terrestria itinera spectemus.
4. In maritimis itineribus, hoc est in navigationibus, procurrentes terræ, & insulæ obstant directo itineri.
5. Maris peculiaris fluxus.
6. Venti.

Sed quærat aliquis, annon fieri possit, siue annon sint loca, quorum itineraria distantia sit minor, quam Geographica brevissima? Ad hoc respondeo, etsi Telluris figura sit spherica quod ad sensum, tamen in primo libro jam indicavimus, hanc figuram non esse omnino Geometricam, sed multis locis elevatis atque depressis inæqualen reddi. Si itaque concipiamus certam Telluris superficiem, siue superficiem à centro distantiam.

ex.gr. vulgarem semidiametrum 860 miliarium, respectu cuius sumenda sint loca elevata vel depressa, hoc, inquam, supposito, possunt esse duo loca ita sita, ut itineraria distantia sit minor, quam Geographica brevissima: nimirum si loca illa sint in superficie Telluris, quæ 860 miliaribus à centro removeretur, spatium autem intermedium sit depressius.

PROPOSITIO VIII.

Duorum locorum in Globo datorum distantiam invenire, ut etiam in Mappis Chorographicis.

Adducatur unus è datis locis ad meridianum æneum, quadrans affigatur vertici, & applicetur ad alterum locum datum: numerentur tunc in hoc gradus intercepti inter verticem & hunc locum: hi gradus convertantur in miliaria vel aliam mensuram, in qua cognoscere volumus distantiam illorum locorum, hæc erit quæsitæ.

Vel, capiatur circino intervallum duorum locorum & translato hoc ad Aequatorem consideretur, quot gradus in hoc occupet: hi enim sunt ipsa locorum distantia, quos in miliaria vel aliam mensuram convertere debemus.

Si verò major sit distantia, quam ut quadrante vel circino intervallum sumi possit, (nimirum si major quam 90 gradus) erit unius loci ab alterius loci antipodibus distantia minor, quam 90 grad. Inquiratur itaque hæc, & auferatur, ab 180 gradibus: residuis gradus erunt distantia quæsitæ.

In Mappis universalibus, sicut etiam in particularibus magnarum partium non potest accurate & vere inveniri distantia locorum: in particularibus autem Chorographicis solet apponi scala miliarium vel leucarum, cuius beneficio cognoscitur

scitur locorum distantia in illis Mappis contentorum. Si enim circino sumas duorum locorum intervallum, & hoc in scalam transferas, statim cognosces locorum illorum distantiam.

Sed si Mappa sit majoris alicujus portione, non caret vitio hæc methodus. Etenim nulla Mappa fieri potest ulla methodo, quæ locorum distantias veras exhibeat: sed talis quidem potest, quæ unius loci à reliquis omnibus distantiam monstret, ut diximus in Methodo constructionis Mapparum.

PROPOSITIO IX.

Datâ latitudine & longitudine duorum locorum, invenire eorum distantiam.

Facilis est solutio hujus problematis per Globum, & Planisphærium Catholicum; difficilis vero, sed accurata per calculum & Trigonometricam supputationem.

In Globo fit hoc modo: Assumatur meridianus aliquis pro libitu (præstat assumere unius loci meridianum, si per ejus longitudinis punctum aliquis transeat, nempe si longitudo sit 10, 20, 30, &c. vel sequentium denariorum, vel quod commodius erit, assumatur primus meridianus) & numeretur in Aequatore ab eo differentia longitudinis locorum, terminus numerationis adducatur sub æneum meridianum, & numeretur in hoc latitudo alterius loci, punctum Globi, quod subjicitur termino numerationis, notetur cretâ: in primo quoque meridiano notetur punctum latitudinis pro altero loco. Deinde circino capiatur intervallum inter notata puncta, & transferatur vel in Aequatorem vel in primum meridianum: ita cognoscemus distantiam locorum

in gradibus & graduum partibus : qui gradus convertendi erunt in milliaria vel aliam mensuram, quam volumus. Si intervallum majus sit, quam ut circino commodè sumi possit, agemus, ut in Propos. VII, vel filum accurate tensum adhibebimus.

Quoniam planisphaerium aptius vel commodius est ad usum, praesertim nautis, & multi ejus beneficio problemata solvere amant, atque hujus Problematis frequens usus est, placet etiam hanc methodum per planisphaerium proponere.

Sunt autem casus duo problematis. Velenim una & eadem est locorum data longitudo aut 180 differentia nempe si in eodem meridiano jaceant, vel diversa est longitudo. Si eadem, non opus est alia methodo, nisi ut differentia latitudinis convertatur in milliaria : namque ipsa illa differentia est distantia locorum in gradibus : si diversae speciei sint latitudines, nempe una borealis, altera australis, addendi erunt gradus latitudinum : Si differentia 180 graduum, nempe si in diversis semicirculis ejusdem circuli longitudinis, simili modo agendum erit, quod cuivis facile est colligere. Aliter fit, si longitudo locorum sit inaequalis, hoc est si in diversis meridianis sita fuerint loca, & extra Aequatorem.

Sed utile fuerit ad distinctam problematis intelligentiam, enumerare prius casus, qui variant solutionem, & plerique facillimam habent, ut manifestum erit per exempla, quæ studiosi exercere debent.

I. Si eadem sit locorum longitudo & sint cognominis latitudinis. In hoc casu differentia latitudinum est ipsa distantia in gradibus, qui in milliaria vel aliam mensuram mutari possunt.

2. Si

2. Si eadem sit locorum longitudo, sed sint diversi nominis latitudines, unius borealis, alterius australis. In hoc casu, addendæ erunt latitudines in unam summam, hæc indicabit distantiam in gradibus.

3. Si differentia longitudinum sit 180 graduum, & sint cognominis latitudinis, erunt sumenda complementa longitudinum ad 90 gr. sive locorum distantia à polo vicino, & illæ addendæ: summa enim indicabit distantiam in gradibus.

4. Si differentia longitudinum sit 180 graduum, & sint diversi nominis latitudines, sumatur longitudinum differentia & auferatur ab 180 gradibus vel semicirculo. Residuus numerus exhibebit distantiam in gradibus.

5. Si ambo loca fuerint in Equatore, differentia longitudinis est ipsa distantia.

6. Si latitudo locorum fuerit una & eadem; neque major viginti gradibus, & differentia longitudinis parva, ingrediemur cum ea latitudine Tabulam magnitudinis parallelorum positam cap. iv. & gradus unius quantitatem excerpemus. Deinde differentiam longitudinis sumemus, & hosce gradus convertemus in excerpta milliaria vel excerptam mensuram.

7. Si vero & longitudo & latitudo sit diversa, vel, si latitudo quidem eadem, sed major quam 20 gr. & longitudinis differentia majuscula, quod quidem in plerisque exemplis usu venit, in hoc casu non licet uti prioribus compendiis, sed difficilior est solutio, & de hoc casu præcipue proponitur Problema. Solutionem per globum jam tradidimus; per planisphærium methodus hæc est: Regula planisphærii adducatur ad unius loci latitudinem sive gradum elevationis poli: deinde

numeretur differentia longitudinum in meridianis, incipiendo ab altera parte, & ubi punctum observetur, quo meridianus hic terminans numerationem secutur parallelum alterius loci latitudinis. Super istud punctum Indicis extremitas constituitur. Hoc facto regula applicetur ad Aequatoris lineam. Numerus parallelorum inter polum & Indicem interceptorum est distantia quaesita in gradibus.

Ita per planisphaerium solvitur problema. Alia est methodus à Maurolyco inventa, quae per linearum ductus in circulo docet jucundâ operatione exhibere distantiam, ex qua lineari descriptione etiam deducitur modus quo per calculum solvitur problema. Describatur centro E peripheria circuli quaedam: semidiameter una BE; arcus BA sumatur aequalis differentiae longitudinum locorum, (si differentia sit major, quam 180 gr. sumpta, hujus differentiae complementum ad 360 gr.) & ducatur semidiameter AE. Deinde sumatur arcus AF (versus B) aequalis latitudini loci A, & ex B arcus BG aequalis latitudini loci B: demittatur GI ex G perpendicularis in BE, & FH ex F in AE. Ducatur IH, & super hanc ex punctis I & H erigantur perpendiculares, IL aequalis IG, & HK aequalis HF. (in eandem plagam, si latitudines locorum fuerint cognomines, sed si diversi nominis tunc ducenda erit IL ab una plaga rectae IH, & HK ab altera.) Hisce factis recta LK erit subtensa quaesitae distantiae sive subtensa arcus illius, qui distantiam indicabit in gradibus. Itaque intervallo circini KL, sumatur arcus BX: hic repraesentabit distantiam in gradibus.

Modus iste Maurolyci ex sphaericorum Triangulorum

gulorum solutione vel habitudine est desumptus, neque linearis hæc methodus accuratam distantiam exhibebit, etsi facilis sit & jucunda praxis: sed sola methodus per numeros vel Trigonometriam sphericorum Triangulorum exhibet accuratam distantiam. Habetur hic enim Triangulum sphericum, in quo dantur duo latera, nempe locorum distantia à polo (complementa latitudinum) & angulus contentus, cujus mensura est differentia longitudinis. Queritur latus tertium. Cujus inveniendi etsi plures sint methodi, tam generalissima & casuum varietatem negligens est hæc: 1. Si latitudines locorum sint cognomines, fiat: Ut quadratum sinus totius ad rectangulum contentum sub sinibus distantia locorum à polo, ita sinus versus differentia longitudinum (si ea major sit quam 180 gr. sumitur ejus complementum ad 360 gr.) ad quartum quendam numerum. Sumatur deinde latitudinum differentia, & hujus complementi sinus. Porro inventus antea quartus numerus conferatur cum hoc sinu: Si huic fuerit æqualis, erit locorum distantia 90 graduum. Si minor fuerit, subtrahatur, & residuus erit sinus arcus, cujus complementum est distantia locorum. Si denique major sit inventus quartus dicto sinu, subtrahatur hic ex illo, & residuus erit sinus arcus, qui adjectus ad 90 gradus exhibebit distantiam quaesitam in gradibus, qui convertendi sunt in distantiam itinerariam.

2. Si latitudines sint diversi nominis, nempe una borealis, altera australis, sumatur pro loco alterutro ejus antipodum locus, & hujus distantia inveniat ab altero loco juxta dictam methodum. Erit enim hujus latitudo eadem quæ loci istius, sed ejusdem nominis cum altero loco: Itaque

que in Triangulo sphaerico erunt duo latera data & angulus est complementum differentiae longitudinis locorum ad 180 gr. (vel excessus supra 180, si differentia haec major fuerit quam 180.) Inventâ itaque distantia inter unum locum & alterius loci antipodes, habetur quoque ipsorum locorum distantia. Etenim haec est prioris complementum ad 180 gr. ut in praecedenti propositione dictum est.

In locis propinquis & non multum ab Aequatore distantibus (nimirum non ultra 18 gradum) faciliori methodo, etsi non Apodictica, utemur, quae distantiam exhibebit à vera parum diversam: nimirum differentiae longitudinis sumemus quadratum atque etiam latitudinis differentiae. Quadrata addemus atque ex aggregato extrahemus radicem quadratam. Haec indicabit distantiam locorum parum à vera discrepantem.

Vel ita ages magis certâ methodo, quae etiam ad loca ultra 20 gr. latitudinis adhiberi potest: Ex tabula quantitatis parallelorum excerpe proportionem paralleli majoris latitudinis ad Aequatorem: Et, ut quantitas Aequatoris ad quantitatem paralleli, ita differentia longitudinis ad alium, sive ad differentiam longitudinis sumtam in parallelo majoris latitudinis. Haec quantitas assumatur pro differentia latitudinis, & fiat ut prius.

Facilior est problematis solutio, si Tabulas Logarithmorum adhibeamus, & Triangulum obliquangulum in duo rectangula resolvamus. Sic enim nulla multiplicatione vel divisione opus est.

PROPOSITIO X.

Data latitudine duorum locorum, & plagâ, in qua unus ab altero situs est, invenire distantiam.

Hoc

Hoc problema idem est cum illo Trigonometrico abstracto: Datis in Triangulo sphærico duobus lateribus, & angulo qui uni lateri dato apponitur, invenire latus tertium. Data enim duo latera sunt in hoc problemate Geographico, distantia duorum locorum à polo, & angulus oppositus alterutri dato lateri est angulus positionis sive angulus plagæ unius loci ad alterum, vel hujus anguli complementum ad 180 gr.

Per globum itaque solutio problematis fit hoc modo. Assumatur primus meridianus pro meridiano loci, cujus plaga ad alterum non datur: & in hoc meridiano notetur punctum latitudinis pro isto loco. Deinde polus elevetur pro latitudine alterius loci, & quadrans affigatur vertici, altera autem ejus extremitas applicetur Horizontis plagæ vel gradui, pro data plaga.

Deinde volvatur globus, donec notatum in meridiano primo punctum ad quadrantem perveniat. Ita arcus quadrantis inter verticem & punctum illud interceptus est distantia quæsitæ duorum locorum: simul habebitur differentia longitudinis in Æquatore, nempe arcus Æquatoris inter æneum & primum meridianum interceptus.

Quomodo per planisphærium, & per calculum tam vulgarem quam Logarithmicum problema sit solvendum, relinquo vivæ Præceptorum informationi, ne multa hic dicam, quæ multis non erunt usui.

PROPOSITIO XI.

Data duorum locorum longitudine, unius latitudine & plaga in qua alter locus ad hunc jacet, invenire distantiam.

Habemus iterum Triangulum sphæricum, cujus

jus latera sunt, distantia locorum à polo & ipsorum locorum mutua distantia, in quo datur unum latus, nempe distantia unius loci à polo, & dantur duo anguli, unus, cujus mensura est differentia longitudinis, alter ex data plaga alterius loci cognoscitur. Ex hisce tribus datis quaeritur latus oppositum angulo differentiae longitudinis. Solutio fieri potest facilis per globum, & per planisphaerium, & per calculum Logarithmicum satis accurata, sicut etiam per calculum vulgarem. Nos ob causam in praecedenti propos. allatam solam methodum, quae globum adhibet, monstrabimus, etsi per planisphaerium facilius sit; sed quae per globum fit, ipsum Triangulum repraesentat.

Primus meridianus assumatur pro meridiano loci, cujus latitudo non datur: Et in Aequatore ab eo meridiano numerentur gradus differentiae longitudinis locorum. Terminus notetur creta, & ad meridianum æneum adducatur: ita hic repraesentabit meridianum alterius loci; numerentur in eo gradus datae latitudinis, & globo immoto polus elevetur pro ea latitudine: Quadrans affigatur vertici, altera extremitas ad plagam Horizontis datam. In hoc globi situ punctum, in quo quadrans secat primum meridianum, repraesentabit alterum locum, & arcus quadrantis interceptus inter verticem & illud punctum est distantia quaesita. Habetur quoque eadem operâ alterius hujus loci latitudo.

PROPOSITIO XII.

Data duorum locorum in uno Meridiano sitarum, sive ejusdem longitudinis distantia, & plagis, in quibus tertius aliquis locus ab illis duobus jacet, invenire hujus tertii ab utroque illorum distantiam.

Habe-

Habemus iterum Triangulum sphæricum, cuius tria latera sunt distantia inter tria illa loca. Et datur unum latus, nempe distantia duorum locorum (quæ in gradus convertenda erit, nisi ita detur) & anguli duo adjacentes dantur, quærentur duo reliqua latera.

Omissis methodis per calculum & planisphærium agentibus, etsi accuratioribus, trademus hic tantum eam, quæ per globum solvit, & ipsam rem magis ob oculos ponit.

Gradus distantia duorum locorum sumantur in æneo meridiano ubicunque libet, & notentur termini: ita ut hi repræsentent loca, quorum distantia datur. Deinde elevetur polus pro unius termini latitudine, quadrans affigatur vertici & applicetur ad plagam datam, in qua alter locus ad locum, qui à termino illo repræsentatur, situs est, & cretâ notetur quadrantis in globo extensio sive vestigium. Dein polus elevetur pro alterius termini latitudine, & quadrans illi termino affigatur, altera extremitas ad alteram plagam datam. Punctum, in quo quadrans secabit arcum cretâ descriptum, repræsentabit locum tertium, unde facile erit ejus distantiam à duobus istis terminis sumere.

C A P V T XXXIV.

De Horizonte sensibili sive visibili.

Horizon sensibilis dicitur peripheria in superficie Telluris, quæ terminat oculi circumducti prospectum, sive quæ terminat partem superficiei, quam oculus circumductus videre potest, sive ex qua radii ad oculum pervenire possunt.

Ejus

Ejus semidiameter, dicitur arcus Telluris maximus inter pedem spectatoris & peripheriam illam interceptus, qui proinde in eam perpendicularis est.

PROPOSITIO I.

Horizontis sensibilis extensio sive semidiameter tam pro diversa oculi altitudine, quam pro diversitate assumptæ semidiametri Telluris varia existit.

Sit Telluris circulus maximus $MPNQ$. T centrum: TP semidiameter, PO altitudo oculi: O sit oculus. Ducantur ex O tangentes ON , OM : & concipiamus radium NO quasi circumduci in superficie Telluris: atque ita describere peripheriam: hæc erit Horizon sensibilis: ejus semidiameter PN , PM : Etenim radii NO , MO sunt ultimi, quia ad O oculum possunt pervenire à superficie Telluris, quam hic perfecte rotundam esse supponimus.

Et manifestum est, si minorem vel majorem assumamus altitudinem PO , quod etiam PN arcus major vel minor sit futurus. Eodem modo si FP ponatur plurium vel pauciorum milliarium, erit quoque PN plurium vel pauciorum milliarium.

Hæ duæ causæ esse videntur, quod Autores antiqui diversas opiniones de magnitudine hujus Horizontis sive extensionis Visus secuti sint. Macrobius enim assignat ei semidiametrum PN stadiorum 180, hoc est $22\frac{1}{2}$ milliarium. Eratosthenes stadiorum 350, quæ faciunt 44 millia. Albertus Magnus, stadiorum 1000, hoc est, milliarium 125. Proclus stadiorum 2000, hoc est milliarium 250. Plurimi assignant 500 stadia, sive nil-

milliaria $62\frac{1}{2}$. Existimo tamen causas diversitatis harum assignationum non esse tantum illas duas, quas dixi, sed etiam ipsorum stadiorum assuam diversitatem, ut ex sequenti Propos. manifestum est.

PROPOSITIO II.

Data statura hominis à pede ad oculum, & semidiametro Telluris datâ, invenire semidiametrum Horizontis sensilis.

PO sit hominis statura: O oculus. TP est semidiameter. ON radius tangens Telluris superficiem, terminat Horizontem sensilem sive aspectum: itaque PN est semidiameter; hujus longitudo quæritur. Addatur PO, ex. gr. quinque pedum ad TP semidiametrum 195 983 00: ita habebitur TO, & in Triangulo NTO præter TO & TN scimus angulum TNO esse rectum, sive 90 gr. Itaque angulus NTO invenitur juxta hanc proportionem:

Ut TO ad TN ita sinus totus ad sinum anguli NOT, cujus complementum ad 90 gr. est angulus NTO sive arcus NP, qui in milliaria potest converti.

COROLLARIUM. Licet itaque cognoscere, si alia atque alia assumatur quantitas semidiametri TN, vel TP, atque alia oculi O altitudo, quanta inde existat variatio Horizontis sensilis.

PROPOSITIO III.

Data oculi altitudine in turri vel monte, invenire distantiam ultimi puncti, ad quod oculus se extendit, sive quod oculus videre potest.

Sit PO data altitudo turris, in qua oculus constitutus circumspicit loca.

In Triangulo itaque NTO rectangulo data se habent eodem modo, ac in præced. problemate. Itaque angulus NTP & arcus NP inveniuntur eodem modo, quo in præcedentis solutione usi fuimus.

PROPOSITIO IV.

Data semidiametro Horizontis sensilis, sive datâ distantia maxima, ex qua oculus videre supponitur, invenire altitudinem oculi.

Idem hoc est cum eo problemate. Datâ maxima distantia, è qua montis vertex videtur, invenire altitudinem montis.

In Triangulo NTO datur angulus rectus TNO , & angulus NTO cognoscitur ex data semidiametro Horizontis sensilis PN : præterea datur semidiameter Telluris TN . Itaque inveniatur TO juxta proportionem hanc:

Ut sinus totus ad secantem anguli NTO ita TN ad TO . Ex qua si subtrahatur TP , residuus numerus indicabit altitudinem quæsitam oculi.

Possumus itaque, suppositâ certâ semidiametri Telluris quantitate, ex assignata à diversis autoribus Horizontis visibilis quantitate, invenire, quantam altitudinem oculi assumerint singuli autores.

PROPOSITIO V.

Datâ oculi altitudine & visa alicujus erectæ magnitudinis, turris, mali navis vel montis altitudine, invenire distantiam hujus ab oculo, hoc est, distantiam navis.

Ex. gr. In Diagrammate præcedentium propositionum, sit PO oculi altitudo, in navi, turri vel littore. FS sit malus navis alterius. Et sit P pun-

punctum & FS navis ita sita, ut in P primo videatur S fastigium mali. Erit itaque punctum S in linea ON, quæ ex oculo O ducitur tangens: Etenim quicquid infra hanc ONX situm est, illud nullos radios directos mittere potest in oculum O: sed debet adeo appropinquare ut vertex vel apex incidat in rectam OX.

Quæritur itaque distantia FP, nempe in qua primus radius ex S potest ad oculum O pervenire.

In Triangulo NOT invenitur angulus NTO ex datis NT, TO & recto angulo TNO. Et in Triangulo itidem rectangulo NTS datur NT, TS & angulus rectus SNT: invenietur angulus NTS: atque ita habebitur totus angulus OTS. cujus mensura est arcus PS, quæsita distantia.

PROPOSITIO VI.

Contra, si data sit oculi altitudo, & distantia, ex qua primò, appropinquantis navis mali, vel turris fastigium cernitur, invenire altitudinem turris vel mali navis.

In Diagrammate præcedentis propositionis: in Triangulo NOT ex datis NT, TO invenitur arcus NP, qui subtractus à noto arcu PF (ex data distantia in minuta conversa) relinquitur arcus FN, sive angulus NTS. Et in Triangulo NTS rectangulo datur NT & N est rectus, ideo invenietur hypotenusæ TS, ex qua si auferatur TF, relinquitur FS altitudo turris quæsita vel mali navis, vel montis alicujus.

PROPOSITIO VII.

Refractio radiorum in aëre auget apparentem Horizontis sensibilem semidiametrum.

Etenim

Etenim diversa est aëris in diversis locis refractionis, crassior, quo terræ magis propinquus. Ideo etsi radius à puncto ultra N sito, ex. gr. ex F non possit directâ viâ ad oculum O pervenire, tamen ita refringi potest in aëre ejus radius, ut refractus sit NO sive tangens Telluris.

CAPUT XXXV.

De Artis Nautica tribus partibus, & in specie de parte prima, nempe Navium structura.

PROPOSITIO I.

ARS sive Scientia Nautica dicitur, quæ docet, quomodo navis ex uno loco ad alium per mare commodissimè & tutissime possit adjuvantibus ventis deduci.

Quoniam itaque in hac disciplina loca Telluris inter se sive ad se invicem comparantur & eorum respectivus situs expenditur, ideo merito ad Respective Geographiæ partem refertur.

Cæterum Artis hujus nobilissimæ & humanæ societati utilissimæ partes tres constitui posse commodè existimo. 1. *πομπικὴ*, sive artem fabricandarum navium, quæ simul motum navis in aquam considerat, vel notum præsupponit. 2. De onere navibus imponendo. 3. Directionem sive gubernationem navis, quæ dicitur Ars Nauticæ sive gubernatio, & in genere dicitur Ars nautica per excellentiam: cui etiam definitio artis Nauticæ omnium maxime competit. Atque hæc pars majori jure ad Geographiam pertinet, quam duæ priores, quæ rectius ad Staticam & Mechanicam referuntur: Directionis autem Ars tota ex Geographia dependet.

PRO-

PROPOSITIO II.

In fabrica navium attendendum est ad hæc.

1. Ut materia sive ligna sumantur, quæ in mari durare possunt diutissime, de quo Vitruvius & alii autores consulantur. Huc etiam pertinet quomodo ligna sint præparanda, & eorum densitas augenda, humor inutilis absumentus (Belgæ vocant, *kalfateren*) igne, pice illinendæ & defendendæ à corruptione. Hæc doctrina sumitur ex Physica, &c.

2. Ut talis figura tribuatur navi, quæ ad celerissimum motum sit aptissima & à levi potentia moveatur: Belgæ hanc proprietatem ita effantur, *het Schip seylt vvel, het is ras in seylen*; item, *het is een kloeck Schip in seylen*.

Huc pertinet diversarum navium figurarum tam antiquarum quam modernarum explicatio, ubi plurima scitu dignissima tam ex antiquitate quam novis inventionibus afferenda essent: præterea ex statica & Phoronomica de diversæ figuræ corporum motu proponenda, inprimis ea quæ divinus Archimedes scripta reliquit ad motum corporum in aqua pertinentia. Verum enim vero, cum pauci fortasse harum rerum studiis delectentur & nos hic tantum epitomen Geographiæ Generalis proponamus, ideo non putavi consultum fore, ista omnia hic explicare: sed sufficere iudicavi, si tantum ipsa rerum capita & partes hujus disciplinæ enumerarem, quod idem etiam de sequentibus monitos volo lectores. Si tamen hunc nostrum laborem juventuri gratum fuisse cognoscemus, secunda in editione omnia ista plenissime explicata dabimus, sicut etiam plurima in præcedentibus hujus Geographiæ capitibus.

Cæterum, ut ad propositum revertamur, maximi momenti est hæc pars doctrinæ nauticæ de apta figura ad celerem & facilem motum, & præcipuam commendationem ab ista naves habent, (præcipue in pugnis navalibus) atque magna navium diversitas in hac proprietate deprehenditur. Pertinet ut dixi hæc pars, sive dependet ex Statica & Phoronomica.

3. In fabrica quoque hac & circa figuram ad illud attendendum est, ut navis facili negotio contra procellas & tempestates defendi possit, vel ne à procellis & ventis facile evertatur: sed de hoc pluribus in parte secunda, ubi de onere navibus imponendo agitur. Hæc quoque pars ex Statica, Phoronomica & spiritali scientia dependet.

4. Consideranda est magnitudo navium: ubi plurima ex antiquitate & ejus cum modernis comparatione. Alexandrinam Architecto Archimede ad jussum Hieronis Siciliæ Regis factam & ad Ptolomæum Egypti regem dono missam, fuisse 12000 doliorum putant: Philopatoris verò navis à Callixeno scribitur habuisse longitudinem 280 cubitorum, latitudinem 38, altitudinem 43. Hodie maximæ sunt naves Hispanorum seu Lusitanorum, quas vocant Caracas, quæ vehunt mille circiter & plures vehes, (*last* vocant Germani, censetur autem vehes doliorum) Belgarum naves non ascendunt 700 vehes.

5. Pertinet inprimis ad navium fabricam, singularum partium navis constructio & cognitio, quæ sunt, Carina, gubernaculum, costæ, prora, puppis, mali, vela, rudentes, anchoræ, &c. quarum omnium non tantum materia, figura, cohærentia, sed etiam pondera sunt explicanda & magnitudo.

6. Ad fabricam quoque navium referri potest cognitio, quomodo pronite occurrendum sit fracturæ vel aliis vitiis navium, ut nimiae aquæ admissionem, &c.

Cui usui & aliis in navigatione inter nautas est faber lignarius, quem vocant *Scheeps-timmerman*.

Hæc de prima Artis Nauticæ parte, nempe *πρωτην* sive fabrica dicta sunt in compendio.

C A P V T XXXVI.

De onere navibus imponendo, sive secunda artis Nautica parte.

PROPOSITIO I.

O Nus navibus imponendum exprimitur per *vehes & dolia*.

Dolium navis censetur 2000 librarum. Vehes doliorum XII, atque adeo librarum 2400.

PROPOSITIO II.

Corpus sive materia, quæ levior est quam aqua, non mergitur omnino in aqua, sed eminet aliqua sua parte: verum si majoris sit ponderis, quam aqua, demergetur ad fundum usque: si denique ejusdem ponderis, servat datum in aqua locum.

Huc pertinet cognitio diversi ponderis diversorum corporum, plumbi, auri, ferri, tritici, ænæ, olei, vini, &c. quorum omnium gravitas ad aquæ gravitatem comparari debet.

COROLL. Ex hoc itaque patet, onus materiæ imponendæ navi, sumtum cum onere ipsius navis debere esse minus quam onus vel gravita-

tem aquæ, cujus moles æqualis sit soliditati vel capacitati totius navis.

PROPOSITIO III.

Quo figura navis magis accedit ad ordinatam, hoc est cubicam æqualitatem longitudinis, latitudinis, & crassitie, eo majus pondus sustinere potest in aqua.

Demonstratio ex statica peti debet.

PROPOSITIO IV.

In onere navibus imponendo ad duo respiciendum est. 1. Ne tantum imponatur onus, ut gravitas ejus cum ipsius navis gravitate sumta fiat æqualis vel major mole aquæ, quæ navis soliditati æqualis est: sed ut minor maneat, non tamen multo minor esse debet. Quod si materia navis imposita sit adeo levis, saburra onus augendum erit. 2. Consideranda est aqua, per quam ducenda est navis, profunditas.

Etenim etsi aquæ gravitas admittat hanc vel istam navis onerisque impositi gravitatem quando hæc minor est, quam aquæ moli navis æqualis gravitas, tamen si aqua habeat minorem profunditatem, quam pars navis infra superficiem aquæ merfa, non concedet fundus navi motum sed illam detinebit. Hæc causa est, quod Hispanicæ naves majus onus vehunt, quam Belgarum, quia mare ad littus & in portibus habent profundius, sicut etiam capaciores naves appellantur ad Zeelandiam, quam ad Hollandiam.

PROPOSITIO V.

Si navis ita onerata sit, ut gravitas seu pondus ejus sit fere æqualis gravitati aqueæ marinæ molis æqualis capacitati navis, non quidem in mari sub-
mer-

mergetur, at ubi in fluvios delata fuerit, fundum petet.

Causa est, quoniam aqua fluviorum est levior quam aqua maris. Si itaque navis onerata gravitas sit ferè æqualis aquæ marinæ molis gravitati, erit ea major, quam gravitas aquæ fluviatilis, & propterea navis in fluvio submergetur, sive ad fundum feretur. Multæ propter hanc causam naves perierunt, quæ nautarum imperitorum culpâ nimis onerata fuerunt, vel non exonerata ante ostia fluviorum. Quanta autem debeat esse ea gravitas, cognoscitur ex proportionem gravitatis aquæ marinæ ad gravitatem aquæ fluviatilis. Vide Propos. VIII.

PROPOSITIO VI.

Corpus quodvis aqua innatans, eam habet gravitatem, quam aquea moles, æqualis parti corporis istius demersæ.

COROLL. Datâ parte navis, quæ in aqua mergitur, licet invenire gravitatem totius navis oneratæ. Etenim aquæ gravitas nota est vel facile est eam invenire: Ex. gr. pes aquæ Cubicus sit 70 librarum. Et sit pars navis demersa 2000 pedum cubicorum. Erit itaque molis aquæ, quæ æqualis est parti navis immerse, gravitas 1400000 librarum. Tanta quoque erit navis onerata gravitas.

PROPOSITIO VII.

In aquis diversæ gravitatis si corpus aliquod constituitur, pars hujus demersa in aqua leviori ad partem demersam in aqua graviore habet eam rationem, quam gravitas aqua gravioris ad gravitatem aqua levioris.

PROPOSITIO VIII.

Navis eam oneris quantitatem commodè vehere plerunque censetur, cujus gravitas aequalis est gravitati dimidiæ aqueæ molis, quam navis continere potest.

Ex.gr. Si navis capax sit doliorum aquæ 500000 (quorum singula censentur 2000 libris) hoc est, si capiat aquam librarum 1000000000 poterit ei commodè imponi onus 250000 doliorum sive 500000000 librarum. Hoc sensu intelligendum est, quando dicunt, naves esse tot doliorum vel tot vehere vehes.

Hispanicæ Caracæ sustinent ad XII vehes: Belgicarum naves Indicæ maximæ non ascendunt 800 vehes.

PROPOSITIO IX.

Quo majus est pondus navis onerata, eo minus à procellis & tempestatibus exagitantur.

Nimirum naves 2000 doliorum non timent eas tempestates, quæ navibus 300 vel etiam 700 doliorum molestæ sunt.

Multo plura hic addenda essent de minuendo vel augendo pondere navium, item de æquilibrio, & variatione ponderis in puppi, prora, medio, & de navibus submersis elevandis, sed pauca ista pro elementis sufficiunt.

CAPUT XXXVII.

De tertia & præcipua Artis Nauticæ parte, Limeneuretica nempe Arte gubernanda navis vel dirigenda, & hujus subdivisione in quatuor partes.

PROPOSITIO I.

A*Rs gubernanda vel dirigenda navis dicitur, quæ docet, in quas plagas navis dirigenda sit in quolibet ejus situ in mari, ut ad locum propositum perveniatur sine periculo.*

Ejus artis partes facio quatuor.

1. Specialem Geographiam, hoc est Cognitionem spatii inter duo loca intercepti & ejus proprietatum. 2. Cognitionem plagarum in singulis locis. 3. Cognitionem lineæ, per quam ex uno loco ad alterum navis ducenda est. Sunt enim inter bina quævis loca infinitæ interceptæ lineæ: hæc pars dicitur Histriodromice. 4. Cognitionem situs singulorum locorum, ad quæ in navigando pervenitur, sive quomodo hæc loca sita sint ad eum locum, in quem navis dirigenda est.

Hæc præcipua est artis gubernandi pars.

PROPOSITIO II.

Cognitio spatii intermediarii comprehendit hæc.

1. Terrarum situs, angulorum procurentias, littorum flexus, promonteriorum, montium, sinuum, pulvinorum, profunditatis aquæ, fretorum, insularum, certarum notarum, cujusvis littoris & partis maris, littoralium terrarum aspectum (Belgæ vocant, *de gedaente van*

et Landt; item, *foo doet hem het Landt op*) aquarionis locorum &c. notitiam, quæ omnia quidem ex speciali Geographia & mappis nauticis, sed omnium facillimè & certissimè ex observatione & frequentibus navigationibus per aliquem aquæ tractum cognoscuntur. Quæ sola causa est, quod naucleri quidam ad hunc locum alii ad alium nave petendum sint aptiores.

2. Ventorum generalium, & specialium priorum & statorum loci cujusvis cognitionem, quæ inprimis necessària est in navigationibus, quæ in Zona Torrida & vicinis locis instituuntur. Hic enim & ventus generalis & in plurimis locis venti anniverfarii, (quos vocari Moufflons, motiones, diximus capite x x) regnant, qui navigationem vel promovent vel impediunt. Mare enim Indicum navigatur anniverfariis istis ventis. De hisce multa attulimus cap. xx sicut etiam de statis procellis & procellarum signis, quæ omnia nauclero nota esse debent. Exemplum damni ex ignorantia hac orti dedimus capite citato.

3. Motuum maris in singulis tractibus conditionem & plagam, in quam nempe plagam fluctus & mare ferantur: abducunt enim secum navem. Illorum motuum diversitatem in multis locis attulimus capite xvii.

Inprimis requiritur notitia fluxus & refluxus maris & tempus sive horæ incrementi & decrementi ad singulos dies, cujus supputationem Belgæ vocant, *de tyd- rekening*. Nisi enim horas istas nauclerus bene noverit, in maximum periculû adducitur sæpe navis, quando littoribus vel pulvinis vicina est, quorum plerique in summo incremento aquæ non impediunt navis transitum, at in decremento plerique. Item cum affluxu navigatio facilior

facilior est ad littora & in ostia fluviorum, contrarium in refluxu animadvertitur. De hujus temporis supputatione diximus pauca in propositione capituli XVII. Sed multo hic accuratior requiritur cognitio in quibusdam casibus, de quibus hoc loco plura dicenda essent, & nautarum methodus explicanda, sed quia breves esse studemus, hac quidem vice omittentur.

C A P V T XXXVIII.

De Cognitione plagarum in singulis locis.

PROPOSITIO I.

In singulis locis cognoscere plagas, nempe Septentrionem, Austrum, Orientem, Occidentem & plagas intermedias. Belgæ vocant, een freeck.

Est hujus cognitio omnium totius artis nauticæ problematum maximè necessaria, cum navis dirigenda sit in aliquam plagam, quæ si ignoretur, non potest fieri directio. Et hujus solius cognitionis defectus veterum navigationem impediebat, atque in hac præcipua est discrepantia inter veterum & modernam navigationem. Etenim veteres non habebant methodum quâ ad quodvis tempus in alto Oceano cognoscere possent, ubi Septentrio, ubi Austus & reliquæ plagæ essent: propterea vasto Oceano non audebant neque poterant se committere: sed tantum littora legebant, ut ita ex aliis signis plagas scirent.

Duplex erat veterum methodus, quæ etiam modernæ navigationi inserviunt, inveniendarum plagarum (est autem problema hoc idem cum eo, invenire lineam meridianam, & Septentrionis atque Austri plagam; ex hisce enim cognitis facile

est reliquas cognoscere.) 1. Per stellas, nimirum nocte urſa, ſive helice & ſtella polaris dicta in extremitate caudæ urſæ minoris (magnæ celebritatis apud antiquitatem) monſtrabat plagam Septentrionis, unde reliquæ omnes inveniuntur, quoniam facie ad Septentrionem converſâ, Oriens eſt ad dextram, Occidens ad ſiniſtram, quarum plagarum linea ad angulos rectos ſecat lineam Septentrionis & Auſtri, & hiſce plagis cardinalibus cognitis facile eſt invenire plagas intermediarias: in quem uſum, ne opus eſſet deſcriptione, paratum habebant circulum cum plagis: cujus lineâ Septentrionali collocatâ ſuper lineam Septentrionalem loci alicujus, reliquæ plagæ uno intuitu cognoscuntur.

Die verò per Orientem Solem vel Occidentem inveſtigabant plagam ſicut monſtravimus capite xxviii.

2. Altera veterum methodus cognoscendarum plagarum erat cognitio ſitus ſive extenſio littorum & unius promontorii ad alterum. Etenim cum hujus extenſionis plaga vel ex mappis vel ex obſervatione & experientia cognita ipsis eſſet, poterant in navigando illis viſis cognoscere plagas reliquas. (Unâ enim plagâ cognitâ, omnes reliquæ inveniuntur.) Ideo veteres non longe recedebant à littoribus, nimirum ut cognitæ plagæ extenſionis littorum beneficio ſcirent plagam, in quam navis dirigenda eſſet. Primâ enim methodo per ſtellas & Solem Orientem vel Occidentem non ſemper uti poterant.

3. Tertia veterum methodus cognitionis plagarum erat curſus navis obſervatus. Etenim è loco aliquo profiſcentes & navem in cognitam
plagam

plagam dirigentes, poterant ex mutatione cursus navis vel flexu scire plagas.

4. Ex hisce patet, præcipuam causam periculose & imperfectæ veterum navigationis fuisse ignorantiam methodi, quâ ubique locorum & in medio atque vasto Oceano cognoscerent plagas, atque adeo illam plagam, in quam navis dirigenda esset. Etenim, ut dixi, methodus per stellas & Solem Orientem vel Occidentem non potest omnibus diebus neque horis singulorum dierum adhiberi: indicium vero ex littorum situ cessat in medio mari & nocte, neque de die satis tutum est.

Tertia methodus ex observato cursu navis non habet locum, ubi navis à furientibus ventis atque tempestatibus hinc inde in varias plagas circumagitur. Atqui in hoc casu præcipua difficultas est.

Hæc de veterum modis inveniendæ lineæ meridianæ & Septentrionis atque Austri monenda fuerunt, quia horum imperfectio causa est periculosa & exigua navigationis veterum, cum nunquam vasto Oceano se committere possent, adeoque illas regiones, quas intrat medius est Oceanus (quarum præcipua tota America) nunquam cognoverint.

Hodie verò methodus cognoscendarum plagarum in omnibus sive inveniendæ lineæ Septentrionis & Austri, facilis est & plana, beneficio admirandæ proprietatis quam Magnes & omnia ferrea, (quæ magneti per aliquot tempus conjuncta vel magnetis polis fricata fuerunt; vel etiam in præparatione situm lineæ meridianæ habuerint) habere deprehensa sunt, nimirum quod Magnetica omnia non impedita vel detenta ab aliis in quovis loco puncta sua dirigant ad easdem circiter plagas. Etenim duo in Magnete puncta opposita

sunt, quorum unum semper & in omnibus locis ad Septentrionem vel vicinam plagam se convertit, alterum ad Austrum, & propterea reliqua quoque Magnetis puncta, reliquas plagas nempe singula singulas respiciunt: verum non omnia considerantur, sed tantum puncta illa duo, quæ dixi ad Septentrionem se convertere & Austrum quæ propterea dicuntur poli Magnetis unus boreus, austrinus alter. Atque eadem virtus magno miraculo communicatur laminæ ferreæ (massæ cujuscvis figuræ) vel acui, sed inversâ & contrariâ naturæ operatione. Etenim extremitas laminæ vel acus, quæ fricatur ad polum Magnetis boreum, vel saltem admoveatur, illa non ad Septentrionem sed ad austrum se convertit, atque illa extremitas, quæ polo australi magnetis fricatur, non ad austrum, sed ad Septentrionem respicit. Dicuntur hæc acus puncta etiam poli. Quam sanè insignem Magnetis virtutem veteribus ignotam fuisse etsi mirum videatur, certum tamen est. Etenim etsi plurimas egregias proprietates habeat Magnes & ferrea Magnete affricata, tamen omnes ad duas quasi species vel ad duo capita referri possunt: una est virtus illa, qua ferrum attrahit: altera, quâ ad Septentrionem & austrum in omni loco dirigit duo superficiei suæ puncta: priorem facultatem non ignorarunt Veteres, sed hanc posteriolem.

Quoniam itaque Magnes hanc proprietatem habet, ideo ejus beneficio facile est invenire in quovis loco terræ, vel maris, ubi sit Septentrio, vel ubi Austus (unde reliquæ plagæ statim innotescunt.) Etenim si in aliquo Magnete notata sint puncta illa Septentrionis & Austri, sive polus Boreus & Austrinus, atque Magnetem hunc habeamus

beamus in navi, ubi in mari versamur, quando plagas scire cupimus, magnes suspensus è fune ut liberè movere seipsum possit, polos suos ad plagam Septentrionis & Austri diriget, atque ita plagas quæritas indicabit. Sed facilior ad usum est acus ferrea, cujus extremitas sit fricata ad polum Austrinum Magnetis. Etenim hujus acus medium si collocetur supra acutum paxillum perpendicularem, ita ut liberè possit se circumvolvere in gyrum, indicabit acus quiescens extremitate suâ una plagam Septentrionalem & alterâ plagam Australem.

Ex hisce facilis est constructio instrumenti nautici.

PROPOSITIO II.

Compassum nauticum componere.

In charta aliqua descriptus circulus dividatur in gradus vel plagas 32, & uno ex istis gradibus vel unâ plagâ assumptâ pro plaga Septentrionali, ascribantur appellationes, *Nord* (cum peculiari signo, lilio nempe) & inventis punctis pro reliquis plagis, *Suyd* / *Ost* / *West* / *Nord ten Desten* / *Nord Dest* / &c. (sicut capite xx eas proposuimus in Diagrammate.) Chartam hanc nautæ vocant *de Rooze*.

Deinde acus Magnetica ita affigatur subtrus chartam, ut medium acus sit infra ipsum centrum, & polus acûs Septentrionalis subjiciatur lineæ chartæ, cui plagam Septentrionalem ascripsimus, porro confecta ita charta cum acu subtrus latente imponatur paxillo æneo acuminato, ut liberam habeat circumrotationem. Ita Index Septentrionis, nempe lilium in quolibet loco

monstrabit vel respiciet plagam Septentrionalem mundi & Telluris, atque indices reliquarum plagarum eodem modo plagas mundi reliquas. Atque hæc est fabrica illius instrumenti, quod nautæ vocant Compassum, alii pyxidem nauticam, nempe ipsum instrumentum cum arcula, in qua asservatur, cujus indicii freti vasto se committunt Oceano atque remotissimas petunt terras, dirigendo navem in illam plagam, quam magnes iusserit: Constructio ista compassi est pro locis, in quibus acus magnetica respicit ipsam Septentrionalem plagam, de aliis locis vide Propos. vi.

PROPOSITIO III.

Plage totidem sunt, quot puncta in Horizontis cuiusvis peripheria, hoc est infinita: nauta autem numerant 16 in parvis navigationibus, triginta duas in mediocribus: sexaginta quatuor in magnis per vastum Oceanum institutis itineribus.

De hac Propositione diximus cap. xx. unde desumi potest accurata hujus explicatio. Lusitani plagas vocant Rumbos, Belgæ, *de Cours*, item *een Strecek*, et si hæc nomina quoque loxodromiæ tribuantur. Quando autem intermedias plagas denominare volunt, faciunt id per divisionem spatii inter duas plagas interjacentis, ex. gr. *een derdepart Zuydlicker*: Vel hoc modo, *vvel sjo Zuydlick*, &c.

PROPOSITIO IV.

Acus magnetica, (sicut ipsius magnetis poli) in paucissimis locis respicit ipsum Septentrionis & Austri plagam, in plerisque locis & fere omnibus declinat aliquantum ab ea versus ortum vel occiduum, & quidem in aquali declinatione, & propter-

ea non indicat veras omnino plagas. Declinatio illa dicitur Chyliboclis.

Etenim ad insularum Azorum sive Flandicarum unam el Corvo dictam, nulla est declinatio, sed ipsam plagam Septentrionalem acus monstrat. Idem in ejus meridiani quibusdam sed non omnibus partibus observatur. In locis ab hac insula versus Orientem sitis usque ad promontorium procurentis Africae dictum Cabo das agulhas (non procul à promontorio Bonae spei) declinat acus à Septentrione versus Orientem in æquali declinatione, nimirum usque ad insulas Tristan de cunha & 70 gradibus remotiorem partem accrescit declinatio, ita ut ibi sit 13 graduum circiter, inde rursus decrescit usque ad loca vicina promontorio das agulhas, ubi nulla est iterum declinatio. Ab eo vero loco versus Indiam incipit declinatio acus à Septentrione versus Occidentem Hamburgi chalyboclis est graduum 9 Amstelodami 5 circiter hodie: nam olim major erat.

Observationes autem testantur declinationem hanc non manere eandem, sed progressu temporis mutari. Londini enim anno 1580 fuit observata 11 gr. 15 min. sed anno 1622 fuit 6 gr. 13 min. atque anno 1634 fuit 4 gr. 6 min. & fuerunt institutæ observationes non tantum novis sed etiam veteribus acubus. Parisiis anno 1642 observata fuit declinatio 3 grad. quæ anno 1610 fuit reperta 8 gr. Idem in aliis locis observatum fuit.

PROPOSITIO V.

Declinationem acus Magnetica à vera Septentrionali plaga invenire in loco quovis.

Inveniatur linea meridiana de cælo, sicut capite xx docuimus variis modis, & innotescet statim

tim declinatio acus Magneticæ. Sed faciliorem methodum monstrabit sequens Propositio pro usu nautico.

PROPOSITIO VI.

Terminos nauticos, quibus in hac declinatione designanda utuntur, & correctionem compassi Magnetici sive nautici, modumque quem nauta usurpant ad declinationem istam in mari inveniendam, explicare.

Belgæ declinationem istam vocant, *de misvissing der Compassen*: declinationem versus Orientem vocant *Nord-Oestering*: declinationem versus Occidentem vocant *Nord-Westering*. Quantitatem declinationis denominant per rumbos, & rumborum partes, *een streeck, een derdendeel van een streeck, &c.*

In compositione compassi sive pyxididis magneticæ corrigitur vel emendatur declinationis vitium seu defectus. Nimirum cognitâ declinatione acus in loco, pro quo paratur instrumentum, non debet acus illa sive lingula Magnetica affigi eæ lineæ chartæ, quæ lilium habet & Septentrionis index esse debet, sed sub ea lineâ, quæ à Septentrionis vel lilii lineâ tot gradibus remouetur, quot inventa habet declinatio Magnetis, versus ortus vel occasus lineam. Sic enim lilium & lineâ Septentrionis monstrabit verum Septentrionem, etsi acus declinet.

Prousu autem nautico vel peregrinationis quoniam in diversis locis diversa est declinatio, ita aptari debet acus ad chartam, ut hæc possit circumduci acu immortâ, atque ejus plagæ lineâ supra acum adduci, quam observata declinatio mon-

monstraverit. Sic idem instrumentum inserviet pro omnibus locis.

Ad inveniendam autem declinationem acūs magneticæ à vera linea Septentrionis & Austri, ita agunt plerique naucleri. Observant plagam compassi, in qua Sol oritur : & vesperi plagam in qua Sol occidit (etsi enim tunc in alio loco sint, tamen parvo à priori absunt intervallo in quo non variatur declinatio.)

Si plagæ hæ compassi æqualiter distant à plaga compassi Septentrionali, tunc indicium est, quod acus in eo loco non habeat declinationem, atque ideo nullâ opus esse correctione, sed acum sub linea Septentrionis debere manere : Si vero plaga Orientis solis longius quam plaga Occidentis Solis distet à plaga Septentrionis, indicio est acum declinare in illo loco à vera linea Septentrionis versus Occidentem : Si denique plaga Orientis Solis minus, quàm Occidentis Solis distet à plaga Septentrionis chartæ, indicio est acum declinare versus Orientem. Quantitas declinationis cognoscitur ita : Sumantur arcus intercepti inter plagam compassi septentrionalem & plagas Orientis Occidentisque Solis, minor arcus à majori auferatur : residui dimidium est declinatio quæsitæ, & tot gradibus linea Septentrionis chartæ removenda est, ab acu vel lingula magnetica.

Methodus hæc duo habet incommoda 1. Sol oriri videtur, cum adhuc 3 4 minutis infra Horizontem est, ex qua discrepantia apparentis & veri ortus, sicut etiam occasus, redundat error in declinationis quantitatem, qui etsi in locis Aequatori vicinis exiguus sit, tamen in locis ab Aequatore aliquantum remotioribus ad duos gradus ascendere

dere potest. 2. Sol sæpe nubibus tectus oritur, quod perpetuum fere est in Zona Torrida.

Aliâ itaque methodo, quæ minus errori obnoxia est, utuntur interdum naucleri, nimirum observant plagam compassi, in qua Sol conspicitur aliquo tempore post ortum, atque ad illud tempus observant altitudinem Solis. Deinde post meridiem expectant, donec ad eandem altitudinem devenisse Solem deprehendant, quò deprehenso observant plagam compassi, in qua Sol tunc conspicitur. Ex hisce plagis sive arcubus inter illas & Septentrionis plagam interceptis invenitur declinatio acus eodem modo quo in priori methodo dictum est.

Tertiam etiam & quartam methodum aliquando adhibent naucleri periti supputationis Trigonometricæ vel Planisphærii Catholici beneficio, quando nimirum per unam observationem statim inquirenda est declinatio acus ad cognoscendas plagas. Etenim vel observant plagam compassi in qua Sol oritur aut occidit, vel observant plagam, in qua Solem ad observatam aliquam altitudinem deprehendunt. Deinde per calculum Trigonometricum vel per Catholicon planisphæricum inveniunt, in qua plaga Sol revera hæreat ad istud tempus ortus vel altitudinis. Differentia hujus plagæ & plagæ observatæ in compasso est ipsa declinatio acus.

PROPOSITIO VII.

Exponere illa, quæ acum magneticam à naturali ejus situ in quovis loco abducunt, adeoque causa sunt, ut non monstret plagas sicut debebat.

Præcipua sunt hæc. 1. paxilli, cui incumbit acus, obtrusa extremitas sive minus acuminata.

2. ma-

2. materia aliqua in foramine, quod recipit paxillum. 3. Si charta sive rosa jaceat extra Horizontalem situm. 4. Aëris aliqua admissio. 5. Ferri viciniæ. Hæc impedimenta veræ ostensionis cavenda sunt.

C A P V T XXXIX.

De Histiodromia sive linea cursus navis.

Difficillima est hæc pars totius Geographiæ, de qua autores ita obscure, plurimi etiam falsa scripserunt, ut lectores præter confusam aliquam imaginationem nihil ex illis scriptis haurire neque ipsam rem intelligere potuerint. Nos, quantum fieri potest, claram & distinctam explicationem asserre conabimur. Requiritur autem in lectore attenta consideratio.

PROPOSITIO I.

Si duo qualibet loca sint sita in uno Meridiano, sive, si ab uno aliquo loco alter locus situs sit versus plagam Septentrionis vel Austri, erit idem locus ab omnibus locis vel punctis quæ interjecta sunt inter duo illa primo assumpta, situs versus eandem plagam Septentrionis aut Austri. Sive, Duorum locorum in uno Meridiano jacentium unus ab altero & ab omnibus intermediis punctis situs est versus eandem plagam Septentrionis vel Austri.

Manifesta est Propositionis veritas, si modo animo rectè concipiatur. Per loca interjecta inter duo puncta vel loca intelliguntur omnia puncta, quæ sunt in arcu intercepto circuli maximi per duo primo assumpta puncta ducti, sive puncta illius arcus qui distantiam brevissimam indicat.

Dica-

Dicatur autem locus is, ad quem alterius loci situs expenditur locus primus; & alter ille, cujus situs expenditur, dicatur secundus. Atque ad facilitatem intelligentiam; locus primus concipiendus est ita, ut quasi in medio sit totius Telluris sive in medio circumjacentium regionum, & quod in meridiano Globi æneo situs sit, & per illum infiniti verticales ducti transeant per circumjacentia loca ad Horizontem, atque ita ad illum expendatur situs reliquorum locorum omnium, sive distantia à meridiano ejus, vel anguli, quos verticales cum meridiano faciunt.

Causa sive ratio Propositionis est, quoniam situm secundi loci ad primum sive plagam denotat angulus quem meridianus primi loci facit cum verticali primi loci ducto per secundum illum locum. Si jam concipiamus omnia puncta interjecta inter duo unius meridiani loca assumpta (hæc enim sunt, quorum unus ad alterum jacet versus plagam Septentrionis vel Austri) manifestum est, quod singulorum meridianus sit idem cum verticali, qui à singulis per alterutrum locum assumptum ducitur, hoc est nullum esse angulum inter meridianum & verticales. Quare locus assumptus ad singula interjecta puncta situs est versus plagam Septentrionis & Austri.

PROPOSITIO II.

Si duo loca qualibet assumantur in Equatore, ad quorum unum sive primum situs alterius sive secundi expendatur, erit secundus à primo situs in plaga Cardinali ortus vel occasus. Et secundus ad omnia interjecta loca situs erit in eadem plaga cardinali: Sive, Duorum locorum in Equatore jacentium unus ab altero & ab omnibus intermediis punctis

punctis situs est versus eandem plagam Orientis vel Occidentis.

Ad faciliorem intelligentiam assumatur quilibet locus in *Æquatore*, & ita constituatur, ut *Horizon* ligneus fiat illius *Horizon*, hoc est ut poli *Telluris* sint in ipso *Horizonte*. Deinde assumatur secundus locus in *Æquatore*, cujus situm sive plagam ad primum consideramus. Manifestum est, quod plaga sit cardinalis Orientalis vel Occidentalis. Est enim *Æquator* ipse verticalis, qui à primo loco ducitur per secundum locum perpendicularis in *Horizontem*, & lineam meridianam ad angulos rectos secat. Idem autem verum est de omnibus interjectis punctis, quæ si adducantur ad meridianum æneum, erit *Horizon* ligneus ipsorum *Horizon*, & *Æquator* erit verticalis eorum primarius, qui meridianam lineam ad angulos rectos secat, & per secundum locum transit. Erit itaque hic secundus ad omnia illa interjecta puncta situs in una eademque plaga Cardinali Orientalis vel Occidentis.

PROPOSITIO III.

Si secundus locus cum primo non sit situs in uno eodemque meridiano, neque ambo sint in Æquatore, non erit secundus locus ad primum & omnia puncta intermedia situs in una eademque plaga, sed in diversis plagis ad diversa puncta.

Ex hac propositione dependet Originis linearum, quam navis describit, cognitio, ideo opera danda lectoribus, ut eam bene intelligant & capiant.

Assumantur in globo quælibet duo loca, quæ neque ambo in *æquatore* neque in uno meridiano jaceant (in hisce enim duabus situs speciebus non varia-

variatur loci secundi plaga ad loca intermedia ex. gr. Amstelodamum pro primo assumatur sive unde iter instituendum vel navigatio, & Pernambuco Brasiliæ pro secundo, sive ad quem navigatio instituitur. Adducatur itaque Amstelodamum ad æneum meridianum, & polus elevetur pro illius latitudine, (sic enim Horizon ligneus repræsentat illius Horizontem) quadrans affigatur vertici & applicetur ad Pernambuco, monstrabit in Horizonte plagam, in qua Pernambuccum jacet ab Amstelodamo. Et arcus inter duo hæc loca interjectus exhibet in globo puncta intermedia. Ostendendum est, quod plagæ, in quibus Pernambuco jacet à singulis hisce punctis, non sint eadem sed diversæ omnes sive quod à singulis hisce intermediis locis Pernambuccum non jaceat versus unam eandemque plagam.

Ad hujus intelligentiam repetendum est ex antecedenti doctrina quod plagam alterius loci ab uno aliquo assumto indicet angulus quem facit hujus assumti loci meridianus cum verticali per alterum locum transeunte, sive arcus Horizontis interceptus inter meridianum & verticalem hunc sicut plagam Pernambuci ab Amstelodamo indicat angulus, quem facit quadrans cum meridiano æneo (qui est ipsius Amstelodami.)

Ad probandam itaque propositionis veritatem assumantur inter Amstelodamum & Pernambuco in arcu quadranti subiecto puncta quotvis, & per ea concipiantur transeuntes meridiani; præstat assumere illa puncta, per quæ in Globo transeunt meridiani (sive circuli longitudinum.) Quoniam itaque quadrans per singula hæc loca & ipsum Pernambuccum transit, denotabit vel repræsentabit singulorum locorum verticalem eum,

in

in quo Pernambuccum jacet ab illis, ideoque anguli, quos facit cum singulorum locorum meridianis, sunt anguli positionis, & indicant plagas, in quibus, vel versus quas Pernambuccum jacet à singulis locis intermediis. Isti vero anguli sunt inæquales, sive diversæ magnitudinis. Itaque plagæ quoque, versus quas à locis illis Pernambuccum jacet, sunt diversæ. Quod verò anguli isti sint inæquales, patet ex ipso aspectu, vel manifestius, si intervallo circini quovis, describas arcus è punctis singulis, & arcus hosce inter meridianos singulos & verticalem interceptos metiaris: vel si confectum habeamus seorsim portionem curvam quæ aptari possit superficiæ Globi: Vel si ipsa loca adducantur ad æneum meridianum & polus pro eorum latitudine elevetur, quadrans verticis applicetur & ad Pernambuccum, atque in eo situ numerentur arcus Horizontis gradus.

COROLLARIUM. Magno itaque vitio laborant Mappæ sive chartæ rectilinéæ & nauticæ, quæ loca ita repræsentant, ut si assumantur duo loca quælibet, ad quorum unum situs seu plaga alterius expendatur, alter hic à locis intermediis in una eademque plaga esse videatur, quod tamen falsum est. Causa vitii est, quos meridianos exhibent parallellos, qui tamen in polis coeunt: Verum nautæ non curant hoc vitium, si modo loxodromiam vel plagam quam in navigatione ab uno loco ad alterum observare debent, referant.

PROPOSITIO IV.

Si ex uno loco Telluris in alium (quæ duo loca non sint in uno meridiano, neque ambo in Equatore) instituendum sit iter vel navis dirigenda & ducenda per viam brevissimam, sive hoc pacto, ut
 nnn-

nunquam recedatur ab arcu verticalis interjecto, in tali itinere vel via singulis momentis mutatur plaga vel alia atque alia fit plaga, in quam iter vel navis dirigitur vel dirigenda est.

Hæc propositio manifesta est ex præcedenti. Sit enim ab Amstelodamo ad Pernambuccum iter instituendum per viam brevissimam, hoc est per arcum quadrantis affixi ad Amstelodamum & transeuntis per Pernambuccum. Quoniam itaque in toto itinere ubique sive in singulis punctis dirigitur iter vel navis versus Pernambuccum, & verò in præcedenti ostensum est, quod diversæ sint plagæ, versus quas ab illis mediis punctis jacet Pernambuccum, ideo manifestum est, quod alia atque alia singulis momentis vel in singulis punctis fiat plaga, in quas iter dirigitur, vel dirigendum est ut Pernambuccum res piciat.

Si vero loca sita sint in uno meridiano, vel si ambo sint in Æquatore, alia est ratio. In illis enim manet eadem itineris plaga Septentrionis vel Austris: in hisce plaga Cardinalis Orientis vel Occidentis.

PROPOSITIO V.

Non potest institui navigatio vel navis ita dirigi, ut singulis momentis in alias atque alias plagas tendat, sed per aliquod ad minimum tempus dum movetur, in unam eandemque specie plagam tendit. Itaque dum ab uno loco ad alium navigandum est, talis via (ex infinitis) vel linea via commodissima est, cujus bina vicina quaque puncta sita sunt in una eademque specie plaga, etsi via hac brevissima non sit.

Etenim in momento nullus fit motus, sed omnis in tempore: itaque neque navis singulis momen-

tis

tis ex una plaga in aliam tendere potest, sed dum movetur, per aliquod saltem tempus versus eam tendit. Præterea nullo modo fieri posset, ut nautæ sciant plagas, in quas dirigenda esset navis, si toties plaga alia esset assumenda. Itaque manifestum est, illam viam inter duo loca esse pro navigatione commodissimam, cujus bina vicina quæque puncta sita sunt in una eademque plaga, ut ita navis continuè in unam plagam dirigi possit & tali directione ad locum destinatum pervenire: Hoc itaque supposito, inquiremus, qualis via inde existat pro navis motu, quæ quidem via, si loca sita sint in uno meridiano, erit ipsius meridiani pars: Si in Æquatore, erit ipsius Æquatoris portio via illa, si in uno parallelo, hujus paralleli portio, si verò in alio circulo præter hosce, erit via illa alia linea, non ille circulus, ut in sequentibus ostendemus.

PROPOSITIO VI.

Si navigatio instituat, vel navis continuè dirigatur ad plagam Septentrionalem vel Australem, (hoc est, si locus à quo & locus ad quem sint in uno Meridiano,) erit linea motus navis ipsius meridiani portio.

Probatur ex propositione prima hujus capituli. Etenim locus, qui petitur, ad omnia intermedia loca, hoc est ad puncta arcus meridiani, situs est in una & eadem Septentrionis vel Austri plaga, ut ibi dictum. Atqui, per præcedentem propositionem, talis via à loco ad locum pro navigatione commoda est & eligenda, cujus bina vicina quæque puncta sita sunt in una eademque plaga. Quare, cum arcus Meridiani talis via sit, erit ille via sive linea motus navis, quam nempe navis motu suo

PROPOSITIO VII.

Si navigatio ab aliquo loco in Aequatore sito instituatur versus plagam Orientalem vel Occidentalem, (hoc est, si navis à loco in Aequatore mota continue dirigatur versus cardinem Orientalem vel Occidentalem) erit linea motus, portio ipsius Aequatoris.

Ostendimus in secunda propositione, si assumantur duo loca in æquatore, primus, à quo, secundus ad quem iter instituitur, quod secundus ab omnibus interjectis punctis hoc est, punctis arcus ipsius Aequatoris situs sit in una eademque plaga Orientali vel Occidentali. Quoniam itaque in hasce plagas navis continue dirigitur, erit arcus Aequatoris interjectus inter duo loca via motus navis. Et quoniam in v propositione supposuimus, talem viam inter duo loca pro navigatione eligendam esse & commodam, cujus nempe bina quæque vicina puncta sint sita in una eademque plaga, erit talis portio illa Aequatoris pro via motus navis eligenda.

PROPOSITIO VIII.

Si navigatio ab aliquo loco extra Aequatorem sito instituatur versus plagam Orientalem vel Occidentalem, ita ut navis continue dirigatur in alterutrum ex istis cardinibus, erit linea motus navis non peripheria verticalis circuli, sed parallelus Aequatoris nempe circuli latitudinis loci, à quo navigatio instituitur.

Quoniam enim navis, dum ab uno meridiano tendit ad vicinum, supponitur eandem respicere

eere plagam, non manebit in verticali sed statim in vicini meridiani punctum aliud, quod nempe sit punctum paralleli *Æquatoris* sive circuli latitudinis loci, unde discessum est. Hujus enim circuli singula puncta talia sunt, ut ductæ ad ea tangentes circuli istius respiciant cardinem ortus atque occasus singulorum istorum punctorum. Propterea earina navis, quoniam continue supponitur dirigi versus istos cardines, tanget continue parallelum hunc in aliquo puncto. Vel, quoniam hujus paralleli bina quæque vicina puncta talia sunt, ut unum ab altero sit situm versus unam eandemque plagam ortus vel occasus, atque navis in hanc plagam dirigi supponitur continue, neque est alia linea in Globo, cujus puncta ita se habeant, ideo sequitur, quod via navis motus sit parallelus iste latitudinis loci.

COROLLARIUM. Ex tribus præcedentibus propositionibus colligimus, si navigatio à quovis Telluris loco instituaturs vel navis continue dirigatur versus plagam aliquam Cardinalem, viam navis fore circularem.

PROPOSITIO IX.

Si navigatio instituenda sit ab uno loco ad alterum in eodem parallelo vel circulo latitudinis situm, erit via navis portio paralleli istius, etsi hac non sit brevissima.

Etenim illa linea pro navigationis via eligitur, per quam ad locum destinatum pervenitur dirigendo continue navem versus unam eandemque plagam, sive cujus lineæ bina vicina quæque puncta sita sint in una eademque plaga. Atqui paralleli circuli bina vicina quæque puncta talia sunt. Quare portio paralleli erit via motus navis.

COROLLARIUM. Triplex itaque situs est locorum, à quorum uno ad alterum cum instituitur navigatio, via navigationis est peripheria circuli, nimirum 1. Si ambo loca in uno meridiano fuerint. 2. Si ambo in Æquatore. 3. Si ambo in uno parallelo vel circulo latitudinis. In duobus prioribus situs speciebus eadem est via vel linea navigationis cum distantia vel via brevissima: Sed in tertio situ via navigationis diversa est à via brevissima. Hæc enim est arcus circuli maximi inter duo loca interjectus. In alio quovis locorum situ via navigationis non potest esse peripheria circuli ut dicimus in propositione sequenti.

PROPOSITIO V.

Si navigatio instituatur à quovis Telluris loco versus plagam quamlibet non Cardinalem, ita ut navis continue in illam plagam dirigatur, via motus hujus navis non est circularis, neque alia curva in seipsam recurrens, sed linea curva solida heliciformis & Tellurem infinitis gyris atque flexibus ambiens.

Concipiamus navem ex aliquo locoolvere. Postquam illa in vicinum meridianum punctum pervenit, dirigitur versus sequentis sive proximi meridiani punctum illud, quod ad prius punctum in eadem situm est plaga, in qua prius hoc ad locum primum, atque ita porro in sequentibus meridianis. Hæc autem puncta meridianorum omnium non faciunt peripheriam circuli, sed curvam solidam helicoidem. Distincta hujus rei explicatio facilius ex ostensione in Globo facta, quam multis verbis haberi potest.

Definitio. Loxodromia dicitur via sive linea motus, quam navis describit, dum à loco aliquo Telluris movetur continue versus plagam unam non Cardinalem.

Hæc

Hæc est nominalis definitio : essentialis vero hujus lineæ definitio, hoc est ipsius naturæ & proprietatum cognitio difficillima est. Neque enim helix est, ut multi putant, neque à magnetis aliqua proprietate dependet, qui illam existere inde dicunt, quod navis sequatur ductum Magnetis, neque composita est ex multarum peripheriarum particulis minutis, ut Nonnius ponit (quod vel ex parallelis circulis manifestum est, qui eodem modo fiunt à motu navis, sicut Loxodromiæ) neque etiam Snellii explicatio plana est, qui dicit quod Loxodromia sit linea *ἑλικοειδής*, in terreni Globi superficie, quam ubique contingens recta lineæ cum omnibus meridianis per contactus ea puncta eductis æquales angulos comprehendit. Non enim explicat Snellius, quomodo concipi debeat talis tangens vel quo modo ducenda sit : & proprie loquendo Loxodromia non habet tangentes rectas lineas, quia est linea solida, cum tangentes ad curvum planas lineas tantum ducantur: in lineis quippe solidis ad quælibet puncta infinitæ tangentes possunt duci. Præterea aliis quoque linearum ductibus convenit ea definitio, cum ad quodvis cujusvis meridiani punctum talis tangens & ducta à vicino Meridiano linea curva concipi possit.

Nostra definitio etiam ita potest proponi : *Loxodromia dicitur linea curva Tellurem multis gyris ambiens cujus quodlibet punctum ab omnibus aliis ejus punctis jacet in una eademque specie plaga: sive, in quâ si sumantur duo puncta, unum punctum ab altero & omnibus intermediis punctis in una plaga jacet : sive à cujus quovis puncto si ducantur circulares arcus ad omnia reliqua puncta, hi arcus faciunt angulos æquales cum Meridianis, qui per singula puncta hæc transeunt.* Hæc definitio est essentialis.

PROPOSITIO XI.

Si navigatio instituaturs à loco aliquo versus alium, qui non in eodem meridiano nec Equatore, nec parallelo cum priori sit situs, & in tota navigatione dirigatur navis continuè in eam plagam, in qua locus designatus situs est à loco discessus, nunquam per istam navigationem pervenietur ad locum designatum sed continue magis magisque ab eo navis removebitur.

Hæc insignis proprietas navigationis magno fuit miraculo nautis, cum primo animadversa esset, quod priori seculo ætate Petri Nonnii Lusitani Mathematici contigit. Ad hunc enim accessit peritus quidam nauclerus, qui cum in Oceano navigasset, & aliquoties, ea loca aditurus, quæ versus ortum vel occasum jacebant, eam navem direxisset continue in talem plagam, nunquam tamen ad destinatum locum pervenerat, sed in eodem parallelo vel etiam aliâ viâ motum navis factum fuisse observaverat. Petiit itaque à Nonnio, ut causam hujus mirabilis phænomeni explicaret. Hæc fuit prima occasio & origo hujus contemplationis. Nonnius enim non multo post duos de hac materia libros edidit: deinde plurimi Mathematici in hoc negotio sive in hac curva linea explicanda laborarunt: denique nautæ eam ad usum nauticum necessariam deprehenderunt: inde Tabulæ constructæ, de quibus postea.

Cæterum causa hujus phænomeni est, quod navis continue directa in eam plagam, in qua locus secundus à primo situs est, non manet in periphæria inter hæc loca intercepta, sed dum ad unum punctum pervenit, quia hic novus est Horizon & alia plaga assumpti, cursus extensio, atque hoc continue

tinuè in sequentibus punctis fit, inde existit linea curva helicoides, in qua dum movetur navis, continuè magis magisque alicubi removetur à loco destinato, alicubi propius accedit.

PROPOSITIO XII.

1. Quando navigatio instituenda est ab uno loco ad alterum in eodem meridiano situm vel versus plagam Septentrionis & Austri, dirigenda est navis continue in hanc plagam Septentrionis vel Austri, sive, eligendus est meridianus pro via navis & pervenietur ad locum alterum.

2. Quando navigatio instituenda est ab uno loco ad alterum, & sint ambo in Æquatore, dirigenda erit navis in eam plagam, in qua alter à primo jacet, hoc est in plagam Orientis vel Occidentis, sive Æquatoris linea assumenda est pro via navis.

3. Quando navigatio instituenda est ab uno loco in alterum, & sint ambo in uno parallelo Æquatoris sita, non est dirigenda navis in eam plagam, in qua alter hic à primo jacet, sive quæ à primo ad alterum extenditur, nunquam enim ad alterum locum perveniret navis, sed infinitis gyris circa Tellurem versus polos circumiret: verum directio continue facienda est in plagam Orientis vel Occidentis: In hanc enim dum tendit navis, describit motu suo parallelum Æquatoris & sic ad locum alterum pervenit.

4. Quando navigatio instituenda est ab uno loco in alterum, quæ neque in uno meridiano, neque ambo in Æquatore, neque in uno parallelo Æquatoris sint, non est dirigenda navis in eam plagam, in qua alter locus à primo jacet, nunquam enim ad locum alterum perveniretur, sed motus

navis describeret Loxodromiam quæ non transiret per alterum locum : verùm directio instituenda est in eam plagam, in quam dum movetur navis, describit Loxodromiam, quæ per alterum locum transeat, sive in eam plagam, cujus angulus cum meridiano æqualis est inclinationi Loxodromiæ, quæ per duo illa loca transit.

Hæc omnia ex præcedentibus Propositionibus sequuntur.

PROPOSITIO XIII.

Loxodromia à quolibet Telluris loco infinita procedunt sive concipi possunt, sicut infiniti verticales, sed numerantur tantum viginti octo circumcirca quemlibet locum, nimirum septem in quadrante inter loci meridianum & loci parallelum, ita ut angulum illum rectum dividant in octo æquales partes atque æquali angulo vicini bini distent. Ipsæ tamen parallelus dicitur octava Loxodromia.

Appellantur autem eisdem nominibus quibus venti seu plagæ. In globis ex centro compassorium, vel etiam aliis meridianorum punctis prodire & circa Tellurem circumvolvi conspiciuntur.

Cæterum in usu nautico Loxodromiæ intermedia denominantur per distantiam à vicinis Loxodromiis, ex. gr. tertiâ parte vel una quarta magis borealis, magis orientalis, &c.

PROPOSITIO XIV.

Loxodromia inter duo loca intercepta est ferè vel ad sensum æqualis hypotenusa Trianguli plani rectanguli, cujus una cathetus æqualis est differentia latitudinis duorum illorum locorum, altera cathetus æqualis est differentia longitudinis locorum sumpta in parallelo, qui medius est inter parallelos locorum illorum.

Vocan-

Vocantur talia Triangula Loxodromica. Sumenda autem sunt pro accurato calculo loca admodum vicina, ut exigua portio interjaceat, nimirum loca, quorum differentia latitudinis est tantum unius scrupuli.

COROLLARIUM. Licet itaque viam Loxodromiæ supputare ab uno loco ad alterum & quidem beneficio sequentis Propositionis.

PROPOSITIO XV.

Partes Loxodromiæ unius interceptæ inter parallelos aequali intervallo distantes, sunt æquales.

Triangula itaque Loxodromica parva, plurima concipiuntur singulis in Loxodromiis, quorum unius Loxodromia si supputetur, habetur quantitas Loxodromiæ ab uno loco in alium, cuius latitudo nota sit.

PROPOSITIO XVI.

Data duorum locorum latitudine & longitudinis differentia invenire Loxodromiam, quæ ab uno loco ad alterum navigatur. Vel, Datis in globo vel Mappa nautica duobus locis invenire plagam, in quam navis dirigenda est, ut ex uno loco ad alterum deducatur.

Hoc est præcipuum vel unicum potius problema totius artis Nauticæ, ad quod omnia reliqua referuntur. Si nulla sit differentia latitudinis, non erit via navis Loxodromia sed parallelus istorum locorum, qui tamen communiter dicitur octava Loxodromia, quoniam eodem modo, ac reliquæ Loxodromiæ, generatur per motum navis, quæ ad cardinem Orientalem vel Occidentalem dirigitur. Si itaque nulla sit differentia latitudinis, dicunt quod octava Loxodromia assumi de-

bōat ; & navem dirigendam esse ad cardinem Orientalem vel Occidentalem in tota navigatione. Et si enim non dirigatur ad locum destinatum, tamen per istam falsam directionem ad locum deducetur navis.

Si nulla est differentia longitudinis, non erit via navis Loxodronica sed portio Meridiani, in quo loca ambo jacent, & assumitur plaga Septentrionis vel Austri pro directione navis.

Si vero loca data sint differentis latitudinis & longitudinis, & per globum operari placeat, notentur in meridiano æneo datæ latitudines, & siquidem unius latitudinis parallelus habeat in se centrum alicujus compassi, sive ex quo eductæ sunt Loxodronica, in globo adducatur hoc ad meridianum sub notato latitudinis gradu: deinde volvatur globus, donec tot gradus Æquatoris transcant per meridianum, quot sunt in longitudinis differentia; & observetur tunc, cujus loxodromiæ ex centro illo eductæ punctum aliquod sit sub altero meridiani notato puncto. Ea loxodromia est quæ sita, & indicat in quam plagam dirigenda sit navis ut ex dato loco in datum locum perveniat: Si nullius loxodromiæ punctum sit sub notato meridiani puncto, loxodromia inter duas vicinas illi puncto intermedia est assumenda.

Si verò in neutro latitudinis parallelo inveniat centrum alicujus compassi, è quo loxodromiæ sint eductæ eligatur aliquo loxodromia, quæ quæ sita propinqua esse videatur, atque adducatur ad unum notatæ latitudinis sive meridiani punctum, & volvatur globus, ut prius, donec longitudinis differentia transeat per meridianum. Hoc facto, si assumptæ loxodromiæ punctum aliquod sit sub altero notato meridiani puncto, erit assumpta loxodromia

dromia ea, quæ quæritur. Si non tale punctum deprehendatur, alia loxodromia est assumenda, atque ut prius agendum, donec talis inveniatur, cujus aliquod punctum deprehendatur, sub noto altero meridiani puncto, vel saltem non longo ab illo removeatur intervallo, eritque loxodromia denominanda à vicinis, inter quas quasi media concipienda est.

In mappis nauticis fit illud hoc modo, sicut unius loci plaga ab alio invenitur, quæ methodus in mappis æqualium latitudinis graduum vitiosa est, in mappis vero inæqualium graduum latitudinis monstrat satis accurate loxodromiam sive plagam in quam navis dirigenda est.

Habent etiam nautæ aliam methodum satis facilem, quâ per solutionem Trianguli plani rectanguli invenitur loxodromia sive navigationis plaga: sed ad illam methodum utuntur Tabulâ, quam vocant crescentis latitudinis, de qua diximus capite xxxii.

C A P V T X L.

De præcipuo Artis Nautica problemate, nempe de inveniendo loco in mappis, ad quem in navigatione facta per aliquod tempus perventum est, sive de invenienda loci istius longitudine & latitudine.

PROPOSITIO I.

Non potest cognosci plaga, in quam navis dirigenda sit, ut ad destinatum locum perveniat, nisi notus sit locus, in quo navis ad illud tempus constituta est.

Diximus in præcedenti capite, quod præcipuum artis Nauticæ problema sit de invenienda plaga, in quam navis dirigenda est. Illam verò inveniri non posse, nisi sciatur locus, ex quo navis dirigenda est, manifestum est. Ideo problematis de loco illo inveniundo solutio est necessaria, imò problema de invenienda plaga reducitur ad hoc.

PROPOSITIO II.

Locum, ad quem navis ad quodvis navigationis tempus pervenit, invenire in mappis.

Hoc est illud opus, quod Belgæ vocant, *het be-
steek in de Pas-kaert*. Singulis enim diebus locum mappæ, ad quem existimant navem pervenisse, notant acicula, ut hac ratione sciant, in quo Telluris loco versentur, & quam in plagam sit navis dirigenda. Utuntur autem triplici methodo ad hoc negotium, prout hoc vel istud rectius observatum esse supponunt.

1. Observato Rhombo in quo navis directâ fuit à loco prioris diei vel loco in mappis dato, sive Rhombo, in quo mota fuit navis & observatâ quantitate confecti interea itineris. Hisce duobus cognitis invenitur locus navis in mappa ita: Sumatur norma, & unum ejus crus applicetur ad locum prioris diei vel unde discessit navis, alterum crus applicetur lineæ vicinæ, quæ plagam observatam vel cursum repræsentat: notetur cretâ punctum cruris, quod loco discessus imminet. Deinde intervallo circini sumantur ex apposita scala confecti itineris milliaria, & pes unus circini imponatur loco discessus, norma verò moveatur in linea plagæ donec alter pes circini attingat notatum normæ punctum. Locus mappæ, qui subje-

subjectus est illi puncto in eo situ normæ est quæsitus, in quo nempe navis tunc versatur.

Naucleri sine norma duobus circinis problema expediunt.

Cæterum, si punctum in mappa accuratius per calculum invenire vel ipsum navis locum in Tellure determinare velis, problema erit hoc : Data unius loci longitudine & latitudine, & datâ plagâ, in qua ad alterum locum navigatum est, cum confecto itinere, invenire hujus alterius loci longitudinem & latitudinem. Hisce enim inventis, licet accuratius in mappa notare locum navis.

2. Observatâ plagâ, in qua ab uno loco noto ad alterum ignotum navigatum est, & observatâ hujus alterius latitudine sive elevatione poli, invenire hujus alterius situm in mappa.

Applicetur rursus unum crus normæ ad plagam observatam loco vicinam, & alterum crus imponatur loco noto (sive unde instituta est navigatio) fiatque ibi in crûre signum creta. Deinde moveatur crus plagæ applicatum, donec notatum alterius cruris punctum incidat in parallelum observatæ latitudinis. Punctum enim incidentiæ est locus quæsitus, nempe locus navis. Si in mappa non sit parallelus latitudinis observatæ, sumantur intervallo circini in laterali linea gradus intercepti, atque simul norma in linea plagæ, & circini pes unus in parallelo isto moveatur, donec alter circini pes & notatum cruris punctum conveniant. Punctum congressus indicat locum navis. Nautæ utuntur duobus circinis.

Si accuratius determinare velis per calculum quæsitum loci in mappa vel Tellure ipsa, problema est hoc : Datâ unius loci longitudine & latitudi-

ne, & plagâ, in qua ad alterum est instituta navigatio, atque hujus alterius datâ latitudine, invenire hujus longitudinem. Etenim longitudine & latitudine datâ, datur ipse locus.

3. Observatâ quantitate confecti itineris ab uno loco noto ad alterum ignotum, & observatâ hujus alterius latitudine, invenire hunc alterum in mappis.

Sumatur circini intervallo quantitas confecti itineris ex apposita scala. Deinde si per latitudinis observatæ gradum in mappa transeat parallelus, ponatur unus pes circini in locum notum, alter pes in istum parallelum. Punctum hoc erit locus quæsitus. Si verò per latitudinis gradum non transeat parallelus, applicetur normæ crus unum vicino parallelo, in altero crure notetur gradus latitudinis, & moveatur norma, donec pes alter circini attingat notatum normæ punctum. Locus mappæ subjectus puncto illi in hoc situ erit quæsitus locus navis.

Si accuratam magis per calculum inventionem cupias, problema erit hoc: Datâ unius loci longitudine & latitudine, & alterius distantia in linea navigationis, atque hujus latitudine, invenire hujus alterius longitudinem. Cognita enim hac, cum latitudo observata sit, habetur ipsius loci situs in mappis & Tellure.

Quarta etiam methodus & quinta inveniendi istius loci datur, nempe in quibus alterius sive quæsitæ loci longitudo observata esse supponitur, ignota autem latitudo. Verum, quoniam raro licet in mari observare longitudinem, ideo methodus hæc tanquam inutilis omittitur. Qui plura hac de re cupit, legat Snellium, Stevinum, Metium & alios, qui prolixè hæc tractarunt.

PROPOSITIO III.

In quam plagam navis moveatur, & in quo Rhombo, conſpicere, eſſe fallacia ſint indicia.

In ſolutionibus prioris Propositionis pro inveniendi loco navis aſſumta fuerunt tanquam nota vel obſervata. 1. Plaga, in quam navis mota fuit, & Rhombus, in quo. 2. Conſecta via. 3. Latitudo loci, in quem perventum eſt. Jam itaq; docendum eſt, quomodo hæc tria in mari obſerventur, ut ad inventionem loci adhiberi poſſint. Si enim hæc non recte obſervata vel nota ſint, neque ipſe locus verus invenietur, ſed falſus. Primò de plagæ curſus navis videamus & Rhombo.

Cognoscunt illam naucleri ex compaſſio nautico ſeu magnetico. Quæ enim compaſſi plagæ ſeu rhombus congruit cum linea conceptæ longitudinis navis, eam in plagam navis moveri ponitur, atque ejus Rhombum deſcribere. Rarius utuntur indicio à plagæ apparentis ortus vel occaſus Solis deſumto, quem ſupputant.

Poſſunt indicia hæc à variis cauſis corrumpi ita ut fallant in indicando Rhombo & plagæ. 1. Si incerta ſit acus magneticæ declinatio in illo loco, atque ideo compaſſi plagæ non indicent veras plagas. 2. Si mare in illo loco fluxum habeat in certam plagam. Abripiet enim navem è Rhombo vero, eſſi navis in eandem plagam dirigatur. Fluxus & refluxus eſt frequens cauſa hujus erroris, & in multis Zonæ Torridis viget motus generalis & perpetuus, in plurimis locis ſtatu à ventis ſtatis. 3. Venti inprimis præcellæ navem è Rhombo itineris remonent eſſi in eadem plagæ tendat. 4. Fluctus maris, qui verſus aliquam plagam feruntur, & navem ſecum ducunt. 5. Non poteſt gubernaculum,
quo

quo navis dirigitur in plagam quamlibet, moveri à nauclero sicut debebat fieri, obstantibus & renitentibus fluctibus maris.

Hæc omnia faciunt ut navis non removeatur, in eo Rhombo, cujus plagam indicat compassus; Quantum autem seducatur ab illo, conjecturâ ex vehementia fluxus maris & plagæ ejus, &c. addiscendum est, sed imperfecta admodum est methodus.

PROPOSITIO IV.

Confectum iter navis in Rhombo conjicere, metiri vel addiscere ad datum tempus à dato loco.

Illud naucleri conjiciunt vel conjecturâ colligunt. 1. Quando observant vel experienciâ sciunt, quantum iter navis tali vento & celeritate conficere soleat. 2. Si in eodem meridiano vel linea vicina navigaverint cum vento aliquo, & observaverint latitudinem loci initio hujus motus & latitudinem loci in sequenti tempore. Differentia enim latitudinum in milliaria conversa indicat confectum iter pro tanto tempore & tali vento. Unde pro dato quovis tempore & tali vento manente colligitur confectum iter. 3. Majori industriâ confectum iter mensurant vel colligunt per naviculam & filum: cujus una extremitas alligata est naviculæ, altera cum globo est in navi ipsa. Etenim immotâ navi conceditur naviculæ navigatio, donec decem vel duodecim fili orgyis remota sit, & observatur tempus interea elapsum. Ex hoc pro quantovis tempore invenitur navis confectum iter.

Hæc indicia confecti itineris multis quoque à causis corrumpuntur vel incerta redduntur, imo ex seipsis incerta sunt, cum meræ sint conjecturæ.

I. Sæpe

1. Sæpe navis minorem vel majorem viam confect, quam conjectura præbet, nempe quia in plerique maris locis fluxus est in certam plagam, vel fluctus volvuntur in aliquam plagam. Si itaque navis in eandem plagam dirigatur, major erit confecta via, quam conjectura præbet, sin in contrarium, minor. 2. quia navis ab aliis causis in alias plagas abripitur & sic per ambages pervenit ad alium locum. 3. Venti variis modis mutantur. 4. Quo navis majorem altitudinem habet, eo tardior videtur ejus motus, etsi tardior non sit.

PROPOSITIO V.

Latitudinem loci, ad quem perventum est, observare.

Observant illam naucleri de cælo per Solem die, & stellas nocte, sicut capite xxiii monstravimus. Instrumentis utuntur tribus, Astrolabio, Radio & Triangulo.

Hujus observatio etsi minus errori obnoxia sit & minus conjecturalis, quam priorum duarum, nempe Rhombi motæ navis & confecti itineris, tamen non raro vitiosa invenitur. 1. quia agitatio navis impedit observationem. 2. quia oculus non recte applicatur instrumentis. 3. quia refraction negligitur.

PROPOSITIO VI.

Ex hisce constat, methodos quibus nautæ utuntur ad inveniendum locum in mappis, ad quem pervenerunt, esse fallaces, quoniam neque de Rhombo & plaga itineris, neque de quantitate confecti itineris, neque de observata latitudine loci possunt esse certi: latitudinis tamen loci, ad quem perventum est, observatio, quia conjecturalis non est & minus errori


errori obnoxia, praesertim aëre & mari tranquillo, potest ab illa fallacia eximi.


Ex illa verò sola non invenitur locus ipse in mappa vel tellure, sed (ut satis superque dictum est capite x x x) requiritur secundum, nempe vel distantia ab altero dato loco (confectum iter) vel plaga aut Rhombus, quo ex dato loco ad illum navigatur, vel denique longitudo loci illius ab hoc. Incertam esse diximus confecti itineris sive distantiae observationem, sicut etiam plagarum & Rhomborum. Ideo ad inveniendam longitudinem loci illius recurritur. Cognita enim loci longitudine & latitudine (cujus inventionem docuimus) invenitur ipse locus in mappis & determinatur in Telluris globo.


Ex quo manifestum est, Artem nauticam ad perfectionem suam requirere solutionem illius Problematis: *Invenire loci, in quo versamur, longitudinem ad quodvis tempus vel quolibet die.* Palma in medio posita est, rapiat, qui potest.

F I N I S.











F 650
V 294g

